

L'histoire du royaume de
Navarre , contenant, de roy
en roy, tout ce qui y est
advenu de remarquable dès
son origine, et [...]

Chappuys, Gabriel (1546?-1613?). Auteur du texte. L'histoire du royaume de Navarre , contenant, de roy en roy, tout ce qui y est advenu de remarquable dès son origine, et depuis que les roys d'Espagne l'ont usurpé, ce qui s'est faict et passé jusques aujourd'hui par ses roys légitimes, servant aussy d'abrégé de l'histoire de ces derniers troubles de France, tirée des meilleurs historiens... et dédiée au roi, par l'un des secrétaires interprettes de Sa Majesté. 1596.

1/ Les contenus accessibles sur le site Gallica sont pour la plupart des reproductions numériques d'oeuvres tombées dans le domaine public provenant des collections de la BnF. Leur réutilisation s'inscrit dans le cadre de la loi n°78-753 du 17 juillet 1978 :

- La réutilisation non commerciale de ces contenus ou dans le cadre d'une publication académique ou scientifique est libre et gratuite dans le respect de la législation en vigueur et notamment du maintien de la mention de source des contenus telle que précisée ci-après : « Source gallica.bnf.fr / Bibliothèque nationale de France » ou « Source gallica.bnf.fr / BnF ».

- La réutilisation commerciale de ces contenus est payante et fait l'objet d'une licence. Est entendue par réutilisation commerciale la revente de contenus sous forme de produits élaborés ou de fourniture de service ou toute autre réutilisation des contenus générant directement des revenus : publication vendue (à l'exception des ouvrages académiques ou scientifiques), une exposition, une production audiovisuelle, un service ou un produit payant, un support à vocation promotionnelle etc.

[CLIQUER ICI POUR ACCÉDER AUX TARIFS ET À LA LICENCE](#)

2/ Les contenus de Gallica sont la propriété de la BnF au sens de l'article L.2112-1 du code général de la propriété des personnes publiques.

3/ Quelques contenus sont soumis à un régime de réutilisation particulier. Il s'agit :

- des reproductions de documents protégés par un droit d'auteur appartenant à un tiers. Ces documents ne peuvent être réutilisés, sauf dans le cadre de la copie privée, sans l'autorisation préalable du titulaire des droits.


- des reproductions de documents conservés dans les bibliothèques ou autres institutions partenaires. Ceux-ci sont signalés par la mention Source gallica.BnF.fr / Bibliothèque municipale de ... (ou autre partenaire). L'utilisateur est invité à s'informer auprès de ces bibliothèques de leurs conditions de réutilisation.

4/ Gallica constitue une base de données, dont la BnF est le producteur, protégée au sens des articles L341-1 et suivants du code de la propriété intellectuelle.

5/ Les présentes conditions d'utilisation des contenus de Gallica sont régies par la loi française. En cas de réutilisation prévue dans un autre pays, il appartient à chaque utilisateur de vérifier la conformité de son projet avec le droit de ce pays.


6/ L'utilisateur s'engage à respecter les présentes conditions d'utilisation ainsi que la législation en vigueur, notamment en matière de propriété intellectuelle. En cas de non respect de ces dispositions, il est notamment passible d'une amende prévue par la loi du 17 juillet 1978.

7/ Pour obtenir un document de Gallica en haute définition, contacter utilisation.commerciale@bnf.fr.




Contraste insuffisant

NF Z 43-120-14



Reliure serrée



Texte détérioré — reliure défectueuse

NF Z 43-120-11

K² 1155
A

~~1155~~

L'HISTOIRE DV ROYAVME DE NAVARRE.

CONTENANT DE ROY EN
Roy, tout ce qui est aduenu de re-
marquable dès son origine:

*Et depuis que les Roys d'Espagne l'ont usurpé: Ce qui s'est fait
& passé iusques aujourd'huy par ses Roys legitimes,
seruant aussi d'abregé de l'Histoire de ces der-
niers troubles de France.*

Tiree des meilleurs Historiens, Latins, François,
Espagnols, & Italiens, & dediee

AV ROY,

Par l'un des Secretaires Interpretes de sa Majesté.



A PARIS,

Chez NICOLAS GILLES, rue saint Jacques aux trois
Couronnes, & à sa boutique au Palais sur le Perron vis
à vis de la gallerie par où on va à la Chancellerie.

M. D. XCXVI.
Avec privilege du Roy.



AV ROY,

SIRE,
Je ne seray repris (sinon de vos ennemis) de dire en ce lieu, que tous les Princes Chrestiens se peuvent proposer les Royales & genereuses actions de vostre Maiesté, comme vn clair & luyfant miroir deuant leurs yeux, qui leur represente & faiet veoir à toute heure, que pour se soumettre toutes choses, ils deuoient obeyr à la raison, & que celuy est tres-digne de commander à plusieurs, qui a la raison pour Royne & Maistresse : moyennant laquelle fortifiée & soutenue de vostre auguste valeur & magnanimité, & assistee d'un petit nombre de vos fideles subiects & seruiteurs, principalement de vostre belliqueuse Noblesse Françoise, vous avez conquesté cest Estat; bien qu'il vous appartienne par la loy fondamentale d'iceluy. Ceste loy est forte &

E P I S T R E.

inuiolable ; & où elle n'auroit lieu en ce Roy-
 aume (ce qui ne peut sans sa totale ruine) qui ne
 void clairement en Vostre diète Maïesté, toutes
 les marques d'un grand Roy, tel que vous estes ?
 la probité, piété & religion Catholique, la pre-
 stance du corps, les particuliers traits du vi-
 sage, la clémence portant la tranquillité, &
 d'autant plus admirable qu'elle est rare es Roys :
 la grace venant du ciel, de pouuoir tout ce que
 vous voulez, & de penser que vous ne pouuez
 que ce qui est du deuoir : de retenir Vostre force
 & defendre les petits de l'injure & violence des
 plus puissans ? de prouoir à toutes choses par
 Vostre prudence, de surmonter tous dangers,
 & de Vostre main liberale r'allier & réunir
 sagement les cœurs & volontez de ceux d'entre
 voz subiects, qui vous estoient contraires. Ce
 qui donne occasion à ceux qui tousiours sont de-
 meurez fermes en Vostre party, comme ils de-
 uoient, ont soustenu Vostre cause avec l'espee &
 la plume, encouru mille dangers & souffert
 grandes pertes & rigueurs pour Vostre service,
 d'esperer un iour quelque recompense, du moins,
 payement des gages & autres appointemens
 qu'il plaist à Vostre diète Maïesté leur donner.
 J'ay c'est honneur d'estre du nombre de ceux qui
 volontiers vous ont seruy par escrit : & pleust

E P I S T R E.

à Dieu que ie fusse de ceux qui vous ont fait paroistre qu'une belle plume n'a moins esté utile & necessaire à l'establissement de vostre Maïesté, qu'une forte & roide lance : pource que ceste-cy a terracé la force; l'autre, les pretextes de vos ennemis. En quoy ie ne veux taxer les bons François que vostre sainte conuersion vous a reünny, mais vos subiects rebelles, espagnolisez, qui en sont encores auourd'huy plus obstinez & endurcis. Or bien que ie n'aye que bien petite part en la loüange que ces excellentes plumes se sont acquis, mais tres-grande en la perte, qu'elles peuuent indifferemment auoir faite pour vostre seruice, ie ne laisseray de supplier en toute reuerence, vostre admirable facilité de donner s'il luy plaist, congé & sauf conduit à cette briefue, mais vraye Histoire de vostre Royaume de Nauarre, (tirée des meilleurs Historiens, Latins & Espagnols, pour continuer le seruice que ie vous doy en ma charge) de se presenter, & prosterner humblement aux pieds de vostre Maïesté, afin que par son fauorable accueil, elle publie plus hardiment, la naissance & origine dudit Royaume, les faits des Roys qui vous y ont precedé, & les gestes & merueilleuses prouesses, de vostre dicté Maïesté, laquelle Dieu vueille tousiours preseruer, pour

E P I S T R E.

*voir sous son ioug gracieux, ce pauvre Royau-
me refleurir & iouyr d'une perdurable paix &
generale tranquillite.*

Vostre tres-humble & tres-obeyssant subiect &
seruiteur C. Secretaire Interprete de vostre Ma-
iesté.



GENEALOGIE DES ROYS

qui ont regné au Royaume de Nauarre, depuis Garcia Ximenes, I. Roy iusques à Henry de Bourbon, III. de ce nom à present regnant.



Garcia Ximenes premier Roy de Nauarre, commença à regner l'an sept cens 16. eut à femme Iniga, de laquelle il eut son fils appelé Garcia Inigo, regna 42. ans, gist à saint Iean de la Penna.

2 Garcia Inigo succeda à son pere, l'an 758. & de sa femme il laissa vn fils nommé Fortun, regna 44. ans, gist à saint Iean de la Penna.

3 Fortun 1. du nom surnommé Garces, commença à regner l'an 802. eut à femme Theude fille de Gallinde Comte d'Arragon, de laquelle il eut Dom Sancho Garces, mourut l'an 816. regna 13. ans, gist à saint Iean de la Penna.

4 Sancho Garces succeda à son pere, & de sa femme il laissa Ximen Inignes, mourut l'an 832. apres auoir regné 17. ans.

5 Ximen Inignes 1. du nom, regna enuiron 8. ans, & mourut l'an 840.

6 Inigo Arista succeda par eslection, aucuns disent qu'il estoit fils de Ximen Inignes, il com-

mença à regner enuiron l'an 840. eut à femme Theude, de laquelle il laissa Garcia Ynignes, regna 27. ans, mourut l'an 867.

7 Garcia Inignes succeda à son Pere, eut à femme D. Sancha d'Arragon, de laquelle il eut D. Fortun, D. Sancho, & vne fille Sancha, regna 18. ans, mourut l'an 885.

8 Fortun succeda à son pere, & de sa femme il n'eut aucuns enfans, il regna 16. ans, & l'an 901. il se rendit moine.

9 Sancho surnommé Abarca 11. du nom, succeda à son frere, eut à femme Roda, de laquelle il eut Garcia Sanches, & 5. filles, à sçauoir Vrraca femme du Roy d'Alphōse 4. du nom Roy d'Ouiedo & Leon la deuxiesme, Marie femme de Seniofrit 5. Comte de Barselonne, la 3. Theresa femme de Ramir Roy d'Ouiedo, la 4. Sancha fut Comtesse de Castille, la dernière fut Blanche D. Sancho, regna 19. ans, & mourut l'an 920. gist au monastere Royal de saint Iean de la Penna.

10 D. Garcia 4. du nom surnommé Sanches succeda à son pere au Royaume de Nauarre, eut à femme D. Theresa, de laquelle il eut Sancho D. Ramir, qui gouerna la contree dicte Vicaria & 3. filles, D. Vrraca, Ermesilda, & Ximena, regna 49. ans, & mourut l'an 969.

11 Sancho 3. du nom succeda à son pere, eut à femme D. Vrraca, de laquelle il laissa D. Garcia, D. Gonçalo & D. Ramir qui mourut auant son pere, regna 24. ans, & mourut l'an 993. gist à S. Sauueur de Leyre.

12 Garcia 5. du nom surnommé le Tremblant succeda à son pere, l'an 993. eut à femme D. Xi-

mena, de laquelle il eut D. Sancho, il regna 73 ans, & mourut l'an 1000. ou environ selon aucuns, il gist à S. Sauueur de Leyre.

13 Sancho 4. du nom succeda à son pere, il fut surnommé le Grand, eut à femme D. Nugua en premieres nopces, de laquelle il eut D. Garcia, apres luy, Roy de Nauarre, D. Ferdand & D. Gonçallo, & d'une concubine il eut D. Ramir, qui fut faict par luy premier Roy d'Arragon, à Fernand son 2. fils, il laissa le Royaume de Castille, il deceda l'an 1034. gist au monastere d'Ogna.

14 Garcia Sanches de Nagera 6. du nom succeda à son pere au Royaume de Nauarre, eut à femme Estiennette, de laquelle il eut Sancho D. Ramir seigneur de Calaora, Fernand Remond & 4. filles, à sçauoir Emesilda, D. Ximena, D. Major, D. Vrraca la derniere, son nom est ignoré, il regna 20. ans, mourut l'an 1054. gist à sainte Marie la Royale à Nagera.

15 Sancho 5. du nom surnommé Garcia succeda à son pere, eut à femme D. Plaisance, de laquelle il eut D. Ramir Sanches, & D. Eluira D. Garcia, & D. Ramir regna 22. ans, mourut l'an 1076. estant tué par son frere Remond, qui espousa Eluira, de laquelle il eut vn fils D. Garcia Ramir, qui depuis vint à la Couronne.

16 Sancho Ramires 6. du nom succeda par election pour gouverner ses cousins qui estoient fort ieunes, eut à femme Felicie, laquelle mourut l'an 1086. laissant D. Pierre & D. Alphonse ses enfans, il regna 18. ans, mourut aagé de 49. ans, l'an 1094. gist à saint Jean de la Penna.

- 17 Pierre 1. du nom succeda à son pere, eut à femme Berthe ou Ignés Italienne, de laquelle il eut Pierre & Isabel, il regna 10. ans & 3. mois, gist à saint Iean de la Penna.
- 18 Alphonse 1. du nom surnommé le Bataillant, succeda à son frere, eut à femme D. Vrraca, de laquelle il n'eut enfans, fut tué par les Maures l'an 1134. gist au monastere de Iesus de Nazareth.
- 19 Garcia Ramires 7. & dernier de ce nom succeda au deffunt Roy, la Couronne luy appartenant de droict & equité, comme estant fils de l'Infant, D. Ramir petit fils de Sancho Garcia, eut à fême D. Marguerite fille du Comte de Perche, de laquelle il eut Sancho, Alphonse, Marguerite, mariée à Guillaume fils de Roger pere & mere d'un autre Guillaume roy de Naples & Sicile en secondes nopces, le Roy D. Garcia espousa D. Vrraca, de laquelle il eut vne fille appelée Sancha, regna 16. ans, gist à la grand' Eglise de Pampelone.
- 20 Sancho 7. du nom surnommé le Sage, succeda à son pere, eut à femme D. Sancha de Castille, de laquelle il eut Sancho Fernand, qui mourut de la cheute d'un cheual ne laissant enfans, & D. Ramir Euesque de Pampelone, Beranguela femme de Richard Roy d'Angleterre, Theresa ou Constance qui deceda vierge, & Blanche femme du Comte Thibaut de Champagne, regna 43. ans & 7. mois, & mourut l'an 1194.
- 21 Sancho 8. du nom surnommé l'Enfermé, succeda à son pere, eut à femme Françoisse fille de Remond, Comte de Thoulouse, de laquelle il eut un fils nommé Fernand, qui mourut courant

- vn Ours, & ainsi mourut le Roy Sancho sans enfans, ayant regné 40. ans, mourut l'an 1234. gist à Ste. Marie de Roncevaux, icy prend la fin la 1. ligne des Roys de Nauarre, laquelle dura 518. ans.
- 22 Thibaut 1. du nom, Comte de Champagne & Brie, & fils de D. Blanche fille de Sancho le Sage, cōme plus proche parēt succeda à la Courōne de Nauarre, eut pour 1. femme vne Dame de Lorraine, de laquelle il n'eut enfans, en 2. nopces il espousa la fille de Guichard seigneur de Beaulieu, de laquelle il eut Blāche femme de Jean Duc de Bretagne, & en 3. nopces il eut Marguerite, de laquelle il laissa Thibaut, Henry, & Leonor, il deceda l'an 1253. gist à la grand' Eglise de Pampelone.
- 23 Thibaut 2. du nom succeda à son pere, eut à femme Alix de France, de laquelle il n'eut enfans, seulement vne fille bastarde, il deceda l'an 1271. ayant regné 17. ans.
- 24 Henry 1. du nom surnommé le Gros, succeda à son frere, il eut à femme Ieanne fille de Robert Comte d'Artois, frere de S. Loys, de laquelle il eut Thibaud, lequel sa nourrisse tua, & Ieanne regna 3. ans 7. mois, mourut l'an 1224. gist à la grand' Eglise de Pampelone, ces Cōtes de Chāpaigne ne regnerent en Nauarre que 40. ans.
- 25 Ieanne de Nauarre succeda à son pere Henry estant aagé de 3. ans, eut pour mary Philippes le Bel, Roy de France, duquel elle eut Loys, Philippes, Charles & Isabel femme d'Edouart 2. Roy d'Angleterre: ladiēte Ieanne mourut l'an 1305. gist aux Cordeliers de Paris.
- 26 Loys 1. du nom, surnommé Hutin succeda à

sa mere au Royaume de Nauarre, & par la mort de son pere à celuy de Frāce, eut pour fēme Marguerite de laquelle il laissa Ieāne qui espousa Philippes d'Eureux, & en 2. nopces il espousa Clemēce fille de Charles 2. Roy de Naples de laquelle il ne laissa enfāns, mourut l'ā 1313. gist à S. Denis.

27 Philippes 1. du nō succeda à son frere, tant au Royaume de Nauarre que de Frāce, eut pour fēme Ieāne fille d'othelin de Bourgōgne, de laquelle il n'eut enfans, mourut l'ā 1321. gist à S. Denys.

28 Charles 1. surnommé le Bel, succeda à ses freres, eut pour premiere femme Blanche, laquelle il repudia, & en 2. nopces il eut Marie fille de l'Empereur Henry de Luxembourg, & pour 3. femme il eut Jeanne fille de Loys de France, Cōte d'Eureux, de laquelle il laissa Blanche, qui fut femme de Philippes Duc d'Orleans, il regna 7. ans & mourut l'an 1328. gist à saint Denys.

29 Philippes Comte d'Eureux 2. du nom succeda à la Couronne de Nāuarre, à cause de Ieāne de Nauarre fille vnique de Loys Hutin, & de laquelle il eut Charles, Philippes qui fut Comte de Lōgueuille, Loys Comte de Beaumont le Roger, Jeanne femme du Vicomte de Rohan, Marie Roynne d'Arragon, Blanche Roynne de France, Agnes femme de Gaston Comte de Foix, mourut l'an 1347. gist à la grand Eglise de pampelone, & Jeanne sa fille mourut en France l'an 1249.

30 Charles 2. du nom surnommé le Mauuais, succeda à son pere, eut pour femme Ieāne de Frāce fille du Roy Iean, de laquelle il laissa Charles, philippes qui fut Comte de Mortaing en Normandie, Marie Comtesse de Denia, Blanche qui

mourut aagée de 13. ans , Ieanne Duchesse de Bretagne, puis apres Royne d'Angleterre, & vn bastard nommé Leonel, il regna 37. ans, & mourut à Panpelone, aagé de 55. ans l'an 1386.

31 Charles 3. du nom furnommé le Noble succeda à son pere, eut pour femme Leonor de Castille, de laquelle il eut Ieanne femme de Jean de Foix, Marie qui mourut fille à rampilone, Blanche qui fut Royne de Sicile & de Nauarre, Beatrix Comtesse de la Marche, femme de Iacques de Bourbon, Isabel aussi decedee fille, & Loys qui moururent ieunes, il regna 39. ans, mourut l'an 1425. aagé de 64. ans, gist en la grand Eglise de rampilone.

32 Blanche 2. du nō succeda à son pere, eut pour mary Ieā Roy d'Arragon, duquel elle eut Charles qui fut Prince de Vienne, femme de Henry Roy de Castille, & Leonor femme de Gaston Comte de Foix, elle mourut l'an 1442. & Jean son mary l'an 1479.

33 Leonor 1. de ce nom, succeda à son pere l'an 1479. eut pour femme Magdeleine de France, lequel mourut d'vn esclat de lance, laissant François Phebus & Catherine : en outre D. Leonor laissa Jean qui fut Vicomte de Narbonne, Pierre qui fut Cardinal, Iacques lequel mourut sans estre marié, D. Marie femme du Marquis de Mōtferrat, Ieanne femme du Comte d'Armignac, Marguerite femme de François dernier, Duc de Bretagne, Leonor femme du Comte de Candale, & encor Leonor qui mourut promise au Duc de Medina Cely, elle deceda l'an 1479. gist en Tafala au Conuent de saint Sebastien de l'ordre

sainct François.

34. François Phebus 1. du nom succeda à ses pere & mere, estât âgé de 12. ans, il regna 4. ans, mourut l'an 1483. sans estre marié, estât empoisonné, gist à l'Escar en l'Eglise cathedrale, & par sa mort la Courōne de nauarre entra en la maisō d'Albret.

35 Catherine succeda à son frere François, eut pour mary Iean d'Albret, duquel elle eut Iean & André qui moururent ieunes, Henry, Charles ou François qui moururent à Naples, Catherine, Anne femme du Côte de Candale, Quiterye, Magdeleine Isabel, & 5. autres qui moururent ieunes, pere du Comte de Rohan en Bretagne, le Roy Iean d'Albret & la Roynie sa femme, moururent l'an 1517. gisent en l'Escar en Bearn.

36 Henry 2. du nom succeda à ses pere & mere, eut à femme Marguerite de France, sœur du Roy François 2. de laquelle il eut Ieanne leur seule heritiere, il deceda l'an 1555.

37 Ieanne d'Albret 7. femme qui regna en Nauarre, succeda à son pere, eut pour mary Antoine de Bourbon Duc de Vendosme, l'an 1558. lequel fut tué deuant Roüan l'an 1562. & ladicte Ieanne l'an 1572. laissant Henry & Catherine.

38 Henry de Bourbō succeda à sa mere au Royaume de Nauarre, & apres la mort de Henry de Valois au Royaume de France, comme son plus proche heritier, a pour femme Marguerite de Valois, de laquelle il n'a eu enfans, Dieu luy doint la grace de recouurer sur l'Espagnol son Royaume de Nauarre, iniustement occupé par ledict Espagnol, nostre ancien ennemy.

Double de l'aduis en-

uoyé au Roy Philippes iij. de ce nom fils de S. Louys, par Messire Eustache de Beau-marchez, ou plustost (comme la forme faict congnoistre) par Messire Robert d'Artois, Gouverneur & Vice-Roy en Nauarre pendant le bas aage de Madame Ieanne de Chāpagne, fille de Héry, & petite fille de Thibault Roys de Nauarre, & Comtes de Chāpagne & Brie, mariée a Philippes le Bel, qui fut aussi Roy de France, 1285.

MON tres-cher Seigneur, la coustume & li usages dou Royaume de Nauarre est telle entre li Roys & li Nauarrois, que quand li Roys vient pour estre Rois nouuiens, li sires ou cil qui tiēt son lieu, mande a un iour certain tel com-

me il plaist au Seigneur, les Prelats de la terre, & les riches hommes, & des cheualiers ce qu'il li semble raisons, (car assez en y vient sans mander) & fait asçauoir as bonnes villes que elles y enuoyent de leurs gens, & qu'ils soyent a Pampelune au iour qu'il mande: & celuy iour ou lendemain, lequel qu'il plaist au Seigneur, il & iuit vont a l'Eglise nostre Dame Cathedrale de Pāpelune, & enqui deuant l'autel, li Navarrois le requierent que il iure sur Saints qu'il les mainterra a leurs bons fuers & a leurs bonnes costumes: & encore li requierent que il iure a tenir la monoye qui est a tel temps sans faire autre dusque a douze ans, & dēqui en auāt n'en face que vne en toute sa vie: & encores li requierent que les forces que ses peres, ou ses ayeuls, ou ses besayens firent a tort, soyent defaiçtes par esgart de preudhes hommes qui y seront mis par li Roys & par aus par accort, c'est asçā-

voir pour li Roys & pour li Prelas, &
pour li Gentilshommes, Cheualiers, Gen-
tilhommes doiuent estre mis qui iurront,
qu'ils feront bien & loyaument: & de-
uant ceuls venront li demandeur & li
procureur li Roy pour mōstrer son droit.
& oyés les raisons & les defenses, li che-
ualiers qui seront mis, & qui orront, iu-
geront: & ce qu'il iugerōt, doit estre tenu,
mais que li Roys ne truisse faulseré. & en
telle moismes maniere, li Roys & cil des
bonnes villes metteront hommes des bon-
nes villes par accort pour ce mesmes fai-
re. Et encores li requierēt, que cil qui sont
fors de Nauarre banni ou autrement, se
ce ne sont iugie pour trahyson, ou s'il ne
sont fors pour fame efforchier, ou pour
briser chemins, & rober, ou pour tres-
grands maux-faiets, soyent rappelez, &
puissent entrer ou Royaume, donnant
pleige & seurté d'amende faire a tous
ceuls qui daus se plaindront: & ce mes-

mes requierent il des prisonniers, se aucuns
en y a. Et quand li Roys a ce oïroye &
ce iuré, il le mettent tuit suz un escu, &
le lieuent haut, & dient tuit, Rois, Rois.
Et ce faict, li Rois s'en va a son hostel &
chascun au sien, & va chascuns l'au il
vent: ne autres feutes, ne autres hom-
mages li Roys ne reçoit des Navarrois, ne
ils plus de luy que dit est. Biē a Sire hom-
mages aucuns en Navarre par conue-
nance, comme li sires de Rade, & li sires
d'Aigremont, & li vicueus de Tartais, li
hoir dan Raymon Guillaume de Caupe-
ne: & ceus reçoit li sires quant il li plaist,
& viennent a luy quand il les mande,
ou dedans quarante iours que il est en Na-
uarre doiuent venir a luy, ne ja n'atten-
mie Sire plus de huit iours, ne tant li
conuiengne a demeurer. Pour toutes ces
choses li Roys Thiebault sires li fils
pourchassa a Rome qu'ils fust ensins &
sacrés & coronnés. Et moult vourroyent

cil dou pays que nostres sires vostre fils
le fust, se il vous plaisoit. Et Sire, ie ay
parlé a l'Euesque de Pampelune, que pour
reuerence de nostre Seigneur vostre fils,
l'on chantera en l'Eglise nostre Dame le
iour qu'il entrera en Pāpelune: & a laide
de Dieu, Sire, & dou grant bienfaict que
vous auez faict & faictes chascun iour
as gens de Nauarre, ie croy pourchassier
que tuit le receuront si honorablement cō-
me plus on pourra: & tuit seront appa-
reilleZ a son commandement sans nulle
maniere de debat, que ie y puisse entēdre.
Et li enfançon qui souloyent estre rebel-
les, si comme vous auez oy plusieurs fois,
sont tout mis a ma volenté. De ces choses
Sire, vous auoys ie mādē ma volenté par
maistre lean mon clerc, & toutes voyes,
ie le vous enuoye ci a dire plus clairemēt:
& vous auise encores, que li Roys Thie-
bault li peres fit deux monnoyes, & ne
iura la monnoye si comme ie enten plus

que a dix ans : & disoit , que si ancesseur
en auoyent deus aussins faites ou plus :
& qu'il en pouuoyt faire apres le ter-
me qu'il auoit iuré tant comme voudroit ,
& ainsi l'auoit encōmancé. Mais li Roys
Thiebault li fils , & li Roys Henry , la
iurerent a xij. ans , & que il n'en feroient
que vne en leur vie. Et des forces deffai-
re , Sire , ie n'entens mie qu'il en y ait
gramment : car presque toutes , ou toutes
sont desfaictes. Et as lettres pendans , Si-
re , que l'en donra as bonnes villes , il con-
uenra bien donner garde qu'il n'y ait nul
point qui puist estre a dampmage dou
Seigneur : & Sire , vous en ayez vostre
conseil , & prenez garde au temps com-
ment il est. car ie vous en auise de ce que
i'en sçai , pour-ce , Sire , que ie n'en puisse
estre reprins ne blasmé : & nostre Sires
par sa grace vous en doint faire le meil-
leur.





HISTOIRE DV

Royaume de Navarre.



LE Royaume de Navarre est vn petit angle de la prouince d'Espagne, qui se confine du costé d'Orient, au Royaume de France, & dans lequel il entre en partie, par les monts Pyrenées: d'Occident au long du fleuve Ebrus, & prouince de Rioia, de Septentriõ, au pays de Guipuzcoa, & du costé de Midy, au Royaume d'Aragon: Ses principales villes sont Pampelone, Estelle, & Tudelle, de la les monts: sainct Iehan de pied de port, deça les môtagnes en la terre des Valcos, avec quelques autres places du Royaume de Navarre, ainsi appelé, selon qu'aucuns ont escrit, par la corruption du nom de la montagne qui est en iceluy, qu'on appelle encor aujourd'huy Nauaca: les autres ob-

Garibay
lib. 21. hist.
Hisp.

seruent que Naua est la planure qui est naturellement au pied des montagnes, & Erria en langage Cantabrien, duquel le peuple vse fort en ce pays, signifie terre, de sorte que ces deux mots, *Naua erria* ioints ensemble signifient terre plaine, d'autant que à la verité, le Royaume est assis au pied des monts Pyrenees, & est bien vray semblable, que du temps des grādes guerres des Maures, Sarasins, en Espagne, les pauvres Chrestiens qui s'estoient retirez aux monts Pyrenees eleurent vn Roy, & avec l'aide & faueur diuine, estans descenduz, reconquirent & recouurerēt ce qu'ils auoyent perdu, leur pais de Planure, qu'ils appelloiēt pour ceste cause, du nom susdit *Naua erria*: & depuis, par la corruption du nom, on l'a nomme Nauarre, nom qui luy demeure encore auiourd'huy. Or ce Royame est vn des plus anciens qui soyēt en Espagne, aussi sont les Roys d'iceluy, fondateurs des Royaumes de Castille, & d'Aragon, mais les enfans ont ruiné leurs fondateurs comme ie diray cy apres.

E S T A N T donc l'Espagne saccagee & pillée, par les Sarrazins d'Aphrique en l'an 716. les Chrestiens qui estoient du costé des monts Pyrenees, Proclamerent, pour

leur Roy de Nauarre (ou ainſi q̄ quelques vns veulēt de Sobrabre) Garcia Ximenes de maiſon illuſtre & valeureux liberateur d'Eſpagne, qui fut ſeigneur d'Amelosa & d'Abarguga places non eſlongnees du lieu où depuis fut fondee la ville d'Estella. Ce Roy ayant aſſemblé pour ſon commēcemēt ſix cēs hōmes aſſeurez & reſolus fit grandes proueſſes. Il eſpouſa vne dame de noble maiſon, nōmee Yniga, de laquelle il eut vn ſils apellé *Garcia Yngo*, & diſent les auteurs Eſpagnols, qu'ayāt pris la ville d'Inſa en Sobrarue il ſ'intitula Roy de ceſte cōtree, & nō de Nauarre, dequoy les Nauarrois indignez, le quiterent & ſe ioignirent au Roy de Ouiedo. Don Alonſe catholique qu'ils appellent Roy de Leon. La premiere occaſion que prindrent les Chreſtiens de ces mōtagnes Nauarroïſes & d'Arragō, de drefſer vn Eſtat entre-eux pour faire teſte aux Mores, fut d'vne aſſēblée, à l'enterrement d'vn Hermite, qui ſe tenoit és lieux ſolitaires pres de Iaca en vne mōtagne appellee Vruel. Ceſt Hermite fut enſeuely au lieu où fut depuis baſty le monaſtere de S. Iehan de la Penna, qui fut premierement vn college de Chanoines. Garcia Ximenes regna quarente & deux


ans, & laissa son petit Royaume à Garcia Ynigo son fils auquel se rangerēt derechef les Nauarrois: Mais Froila Roy d'Ouiedo qui premier de tous en Espagne vſa du nom de Don, regnant à Ouiedo, les contraignit par armes de retourner à son obeissance.

De D. Garcia Ynigo. II. Roy de Nauarre.

DV Royaume naissant de Nauarre succeda Don Garcia Ynigo à son pere Garcia Ximenes, l'an sept cens 50. huiet. Ce Roy estendit ses limites à cause des dissentions qui estoient entre les Maures: car il print sur eux la ville de Pampelone, laquelle nous lisons auoir aussi esté prinſe enuiron ce tēps par Charles le Grand, Roy de France: qui faiet iuger, que allant en Espagne au secours de Ibnaballa, Roitelet de Saragoſſe, il se voulut ſaiſir de Pāpelone ſur le Roy Don garcia Ynigo, pour mieux aſſeurer ſō paſſage, & pour auoir eu differant avec luy, le Roy Charles fit deſmanteler ladite ville. Ce Roy Don Garcia Ynigo estoit Prince guerrier, qui recouura en Nauarre la ville de Pampelone, qui estoit entre les

5
mains des Maures, & print autres places
hors de Nauarre, & chassa les Sarrafins de
celles qu'ils tenoient pres des montagnes,
& se nomma Roy de Pampelone: estoit
bon Roy, & fonda plusieurs Eglises. Ayāt
eu a son seruice Asnar petit fils du Comte
Eude de Guienne luy dōna les terres qui
sont entre les deux riuieres nommees Ar-
ragon, avec tiltre de Comte. Le siege de
ce Cōté estoit Iaca recognoissant la sou-
ueraineté des Roys de Nauarre. Don
Garcia régna quarante & quatre ans, lais-
sant vng fils appellé Fortun, il gist à saint
Iehan de la Penna en la sepulture du Roy
son pere.

Don Fortun III. Roy de Nauarre.

 On Fortun 3. Roy de Nauarre,
premier de ce nom, surnommé
Garces ou Garcia, commença à
regner l'an huit cens deux. Il eut la
guerre non seulement contre les Mau-
res, mais aussi cōtre les François, qui cou-
royent & pilloyent le pais de Nauarre &
d'Arragon aussi bien que celuy des Mahu-
metistes, car les gens de guerre n'ont rien
de saint que ce qui est sterile & sans bu-
Rapacité
des gens de
guerre.

Histoire

Genealogie
de Navarre.

tin : Du temps de ce Roy, fut la fameuse bataille de Roncevaux, où il se trouva avec ses Navarrois, pour le party des Espagnols en l'an 809. Ce Roy fust maryé à Theude, fille de Don Galinde Comte d'Arragon, à cause de laquelle il fut Comte d'Arragon : toutesfois ceste vnion de Arragon & Navarre, n'est pas receue de tous auteurs, ains est faite par aucuns plus tard. De ce mariage sortit l'Infant. Don Sancho Garces, qui succeda au Royaume auquel possible ceste D. Theude fut mariee en secondes nopces : car aucuns auteurs disent, qu'elle auoit esté mariee auparavant a vng Capitaine de Charles le Grand, & du sang d'iceluy, nommé Bernard, autre que celuy qui gouerna Cathelogne : Dom Fortun eut forte guerre avec les Arabes Maures, tant qu'il vescu, & se faisoient perpetuellemēt les vns aux autres tous les dōmages qu'ils pouuoient. La ville de Pampelone desmentee par Charles le Grand, estoit tantost en la puissance des François, tātost des Navarrois, souuent des Maures, auxquels Dom Fortun & les Arragonnois, & autres siēs allies donnerent vne bataille, au lieu dit Olcassa, ou Olaast, en laquelle mourut D. Ximen,

Aznar, Côte d'Arragon, l'an 803. ou environ, frere de Dom Theude : neantmoins les chrestiens la gagnerent, par la vaillance de ceux de Roncal, qui en eurent pour *Prinilegedes habitans de Roncal.* tesmoignage, & marque, le tiltre, & priuilege de Noblesse, dont ils iouissent encore de ce temps. Il regna 13. ans & mourut l'an 815. & dit-on qu'il fut enterré à saint Iehā de la Penna.


De D. Sancho Garces IIII. Roy de Nauarre.

DOm Fortū mort, son fils Don Sācho premier de ce nom, surnomé Garces ou Garcia luy succeda, lequel cōtinua de faire la guerre aux maures, avec heureux succez. Il est fait mention d'une bataille par luy gaignee cōtre les Mahumetistes l'an 821. en vn lieu nommé Ocharan, que autres appellent Ochauierre, en laquelle les habitans du Val de Roncal, qui auoient l'auantgarde, firent si bien leur deuoir, qu'ils meriterent nouuelle confirmation, & validation de leurs priuileges de noblesse, & leur en furent leurs lettres despeschees à Pampelone, au moys de Feburier que l'on comptoit huiet cēs soixante, qui est l'an de la Natiuité de nostre

Seigneur, 822. Ces peuples encor qu'ils soient subiets de Nauarre, leuoient tribut annuel des François leurs voisins, par paches, & paix faicte anciennement. C'est vn lieu du ressort de Sangueffe, situé és mōts Pirenees Nauarrois, confinant à ceux du Val Breton, qui sont de Frāce, desquels ils exigeoient trois vaches chacun an, le treziesme iour de Iuing feste de S. Antoine, avec certaines ceremonies obseruees de lōgue anciēneté. On estime ce tribut estre venu des guerres que ce Roy eut avec les Gascons & François, lesquels indignez de la route de Roncevaux, couroyent ordinairement les terres de Sobrarue, & Nauarre, & ce apres auoir par luy, ou autres siens successeurs, esté viuement repoussez, & contrains de faire la paix, & l'hommage susmentionné, D. Fortun Ximenes Comte d'Arragon mourut combatant vaillamment contre les Maures d'Espagne, ne laissant aucuns hoirs. Don Sancho Garces eut beaucoup a faire à se defendre contre les Maures, & quand il en fut deliuré, il alla à S. Jean de la Penna, où il fit de grands dons, fit bastir la plus grande Eglise, où il fit transporter les corps des saincts Hermites. D. Sancho Garcia mourut en

vne bataille qu'il eut contre les Maures, l'an 832. fut valeureux & sage Roy, qui regna enuiron 17. ans, & fut enterré à S. Iean de la Penna.

De Don Ximeno Yniguez, v. Roy de Nauarre.

 Dom Sancho Garces, Roy de Nauarre succeda vn fils Don Ximen premier de ce nom, surnommé Garcia, & autrement Ynigues, enuiron l'an 832. Des faits de ce Roy & de ces mœurs & qualitez, les histoires sont muettes : mesme plusieurs auteurs passent tous ces premiers Rois de Sobrarue ou Nauarre, & cōmencent seulement l'histoire de ce Royaume à Dō Yngo Arista, qui vint depuis à la Couronne. Ce neantmoins si l'on prend garde à l'année que mourut le Roy Don Sancho Garcez, & à la succession du Roy Don Ynigo Arista son fils, ce Roy Don Ximeno, regna enuiron 8. ans, & mourut l'an 840. & tient on qu'il est enterré au Conuent de S. Sauueur de Leyre, avec D. Nugna sa femme. Du temps de ce Roy commencerent à s'espandre par toute Europe les miracles que faisoit Sainct Iacques en Cōpostelle.

De Don Ynigo premier & seul de ce nom, surnommé Ximenes, & communement appelé Arista VI. Roy de Nauarre.

ENviron l'an 840. vint à la Couronne Don Ynigo Arista, aucuns disent qu'il estoit fils de Don Ximenes susmencionné, autres (entre lesquels est Curile Espagnol Auteur graue) afferment qu'il estoit fils d'un Comte de Bigorre, nommé Simon, & qu'il fut esleu par les suffrages des gés de guerre Roy de Sobrarue ou Nauarre, à cause de ses vertus & prouesses, tât y a peu de certitude en l'antiquité, principalement aux races, & origines. Le nom d'Arista luy fut baillé à raison de sa vehemence, & ardeur à la guerre. Les Espagnols nommēt Arisco vn homme courageux & hardy. Ce fut le premier des Roys de Nauarre qui fut oingt & couronné, à la façon de noz Roys de France: ce qui fut obserué aux autres Roys suiuiās, combiē qu'aucuns croyēt que telle coustume vint seulement en Nauarre, depuis qu'il y eut des Roys de la maison de Chāpagne. Or les François, entre les peuples Chrestiens, ont retenu cela des ceremonies de l'ancienne Loy des Iuifs, par le conseil de

*Premier
Roy de Na-
uarre sacré.*

leurs Euesques. De son temps, & depuis quelques années, le Siege Episcopal de Pampelone estoit en l'Abbaye Royale de saint Sauueur de Leyre, gardant neantmoins le tiltre d'Euesque de Pampelone, ou d'Iruua, a cause des guerres & du degast des Maures. Il a faict long temps la guerre aux Maures, & a reprins sur eux en la plaine de Nauarre, beaucoup de places, & quelques Auteurs tiennent qu'il print sur eux la ville de Pampelone, & qu'il les chassa de toute cette contrée. Du temps de ce Roy, de sa mort, ne de sa Sepulture, non plus que de ses faits ne se trouue grande certitude entre les Auteurs, ny encore de la maison ou famille de sa femme, qu'aucuns nommēt Oncca qui est à dire Yniga autres Theude, tirāt l'vne de Pampelone, l'autre de Biscaye : possible qu'il en eut deux ainsi nommées. Il mourut à ce que disent quelques Auteurs environ l'an 867. & regna enuiron 27. ans.

De Dom Garcia III. de ce nom & VII. Roy de Nauarre, surnommé Ynignez, comme le second.

DOm Garcia surnommé Ynignez 3. de ce nom & 7. Roy de Nauarre succeda à son pere Don Ynigo

*Fable de
D. Sancho.*

Arista, l'an de la natiuité de nostre Seigneur 867. Il vnit le Comté d'Arragon à son Royaume par le mariage de luy & de Dame Vrraca, fille de Don Fortun, dernier Comte, ou de Dame Endregot Galinde, de la mesme maison & famille d'Arragon. De ceste Dame il eut deux fils D. Fortun & D. Sancho Abarca, & vne fille nommée D. Sanctina, ou Sâcha. De la naissance de D. Sancho on escrit ceste fable: c'est assauoir qu'allant le Roy avec sa femme inconsideremēt par les monts de Nayarre, il fut surprins par des coureurs Maures, & tué: & la Royne portée par terre, percée d'un coup de lance Moresque par le ventre, estât enceinte de ce D. Sancho. Quelques heures apres vn Cheualier qu'on appelloit D. Sancho de Gueuara, passant par là, rencontra ce pitieux spectacle, & vid que l'enfant auoit passé vne main par la playe de la mere, & s'efforçoit de sortir: parquoy ce cheualier descendant, couppa, & agrandit la playe, en sorte, qu'il en tira cest enfant vif, & sans aucune blessure: puis l'emporta en sa maison avec bōs tēmoins, où il le fit nourrir cōme il apartenoit, iusques à ce qu'il fut grand, & puis le presenta aux estats du Royaume, & le fit

recongnoistre pour leur Roy legitime: mais comme nous disons, cela ressemble à vne fable, & n'a pas grande authorité. Sa fille D. Sanctina fut mariée au Roy Ordogno 2. fils d'Alphonse le grand Roy d'Ouiedo. Du temps de ce Roy la prouince d'Alaia estoit grande, & portoit tiltre de Royaume de ce temps entre les Maures, possesseurs d'une partie d'icelle, residans au val de Burunda, cōtre lesquels les Roys de Nauarre auoyent cōtinuelles guerres: & notamment de ce temps que viuoit le Roy D. Garcia Yniguez, est faite mētion par les Autheurs, & aussi par les tiltres de l'Eglise de Pampelone, d'une bataille donnée au val d'Inuquerra, entre Abderramē Roy de Cordoue, & les Roys Chrestiens, D. Ordogno & ce Roy Don Garcia, qui fut perduë par les Chrestiens: lors le Roy Abderramen entra en Nauarre, & y print & possēda plusieurs villes & places. En la dicte bataille fut pris l'Euesque de Tuy, nommé Don Hermoge qui ne pouuant supporter la rudesse de la prison à cause de son viel aage, bailla en ostage pour sa rançon vn sien nepueu, appelle Pelage, beau ieune enfant, d'environ quatorze ans, au surplus nourry religieusement, & en gran-

*Pelage S.
enfant cruel
lent et men-
tri.*

de crainte de Dieu. Des qu'il fut entre les mains des Maures, le Roy Almāfor poussé de detestable apetit, en voulut abuser à son plaisir, & l'induire à prendre la Secte de Mahimel à quoy ce saint enfant résista vertueusement. Parquoy le Roy indigné, le fit tuer par diuers tourmens, & ietter dans la riuiera de Guadalqubir, où son corps étant trouué, fut enseuely par les Chrestiens : la memoire duquel, pour sa grande vertu en si bas aage, est digne de durer à iamais. Don Garcia Yniguez n'auoit que 17. ans quand il commença à regner, & de ses tendres ans exerça l'art militaire contre les Maures : fut Prince belliqueux, franc & liberal, & sur tout Catholique & grand seruiteur de Dieu, frequentant les Eglises avec grande deuotiō, mourut au val d'Ayuar, en vne bataille contre les Maures l'an 885. dont fait foy l'escrip- ture de son tombeau, à saint Iean de la Penna. Il regna 18. ans. l'on trouue neant- moins escrit au liure des Reigles de saint Sauueur de Leyre, que le Roy don Fortunio son fils l'enterra en Leyre.

*De Don Fortunio I I. & dernier de ce nom &
VII I. Roy de Navarre.*

LE Sceptre de Nauarre, depuis la mort de D. garcia Ynigniez quoy qu'on ait voulu escrire d'un interregne de plusieurs années, durant que Don Sancho estoit incogneu, nourry en la maison de ceux de Gueuare, vint sans aucune doute à son fils aîné D. Fortuno 2. & dernier du nom l'an 885. au defaut duquel il n'y eut peu auoir interregne, attendu qu'il y auoit vne fille mariée a D. Ordogno 2. du nō Roy d'Ouedo, laquelle indubitablement auroit succédé à son pere: car des-ja commençoit à preualoir le droit de succession, mesmes des femmes, par dessus les electiōs accoustumées d'ancienneté entre ces peuples. De ce Roy Don Fortuno donne tesmoignage vne charte de donnation, qu'il fit au monastere de Leyre l'an 901. Il est escrit és memoires de saint Sauueur de Leyre, que lors que le Roy D. Garcia son pere fut tué, il estoit en Cordoue: par ou il y auroit apparence, que les Maures qui le tuerent n'estoient de la ligue du Roy de Cordoue, mais quelques voleurs, ou factieux selon que ceste nation auoit de coustume de viure en perpetuelle diuision & querelles. Estant Roy de Nauarre D. Fortuno, il fut

Dom. For-
tun se fait
moyne.

pareillement Comte d'Aragon, par succession naturelle. Des-faits de ce Roy n'y a aucune chose notable écrite par les Auteurs, sinon qu'il estoit fort religieux, & cherissoit les moynes auxquels il fit beaucoup de dons puis l'an 901. Se voyant viel & sans enfans meu de deuotion, se rendit moyne au monastere de saint Sauueur de Leyre, laissant à son frere Don Sancho Abarca le Royaume de Nauarre & Comté d'Arragon. Il regna 16. ans, & apres sa mort fut enterré au mesme monastere de saint Sauueur, où il auoit prins l'habit de Religieux.

*De D. Sancho Abarca I I. du nom I X. Roy
de Nauarre.*

DOn Fortū estāt moyne laissa son Royaume à D. Sancho surnomé Abarca, lequel avec la Roync sa fēme D. Toda alla au susdict monastere de Leyre receuoir la benediction de son frere le Roy D. Fortuno duquel ils receurent vne couronne & plusieurs autres riches ioyaux. De la Roync Toda le Roy D. Sancho eut vn fils nommé D. Garcia Sanches, du nom de son ayeul, & de son pere

pere Affébles. Il eut d'elle aussi cinq filles, dont l'aînée nommée D. Vrraca Ximenes, fut femme du Roy D. Alphonse 4. du nom, Roy d'Ouiedo, & Leon. La 2. D. Marie, Contesse de Barcelonne, pour auoir esté mariée à D. Seuiofrid 5. Comte. La 3. D. Theresa qui fut mariée à D. Ramir, Roy d'Ouiedo, frere de D. Alphonse. La 4. D. Sancha, Contesse de Castille secōde femme de D. Fernād Gonçales, & la plus ieune D. Blanche Velasque, le mariage de laquelle est incertain. Ce Roy fut genereux & magnanime, & en perpetuelle guerre contre les Maures, regnans en Alaua, & aux confins de Navarre: les terres desquels il courut & fouragea plusieurs fois, print & demolit plusieurs places, & en rebastit d'autres les particularités desquelles sont incertaines, à cause de la negligence, ou defaut des escriuains de ce temps là: mais en general, on tient qu'il assubietit à sa couronne, & rendit tributaires tous les peuples qui estoient depuis les confins, iusques au mont d'Oca, d'un costé & d'autre, suiuant le Cours d'Ebro iusques à Tudelle, & contre les môtagnes, à Huesca: mesme passant les Pirenées, cōquesta sur les François celle partie de Gas-

Genealogie
de Navarre

re.

Confins an-
ciens de
Navarre.

congue, ou sont les Basques, qui est au pied des Mōtagnes, ou pēdant qu'il estoit occupé, les Maures vindrēt assieger Pampelone, estimans la prendre avant que le Roy D. Sancho la peut venir secourir, mais le contraire aduint: car non seulement les assiegés furent secourus, mais les Maures chassés & poursuivis bien avant en leurs terres, avec grande perte de leurs gens. En ces guerres, illustre fut la vertu & prouesse de ceux de Sobrarue & Ribagorça, spécialement d'un capitaine nommé Centullo. L'histoire d'Espagne fait mention d'une guerre qu'il eut contre le Comte de Castille D. Fernand Gonzales, fondée sur la reparation de plusieurs dōmages faits par les Nauarrois, passans & repassans par le pays de Castille, sous pretexte de faire la guerre aux Maures, avec lesquels D. Sancho fit vne paix au desavantage des Castillans & autres siens voisins: ce qui mescontenta fort vn chacun. Parquoy le Comte D. Fernand demanda restitution des degasts & excés faits en son pays: mais ces messagers furēt renuoyés avec parolles iniurieuses & de mespris, à raison dequoy on vint aux armes, & y eut vne aspre rencontre des deux

armées, à vn lieu nommé Era de Gollanda, où fut respandu beaucoup de sang. Durant ce combat s'estant rencontrés les deux Princes, D. Sancho & D. Fernand, ils coururent l'un sur l'autre de telle animosité, qu'eux & leurs cheuaux estās portés par terre, le Roy D. Sancho se trouua mort du coup de lance, & D. Fernand griuemēt blessé. Ce malheur entendu en l'armée des Nauarrois, les rendit laches & descouragés, si que le chāp demeura aux Castillans. Celle mēme histoire raconte qu'estant venu au secours du Roy D. Sancho, vn Comte de Thoulouse, avec grande armée, desireux de vanger la mort d'iceluy, comme amy & allié qu'il estoit, & s'estant ioint avec le reste des forces de Navarre, fut derechef combatu, vaincu, & mis à mort par D. Fernand, lequel rēdit les corps de ces Princes occis aux leur pour les enseuelir. Or du temps de ceste defaictē, ny de la façon de mort du Roy D. Sancho Abarca, il n'y a grāde assurance en ce qui est narré par ceste histoire generale: on estime toutesfois que ce fut enuiron l'an 920. Il est hors de doute que ce fut vn Prince vaillant & magnanime, & tellemēt renommé, qu'encor de temps il

*Victoire des
Castillāns &
mort du Roy
D. Sancho.
Roy de Na-
uarre.*

ny a si simple femmelette au Royaume de Nauarre, ny autre personne, quoy qu'il ignore les noms des autres Roys, qui ne sache celuy de D. Sancho Abarca, qui n'en parle, & face honorable mention, comme d'un Prince sage & vertueux. Il estendit ainsi que cy deuant nous auons dit, les limites du Royaume de Nauarre, conquestant sur les Maures fort auant de tous costez, mesmes le long du cours de la riuere d'Ebro, dont fait foy vn chasteau prez de Saragosse, qui porte encor de ce temps son nom. Plusieurs autres marques se treuuent de luy en Espagne. Le chasteau de Ses, & celuy d'Arrasate, depuis dit Mō-dragon en Gui Puscoa, à present demolly, sont fabriques d'iceluy. On tient qu'il peupla: & ceignit de murs la ville de Lurgogno en la Rioje. Ample memoire fait de luy vne charte de priuilege, & de donation des lieux de saint Vincent, & Ledea, au monastere de S. Sauueur de Leyre, en datte de l'an 919. par ou plusieurs choses qu'on a escrit de ce Roy ambiguement, sont esclarcies & confirmées. Entre autres il apert par icelle, que de fait il estoit fils de D. Garcia Yniguez, frere de D. Fortuno, & mary de Donna Toda. D.

*Memoire
celebre du
Roy D. San
cho Abarca*

*Bastiments
faits par le
Roy D. San
cho Abarca.*

*Donations
aux Eglises
dudict Roy.*

Sancho frere de D. Ordogno 18. Roy de Leon quita son frere se rebellant contre luy, & se retira vers Don Sancho Abarca pour auoir gens de guerre pour molester son frere. Don Sancho regna 19. ans ou enuiron, & mourut en l'an 920. ou vn peu deuant, fut enterré au monastere Royal de S. Iean de la Pena.

De Don Garcia IIII. du Nom, & X. Roy de Nauarre, surnommé Sanches.



Pres la mort de D. Sancho Abarca il y a erreur aux histoires remarquable en cest endroit, assauoir qui estoit celuy qui re-
gnoit lors en Nauarre. Car les vns tiennent que ce ieune Prince Don Sancho vint à recours au Roy D. Sancho Abarca, son ayeul maternel : autres disent que ce fut à son fils D. Garcia Sancho, ce qui est plus probable, affermans les plus diligens autheurs, que le Roy Don Sancho Abarca de Nauarre mourut des le regne du Roy D. Ramir, pere de ce Roy D. Ordogno, enuiron l'an 920. ayant regné enuiron 20. ans, ou peu moins, sur les siens, & vaillamment repoussé les Maures infidelles, dominans en Alaua, ou ailleurs en

*Sancho Roy
de Leon.*

*Fernand
Comte de
Castille.*

*Vengeance
de femme.*

ses confins : Auquel vint à succeder son
fils D. Garcia Sanches au Royaume de
Nauarre & Comté d'Aragon. Durant le
tēps que D. Fernand demeura en la Court
du Roy D. Sancho, il fut traité particu-
lièrement du mariage du Comte D. Fer-
nād veuf avec D. Sancha, Infante de Na-
uarre fille de D. Sācho Abarca, & sœur de
D. Garcia à lors regnant, & fut mis en a-
uant iceluy mariage par la Roynemere du
Roy D. Sancho Gordo, D. Therosa qui
estoit sœur de D. Sancha, non pour bien
veillance aucune enuers le Comte de Ca-
stille, mais pour le ietter dans les rets quel-
le luy preparoit, en hayne & par vangean-
ce de ce qu'il auoit occis son pere le Roy
D. Sancho Abarca : quoy que c'eust esté
en guerre ouuerte. Partāt leur desir estant
d'attraper le Comte sous feintise & pre-
texte de nopces, le Comte alla en son país
de Castille pour se preparer au futur ma-
riage, mais il trouua que pendant son ab-
sence, les Nauarrois auoyēt couru ses ter-
res, & fait plusieurs actes d'ennemis, dont
il se plaignit premierement par messages,
demendant restablissēmēt de ce qui auoit
esté violé & pillé, mais ce fut en vain : par-
quoy luy qui estoit courageux, se mit in-

continent en armes, & entra dedans les ^{Guerre en-}
 terres de Nauarre, defit ses ennemis, & se ^{tre Castille,}
 fit faire raison. Les pratiques du mariage ^{& Nauar-}
 ne laisserent d'aller en auant, par la solici-
 tation & entremise de la Roynemere de
 Leon, sœur de l'Infante de Nauarre, Don
 Sancha, laquelle auoit comploté avec le
 Roy D. Garcia Sanches son frere, d'atirer
 & atraper le Comte sous l'apast de ces
 nopces, & prendre vengeance de luy à leur
 volonté. Tant fut parlé & allé de part &
 d'autre que le Comte D. Fernand se laissa
 persuader d'aller en Nauarre, pour cōclur-
 re ce mariage: & ayant conuenu avec le
 Roy D. Garcia de Nauarre, que leur en-
 treueue se feroit en vn lieu nommé Cir-
 uegna, acōpagné de cinq Cheualiers seu-
 lemēt. Quand le Comte fut arriué, le Roy
 y comparut avec trente cinq hommes de
 cheual: parquoy le Comte se voyant sur-
 pris, se cuida sauuer dans vn hermitage,
 mais la Saincteté du lieu ne le peut garen-
 tir, qu'il n'y fut assiegé, & contraint de se
 rendre, à cōdition qu'on ne le feroit point
 mourir. Estant prins, il fut enfermē dedās
 vn fort, nommé le Chasteau Vicil, & assés
 durement traité. Quelque temps apres vn
 cheualier Italien, allant en pelerinage à S.

*Le Comte
 D. Fernand
 de Castille
 surpris en
 Nauarre &
 retenu pri-
 sonnier.*

*Femme aussi
legere a ay-
mer qu'à
hayr.*

*Delivrance
du Comte
de Castille.*

Jacques, & entendant que le Comte D. Fernand estoit là detenu prisonnier, eut grand desir de le voir, d'autant qu'il auoit ouy sa renommée, vertus & proüesses en plusieurs endroits, trouua moyen de luy parler. Au partir de là ce cheualier alla trouuer l'Infante D. Sancha qui estoit belle & gracieuse: à laquelle, avec douces remonstrances il flechit le cœur, tellement qu'elle commença à aymer & desirer la liberté du Comte D. Fernand. Ceste Dame poussée de ceste affection, fit en sorte que elle le deliura, & mit hors de prison vne nuit, s'estans donnés foy & promesses de mariage l'un à l'autre, sans le sceu du Roy D. Garcia, & par ensemble prindrent la route de Castille: d'où à peine auoyent ils touché ses limites, qu'ils rencontrerent grand nôbre de gens de guerre. C'estoyēt les subiects du Comte, lesquels aux nouvelles de son emprisonnement s'estoyent assemblés en armes, & ayant dressé vne effigie à la semblance de leur seigneur, auoyent presté le serment deuant icelle, & iuré qu'aucun d'eux ne retourneroit en sa maison que le Comte ne fut deliuré, & quiconque feroit autrement, seroit tenu pour traistre. Ainsi deliberez venoyent en

Navarre, quand ils eurent cest heureuse rencontre du Comte D. Fernand, & de la Comtesse D. Sancha, son espouse. Le Roy D. Garcia Sanches aduerty de la fuite de sa sœur & deliurance du Comte, irrité à merueilles, assemblea son armée, & entra es terres de Castille, où le Comte luy vint au deuant à grand puissance, & luy liura bataille, en laquelle les Navarrois furent deffaits, & le Roy D. Garcia prins prisonnier, ayant esté abatu d'un coup de lance, par le Comte mesme qui l'auoit cherché & rencontré durant le combat. Ainsi fut mené à Burgos, où il demeura treize mois en bonne & seure garde, puis aux prieres de la Comtesse D. Sancha fut mis en liberté, & renuoyé avec honorable compagnie en ses terres de Navarre. Ce neantmoins ne furent terminés leurs differents, car quelques temps apres, estant le Comte D. Fernand allé à Leon, le Roy D. Garcia reuint derechef par les monts d'Oca & Bureua, courir iusques à Burgos avec grand nombre de gens d'armes, & fit tout ce qu'il peut pour persuader à la Comtesse D. Sancha sa sœur de s'en retourner avec luy : mais elle n'y voulut entendre : par ainsi il s'en retourna avec grand butin

*Defaite des
Navarrois
& prinse
du Roy D.
Garcia Sanchés.*

ayant fait fort grand degast par le pays de Castille. Dont aduerty le Comte demâda reparation & mena vne armée en Nauarre, donna bataille aux plaines de Valpure, prez de Nagera & Brion, où eut le Comte entiere satisfactiō du Roy de Nauarre. En ce temps le Roy D. Garcia de Nauarre confirma en ses terres le vœu de Saint Emylian par lettres expediees l'an 934. Galinde Euesque de Pampelone, pour la grâde deuotion qu'il auoit enuers le Conuent de saint Sauueur de Leyre, où auoit esté autresfois le siege Episcopal de Pampelone, donna à l'Abbé & religieux de ce lieu toutes les decimes de l'Archipresbiterat du val d'Onfella par lettres de l'an 938. A la mesme maison & monastere le Roy D. Garcia & sa femme Don Theresa donnerent le villar de la tour, prez Nagera, avec tout son territoire & iurisdiction l'an 943. Ité par autres de l'an 944. le Roy D. Garcia, la Roynie sa femme, & D. Galinde Euesque, qui est là appelé par le Roy son maistre & Seigneur, confirment la donation de la part des decimes appartenans à l'Euesque des lieux la nommés: & en outre autre donation est faicte de tout ce que le Roy de Nauarre pourra

conquerir de là en auant sur les Maures, infidelles & barbares. Mourut enuiron l'an 969. regna 49. ans ou enuiron, & gist au monastere de sainct Sauueur de Leyre qui estoit de ce temps là vne maison plus autorisée que sainct Iean de la Pena, pource que là estoit le siege Episcopal de Pampe-lone. Il laissa de sa femme D. Therefa Don Sancho Garces son successeur, D. Ramir qui gouerna la contrée dicte Vicaria & trois filles assauoir D. Vrraca, Ermesilda, & Ximena.

*De D. Sancho Garces III Du nom & XI.
Roy de Nauarre.*

Ly a peu de certitude des faits des Roys de Nauarre de ce temps, par la negligence des historiens, ou defaut de leurs escrits, ne pouuâs sçauoir vrayement l'année qu'il succeda à son pere, ny que fort peu de ses faits, tant y a qu'il eut a femme vne dame nommée D. Vrraca, de laquelle il eust 3. fils, D. Garcia, D. Gonçalo & D. Ramir, lequel D. Ramir mourut auant son pere, D. Sancho qui donna pour l'ame de son fils au monastere de S. Emylian, la vil-

le de Cardegnas & toutes ses appartenances, renouvela l'accord que son pere auoit fait avec le Roy D. Sancho Garces Roy de Castille l'an 992. & l'an 993. Mourut & regna 24. ans selon que l'on peut recueillir du commencement de son regne, & fut enterre à saint Sauueur de Leyre.

*De Don Garcia dict le Tremblant V. du nom
& XII. Roy de Nauarre.*

DOn Garcia cinquiesme de ce nō, surnommé le Tremblant succeda à son pere au Royaume de Nauarre, l'an 993. Il fut surnommé ainsi, pource que lors qu'il entroit au combat il fremissoit, non pas de peur, mais par vne façon naturelle: ce qui se conuertissoit apres en force & vaillance, depuis qu'il estoit vn peu eschauffé. En certain priuilege & donation de l'an 996. de la ville de Herrero, octroyé par ce Roy D. Garcia au monastere de S. Emylian de la Cogolla, est faicte mention de D. Sancho & de D. Garcia ses nepueux, qui furent enfans de D. Ramir, frere d'iceluy, lequel on nommoit Roy d'Arragon, c'estoit possible le tiltre seulement: iceluy mourut du viuant

du Roy D. Sâcho leur pere, & par la mort
Gonçalo leur autre frere est dit aussi re-
gner en Aragon, avec la Royne, mere de
ces trois Princes, D. Vrraca, & non les en-
fans de D. Ramir, qui cōferme encor plus
que ce n'estoyent que tiltres. Auquel lieu
de saint Emilian, ce Roy D. Garcia, & D.
Ximena sa femme, font autre donation,
de l'eau qui vient du val d'Alençon pour
arrouser leurs champs & vergers, vn iour
& vne nuit de la semaine, auxquels tiltres
est nommée tousiours D. Vrraca : Car la
coustume des Princes estoit en Espagne,
de nommer tousiours par honneur leurs
meres & femmes, és lettres de dons & pri-
uileges qu'ils octroyoyent : pour leur ame
(disent ceux cy) & pour celle de leur pere,
& font ceste donatiō à saint Emylian, le-
quel ils appellent leur patron. Grâde pour
certain estoit la deuotion qu'on auoit en
ce temps à saint Emylian, lequel estoit in-
uoqué pour aduoocat & patron, par les
chrestiens d'Espagne, depuis Burgos, ius-
ques à la mer Occane, duquel sont deux
monasteres, l'un appelle d'enhaut, l'autre
d'embas.

Or le Roy D. Garcia le tremblant es-
pousa D. Ximena, quoy que sur le nom de

*Genealogie
de Navarre.*

ceste Dame y ait grandes diuersités entre les auteurs, de laquelle il eut D. Sancho qui fut Roy apres luy. Il recōmāda la nourriture & instruction d'iceluy à D. Sancho, Abbé de saint Sauueur de Leyre, qui fut puis Eueſque de Pampelone. Les qualitez de ce Roy ſont peu cognues, par faute d'anciens teſmoignages d'histoires: on en celebre vne, qu'on doit à bon droit douter ſ'y c'eſtoit vertu, ou vice, c'eſt qu'il ne ſcauoit refuſer choſe qu'on luy demādaſt.

*Que c'eſt
qu'on doit
apeller libe-
ralité en vn
Prince.*

La liberalité és Princes eſt vertu loüable: mais lors ils meritent d'eſtre tenus pour liberaux, quād ils donnent avec iugemēt, par meſure, à gens dignes & qui le meritēt: autrement on les qualifie prodigues, ignorans, negligens & cōtempteurs de la principale partie de leur offce, qui eſt de bien apliquer les ſalaires & les peines. Des guerres de ſon temps, entrepriſes, ou ſouſtenues par luy, ne ſe trouue non plus me-
moire. Il regna à ce qu'on eſtime, ſept ans,
1000. & ainſi viendroit ſon decés à l'an millie-
me de la Natiuité de noſtre Sauueur, ſon corps fut, ſelon aucuns, enſeueli a ſaint Iean de la Pena, ſelon autres a ſaint Sau-
ueur de Leyre, qui eſtoit lieu plus fameux,
& de plus grande authorité.

De D. Sancho, IIII. du Nom, & XIII. Roy
de Navarre.

AVx estats du Roy Don Garcia le Tremblant, succeda D. Sancho son fils treziesme Roy de Navarre, Prince vertueux, magnanime & illustre, pour la grandeur de ses faits: Au regne duquel l'histoire & principalement la raison des temps, commence d'estre plus claire & certaine, qu'en ceux de ses predecesseurs. Il fut surnommé le grand, principalement pour la grande estendue de ses estats, & puis pour les grâds exploits qu'il executa, tant en paix qu'en guerre, à raison dequoy il s'intitula Empereur des Espagnes, ce que les Gots avec toute leur grandeur & puissance n'auoyent osé faire. Il espousa D. Nugua, fille aînée de D. Sancho Garcia, Comte de Castille, nonobstant que les histoires d'Aragon la nomment autrement, & donnent au Roy encor vne autre premiere femme, D. Caya, Dame d'Ayuaz, laquelle plustot fut concubine, que femme legitime, d'où n'asquit Don Ramir premier Roy d'Arragon. Par ceste Dame D. Nugua, il herita le Comté de Castille, ainsi que nous dirons & d'elle

D. Sancho
Emper. des
Espagnes.

couvrir la verité : Il fist toutesfois mettre la Royne en prison, dans le Chasteau & maison forte de Nagera, puis tirant à part D. Fernand son deuxiesme fils, l'enquit de ce qu'il pouuoit sçauoir de ce faict, à quoy il respondit au Roy son pere ambiguemēt, & en sorte qu'il le mit en plus grand soupçon qu'il n'estoit auparauant. Partant ayāt le Roy fait assemblée des grāds Seigneurs & gens de son conseil, leur proposa ce pitoyable cas, leur demandant aduis de ce qu'il deuoit faire. Eux respondirent, qu'il estoit neccessaire que la Royne se purgeast par contraires preuues, selon les loix, ou bien que suivant la coustume lors en vusage, elle trouuast vn cheualier qui deffendist sa cause avec les armes: autrement qu'il falloit qu'elle souffrit la peine deuë à vn tel forfait, qui estoit d'estre bruslée. La pauvre Dame attendant ce iugement, estoit en continuelles prieres à Dieu, de vouloir declarer son innocence, en quoy sa misericorde l'exauça: car estans des-jà passés quelques iours, sans qu'aucun s'osast presenter pour soustenir qu'elle estoit chaste & honneste Princeesse, D. Ramir, fils Bastard du Roy D. Sancho, se mit en auant, offrant de combattre pour la iustice de la

*Vertu de D.
Ramir, Bastard.*

Royne, contre tous ceux qui vouldroyent
 maintenir l'accusation formée cōtre elle.
 Or ainsi qu'on s'aprestoit pour le combat,
 il se trouua vn Religieux de bonne renō-
 mée, & fort reueré en Nauarre, lequel se
 doutant de la fraude, ou autrement ad-
 uerty, selon sa prudence & bonne diligen-
 ce, vint trouuer les deux enfans Royaux,
 D. Garcia & D. Fernand, & les sceut par
 bonnes & sainctes remontrances si bien
 persuader, qu'ils furent touchés tres viue-
 ment en leur conscience, & commence-
 rent à aprehender l'énormité de leur pe-
 ché, d'auoir osé machiner la mort à celle
 qui estoit instrument de leur vie, contre la
 verité, & pour chose de si peu de comptes:
 parquoy se iettās aux pieds de ce bō per-
 sonnage, confesserent leur faute, deman-
 dans pardon à Dieu, & prians le religieux
 de trouuer quelque remede, afin que ceste
 poursuite cessast, estant l'innocence de la
 Royne cognuë, & qu'ils r'entraissent en la
 grace du Roy. Le religieux les ayant con-
 solés, & donné bonne esperance, alla de
 ce pas vers le Roy, auquel il declara ce
 qu'il auoit fait & entendu de ses enfans:
 le prians au surplus de leur pardonner ceste
 faute, à laquelle leur ieunesse & la colere

*Louable di-
 ligence d'un
 Religieux.*

*Innocence
 de la Royne
 Auérée.*

*Affection
de mere.*

les auoyent induits. Le Roy content à merueilles de l'innocence auerée de la Roynne sa femme, la deliura de prison, & voulut que la grace & faueur que ses enfans pretendoyent recouurer enuers luy, dependist totalement de leur mere, à laquelle il les renuoya: mais elle se monstret vrayemēt mere, oublia le mal qu'elle auoit cause de vouloir à ses deux mal auisés enfans, & leur pardonnant de vraye affectiō, les remit en la bonne grace du Roy. En ce fait se monstra grande la vertu & magnanimité de Don Ramir, laquelle prit plus grand lustre par ceste constance, que luy qui estoit fils d'une autre femme: voulut maintenir l'honneur de sa marastre cōtre les propres enfans d'icelle: en recognoissance dequoy le Roy D. Sancho, faisant de son viuant le partage entre ses enfans, donna apres sa mort le Comté d'Aragon à D. Ramir, avec tiltre Royal. Par ce partage & reglement fait par le Roy D. Sancho, & D. Nugna fut orné D. Fernand de mesme tiltre Royal, à la succession de Castille, qui escheut à icelle par la mort violente de son frere D. Garcia, ainsi qu'il est escrit en l'histoire d'Espagne: estant demeuré Nauarre à l'aîné D. Garcia, & l'anciē Royaume de Sobrarue à D. Gonçalo:

voulans honorer tous leurs enfans de ce nom & tiltre de Roys, qui fut cause de grandes diuisions entre ces freres, lesquelles possible eussent cessé, si vn d'iceux eust este estably Roy souuerain sur les autres, lequel eut maintenu l'estat des Chrestiens en Espagne vni & plus puissant, pour repousser les Maures. Le Roy D. Sancho fut tres-deuotieux & religieux Prince: car outre la confirmation des donations que luy & sa femme firent au monastere de saint Emilian, de la ville de Ventost, anexée à ce lieu par D. Garcia son pere & autres: il fit vœu de donner au Conuent de saint Sauueur de Leyre, le disme du pain, vin, & herbages des lieux qu'il prendroit sur les Maures: & sur ceste esperance dressa l'an 1015. vne armée, pour aller assaillir les Infidelles, par la frontiere de Funes: auquel lieu de Funes il assigna & donna à ce mesme monastere vn vignoble qu'il eut des habitans, pour auoir tué dix Maures en ce temps de paix, pour lesquels ils deuoyent d'amende mille sols, qui estoient autant descus, ou enuiron. Plus en Falses vne possession, maison, vigne & autres appartenances: Et en Nagera les maisons, vignes, & champs du Roy Antrayo, duquel nous

Actes religieux du Roy D. Sancho le grand.

1015.

Conciles en
Navarre.

n'auons aucune certitude qui il fut. Ces choses donna-il au temple de S. Sauueur de Leyre. Or ne sçait on point quel succez eut ceste guerre du Roy D. Sancho contre les Maures, sinon par coniectures, qu'il fut bon, & à son souhait, d'autant qu'il y a en ce temps confirmation de luy, de la noblesse, & exemptions octroyées par ses predecesseurs aux habitans de Roncal. Le zele de ce Prince religieux fut tel qu'il assembla vn Concille a S. Sauueur de Leyre, l'an 1022. Mais le principal decret d'iceluy fut la confirmation des priuileges octroyés à ce monastere par son ayeul D. Sancho, & D. Vrraca son ayeule, & D. Garcia, & D. Ximena ses pere & mere: laquelle confirmation fut souscrite par le Roy & tous ses enfans. L'an apres 1023 fut tenu autre Concille en la ville de Pampelone, auquel lieu l'Euesché fut remise & transferée de S. Sauueur de Leyre, où elle auoit eu son siege quelque temps. La fut aussi enquis des anciens limites de la iurisdiction & ressort de l'Euesché de Pampelone, & les bornes & termes plantés, c'estoit matiere des Concilles de ce temps. Alors estoit Euesque de Pampelone, & Abbé de S. Sauueur D. Sancho le majeur,

qui auoit esté precepteur du Roy, mais il ne peut voir ce remuement, à cause qu'il mourut ceste année, son successeur portât mesme nom que luy, surnommé le mineur, le veid, l'an 1026. qui fut le septiesme Euef- 1026.
que de ceste Eglise en nombre, laquelle on ne sçait bonnement à quel Archeuef- que elle estoit pour lors subiette. De nostre temps c'est a celuy de Saragosse. Or le Roy D. Garcia estant mort le Comté de Castille tomba par heredité à D. Sancho le grand, à cause de D. Nugna sa femme, sœur aînée du deffunt, & fut la premiere ^{Premiere} femme qui ^{qui} succeda en ^{succeda en} Castille.
guerre entre luy, & le Roy D. Bermond de Leon, qui auoit espousé l'autre sœur du Comte, nommée D. Thersa, par laquelle le Roy de Leon fut despouillé du pays qui est depuis la riuere de Cea, iusques aux anciens limites de Castille. Mais par l'entremise des grans seigneurs & bons conseillers de ces deux Princes beaux-freres: ils firent paix & accord ensemble, par lequel mariage fut contracté, entre D. Fernand, second fils du Roy de Navarre, & la sœur du Roy D. Bermond, D. Sancha, qui auoit esté promise au Comte D. Garcia de Castille. Par ce traité, les terres prises par

*Erection du
Comté de
Castille en
Royaume.*

1033.

*Euesques de
Palace Co-
tes de Pernia*

*Mort du
Roy Don
Sancho de
Nauarre.*

le Roy de Nauarre sur celuy de Leon, demureroyent deslors du mariage aux espoux: & fut dict que le Comté de Castille assigné à D. Fernand, prendroit tiltre de Royaume, quand il commenceroit à en iouyr. Ainsi furent bons amis, & maintindrét paix, & concorde entre eux ces deux Estats de Leon & Castille, iusques apres la mort du Roy Don Sancho le grand: lequel enuiron l'an 1033. restaura la ville de Palence, pour opinion qu'il eut d'auoir esté guerri miraculeusement d'une entorse qu'il s'estoit faite à vn bras, en voulant enfermer vn sanglier à la chasse, parmy les ruines de ceste ville, iadis destruite par les Maures, & à l'édroit où auoit esté le temple de saint Antollin. A ce lieu il restitua son siege ancien Episcopal, & luy fit grans dons. Les Euesques de Palence se disent Comtes de Pernia de ce temps. Il fit plusieurs autres donations à diuers monastères, & mesmes par deuotion qu'il auoit aux reliques d'Ouedo, s'achemina ainsi que pelerin celle part: mais par chemin il fut tué, comme on dit, & fut enseuely à Ouedo, & depuis transferé au monastere d'Ogna, l'an 1034. Apres son decez, les enfans prindrent possession des Royaumes

à eux ordonnés par leur pere, & mere, assauoir D. Garcia de celuy de Nauarre, D. Fernand de celuy de Castille, D. Gonçalo de Sobrarue & Ribagorça, & D. Ramir d'Arragon. Ainsi vn grand Estat, à raison duquel D. Sancho s'estoit fait appeller Empereur des Espagnes, & surnommer le grand, fut mis en pieces, au grand dommage de la chrestienté. Des qu'il fut hors d'entre les viuās, le Roy D. Bermond son beau-frere, ne voulut tenir les conditions portées par le traicté de mariage d'entre sa sœur & D. Fernand, nouveau Roy de Castille, ains se mit en effort de luy rauer les terres confinantes à la riuere de Cea, conquestées par D. Sancho le grand, & qu'il auoit despuis laissées à D. Fernand, & à la femme d'iceluy, sa sœur en mariage faisant. Entendant Don Fernand qu'il se mettoit en armes à son dommage, se mit en deffense de sa part, & eut secours de son frere D. Garcia, Roy de Nauarre, de grand nombre de gens de guerre, qu'il conduisit luy mesme en personne, à vn lieu nommé Liantada, les deux armées ennemies se rencontrerent sur la riuere de Carion, & cōbattirent furieusement entre elles, avec grand meurtre d'vne part & d'autre : mais

*Erection de
Royaumes
l'an 1035.*

*Union de
Leon & Ca
stille. 1037.*

Don Bermondy perdit la vie, percé d'un coup de lance: par la mort duquel, d'autant qu'il n'auoit aucuns legitimes enfans, la succession de Leon, & Ouiedo fut deuolue à D. Fernand, mary de Don Sancha, sœur du deffunt. Ce fut l'an mil trente & sept, que les deux Estats de Leon & Castille furent vnis. D. Bermond fut enterré à Leon, avec sa femme en grand honneur & magnificēce, laquelle D. Theresia estoit decedée quelque temps auparauant. Ainsi il finit pour auoir esté perfide & ne vouloir tenir sa promesse à sa propre sœur, laquelle il congnoissoit estre son heritiere, comme nous auons dit cy dessus assez amplement.

*De Don Garcia Sanchez de Nagera V. I. du
Nom, & XIII. Roy de Nauarre.*

DOn Garcia sixiesme du nom, surnommé Sanchez & communement appelé de Nagera, heritier du Royaume de Nauarre, vint à la Couronne ainsi que les autres freres, l'an mil trente quatre, viuant encor sa mere, la Roynie D. Nugna: Il fut surnommé Sanchez de Nagera, à cause qu'en ce lieu il fut

nourry, & fit sa demeure iusques à la mort, voire mesme y fut enterré. Les partages faits par le Roy D. Sancho le grand leur pere, luy furent grandement preiudicia- bles, d'autât que comme aîné qu'il estoit, la souueraineté de tous ces Estats luy appartenoit, desquels ne demeura à D. Garcia que la Couronne de Nauarre, le pays qui est depuis Burena, & Oгна, courant par la contrée de Frias, contenant sept ref- fors, appellés anciennement Castille la vieille propremēt, & en outre Alaua, Na- gera, & partie de Biscaye. Or le Roy Don Garcia s'acorda du commencement assez bien avec Don Fernand son frere, Roy de Castille, & luy ayda ainsi que nous auons dist, à la guerre qu'il eut contre le Roy D. Bermōd, à s'establir au Royaume de Leō: mais depuis ils vinrent en querelles, com- me aussi entre luy & D. Ramir, tant qu'il vescu ne fit oncques bonne paix. Il fut marié des qu'il estoit encor Infant de Na- uarre, à vne Dame Françoise, nommée Estiennette, de la maison de Foix: mais possible estoit de la maison de Carcasson- ne, ou Besiers, d'où sortirent depuis les Côtes de Foix, de laquelle il eut plusieurs enfans, assauoir, quatre fils, Don Sancho

*Estādne du
Royaume
de Nauarre
sous le Roy
D. Garcia
Sanchez.*

*Genealogie
de Namarre.*

Garcia qui fut Roy apres son pere, Don Ramir Seigneur de Calaorra, Torrefilla, de los Cameros, Riua fresca, Lea, Villoria, Trebejan, & autres, D. Fernand le troisieme Seigneur de Iubera, Lagunilla, & autres places, & D. Raymond le quatrieme Seigneur de Murillo, Agon, & Agoncillo, & quatre filles, D. Ermesilda, ou Ermiscude, qui fut Dame de Villa Mediana, & Matres, D. Ximena, Dame de Corcueros, & Hornos. La troisieme D. Major, Dame de Ianguas, & D. Vrraca, ou selon aucuns Oguenda la derniere Dame, d'Aluerite, Lardero & Mucrones. Telle fut la posterite du Roy D. Garcia Sanchez de Nagera : du regne duquel les Espagnols mettent l'invention de l'image de la Vierge Marie, du monastere Royal de la ville de Nagera, en l'honneur de laquelle D. Garcia, & sa femme Estephana, ou Estiennette, firent bastir ce Conuent de l'ordre de S. Benoist : & en outre, institua le Roy vn ordre de cheualiers du Lis, a cause qu'en icelle peinture y auoit vn vase de fleurs de lis blancs : & voulut que les cheualiers portassent en leurs robes des lis peincts a lesquille, d'ouurage de broderie. Ceste fut la deuise des Cheualiers de l'or-

*Ordre du
Lis en Na-
marre.*

dre de Nauarre, duquel furent honnorés les enfans Royaux & plusieurs cheualiers Nauarrois, & estrangers, & depuis fut trās-mis à la posterité en ceste maison de Nauarre. Le Roy D. Garcia honnora fort la noblesse, & confirma l'an 1043. Les priuileges des gentilshommes du val de Roncal, en tesmoignage de leur perpetuelle fidelité enuers les Roys Nauarrois leurs Princes, desquels il receut de bons seruices contre les Maures, mesme contre vn Prince Maure aussi nommé Aly Maymō comme le Roy de Toledo, contre lequel D. Garcia eut vne aspre rencontre, au lieu de Recorbasesca, ou ce Maure fut vaincu & tué. Sur ceste gēt il print la ville de Calorra, l'an mil quarante quatre ensuiuant: 1044. guerre à la verité plus heureuse que celle qu'il eut depuis contre D. Fernand Roy de Castille, son frere, homme fatal pour ses parens & alliés. L'euie qui traueille ordinairement les hommes, à cause des prosperitez d'autrui, engendra vne haine en D. Garcia, contre D. Fernand, laquelle fut acreuë, & nourrie par le different meue entre eux pour la ville de Nagera en la Rioye, ou D. Garcia tenoit sa court, & les terres de Burena, lesquelles le Roy Don

*Machinatio
du Roy D.
Garcia, con-
tre son fre-
re*

Fernand maintenoit estre des appartenances de son Royaume de Castille. Le premier & plus indigne effect, par lequel ceste mal-veillance se descouvrit, fut la trahison brassée contre le Roy D. Fernand, en la ville de Nagera : car estant iceluy venu visiter, selon le debvoir de fraternele amitié, son frere D. Garcia malade au lit, il fut aduerti que par son commendement on le voulut detenir, & de faict s'il ne se fust sauué, il estoit arresté prisonnier : cela les enflamma tellement l'un contre l'autre, qu'estans venus aux armes, la mort de l'un ensuiuit. Ce mauuais tour fut longuement dissimulé par D. Fernand, attendant temps oportun de s'en ressentir, quelques excuses que luy en sceut faire D. Garcia, voyant que le coup auoit failly. Ainsi vescu ce Roy de Nauarre en continuelles haynes de ses freres, D. Ramir, & D. Fernand, comme il auoit poutchassée par son mauuais naturel celle de ses pere & mere: Prince à la verité peu digne de faire la guerre aux Maures, pour l'auencement de la religion Chrestienne : contre lesquels (nonobstant qu'il fust en ce mauuais mesnage avec les siens) il ne laissa d'enuoyer

armée, & leur osta la ville de Funes, l'an mil quarente cinq. Pour recouurer sa santé il auoit enuoyé messagers à tous les Euesques, & Abbés renommés en Espagne, afin d'impetrer par leurs prieres sa guérison de Dieu. En ceste deuotiō il se fit porter au monastere de S. Sauueur de Leyre, croyant que par les oraisons des religieux de leans sa santé luy auoit esté rendue, pource & en recompense, donna à icelle maison le Conuent de Centurifontes, ensemble plusieurs autres biens. Mais pour tout cela il ne diminua en rien le mal talent contre D. Fernand son frere, lequel ne s'estoit voulu laisser prendre. Or ces Roys Chrestiens, ambitieux & perfides les vns aux autres, iusques à n'espargner leur propre sang, pensoient se purger de tous leurs pechez, & en demeurer quittes pour biē batir des temples, & les enrichir & douer de rentes & grans reuenus, à l'enuy l'un de l'autre. Sur ceste opinion le Roy D. Garcia octroya plusieurs dons & priuileges à l'Eglise de sainte Marie la Royale de Nagera, qu'il auoit fait bastir pour la sepulture, declarant que ses dons estoient pour le remede de son ame, de celles de son pere, de la Royne sa femme,

*Donations
aux Eglises.*

1052.

& de ses enfans, avec aprobatîõ des grâs Seigneurs de son Rõyaume: lesquelles donations & priuileges il entendoit deuoir durer iusques a la fin du monde, sur peine, à qui les enfreindroit, de mille milliers de talens, applicables au monastere. En tels termes sont conceuz les memoires & lettres qui se treuuent audit monastere, de l'an mil cinquante & deux veues par Garibay.

1054.

Par mesme persuation le Roy D. Fernand de Castille bastit le temple de sainct Isidore en la Cité de Leon. Et afin qu'il eut dequoy rendre ce lieu plus authorisé, il recouura le corps dudit S. Isidore qui estoit en la ville de Seuille, d'où il auoit esté Euesque, dont furent receueurs D. Auito, Euesque de Leon, & D. Ordoño, Euesque d'Astorga: lesquelles reliques il fit porter à Leon, fit rebastir la ville de Zamora, qui auoit demeurée en monceaux de pierre despuis le regne de Don Ramir troisieme. Le Roy Don Garcia de Nauarre fit pareillement bastir la ville de Deratta, & fit autres œuures. Or pour reuenir à l'inimitie qui regnoit entre ces deux freres, elle reuerdit l'an mil cinquãte quatre, en maniere que le Roy D. Fernãd
estant

estant deuenu malade à Burgos, rendit à D. Garcia la pareille: car s'estant transporté vers luy D. Garcia, pour le visiter, & luy oster le soupçon de ce qu'il auoit attenté contre luy, il fut saisi, & emmené prisonnier à Cea.

*Detention
du Roy D.
Garcia en
Castille.*

Don Garcia, par belles parolles & argent, fit en sorte que les gardes le laisserent eschapper. Ainsi plein d'ire & maltalent, s'en retourna en Nauarre, où il mit ensemble vne puissante armée de ses subiets, de Gascons & de Maures, alliés ou mercenaires, laquelle il mena par les mōts d'Oca, iusques à Actapuerca, à quatre lieues de Burgos: dequoy estant desja aduerty le Roy D. Fernand s'estoit preparé de son costé pour luy resister, avec grand nōbre de gens de guerre, tirez de Castille, Leon, & Asturie. Neantmoins, auāt que de ioin- dre ces deux armées au combat, il sollicita par plusieurs messagers le Roy D. Garcia de se retirer, le priāt qu'il oubliast les choses passées, & que deormais il luy voulut estre bon frere & amy: mais tant estoit irrité D. Garcia, qu'il ne voulut entendre à aucun salutaire conseil: parquoy s'aduençans les armées d'une part & d'autre, eurent rencontre aspre & furieuse, en laquelle fut

*Guerre entre
Nauarre
& Castille.*

D

Mort du
Roy D. Garcia de Na-
uarre.

respédu beaucoup de sang chrestien: mais le malheur fut tel pour le Roy D. Garcia, qu'il fut rencontré en la meslée par deux cheualiers Nauarrois, qui s'estoyent retirez malcontens de luy en l'armée du Roy D. Fernand. Lesquels coururent sur luy, & le tuerent: parquoy l'armée Nauarroise fut tost mise en route, & deffaite. La mort du Roy D. Garcia fut griefue au Roy D. Fernand, lequel deliura son corps aux siés, pour l'enseuelir, & ne poursuivit point ceux de Nauarre, mais seulement les Maures, qui estoyent venus à ceste guerre: Tel le fut la fin du Roy D. Garcia, ayant regné

1054. vingt ans, l'an mil cinquante quatre, son corps fut enseuely a sainte Marie la Royale à Nagera. Il s'intitula Roy de Pampelonne, Nagera, Alaua, d'Oca, de Bureua, & de Castille la vieille, & encor de Biscaye, où à la verité il possédoit la plus part du pays, en foy dequoy il se trouue lettres contenant que l'an mil cinquante trois D. Nunguo Sanches, Comte de Durango, & D. Luguncia sa femme fonnerent vne Eglise de S. Augustin, qui s'appelle à present S. Augustin de Echauarri, pres du lieu où long temps apres fut fondée la ville de

Helorrio, lesquelles lettres furent confirmées par le Roy D. Garcia, comme regnant en ce pays là.

En outre le Roy de Castille la neuue ^{*Vsurpations*} s'empara de Castille la vieille de la terre ^{*du Roy de*} de Bureua, du mont d'Oca, & partie de la ^{*Castille sur*} Rioye, il est fait mention d'un debat d'en- ^{*le Royaume*} tre le defunt Roy D. Garcia de Nauarre, ^{*de Nauarre.*} & S. Dominique dict de Silos, qui estoit vn religieux natif de Cagnas, en la Rioya, de berger deuenu Moyne, & nourry au monastere de S. Emylian de la Cogola, là où il print l'habit de l'ordre de S. Benoist, & y vescu si religieusement, qu'il en fut Abbé : mais pour estre trop grand protecteur des droits de l'Abaye, & de leurs exemptions, il tomba en la defaveur du Roy, qui le chassa de là, & de toutes ses terres, dequoy toutesfois il se repentit par apres, le voyant s'estre retiré en Castille & bien receu du Roy Fernand son frere.

*De Don Sancho V. du nom, & XV. Roy de
Nauarre, surnommé Garcia.*

EN ce Royaume de Nauarre, apres Don Garcia Sanches, auoit succédé son fils D. Sancho Gar-

cia, par lequel ne peut estre empesché le cours des victoires, & conquestes du Roy D. Fernand son oncle; qui luy osta apres la bataille d'Atapuerca, bonne partie des terres que son pere auoit possédées: Parquoy il s'allia avec son autre oncle D. Ramir, Roy d'Arragon, contre le Roy Don Fernand. Par ceste alliance, disent les auteurs Espagnols, que ces Roys se baillèrent en gage plusieurs villes & forteresses, & mesmes que le Roy de Nauarre quitta à celuy d'Arragon, & aux siens à perpetuité, les villes de Sanquessa, Lerda, & Ondues. Le Roy eut à femme vne Dame, nommée D. Plaifance, de laquelle il eut des enfans, mais d'iceux ne se trouue memoire aucune certaine. Il fut de peu de vertu, & partant eut D. Fernand de Castille son oncle, moyé de le resserrer, & luy limiter son Royaume de Nauarre, ainsi que bon luy sembla, fut à droict, fut à tort, & pour purger son ame donnoit tous les ans à l'Abbaye de Clugny, mille pieces d'or, & mourant laissa trois enfans masles qui se ruinerent l'un l'autre. Or si les freres Castillans estoient mal d'acord, ceux de Nauarre n'auoyent pas plus de charité entre eux:

Freres Nauarrois en discorde.

car entre D. Sancho Garcia , & D. Raymond son frere , estoient des enuies & mal-vueillances secretes, lesquelles avec le temps se descouvrirent : car ayant Don Raymond quelques places fortes à luy, & aucunes en gouvernement du Roy son frere, attira à luy par dons, & largesses plusieurs, à qui l'Estat present du Royaume ennuyoit, il se rebella, & voulut tenir fort en ces places: mais le Roy D. Sancho, avec la Noblesse de Navarre l'en chasserent aisement. Cela fut vn nouveau destourbier aux Navarrois, de pouvoir avoir raison des Roys de Castille, qui detenoyent les terres cy dessus mentionnées.

D. Raymond ainsi chassé n'eut recours à aucun des Princes Chrestiens voisins: lesquels, cōme il se doubtoit bien, auoyēt en detestation ses entreprises, mais se retira vers les Maures, ennemis de nostre foy, & guerroyant avec eux contre son frere, fut donnée vne bataille prez de Penalen, où le Roy D. Sancho fut tué, qui fut environ l'an mil septante six, ayant regné en- 1076.
viron vingt & deux ans. Il auoit eu de sa femme D. Plaisance, entre autres enfans, D. Ramir Sanches, & D. Garcia, D. Ramir qui pour lors estoynet fort ieunes, à la nou-

uelle de la mort de son pere, se mit en la protection de D. Sancho Ramires, Roy d'Arragon, lequel aussi les Seigneurs, & cheualiers de Nauarre appellerent pour regner sur eux, à cause de la minorité de leur Roy, pour s'opposer aux efforts, & entreprises du mauuais D. Raymond qui poursuuiuoit de se faire couronner Roy de Nauarre, & des-jà s'estoit saisy de la ville de Pampelone, & vsurpoit le tiltre de Roy d'icelle, mais il en fut vertueusement repoussé, tellement que descheu de son ambition, & ne scachât plus quel conseil prendre, il se retira à Sarragosse, vers le Roy Maure d'icelle, où il passa sa vie banni, & de la liberalité de ce Payé, y posseda quelques terres & places, qui passerent depuis avec vne sienne niepce, nommée Marquise, femme d'Aznar Lopez, cheualier, laquelle en fit donation à l'Eglise colegiale de Saragosse, de sainte Marie Majeur.

*De Don Sancho Ramires VI. de ce nom, XVI.
Roy de Nauarre & II. d'Arragon.*

*Arragon &
Nauarre
ioints.*



Vand D. Sancho Ramires vint à la Couronne de Nauarre, il y auoit des-jà quelques années

qu'il regnoit en Arragon. Il auoit espouſé vne Dame, fille du Comte d'Vrgel, appelée D. Felicie, de laquelle il eut trois enfans, Don Pedro qui luy ſucceda en ſes Royaumes, D. Alphonſe, lequel regna apres ſon frere, & D. Ramir religieux au monaſtere de ſainct Ponce de Tomeres, prez de Beſiers; & deſpuis Roy par le decez de ſon frere D. Alphonſe mort ſans enfans. En ce Prince donc ſe reünirent les deux Royaumes de Navarre & d'Arragõ, quarente & deux ans apres la ſeparation d'iceux: Il fut guerrier & politiꝑ. Il ſe trouue vnn volume de Loix particuliers dõnées par ce Roy à ceux de Iacca, qui eſt inferé entre les vz, & couſtumes de Navarre d'aujourd'huy: mais les principaux actes ſont grandes donations & exemptions aux monaſteres, parroiffes & colleges d'Eſpagne.

Or le Roy de Caſtille D. Alphõſe eſtoit fort mary de ce que les Nauarrois auoyẽt appellé pour regner ſur eux, le Roy Don Sancho Ramires Roy d'Arragon, pluſtot que luy, de qui le droict eſtoit plus valable, eſtant couſin germain du Roy Don Sancho Garcia deſſunt, par ligne legitime, au lieu que le Roy d'Arragon ne luy

touchoit que par ligne bastarde. En fin ils s'accorderent par ensemble au tres-grand dommage du pupille, & demeura Pampelone, & toutes ses appartenances, osté Nagera, & les autres pays, dont estoit faisi Don Alphonse, au Roy d'Arragon, moyennant qu'il en feroit recognoissance, & se confesseroit estre vassal pour ce regard du Roy de Castille. Ce Roy auoit fait la guerre aux Maures, durant le temps qu'il fut Roy d'Arragon seulement, & auant que d'obtenir le Royaume de Nauarre, les auoit chassés des montagnes d'Arragon, Sobrarue & Ribagorca, & en outre guerroyé le Roy Abderramen d'Huesca, pris la ville de Barbastro, estant puis acreu du Royaume de Nauarre, il continua ses entreprises, & conquestes contre les Maures, leur ostant le chasteau de Mugnoues és enuiron de Secastilla, en Ribagorca: Cobin, & Pitilla, & eut aupres-de Saragosse vne grande & cruelle bataille. Pour satisfaire aux frais desdittes guerres, ce Roy estoit contraint de mettre la main quelques fois sur les reuenus Ecclesiastiques, n'estans ses finances suffisantes à tant de charges: mais les Euesques de ce pays s'opposèrent viuement à luy, & le

travaillèrent en sorte, par la crainte d'estre d'amn  , qu'ils luy firent faire amende honorable, & confesser en public dedans l'Eglise de Roda, & deuant l'autel de S. Vincent, estans presens & ce poursuivans l'Euesque du lieu, D. Raymond Dalma-
ce, & celuy de Iacca D. Garcia, propre frere du Roy, qu'il auoit grieuement offenc  , cela auint enuiron l'an mil huitante deux
auquel temps D. Ramir, fils du Roy Don Garcia, meu de grande deuotion, donna de nouveau, & confirma ce qu'il auoit donn   au monastere de sainte Marie de Nagera, qui estoient les lieux de Torrefille, Cameros, Treuexan, Rilafresca, Lea, Villedoria, & saint Pelage de Cerezo, S. Pierre de Torefille, sainte Marie de Veraca, & autres places & Eglises iusques    faire les moynes, & Abb   de ce lieu, ou il est enter-
r  , ses heritiers vniuersels. Le Roy D. Sancho Ramires gaigna l'an suiuant
le chasteau de Groas, dont il fit vn present au Monastere de S. Victorian pour s'acquiter de certain v  u fait par le Roy D. Ramir son pere. Aucuns escriuent que peu apres il receut vne grande route autour de Roda, o   on dit que le Roy D. Alphonse gardant tousiours en son c  ur quelque

Roy d'Ara-
gon faisant
Amende
honorable
aux Eccle-
siastiques.

1082.

1083.

colere, de ce que le Roy d'Arragon possedoit le Royaume de Nauarre, donna secrettement aide & faueur aux Maures, & fut cause de ceste deffaite de Chrestiens.

1084.

Mais l'année suiuiante cependant que le Roy D. Alphonse ordonnoit les affaires de sa nouuelle conqueste de Toledo, & que les Maures plus desunis que iamais, ne pouuans congnoistre le malheur qui les poursuiuoit, continuoyent à s'entrepiller & à susciter nouueaux troubles entre eux, D. Sancho Ramires, ne voulut demeurer oyfif de son costé, ny laisser eschapper si belles & si opportunes occasions d'essargir ses terres, & aduancer la puissance des Chrestiens en Espagne. Il gaigna donc sur ces infidelles vne bataille, pres d'un lieu dit Piettra Pisida, print sur eux la ville d'Arquedas, & eut derechef vne autre bataille contre ceste gent Moresque, prez la cité de Tudelle: & en troisieme lieu les combatit autour de Morella, lesquelles rencontres aduindrent toutes heureusement pour les Chrestiens. Et l'année suiuiante voyant qu'il auoit fait conquestes notables au plat pays, donna à son fils aysné le Royaume de Sobrarue, & Ribagorca, le faisant nommer Roy: & quelques temps apres mou-

1085.

rut la Royne D. Felicie sa femme, laquelle fut enterrée à S. Jean de la Pena, & continuant toujours contre les Maures l'an mil octātē & neuf pres la ville de Mōçō, toutesfois avec grande difficulté, à cause de la forteresse du lieu, & de l'obstinée defence de la garnison. Ceste mesme année furent par luy confirmés les priuileges de Noblesse, & totale exemption à ceux du val de Ronçal, (tesmoignage qu'ils estoient toujours vaillans, & fidelles à leurs Roys.) L'an 1091. il contraignit Abderramē, Roy Maure, de la cité de Huesca, de luy payer tribut, donna secours à son cousin D. Alphonse de Castille, és guerres qu'il faisoit és marches de Toledo, & ayāt fait dessein d'assiéger avec le temps la cité de Saragosse, pource commença vne forteresse pres la riuere d'Ebro, à cinq lieuës de Saragosse, qu'il nomma Castellar : gaigna depuis sur les Maures Olalla, Almenara, Nual, peupla Liue, & pour tenir enfermé le Roy d'Huesca, fortifia les Chasteaux de Marciello, Loarre, & Alquecar, aux marches de la terre de Sobrarue, & mit en sa puissance tout ce qui est despuis ce lieu, iusques à Mottaragon, prochain d'une lieuë d'Huesca. Parquoy le Roy Abderramen

1086.

1089.

1091.

Fort de Castellar.

se voyant retrainst & pressé de jour en jour, eut recours au Roy D. Alphonse de Castille, offrant de luy payer plus grand tribut qu'il ne faisoit au Roy de Nauarre, s'il le vouloit prendre en sa protection : à quoy D. Alphonse de Castille entendit, comme celuy qui estoit prompt à s'agrandir en quelque façon que ce fut, tant peut l'ambition aux cœurs humains, que même n'espargnant son cousin le Roy Don Sancho, il luy auoit soustraiet la seigneurie de Guipuscoa, vnüe de tout tēps à la couronne de Nauarre, & en auoit estably Cōte & gouuerneur en son nom Don Lope Dias, de Haro, Seigneur de Biscaye. Ces façons despleurent grandement au Roy D. Sancho Ramires, lequel a ceste cause, ayant despeché à la frōtiere d'Alaua quelques troupes de gens de guerre pour entretenir le Castillans, alla au siege de Huefca, resolu de la prendre à quelque pris que ce fut : la luy tindrent compagnie ses enfans, D. Pierre Roy de Sobrarue, & D. Alphonse avec les forces de Nauarre & Aragon : mais comme il procedast en ce siege par trop grande affection, il auint que voulant recongnoistre les endroits de la place plus foibles, ainsi qu'il la tournoyoir

avec les capitaines, il fut atteint d'une fleche Morefque au deffous de l'aiffelle au deffaut du harnois, ainfi qu'il hauffoit le bras, pour monftrer à quelqu'un qui eftoit pres de luy, vn lieu qui luy sembloit propre à faire fa batterie. Ce coup fut mortel, ce que fentant D. Sancho, se retira en farente, diffimulant plus qu'il pouuoit fon mal: eftant la, il fit promettre & iurer à D. Pierre, & D. Alphonse ses enfans, qu'ils ne partiroyent point de ce fiede, que la ville ne fust en leur puiffance, & toft apres rendit l'ame, ainfi qu'on luy tiroit la fleche de la playe. Il fut Prince magnanime & guerrier, lequel acreut ses terres des cōquestes heureusement faictes sur les Maures: mais il eut ses voisins Chrestiens peu fidelles, mefmes D. Alphonse, Roy de Castille, ay-ma la Iustice & police: ce fut par luy que la ville d'Estella eut son origine, qui est de ce temps vne des trois citez de Navarre, & la deuziesme en dignité, il fit le plus ieune de ses enfans D. Ramir religieux de l'ordre de S. Benoist, au monastere de fainct Ponce de Tomeres. D. Ramires mourut l'an mil nonante & quatre, en l'aage de 49. 1094. ans, regna 18. ans en Navarre, & 31. an & 26. iours en Arragon, laissant comme def-

D. Sancho
Ramires
Roy d'Ar-
ragon occis
au fiede de
Huesca.

fus est dict trois enfans:sa mort fut vn iour de Dimenche, quatriefme de Iuin de la fufdicte année 1094. & le corps iufques à la prinfe de la ville, fut porté au monaftere de Montaragon, & de là à S. Iean de la Pena.

De Don Pierre, I. du Nom, XVII. Roy de Nauarre, & III. d'Arragon.

1094.

PAr le decez de Don Sancho Ramires, vint à la Couronne Don Pierre feul de ce nom entre les Roys de Nauarre, & i. entre ceux d'Arragon, l'an mil nonante quatre, ayant ja regné en Sobrarue & Ribagorça neuf ans. A fon aduenement il iura de maintenir les Loix & priuileges du pays: il s'intitula Roy de Pampelone, & d'Arragon, & fuiuant la promesse faite à son pere il continua le fiege d'Huesca, lequel fut long & difficile à cause de la force du lieu, & de la refiftance des Maures la habitās, aydés par le Roy Almocabeu de Saragoffe, & autres Maures, & auffi d'aucuns Chrestiens, du nombre defquels le Comte D. Garcia de Cabra, & D. Gonçales vaffaux du Roy de Castille, estoyent. Ceux cy eftans venus au

secours d'Huesca, avec vne grāde & puissante armée l'an mil nonante six, & cuidās ^{1096.} faire leuer le siege, eurent bataille aux champs dicts Alcoras, avec les Nauarrois, & Arragonnois, qui la gaignerent, mettāt à mort plus de trente mille Maures, & le surplus en totale routte, & fuitte: tellement que la ville destituée du secours esperé, se rendit au Roy D. Pierre de Nauarre & de Arragon. Icy sont forgées les anciennes armoiries d'Arragon, sur vne vision que les Espagnols escriuains disent estre apparue à plusieurs Arragonnois, durant le combat: assauoir S. George à cheual, avec vn escu d'acier, avec croix de gueules, combatant pour les Chrestiens: & qu'apres la deffaitte des Maures, furent trouués quatre testes de Princes Maures fort remarquables, à raison dequoy, disent que le Roy D. Pierre print pour armoiries d'Arragon la croix rouge, en champ d'argent, avec quatre testes de Maures, de mesme couleur aux quatres quarres de l'escu. En ceste journée d'Alcoraz furent renommés pour leur vertu & prouesse, Gaston Biel, fouche de la famille, des Cornels, Federic Atrocillo, Lopez, Ferencio de Lune, Gomes de Lune, Fortun Maza, Simon

*Prise de
Huesca par
le Nauar-
rois & Ar-
ragois.
Anciennes
armoiries
d'Arragon.*

6
Aznar, Oteicia & Sâcha Pegna, cheualiers
Arragonnois. Huêfca prinſe, la Moſquée
Majeur d'icelle fut a l'inſtant dediée en E-
gliſe cathedrale, & le ſiege Epiſcopal de
Iacca transferé en icelle cité, ainſi qu'il
auoit eſté autresfois. Dans la ville furent
trouués des Chreſtiens Muzarabes, leſ-
quels auoyent veſcu durant la domina-
tion des Maures en icelle, touſiours en li-
berté de leur religion, exerçans leurs offi-
ces dans le temple de S. Pierre. Le Roy
Don Pierre doua magnifiquement ceſte
Egliſe cathedrale d'Hueſca, & inuita par
grans priuileges les hommes de toutes
pars à la venir peupler, & ſi habituer. Le
Roy D. Pierre, du viuant de D. Sancho
ſon pere, fut marié à vne Dame nommée
par aucuns Berthe, par autres Ygnes, Ita-
lienne, de maniere qu'il eſt incertain ſ'il
eut vne ſeule femme, à qui ces deux noms
ſoyent attribués, ou biẽ ſ'il fut marié deux
fois. Tant y a qu'il eut de ſa femme eſpou-
ſée, vn fils nommé comme luy, D. Pierre,
& vne fille, dictẽ D. Iſabel, l'vn & l'autre de
ſes enfans moururent auant le pere: l'en-
fant D. Pierre neantmoins eſtant marié
avec D. Solin fille du Cid Ruis Dias. Quât
à l'autre fille du Cid, D. Eluira, elle eut de
ſon

son mary D. Ramir Sanches, fils du Roy
D. Sancho Garcia, vn fils nommé D. Gar-
cia Ramires, lequel despuis vint a la Cou-
ronne de Nauarre, & vne autre fils appel-
lé D. Sancho Ramires, qui fut Seigneur
de Degna Corrada, & vne fille, D. Eluira
Ramires, laquelle fut mariée en Castille,
auec D. Rodrigo Gomes, fils du Comte
D. Gomes de Candespina, & Garmas.
Par ces alliances, estant la maison de Na-
uarre & d'Arragon fauorable au Cid Ruis
Dias, qui possedoit Vallance, il fut souuēt
aydé & secouru contre les Maures, d'hō-
mes & d'argent, par les Prince d'icelle. Or
apres la prinse d'Huesca, le Roy D. Pierre
laissant dans icelle en garnison D. Fortun
Garces de Biel, & D. Ferris de Licaua, &
D. Pierre de Vergas, assallit & print vn
chasteau tres-fort, pres de Beloa, appelé
Calasanzo, & eussent fait luy & les autres
Princes Chrestiens plus grans effects, s'il
y eut eu plus de fidelité & de bonne intel-
ligence entre eux, voire plus de zelle, & de
bonne religion, mais chacun taschant d'a-
grādir sa maison, & pour ce faire se dōnās
les vns aux autres plusieurs destourbiers,
& empeschemens, la force des Maures ac-
creut, par l'vnion qu'ils auoyēt faicte d'Es-

pagne & d'Afrique. C'estoit au temps que plus bruyoyent les armes d'Orient, & que tous les Princes, Seigneurs & Gentils-hōmes guerriers de France, Allemagne, Italie, Angleterre, voire mesme d'Espagne, brusloyent du desir de faire ce voyage, oubliant leurs pays, affaires, familles & maisons, pour s'acheminer a ceste entreprise. Parquoy ce n'est de merueilles, si l'estat des Maures presque aterré en Occident, par leurs feditions & partialités, ayāt trouué l'appuy des Miralmumins d'Afrique en temps que chacun couroit a la cōqueste de Leuant, fut restably & remis sus par les Almorauides.

*Dismes o-
ctroyés aux
Laics.*

Ce fut de ce temps que les Seigneurs seculiers, ou laiz, commencerent à iouyr en propriété, & s'acōmoder des reuenus Ecclesiastiques, des dismes par touttel l'Europe, ayant le Pape Urbain expedié ses bulles aux Princes & potentats Chrestiens, confirmatiues de celles du Pape Gregoire vij. donnés a saint Jean de Latran, l'an 1073. dont les Nobles de la Gaule Nauarre seurent bien faire leur profit. Toutes ces permissions, & facultés de iouyr des biens qu'ils appelloient spirituels de l'Eglise, octroyoit le Pape, pour donner courage

aux hommes de faire la guerre aux infidèles.

En ce temps, le pays de Navarre estoit gasté par vne multitude de sauterelles & chenilles, dont les Navarrois eurent recours au saint Pere, luy faisans entendre leurs calamités : Le Pape, par l'aduis des Cardinaux, enuoya vn Euesque d'Ostia, nommé Gregoire, lequel les aduertit que cela aduenoit pour leurs pechez, possible que l'Euesque de Pampelone, D. Pierre de Roda, ni autres leurs pasteurs ne leur en auoyent rien dit, ou bien ne les auoyent sceu persuader que telle fut la cause de ce chastiment. Cest Euesque d'Ostia fut creu, & partant quelque amendement aduint entre les peuples de Navarre : à raison de quoy le fleau des sauterelles, & chenilles cessa. Pour cela ce Gregoire d'Ostia fut
Gregoire Euesque d'Ostia protecteur des vignes & fruits en Navarre.
 estimé Saint, & est aujourd'huy le patron & protecteur des vignes, & fruits de la terre a l'encontre des chenilles, & semblable vermine, en Espagne. Disciple d'iceluy fut saint Dominique, dict de la Calcada, lequel se tint long temps és terres voisines de Navarre, à quatre lieues de Nagera, recueillant les pelerins estrangers, qui de diuers endroits de l'Europe alloient visiter

1098.

1101.

le sepulchre de saint Jacques. Ce S. Gregoire mourut depuis a Logroño, & est ensevely a la Berneça en Nauarre. En mesme temps fut institué l'ordre de Cisteaux au diocese de Chalon en Bourgongne par vn certain personnage nommé Robert. Cependant le Roy D. Pierre ne cessoit de faire guerre contre les infidelles de son voisinage, & sur eux auoit pris le lieu de Pertusa. Despuis il se mit au siege de la cité de Barbasto, laquelle apres grans efforts, tant des assiegeans que des assiegés, luy fut randue, ensemble le chasteau de Vililla, & autres fortcreffes de ceste contrée l'an mil cent vn. Il rendit incontinent a ceste Cité son siege Episcopal, comme elle auoit eu autres fois, & en fut lors Euesque D. Ponce, qui l'estoit de Rode,

Ordre des
Temples.

Ce fut en ce temps que la cheualiere du temple de Hierusalem fut premierement instituée par vn certain Hugues de Paganis, & Geoffroy de saint Adelman, voués a tenir le chemin assureés, depuis le port de Iaffa (Ioppe anciennement) iusques au temple, despuis meslans la cheualiere avec les regles monacales, ils constituerent vn ordre approuué par les Papes, & par succession de temps, acumulerent si grandes

richesses par toute la chrestienté, que les Roys, & les Papes mesme leur en portèrent enuie, & dura leur ordre l'espace de deux cens ans: de la despouille desquels plusieurs s'acommoderent. Ces templiers furent la source de tous les ordres militaires qui sont depuis venus en la Chrestienté. Ce Roy D. Pierre, & ses enfans, furent enseuelis a iainct Iean de la Pena, dernier des Roys qui y sont enterrés ensemble ses enfans, apres auoir regné tant en Nauarre qu'en Arragon dix ans & trois mois.

*Templiers
source de
tous les or-
dres militai-
res de la
Chrestienté.*

De Don Alphonse, XVIII. Roy de Nauarre & IIII. d'Arragon, Empereur des Espagnes, surnommé le bataillant.

Tous les Royaumes Chrestiens d'Espagne furent ioints comme en vn corps, l'an mil cent huit par la succession de Leon, Castille, Tole-
de, & autres conquestes eschues a D. Vrraca, femme de D. Alphonse, Roy de Nauarre & d'Arragon. Or entra le Roy Don Alphonse de Nauarre en Castille, estant en armes, menant avec luy sa femme D. Vrraca, mais il ne luy fut besoin d'vser de forces, car tous luy furent obeissans, villes,

1108.

forteresses & grans Seigneurs du pays, lesquels il regit & gouuerna en toute douceur, humanité, & bonne iustice, il fit forte guerre aux Maures qui confinoient sur les marches de son Royaume d'Arragon. Il fut surnommé le bataillant, a raison des faits d'armes, & batailles ou il se trouua durant son regne: affermans les historiens quil fut neuf fois en bataille rangée, & emporta la victoire en toutes, excepté es deux dernieres batailles quil eut prez de Fraga. Des quil eut le pied en Castille, il commença à penser a ce qui pourroit aduenir, si sa femme venoit a mourir sans enfans de luy, partant mit es principales places, & villes fortes de ce Royaume, des gouuerneurs & capitaines de ses pays de Nauarre & d'Arragon, affin ques'il estoit besoin de quitter ses Royaumes, il s'eust de saisir avec son honneur & aduantage. Il cognoissoit aussi sa femme. Vrraca superbe, ingratte, legere, & assez peu honneste de sa personne, partant comme bien aduisé, il se munissoit pour tous euenemens que le temps pouuoit amener. Ceste femme sur legere occasion, conceut vne haine tres-maligne cõtre le Côte D. Pierre Anfores, Seigneur de vailledolit, qui l'auoit

*D. Vrraca
inconstante
superbe &
legere.*

nourrie, & luy auoit gardé ses Estats apres la mort du Roy son pere, seulement pour ce qu'es lettres qu'il auoit escrites au Roy son mary, & à elle, les aduertissant qu'ils vinssent prendre possession de leur heritage: Il auoit intitulé son mary Roy de Castille, pour ceste cause elle entreprit de luy oster sa terre de Vailledolit, & autres biës, mais le Roy le restablit en iceux incontinent: & affin qu'il fut plus asseuré contre la rage de ceste femelle, il l'enuoya en Aragon, avec D. Elo sa femme, leur donnât en gouuernement le ieune Conte d'Vrgel son nepueu.

La premiere expedition qu'il fit contre les Maures, fut enuiron l'an 1110. sur ses frontieres de ses pays d'Arragon & Nauarre, ou il fut assisté par plusieurs Seigneurs François desireux d'aquerir honneur & renommée. Discourant le long du cours d'Ebro, il print Tihauste, Borja, Magallon, & autres places de ces marches: tellement que l'heureux succès qu'il eut en ceste entreprise, luy donna courage d'effectuer ce que ses predecesseurs Roys de Nauarre auoyent de long temps designé, sçauoir est, de presser, & d'assaillir la cité de Sarragosse par tous moyens, pour la re-

Almogarabes soldats.

*Siege de Sar-
ragosse.*

*Tudelle prise
par le
Comte de
Perche.*

duire a son obeissance : laquelle comme il faisoit semblant d'assieger, commençant a donner le gast, & se saisir des lieux propres enuiron icelle, le Roy Abucalem luy vint presenter la bataille, acompagné de grande puissance, laquelle se desmela pres de Valtierra, ou fut ce Maure vaincu, & tué sur le champ. A la faueur de ceste victoire le Roy D. Alphonse print Morella, & resolut d'assieger plus estroictement la cité de Sarragosse : parquoy il mit en premier lieu dans le fort du Castelar vne grosse & forte garnison de viels soldats, appellés pour lors en Espagne Almogarabes, gens continuellemēt entretenus a la solde des Roys, sur les frontieres des Maures. Ce siege fut long & perilleux : car les Maures deffendirent celle cité, grande, peuplée, & bien munie, courageusement. En ce siege se trouuerent plusieurs Seigneurs François, & autres desquels furent Gaston, Seigneur de Bear, le Comte de Commiges, & Rotron Comte de Perche par lequel la ville de Tudelle, située sur Ebro, entre Sarragosse, & Calaorra, fut prinse d'emblée. Le Roy D. Alphonse pour remunerer le Comte de Perche d'vne prinse de si grande consequence, pour le siege ou il estoit,

luy donna ceste place, laquelle depuis demeura iointe au Royaume de Navarre.

Pendant que le siege se continuoit, se trouvant le Roy D. Alphonse en la Cité de Barbastro, vint en sa court le Comte Bertrád de Toulouse, fils du Comte Raymond, & de D. Eluira fille bastarde du defunt Roy Alphonse vj. Ce ieune Prince estoit depossédé, par le Côte de Poictiers, de toutes ses terres, a raison dequoy estat bien receu & honnoré par le Roy, & aussi pour estre par luy aydé au recouurement de ses biens, il se fit vassal d'iceluy le recognoissant pour son Seigneur souuerain, de tout ce qu'il possedoit & possederait (selõ les histoires Espagnoles) qui fut environ l'an 1116. Neantmoins cela ne profita de rien au Comte Bertrád: car les guerres continuelles que le Roy eut contre les Maures, ne luy donnerent loisir d'entendre aux affaires de Toulouse, ioint que le Comte Guillaume de Poictiers estoit amy du Roy, & vint luy mesme en personne a la guerre contre les Maures d'Espagne, & notamment au siege de Sarra-
gosse, avec les Comtes de Cominges: & de Bigorre. Environ l'an mil cent dix-huit 1118. fut prinse par les François la place de Al-

*Almudebar
forte place
prise par les
François.*

*Prise de
Sarragosse.*

Almudebar, forte & bien munie, qui donna grand effroy aux Maures circonuoifins, & leur fit abandonner plusieurs places, les affiegez de Sarragosse commençans à se deffier de pouuoir garder long temps leur cité employèrent tous leurs deniers, credits, & moyens, prians, & sollicitans les Maures voisins & loingtains de les secourir en leur extreme besoin. Parquoy leur fut enuoyé vn Capitaine appelle Tenin, avec gens & viures, pour mettre dans la ville, il fut rencontré, mis en route, & deualisé prez de Doraca, par le Roy D. Alphonse, & le Comte de Poictiers lequel selon Curite, auteur Arragonnois, s'y trouua avec six cens cheualiers. La prise de ceste grande ville fut en Decembre mil cent dix-huit, en laquelle estant entré le Roy D. Alphonse, il se logea dans le Palais des Roys Maures, appelle Açuda pres la porte de Toledo, puis se mist a ordonner de l'Estat d'icelle, pour en faire sa capitale ville. On trouua en Sarragosse plusieurs Chrestiens, appelez Muzarabes, qui viuoient la entre les Arabes, en assés grande liberté de leur religiõ, laquelle ils exerceoyent au temple appelle Nostre Dame del Pilar, edifice fort ancien. Ces choses

ainsi executées, on fit mettre le siege deuant la ville de Tarassonne, laquelle ne fit pas grande resistance. Elle auoit esté auparauant de la Couronne de Nauarre, demeura par ceste derniere conqueste, en celle d'Arragon: Puis institua vn ordre de Cheualiers, à l'imitation des Templiers de Hierusalem, qui s'appella de saint Sauueur, leur assignant rentes & reuenus, affin qu'ils s'employassent de meilleur courage à extirper, par armes, les Infidelles de la terre d'Espagne, ce qu'il auoit proposé & fut l'an mil cent vingt.

Ordre des
cheualiers
de S. Sau-
ueur.

1120.

Voyant le Roy que sa femme D. Vrraca estoit impudique: la fit reserrer en la forteresse de Castelar, prez la ville de Saragosse, d'où elle essaya par tous moyens d'euader: ce qu'elle fit, estant aydée par aucuns Seigneurs de Castille, mal contās, avec lesquels elle se retira en ses Royumes, là où elle print conseil de faire diorce d'avec son mary, prenant occasion sur ce qu'elle auoit esté mariée outre son gré, & par contraincte, & aussi qu'elle estoit sa cousine remuée de germain, ne pouuans son mariage estre sans dispense de l'Eglise Romaine, les grans Seigneurs & Estats de Castille considerans les grans troubles, &

D. Vrraca
impudique.

miseres qui deuoyent aduenir, si ce des-
feing estoit effectué contre le Roy D. Al-
phonse, ils n'y voulurent consentir, ains
prindrent en toute reuerence leur Roy-
ne, & la ramenerent en Arragon, au Roy
son mary, lequel dissimula les iniures re-
cues d'elle, & la recut en grace : mais cō-
me elle continuast en ses meurs des-hon-
nestes, & oubliast de plus en plus son hon-
neur, le Roy la chassa de sa compagnie à
iamais, sans se foucier beaucoup du gou-
uernement ou administration du Royau-
me de Castille.

Haut pour certain fut le courage de ce
Roy, & monstra bien qu'il faisoit plus d'e-
stat de la vertu, & de son honneur, que des
biens mondains, se dessaisissant de si am-
ples iurisdctions que celles de Castille
Leon, Toledé, & autres, que luy auoit ap-
porté D. Vrraca: laquelle estant remise en
ses pays, se plaignit de ce que plusieurs for-
teresses luy estoient encores retenues, de-
mandant aduis & aide pour les recouurer.
Celles qui estoient gardées par capitai-
nes, & gouuerneurs Castillans, luy furent
rendues sans attendre le mandement du
Roy. Entre autres D. Pedro Ansures, in-
continent apres la restitution, par luy fai-

Des de quelques places, s'en vint trouver le Roy, qui estoit en Castellaz & comparoissant deuant luy, monté sur vn cheual blanc, & vestu d'escarlata, mit pied a terre, & tenant vn licol en sa main, luy dit qu'il auoit fait enuers sa Roynie & Princesse naturelle, deuoir d'un fidelle vassal, neantmoins qu'ayant failly enuers le Roy, auquel il auoit iuré, hommage & fidelité, il luy apportoit la main, & la bouche, instruments du serment qu'il luy auoit faict, afin que d'icelles, & de tout son corps, fut fait ce qu'il plairoit à sa Majesté commander.

*Eidetelli &
intégrité de
D. Pedro
Ausuras.*

Le Roy D. Alphonse, tousiours semblable à soy mesme, quoy qu'il fut ennuyé de la reddition de ses forteresses, luy pardonna, acquiescant au conseil & remonstrances des sages, qui louerent fort la fidelité, & rondeur de ce cheualier, laquelle deuoit seruir d'exemple à la posterité: parquoy il fut renuoyé avec honneur en Castille.

*Magnanimité du Roy
D. Alphonse.*

De la en auant D. Vrraca ne fit aucune chose de bon: elle obtint son diuorce par l'autorité du Pape Pascal. Lors se voyant sans bride, elle se desborda estrangement. Elle eut des-honneste conuersation avec le Comte D. Gomes de Candespina, & d'iceluy engendra à la desrobée vn fils

*Maison &
famille des
Hurtados.*

nommé à ceste cause D. Fernád Hurtado, ou le desrobé duquel est deffendu la famille des Hurtados, illustre maison en Espagne. Il est certain que le Comte Don Gomes, en bref temps eut l'entier gouvernement du Royaume, & disposa des affaires d'iceluy, tât de la guerre que de la paix, à son plaisir & volonté, il y eut aussi Don Pedro de Lara qui sinfinua aussi en la bonne grace de la Roynie, & fut en peu de tēps de les plus agreables mignons, dont le Comte Gomes estoit fort ialoux. La vie dissolue de D. Viraca, estoit tellement connue de tous, & par tout, que le Roy Don Alphonse meu de iuste desdain, se resolut d'entrer en Castille, avec grande armée, mit au feu & à l'espée tout ce qu'il rencontroit.

*Entrée du
Roy D. Al-
phonse en
armes en
Castille.*

Contre luy se mirent aux champs les deux amoureux de la Roynie D. Gomes, & D. Pedro avec les forces de Castille, & Leon, & ayans rencontré l'armée du Roy, composée de Nauarrois & Arragonnois, vaindrent aux mains, prez de Caude Espina, non gueres loing de Sepulueda. D. Pedro qui conduisoit l'avantgarde, fut des premiers chargé, & premiers à fuir, se retirant à Burgos, où estoit la Roynie, portât nou-

uelles de la route, qu'il n'auoit pas eu loisir de voir. L'armée de Castille fut deffaitte, & mise en route, plusieurs bons cheualiers tués, & autres prins, notamment D. Gomes, Comte de Candespina, avec vn sien frere, appelle D. Diagomes y moururent sur le champ. Grãde fut la vertu d'vn de la maison d'Olea, qui portoit l'estandart du Comtes Gomes, lequel estant mis bas de son cheual ayant les deux mains couppees, retint l'estandart serré entre ses bras, tant qu'il eut l'esprit, criant a haute voix, Olea, Olea. Apres ceste victoire, le Roy D. Alphonse passa iusques a Leon, par le territoire de Campes, faisant cruel degast & massacre par ou son armée passoit, à l'endroit des partisans de D. Pedro. Et pource que les deniers defailloyent, les soldats s'abandonnans au pillage, commirent infinis brigadages & sacrileges. Ayāt le Roy D. Alphonse penetré iusques en Galice, avec le mesme desordre, la noblesse de ces contrées assembla ce qui estoit propre à porter armes, & vint au deuant de ce furieux ennemy, menant en l'armée le ieune D. Alphonse Raymond, fils de D. Vrraca, & de son premier mary, le Comte Raymond de Bourgongne. Et derechef

*Deffaitte des
Castillans.*

*Marque illustre de la
maison d'Olea.*

*Autre de
faite des
Castillans
Leonois, &
Gallegos.*

eut le Roy D. Alphonse bataille prez d'un lieu appelle Carrora de Augnas, entre les villes de Leon, & Astorga, ou les Nauarrois & Arragonnois eurent encor du meilleur, & fut prins prisonnier D. Pedro de Trauas, D. Alphonse Raymond se sauua en Portugal. Le Roy de Nauarre ramena son armée victorieuse, en vn lieu appelle Nençon ou il enserra la Royne puis retourna en ses pays, avec grande quantité de prisonniers, & de butin.

*Conspiratiõ
contre la Roy
ne en Ca-
stille.*

La Royne deliurée d'un si grand danger, ne laissa pourtāt de se donner du bon temps, avec son mignon D. Pedro de Lara: lequel faisant le Roy, & passant outre iusques a extreme tirānie, irrita les cœurs de la noblesse, en sorte que plusieurs des plus grans conspirerent d'abandonner la Royne, & appeller au gouuernement du Royaume D. Alphonse Raymōd son fils, & malgré la Royne sa mere, & son amoureux, l'establiēt Roy de Castille, & Leon, l'an 1122. ayant regné le Roy D. Alphonse de Nauarre en ces Royaumes prez de quatorze ans, en perpetuels troubles & grans tourmens.

En fin D. Alphonse Raymond assiegea sa mere Vrraca dās la Tour de Leon: mais
par

par l'entremise des grâs Seigneurs, la paix fut faicte à telle condition, qu'elle se deporteroit de tout gouuernement & maniemment d'affaires, & se contenteroit d'une pension conuenable à sa dignité. Quāt a Don Pedro de Lara, son mignon apres auoir longuement tournoyé ça & la en fuyant en fin se retira a Barcelone.

L'an mil cent vingt cinq le Roy D. Alphonse de Nauarre dit le combatant mena vne armée contre les Maures de Valance, dont il courut & fouragea le pays, puis celuy de Grenade, & apres tournant par Cordoue, ainsi qu'il s'aprestoit pour l'assieger, fut empesché par vne armée suruenante des Maures Almoradides, ausquels il liura la bataille, & les desfit. Neātmoins ne luy semblant bon de s'arrester pour lors à ce siege s'en retourna chargé de proye, de toutes fortes.

Il mena au voyage de Cattelogne l'infant D. Garcia, fils & heritier de D. Ramir Sanches, auquel appartenoit de droit la succession du Royaume de Nauarre, pour estre issu de ligne directe & legitime du Roy D. Sancho Garcia son ayeul. Ce ieune Prince fut laissé par son pere mourant, en gouuernement à D. Sol, veufue de l'in-

1125.

D. Garcia
vray heri-
tier du
Royaume
de Nauarre.

fant D. Pedro, sa tante maternelle, fille du Cid Ruys Dias, par laquelle il fut nourry, en sa premiere ieunesse, en toute vertu & saincteté, & l'appelloit on Seigneur de Monçon. Apres ceste expedition, le Roy peupla le nouveau bourg de Pampelone, qu'il auoit fait construire prez l'ancienne ville, qui s'appelloit de ce temps la Iruna, c'est a dire bonne ville : & y mit des habitans François, prins d'entre les gens de guerre qui l'auoyent serui contre les Maures, lesquels il voulut remunerer de leurs bons seruices, en les logeant en ceste nouvelle creue, leur donnant les priuileges & exemptions de la ville de Iaca : on tient qu'ils estoient venuz de Cahors en Quercy.

*Prise de
Bayonne.*

Ce fut enuiron ce temps que le Roy D. Alphonse de Nauarre, eut quelques debats avec les habitans des Pyrenées, du costé de France, au Duché de Guyenne, que ie coniecture estre, que fauorisant au Comte de Toulouse, & de S. Gille, il fit guerre au Comte de Poitiers qui detenoit les terres dudit Comte de Toulouse, il assiegea la ville de Bayōne, laquelle il print. Durant ce siege, il fit son testament, il donna à l'Eglise de Pampelone, & au mona-

stere de Leyre, la ville & chasteau d'Estella, avec tous les droits, proffits, & emolument d'icelle, fit aussi plusieurs laigs, & dōs de grande consequence : mais le plus important de tous, fut celuy qu'il fit aux religieux du Sepulchre, & a l'ordre des cheualiers templiers, & celuy des hospitaliers de Hierusalem, de tous ses Royaumes de Nauarre, & d'Arragon, & outre-plus de ce qu'il pourroit conquerir de la en auant sur les Maures, ordonnāt particulieremēt, que ses armes, & son cheual fussent enuoyés aux cheualiers du Temple. Toutes ces ordonnances fit ce Roy, par la hayne qu'il portoit a ceux de son sang, se voyant viel, & sans aucuns heritiers engendrés de son corps, mais il y en eut peu d'executé, à cause du grand trouble, & detrimēt que cela eust peu porter à l'Estat des Chrestiens d'Espagne. Si est-ce que son testament fut fait avec toutes les solennités, & corobore par les peines, & comminations qui estoient en vsage en ces siecles là. Estant de retour en ses Royaumes, il erigea vn siege, & court particuliere aux habitans de la ville de Calataiub, leur octroyant plusieurs priuileges, & immunités, iusques à ordonner que les reuenus Ecclesiastiques

*Testament
prodigieux
du Roy D.
Alphonse
Roy de Na-
uarre.*

1133.

fussent patrimoniaux, afin que les habitans, & naturels seuls, en peussent iouyr. Au commencement de l'année mil cent trête trois ce Roy fit vne assemblée des Euesques, & grans Seigneurs de ses pays à Saragosse pour deliberer de la guerre contre les Maures, la fut decreté de la guerre contre les Maures, vsurpateurs des terres d'Espagne, & quant & quant fut donné ordre à tout ce qui estoit necessaire pour vne si grande entreprise. Ayant deliberé dexterminer de tout point les Maures, il cōmença au deça d'Ebro d'affaillir ceux de Lericda, & Fraga, sur lesquels il print par composition la ville de Mequinencia, lors forte a merueilles, & ayât fait les Maures leur plein pouuoir de se deffendre. De la il vint deuant Fraga ville munie, & naturellemēt forte, asize sur la riuier de Cinca, laquelle il commença de ferrer de prez, enuiron le mois d'Aoust, mais l'hyuer suruenāt, il fut contraint de leuer le siege, & rompre son camp, avec bonne volonté d'y retourner sur le printemps, ce qu'il fit, des le mois de Feurier mil cent trente quatre. Or si la place estoit forte auparauant, les Maures y auoyent tellement besongné, durant leur relache de l'hyuer, qu'ils l'auoyent rendue

1134.

inexpugnable. L'ayāt le Roy D. Alphonse assiegée, & essayé en toutes les façons possibles à luy fut contraint en fin de lever vne autre fois le siege de deuant ceste place, cognoissant quelle estoit imprenable. Ainsi qu'il se retiroit, les assiegés prenant courage, tāt de la retraicte des Chrestiens, que de quelque secours qu'ils auoyent eu du costé de Lerida, se iesterent aux champs, & donnerent sur la queue de l'armée Nauarroise, laquelle ils contrainrent d'arrester, & tourner visage, pour combattre. La aduint au Roy D. Alphonse d'estre vaincu, chose du tout nouuelle, & dure a luy, qui auoit par tout battu ses ennemis, depuis qu'il auoit commandé aux armées. Partant se retira extremement indigne, & confus, ayāt perdu en ceste iournée grand nombre de Chrestiens, & entre autres quantité de vaillans cheualiers & grans Seigneurs de Nauarre & Arragon. Les Maures enorguellis de ceste victoire, & de ce qu'ils auoyent chassé le Roy hors leurs limites, entrerēt aux terres d'iceluy, mettant a feu & a sang tout ce qu'ils ne pouuoient amener, & paruindrēt iusques a Mouçon: dequoy depité le Roy se mit en vn malheur indigne d'vn si grand &

sage capitaine qu'il s'estoit tousiours mon-
stré : mais on court pour neant contre la
volonté de Dieu. Estant ses forces dissi-
pées, & chacun retiré en sa maison, apres
la route qu'ils auoyēt receuë, il rapela les
plus prochains, & sans attendre qu'ils fus-
sent arriués en nombre conuenable, pour
acompanyer la personne, se mit tout vieil
& cassé qu'il estoit, avec quatre cens hom-
mes de cheual seulement, à la poursuite de
ces Maures, qui emmenoyēt grāde proye
de toutes sortes de biēs, & innumérables
prisonniers Chrestiens : les ayant attains
pres de leur fort de Fraga, il s'apperceut de
sa faute, & se cuida retirer, mais il n'estoit
plus temps : car les Maures s'estans assez
aperceu du petit nōbre qui les auoit pour-
suiuis, se retournerent contre eux, & ayās
estandu leurs bandes par assez grand cir-
cuit, enuironnerent le Roy, & la troupe
qu'ils mirent presque toute au tranchant
de l'espée, entre autres le Roy y fut tué :
cela aduint au moys de Septembre, de l'an
mil cent trente quatre. Telle fut la fin du
Roy D. Alphonse le bataillant, excellent
Prince, & heureux, si les calamités dome-
stiques, la hayne des siens, & la trop gran-
de superstition n'eussent miné, & affoibli

Mort du
Roy D. Al-
phonse le
bataillant
1134.

a vigueur de son esprit, qui luy faillit du tout en ses derniers iours. On dit que son corps fut recueilly, & enseuely au Monastere de Iesu de Nazareth, de Montaragõ: toutesfois plusieurs estiment, qu'il ne se rouue point, s'estant perdu en ceste defeatte escarte de ses gens, comme il est advenu a autres grãs Princes, en semblables rencontres. Le bruit courut entre le peuple, qu'il s'estoit sauué de la meslée, & que voyant pour la deuziesme fois vaincu, chose non acoustumée à luy, il en print si grand creuecœur, qu'il ne s'osa plus montrer à ses subiets, mais s'en alla en Hierusalem d'ou il ne reuint plus. Il auoit regné l'espace d'environ de trente ans. A son decez, les Estats de Navarre & d'Arragon se trouuerent en grande perplexité, tant a cause que leur deffunt Roy ne laissoit aucun successeur direct de luy, que pour raison aussi du desesperé testamēt qu'il auoit fait, les difficultez furent acreues par les partialitez des Seigneurs qui ne se pouoyent accorder en l'election d'un nouveau Roy.

Pendant qu'ils debattenr entre eux, le Roy D. Alphonse Raymond de Castille estant aduerty du decez de son beau pere,

reueilla, par l'aduis, & sollicitation de ses conseillers, les viels droits, & prétendant que les Estats de Nauarre & Arragon luy appartenoyent, comme arriere fils qu'il estoit de D. Sancho le grand, qui fut Roy de Nauarre, & Comte d'Arragon, eut moyen de s'emparer des terres de la riuere d'Oija de Villaroda, Grauon, Nagera, Logrogno, Arnedo, Biguerra, & plusieurs autres places, iusques à Calaorra, qui furent lors retranchées du corps de Nauarre, tellement que la iurisdiction de ce Royaume fut bornée du costé de Castille, par le Fleuve Ebro, courât le pays d'Alaua, & print la ville de Maragnon, & autres forts mettât telle terreur aux Nauarrois, & Arragõnois que n'eut esté la crainte qu'ils auoyent de perdre leurs exemptions & priuileges, & recepuoir quelque mauuais traitement du Roy D. Alphonse ils se fussent volontiers rendus tous a luy. Apres auoir bien rauagé, il fut admonesté de n'oublier l'expiation de ses excès, pour ce fit plusieurs belles donations au monastere de saint Emilian, qui se trouuent escrites & receues par Berengir, Arche-diacre de Toledé. Estant puis entré en Arragon, fit le mesme d'egast qu'en Nauarre.

*Expiations
des pechez
& usurpa-
tions du Roy
D. Alphonse
de Castille.*

Lors les nauarrois & arragõnois se voyãs pressés par le Roy de Castille, se hastèrent de remedier à ce mal, qui leur venoit par faute d'auoir vn chef: partant s'estans assemblés au lieu dict Boria, ville appartenante a D. Pedro de Atares, cheualier du sang Royal, qu'on estime fils de D. Garcia, fils de D. Sancho bastard de D. Ramir, premier Roy d'Arragon, & de D. Therese Caxal sa femme, grande partie deux estoit d'aduis qu'on l'esleut pour Roy de Nauarre & d'Arragon, d'autant qu'ils auoyēt cognu en luy plusieurs qualitez Royales, sçauoyent que le feu Roy l'auoit grandement estimé, & que pour recongnoissance de ses merites, il luy auoyent donné la ville ou ils estoient & plusieurs autres dōs. Toutesfois ce personnage autremēt doué de grandes vertus, estoit graue & seuerer outre mesure : à raison dequoy il estoit moins aymé de la noblesse de Nauarre, dont mesmes aucuns se sentoient particulièrement offencés, de ce que quelques fois l'ayans voulu visiter, on leur auoit refusé l'entrée, disans les portiers que monsieur estoit empesché en affaires de grande consequence: mais ils entendirent depuis, que les occupations de Don Pedro

*D. Pedro de Atares reiet
tē de la dignité Royal
le de Nauarre par son
arrogance.*

estoyent, qu'il se faisoit testonner par son
barbier: partant sa grande outrecuidance,
& importune grauité luy fit ce dommage,
» qu'il ne fut point esleu Roy de Nauarre,
» disans l'assemblée, que les principales ver-
» tus, qu'estoyent requises aux Roys deffail-
» loyent a D. Pedro: assauoir, la clemence.
» S'il a monstre (disoyent-ils) son outrecui-
» dance & arrogance insupportable, estant
» en estat priué, qui pourra doubter qu'a-
» pres qu'il sera monté au trosne Royal, il
ne se iette du tout hors des termes de mo-
destie, & qu'il ne vilipende les Seigneurs,
& Gentilshommes ses subiets. Partant cō-
cluoyent, qu'il se failloit bien garder de se
soubmettre à vn tel homme, mais auisaf-
sent de choisir autre Seigneur, qui fut des-
cendu du mesme sang, dont le pays, par la
prouidēce diuine n'estoit pas despourueu:
qu'ils auoyēt D. Ramir, frere du Roy def-
funt, D. Garcia Ramires seigneur de Mou-
çon, & autres qui auoyent dōné meilleur
esperence d'eux, que n'auoit fait D. Pedro.
A la persuation de ceux cy les Seigneurs,
& gens d'Estat assembles à Boria, incline-
rent à D. Frere Ramir, qui estoit moyne
de l'ordre de saint Benoist: mais affin que
cela se peut faire avec plus d'ordre, &

moins de difficulté, ils resolurent de changer le lieu de l'assemblée & s'en aller a Mouçon pour la y declarer & ordonner en bref temps à suruenir a leurs affaires, ce qu'ils firent comme verrez.

De Don Garcia Ramires, VII. & dernier de ce nom & XIX. Roy de Nauarre.

EN ce deslogement qu'ils firent de Borja pour aller à Mouçon, il vint vn autre pensemēt aux Nauarrois, considerans qu'ayant esté D. Fre-
re Ramires l'espace de quarante ans nour-
ry entre les moynes, il estoit croyable qu'il
sçauoit mieux les choses appartenantes à la
vie monastique, qu'il n'entendoit la char-
ge de regir vn Royaume, outre qu'ils furēt
piquez de quel que soupçon, que les Arra-
gonnois eslisans vn Prince Royal d'Ar-
ragon, se faisoient voir par ce moyē, aux
premiers lieux, & faueurs, & honneurs de
la cour : parquoy ces choses estant mises
en auant en assemblée particuliere, par D.
Sancho de Rosas. Euesque de Pampelone
Ladrou de Gueuara, fils d'Ygnes, chef de
la maisō de Gueuara en Alaua, Guillaume
Azuares d'Oreyça, Fortunion Yniques de
Leet, Ximen Azuares de Tores, & autres,

*Diuisiō des
Royaumes
de Nauarre
& d'Arra-
gon par ia-
lousie entre
la noblesse.*

1134.

il fut conclu qu'au lieu de se trouuer en l'assemblée générale à Mouçon, les Estats Nauarrois s'assembleroyent à Pampelone: ce qu'ayans executé en grande diligence, ils esleurent D. Garcia Ramires, Seigneur de Mouçon, pour Roy de Nauarre lequel estoit fils de l'Infant D. Ramir, petit fils du Roy D. Sancho Garcia, & arriere fils du Roy D. Garcia vj. qui estoit fils du Roy D. Sancho le grand. Lors de ceste election, estoit D. Garcia à Mouçon, terre de son appanage, avec les Arragonnois assistant à l'assemblée qui se faisoit là, pour l'election du Roy futur, ne pensant rien moins que de paruenir à ce degré, quand Guillaume Aſuares d'Oteyca, & Ximen Aſuares de Tores, enuoyés par l'assemblée de Pampelone, le vindrent aduertir de ce qui s'estoit passé, & l'emmenèrent secrettement à Pampelone. Ainsi fut estably Roy de Nauarre D. Garcia Ramires, au mois d'Octobre, mil cent trente quatre, estant aagé d'environ quarente ans. Quand les Arragonnois entendirent qu'il y auoit vn Roy en Nauarre, ils esleurent sans delay D. Frere Ramir pour leur Roy, lequel auoit esté destiné Euesque de Roda, & Barbastro, l'ayant auparauant esté de Burgos,

& de Pampelone , & estoit prestre à ce qu'escriit l'Archeuesque D. Rodrigo Ximenes, par ce moyē les Royaumes de Nauarre, & Arragon, qui auoyent esté vnis l'espace de cinquante huit ans, despuis le Roy D. Sancho Ramires, furent separez en ces deux Roys.

Le Roy de Nauarre, D. Garcia Ramires, voyant le progrez que le Roy de Castille auoit fait, tant ez terres de Nauarre, que celles d'Arragon se doubant d'estre du tout impuissant pour resister a vne si grande force, que celle de ce Roy D. Alphonse, principallemēt s'il se rendoit maistre du Royaume d'Arragon, comme il y auoit grande apparence, se resolut d'acquiescer la paix, & l'amitie d'iceluy, par quelque submission qu'il luy fit de son Royaume de Nauarre. Estant doncques D. Alphonse de retour en Arragon, apres les ceremonies de son couronnement, ces deux Princes s'entreueirent, avec grand signes de bien vœillance, en Pradella, ou leurs accors, & confederation furent cōfirmés.

*Le Roy de
Nauarre se
fait vassal
de celuy de
Castille.*

Le Roy D. Ramir d'Arragon, qui ne pouuoit obtenir son Royaume, pretendoit neantmoins d'occuper celuy de Nauarre sur D. Garcia Ramires, disant, qu'il luy ap-

partenoit, comme estant frere, & legitime successeur du feu Roy D. Alphonse le combatant, combien qu'au contraire, D. Garcia y auoit plus de droict que luy, ny ses predecesseurs Roys d'Arragon, d'autant qu'il estoit fils de l'Infant Don Ramir Sanches, & petit fils du Roy D. Sancho Garcia, occis par son frere D. Raymond, par conuoitise de regner, apres lequel parricide les Nauarrois appellerent D. Sancho d'Arragon, pere de ces Roys D. Pedro, D. Alphonse, & de ce moyne, pour regner sur eux, à cause de la minorité des enfans de leur deffunt Roy, & pour rembarrer avec les forces d'Arragon le meurtrier D. Raymond & sa faction, & l'empêcher de regner en Nauarre : voire mesme auoit le Roy D. Garcia Ramires meilleur droict en Arragon, que n'auoit D. Alphonse Raymond de Castille, pour estre descendu du Roy D. Garcia Sâches, fils aîné de D. Sancho le majeur: mais où la force regne, le droict se tait & n'a lieu. Nonn obstant toutes ces raisons, D. Frere Ramir vouloit faire la guerre en Nauarre, & s'estant mis en armes, contraignit le Roy D. Garcia d'armer de son costé, lequel pour euit les inconueniens qui le

menaçoient, si D. Ramir se fust accordé avec le Roy de Castille premier que luy se hasta de luy faire hommage : ce qui ne fut de longue durée : car tost après le Royaume de Nauarre reprint son ancienne, & hereditaire souueraineté. D. Ramir qui se tenoit a Monclus, aux Montagnes de Sobrarue, ne demeura gueres à se soumettre aussi au Roy de Castille, & luy faire hommage de son Royaume d'Arragon : parquoy D. Alphonse luy rendit ce qu'il tenoit de ses terres, hormis Sarragoffe, & quelques autres places qu'il retint pour les garder, & deffendre, & s'en seruir contre les Maures. Cependant aux frontieres des deux Royaumes, entre les Nauarrois & Arragonnois, se demenoit mortelle guerre : mais la negotiation de l'Euesque de Pampelone, D. Sancho de Rosas, Arragonnois de nation, qui se mesloit des plus auant au traitté de paix qui se fit, fut telle, qu'il donna occasion au Roy Don Garcia de le soupçonner de luy estre traître, & pour-ce le chassa de ses pays : dont il fut notté de trop grande seuerité.

*Hommage
du Roy d'Ar
rago a celuy
de Castille.*

*Guerre en-
tre Nauarre
& Arrago.*

Les prelatz qui auoyent entrepris de traiter l'appointement ne cefferent de traualler, iusques à ce qu'ils le reduirent à

tels termes , qu'on esliroit six cheualiers, trois de chacun Royaume , par l'arbitrage desquels les differents seroyent accordés, & determinés. Pour la part de Nauarre, furent esleus Ladron de Gueuarra, Guillaume Azuares d'Oteyca , & Ximen Azuares de Tores: Pour Arragon, on choisit D. Pedro d'Athares, D. Caxal, & D. Ferris d'Huesca. Ces six assemblés au lieu de Vadoluengo, apres plusieurs conseils, & conferences , iugerent que les armes posées d'une part & d'autre , les Roys demeureroient de là en auant bons amis, & pour reglement entre eux , assignerent au Roy D. Garcia Ramires la superiorité sur la noblesse, lequel conduiroit les armées cōme chef, & capitaine general des deux Royaumes, & que le Roy D. Ramir auroit commandement sur le demeurant du peuple, & feroit administrer la iustice , ce qui deuoit auoir lieu pour le regard de leurs personnes, & leur vie durant, sans tirer à consequence , de laquelle sentence ne furent trop contens les Roys. Neantmoins D. Ramir voulant satisfaire à D. Garcia, vint en personne à Pampelone , où il fut receu avec grand honneur, & procura en premier lieu la restitution de l'Euesque Don Sancho,

Sancho, lequel il remit en la grace du Roy D. Garcia. La fut aduisé d'establiſſir certains, & euidens limites entre les deux Royau-
mes de Nauarre & d'Arragon. La ſepara-
tion fut tirante la ligne depuis ſaincte Eu-
cralie, iuſques à Bioſal, demeurant le val
de Ronçal a la part d'Arragon. De là paſ-
ſant par la riuere de Sarazas, iuſques ou
ſes eaux entrent dans celle d'Yda, & le
pont ſainct Martin, & de là iuſques ou ſe
deſcharge Yda dans le fleuve Arragon, &
celles d'Arragon en Arga, & celles d'Arga
en Ebro, & le long d'Ebro iuſques à Tu-
dela.

Ce partage fait, il ſembloit bien qu'en-
tre ces deux Princes ne demeureroit au-
cuns reſtes d'inimitié, & que Don Garcia
Ramires reuereroit D. Ramir comme pe-
re, D. Ramir cheriroit D. Garcia ainſi que
ſon fils, auquel meſme il octroya, ſa vie du-
rant, des terres de ſon appannage, Valtier-
ra, Quadreita, & ce qui eſt deſpuis Ronçal,
iuſques a Biſoal, leſquelles il tiendrait en
fiefs de la Courōne d'Arragon, pour eſtre
reünies à icelles apres ſa mort. Toutesfois
D. Garcia n'eſtoit point content de ceſt
accord, & auoit ie ne ſçay quelle perſua-
ſion, qu'il n'apartenoit point a D. Ramir

de regner, mesme en Arragon, d'autant qu'il auoit esté moyne profets, tellement que sur la poursuite qu'il fit d'estre deliuré de l'hommage qu'il auoit fait a D. Ramir, à cause des places, & terres cy dessus mentionnées, il entreprint de l'arrester dās Pampelone, & donna charge à aucuns de ses gens de ce faire : mais il ne le sceurent pas bien executer, car le Roy d'Arragon en fut aduerti par vn cheualier, dit Inigo d'Ayuar, si qu'ayant conferé avec D. Pedro d'Athares, & autres cheualiers d'Arragon, il sortit incogneu, luy cinquiesme, de la ville. & ne cessa de piquer qu'il ne fut arriué à sainct Sauueur de Leyre, là où il attendit trois iours ses gens, qu'il auoit laissés dās la ville, lesquels le vindrēt trouver, comme il auoit donné ordre qu'ils fissent : & de là se retira à sauueté à Huesca. Par ainsi il en print au Roy D. Garcia Ramires comme à son bisayeul Don Garcia Sanches, quād il voulut retenir prisonnier D. Fernand, premier Roy de Castille, son frere puisné, en la ville de Nagera. A ceste cause commēça D. Ramir à remettre ensemble gens d'armes pour la guerre future de Nauarre, de laquelle le Roy D. Garcia se tenant tout assuré, fit plusieurs prouui-

sions pour sa deffense & seureté : la meilleure desquelles, de plus grãde consequence, & digne d'estre imitée, fut qu'il choisit douze familles principales de ses pays, lesquelles il obligea à soy par honneurs, & bienfaits, les constituant comme chefs de tout le reste de la noblesse de Nauarre. Ce furent celles de Gueuara, d'Almoraut de Baetan, d'Aybar, de Leet, de Subica, de Rada, de Bidaurre, de Montagut, de Vrox, de Cascant & de Mailcon. A ces nobles maisons il establit vn chef, lequel seroit reueré sur tous, apres la personne du Roy: ce fut D. Ladron de Gueuara, auquel il bailla tiltre de Côte, & fut le premier qui se dit Comte en Nauarre : cela fit-il pour ce qu'il voyoit qu'aucuns Gentilshommes de ses pays se debandoyent pour suiure le party d'Arragon, & se retiroient vers le Roy D. Ramir, qui les recueilloit, & leur assignoit terres, & heritages, en Arragon. De ce nombre fut D. Caxal, grand Seigneur pour le tēps d'alors, ayant des biens es deux Royaumes, dont il quitta ceux de Nauarre, pour seruir le Roy d'Arragon, mais comme il se mesloit de grande affection de ces differens, il en pensa porter griefue peine peu apres: car estant enuoyé

*Premier
Comte en
Nauarre.*

par le Roy D. Ramir vers l'Empereur D. Alphōse de Castille, pour restablir la paix avec luy, afin de pouuoir mieux entendre aux affaires de Nauarre, ainsi qu'il passoit inconsiderement riere les terres de Nauarre, iceluy en estant aduertit, le fit prendre pres d'un lieu appellé lors Cares, petit Bourg, lequel a creu avec le temps, est de present comme ville, nommée Pont de Royme, sur la riuere d'Arga, au tour de laquelle croissent les meilleurs vins de tout le pays de Nauarre. D. Caxal fut mis en estroite prison, où il demeura quelque temps : mais l'Abbé de saint Sauueur de Leyre, qui estoit son parent, & grand amy, bailla au Roy tous les ioyaux, & thresors de son Eglise pour le rachepter. Parquoy apres sa deliurance, il se monstra estre bié recognoissant enuers ce monastere, luy donnant tous les heritages qu'il auoit en Tudelle.

*Dextérité
du Roy D.
Alphonse
Raymond
de Castille.*

Telle fut la dextérité du Roy de Castille, ayant reduit Nauarre & Arragon sous sa souueraineté, & comme fondateurs de son Empire, qu'encores qu'ils eussent grande volonté de s'entrecourir sus l'un l'autre, il les empecha qu'ils ne vinssent de fait aux armes, tant par son autorité, que par

autres moyens, ores les retenans par promesses, ores par menaces, estimant que demeurans en l'estat present, il les auroit plus a son commendement, que si l'un croissant par le dommage, ou ruine de l'autre, deuenoit si puissant, qu'il se vint à rebeller contre luy, & luy refuser la recôgnoissance, & hōmage qu'il luy auroit iurée. Toutesfois apres que D. Ramir se fut retiré en vn monastere & qu'il eut marié sa fille a D. Raymond Berenger Comte de Barcelone, ledit Côte alla trouuer D. Alphonse de Castille où furēt couchées & arrestées les conditions & articles de la guerre qui se deuoit faire en commun, contre le Roy D. Garcia de Nauarre, entre lequel estoit capitulé le partage de la peau de l'Ours, ^{Coniure entre le Roy de Castille & le Prince d'Arragon contre le Roy de Nauarre.} avant qu'il fut prins par vn article, portāt que les terres du Royaume de Nauarre a conquester, D. Alphonse en auroit la tierce partie, & les deux tiers restans appartenroyēt au Prince d'Arragon D. Raymond, à la charge de les tenir en fief du Royaume de Castille.

Estant l'armée de Castille en point de marcher D. Alphonse passa à la frontiere de Nauarre, sur la riuiera d'Ebro, le long de laquelle marchant, il vint a la ville de



1140.

Calaorra, là où luy vindrent au deuant D. Sancho Euesque de Calaorra, D. Estienne prieur de sainte Marie la Royale de Nagera, D. Michel Euesque de Tarassonne, avec le Comte D. Ladron de Gueuara, & autres lesquels s'employèrent heureusement à apaiser l'ambition de ce Prince, conuertissant la guerre en vne bõne paix, qui fut conclue par l'entreueue des deux Roys. de Castille & Nauarra, entre Calao-ra, & Alpharo : pour lien de laquelle fut acordé le mariage de l'Infant D. Sancho aîné de Castille, & de D. Blanche, fille du Roy D. Garcia de Nauarre, l'an 1140. & les promesses faictes par parolles de futur, à cause du bas aage de l'Infante, qui fut des lors mise en la puissance du Roy Don Alphonse son beau pere, pour estre nourrie en Castille, iusques à ce qu'elle fut capable pour la consommation du mariage.

Cela fut pour la v. fois vn arrest, & barriere aux desseins du nouveau Prince d'Arragon, qui ne laissoit pas en paix D. Garcia Ramires, lequel se tenant sur ces gardes, se sentoît bien assez fort pour luy resister : car encor que le Comte fut sage & preux cheualier, le Roy Don Garcia ne luy cedit en rien de vertu & grandeur de

courage, sçauoir, & bonne discipline de guerre, & si estoit tres-bien assisté de bõs & sages cheualiers, entre lesquels luy faisoient fidelle seruice l'Euesque de Pampelone reconcillié D. Sancho de Rosas, le Comte D. Ladron de Gueuarra, Seigneur en Ayuar, Guillaume Aznares, Seigneur en Samquesse, Ximen Aznares, Seigneur en Tofalla, Ramir Garcia, Seigneur en la ville de saincte Marie de Vxe, Martin de Leet, Seigneur de Gallipenco & Peralta Pierre Tison, Seigneur en Cadresta, Rodrigo de Acagra, Seigneur en Estella, Rodrigo Abarca, Seigneur en Funes & Valtierra, Iean Dia Seigneur en Cascant, Ramir Sanches, Seigneur en Maragnon (cestoyent gouuerneurs ou capitaines en ces places) & autres en bon nombre, tant de son Royaume que de France. Il maintint ses places frontieres bien garnie, selon que des-jà il y auoit dõné bon ordre, ainsi que Prince preuoyant, & bien aduisé, comme la forteresse de Tudelle qui luy estoit aduenue par mariage, Bureta & Sos. Il auoit mis dedans la forteresse de Nalon vn vaillant capitaine, nommé Girard le Diable, dans celle de Frescano vn autre capitaine estrange, dit Robert de Matalon, & ainsi

aux autres situées sur la lisiere d'Arragon. Outre ce auoit pratiqué l'amitié & alliance de France, premierement avec Louys sixiesme dict le Gros, & puis avec Louys septiesme dict le Jeune, des forces duquel il fut secouru, & son armée renforcée, lors que l'Empereur D. Alphonse se presenta premierement entre Cortes & Calur, & puis en la derniere expedition de Calaterra, où la paix fut conclue, & confirmée par le mariage de l'Infant de Castille D. Sancho, avec l'Infante de Nauarre D. Blanche, laquelle le Roy D. Garcia auoit eue de D. Marqueale sa femme, fille du Comte de Perche Rotron, qui luy auoit apporté pour dot la ville de Tudelle, obtenue par le Comte Rotron, du Roy D. Alphōse le bataillant, pour ses merites & vaillances, comme nous auons dit cy deuant. De ceste Dame eut le Roy D. Ramires plusieurs enfans: c'est assauoir, D. Sancho qui fut Roy apres luy, D. Alphonse Ramires, Seigneur en Castro Vicijo, plus l'Infant D. Marguerite, laquelle fut Royne de Naples, & Sicille, mariée a Guillaume fils de Roger, pere & mere d'un autre Guillaume Roy de Naples & Sicille. La Royne Marguerite deceda enuiron l'an

mil cent quarente & vn, apres laquelle se remaria le Roy Don Garcia en secondes nopces avec D. Vrraca, fille bastarde de L'Empereur D. Alphonse, & d'une gentille femme nommée D. Gontrude, sœur d'un certain Diego Abregon, ou Apricio. De ceste seconde femme eut le Roy une fille, appelée D. Sancha laquelle fut femme en premiere nopces de Gaston, Seigneur de Bear, & en second mariage de D. Pedro de Molina, duquel sortit D. Almerigo, ou Maurique, qui fut visconte de Narbonne, par succession de son ayeule paternelle D. Ornelinde. Aucuns disent que la seconde femme du Roy D. Garcia ne fut point ceste D. Vrraca, fille bastarde du Roy de Castille D. Alphonse, mais une fille de Don Lopes dias de Haro, Seigneur de Biscaye troisieme du nom, & premier qui s'intitula de Haro, laquelle s'appelloit D. Geofreyde, dont la sœur D. Vrraca Lopes fut femme du Roy D. Fernand de Leon deuxiesme de ce nom, fils de l'Empereur Don Alphonse lors regnant. Ces deux Dames eurent aussi un frere, nommé D. Lopes de Haro, appelé le bon, qui fut brave, & vaillant cheualier. Toutesfois la premiere opinion prinse de l'Archeuesque D. Rodrigo

Ximenes de Toledo Nauarrois, est plus aprouuée, & creuë des Espagnols. C'est ce que nous trouuons des mariages du Roy D. Garcia.

1143.

Durant l'année mil cent quarente trois que la guerre duroit entre D. Raymond & D. Garcia Ramires comme dessus est dit, ledit Comte Raymond se trouuoit non seulement empesché en ceste guerre mais encore contre les Maures voisins d'Arragon, & Catelogne, ains aussi cōtre aucuns cheualiers Prouençaux ennemis de Don Berenger Raymōd son frere qui s'estoyēt emparez de quelques places, tellement qu'il fut contraint d'y aller en personne. Parquoy ses terres furent fort endommagées, & trauaillées par les Nauarrois, lesquels se trouuans assurez du costé de Castille, faisoient toutes choses à leur auantage. Neantmoins à son retour il print sur eux la ville de Sos. Le Royaume de Nauarre eut de ce temps plus grands limites, qu'il n'a eu depuis, luy estant osté le moyē de les accroistre sur les Maures, à cause que les Royaumes d'Arragon, & Castille faisoient barrière entre deux: tellement que c'estoit aux Castillans, Arragonnois, & Cattelans à les guerroyer comme frontic-

res, à Vallance, & autres leurs terres & seigneuries. Et tant s'en faut que les Roys de Navarre qui sont depuis venus, se foyent peu estendre d'avantage, qu'au contraire ils ont souvent esté encor plus reserrés, par la violence, & trop grande puissance des Roys de Castille.

Au voyage que fit D. Alphonse Roy de Castille contre les Maures il fut secouru des forces de Navarre & Arragon, car avant son despart il s'entremist de faire la paix entre Navarre & Arragon, & pour ce faire il les conuoqua à saint Estienne de Gormas, où estans venus, il ne peut obtenir d'eux autre chose, qu'une trefue de peu de iours: car les forces d'Arragon étant occupées contre les Maures, le Roy de Navarre rompit la trefue accordée, pource que ayant le Roy D. Garcia fait solliciter, & admonester le Comte par l'Empereur D. Alphonse, & autres Seigneurs, & Prelats de se desmettre, & laisser les pretentions, qu'il se vantoit avoir au Royaume de Navarre, il n'en voulut rien faire ains menaçoit de les poursuiure en temps & lieu. Parquoy les Navarrois coururent le pays d'Arragon, & prindrent la ville de Thauste, & les Fayos qu'ils garnirent de bons

hommes, pour faire frontiere contre les Arragonnois. Durant ce temps les habitants de la ville de Pampelonne luy estans desobeissans il fut incité d'y aller pour les reprimer & chastier. Estant arriuéjà l'Orca, pour chasser, ainsi qu'il picquoit & brochoit par les bois & montagnes, son cheual heurtant à vne pierre, vint à broncher si lourdement, que renuerfant luy & sa charge en lieu estroit & rabotteux, le Roy se rompit le pied, & autrement s'offensa si violemment qu'il mourut sur la place, sans qu'on y peut remedier, ayant regné seize ans, & quelques iours. Son corps fut porté à Pampelone, fut enseuely, avec pompe Royale, en la grande Eglise & fut le premier des Roys de Nauarre, qui y ait eu sa sepulture.

*Mort du
Roy de Na-
uarre D.
Sancho Ra-
mires.*

De Don Sancho, VII. du nom, furnommé le sage & vaillant, XX. Roy de Nauarre.

Estant venu a la Couronne de Nauarre D. Sancho furnommé le sage & vaillant, fils de D. Garcia Ramires, se fit vne assemblée & entreueue de Princes en Tudilem, pres de Aigues chaudes, où se trouuerét l'Empereur

D. Alphonse, & son fils D. Sancho Roy de Castille & le Comte D. Raymond Berenger, Prince d'Arragon : lesquels conspirerent contre le nouveau Roy de Navarre, & escriquirent plusieurs articles pour le fait de la guerre. Entres autres fut accordé, que le Royaume de Navarre se cōquesteroit à communs frais, & se partiroit par moitié entre l'Empereur, & le Comte, excepté les forteresses que les Navarrois tenoyent, appartenantes à la Couronne d'Arragon, lesquelles prealablement seroyent reunies. Quant à la ville de Tudelle, sa iurisdiction se partiroit entrant la moitié d'icelle en la portion des terres qui sont despuis Ebro iusques à Moncayo : & que pour la moitié du Royaume de Navarre que perceuroit le Comte, & en feroit comme gouverneur d'Arragon, foy & hommage au Roy de Castille. Que le iour de saint Michel de celle année venu, l'Infant D. Sancho, retireroit par deuers luy l'Infante de Navarre D. Blanche, pour l'espouser, ou bien (si bon luy sembloit) la pourroit quitter. Telles & autres semblables conditions furent escrites par ces princes, à la ruine du ieune Roy D. Sancho de Navarre, & de ses Estats, s'y Dieu

ne l'eust guarenty. En ceste resolution se partirent les Castillans, & Arragonnois de Tudilem, & se mirent chacun endroit soy a donner ordre à ce qui estoit besoin pour faire la guerre, estimans que leur enemy, qui n'estoit qu'un enfāt, ne se pourroit guarentir contre si grande puissance, mais Dieu qui en auoit arresté autrement, ne donna lieu a leurs complots. Peu apres deceda D. Pedro Athares, qui auoit failly d'estre Roy de Nauarre & d'Arragon, fondateur du monastere de saincte Marie de Veruela, où il fut enterré.

Les Nauarrois soupçonnans quelque entreprise contre leur Prince en ceste assemblée de Tudilem, furēt diligens a munir les places frontieres, & à renouueller les alliances de la maison de Nauarre, avec les Roys de France, & autres grans Seigneurs de ceste nation. Le ieune Roy D. Sancho fut courōné apres la mort de son pere, en l'Eglise de Pampelone, où il iura d'observer les Loix, & ordonnances du pays, qui estoient celles mesmes qu'on appelle de ce temps, le droit d'Arragon, selon lequel se gouvernoient lors Nauarre, Guipuscoa, & lieux adiacens, & conioints à Nauarre. Sainct Sebastien qui

estoit de ce temps là lieu de grand trafiq^t,
 ent du viuant, & par l'octroy de ce Roy,
 ses droits & priuileges, comme eut pareil-
 lement la ville de Durango en Biscaye.
 On furnomma ce Roy le sage, pource qu'à
 la verité il fut sage & aduisé Prince, &
 pour sa vaillance, & magnanimité est par
 aucuns appelé le vaillant. Il eut quelque
 instruction aux lettres, honnora les gens
 sçauans, & fut studieux de la Sainte Es-
 cripture, il se monstra grand iusticier: pour
 toutes lesquelles vertus il fut fort prisé des
 autres Princes, & honoré, craint & aymé
 de ses subiets. Les armes de la ligue de Tu-
 dilem le commencerēt à trauailler des son
 aduenement, & luy firent quelque dom-
 mage aux frontieres de son Royaume,
 mais si ne perdit-il aucune place de con-
 sequence: car combien qu'il fut fort ieune,
 il auoit vn esprit vif, & le cœur magna-
 nime, avec ce qu'il estoit bien, & fidelle-
 ment aydé par ses alliés, & seruy par ses
 Nauarrois. Les armes se demenerēt pour
 le plus par le val de Ronçal: mais il ny a
 memoire, que n'y en ceste année, ny au-
 tres suiuanes fut fait aucun exploit me-
 morable, & tient on que Louys Roy de
 France, qui auoit esté fort grand amy du

*Qualitez
 du Roy D.
 Sancho.*

*Le Roy de
 France fa-
 uorisé le Roy
 de Navarre.*

1154.

Roy D. Garcia defunt, affoiblit grandement les efforts de la ligue de Tudilem, & les empecha tant qu'il peut, & par tous moyens, estant ou sur le traicté de Mariage, ou bien marié nouvellement à l'Infant de Castille D. Isabel, en faueur de laquelle alliance D. Alphonse se deporta de ceste guerre, ou la negligea, & D. Sancho Roy de Castille son fils, aux choisis duquel estoit remis d'espouser D. Blanche, ou de la laisser, l'espousa, & en eut vn fils au bout de l'an, nommé D. Alphonse, lequel fut Roy de Castille, & Toledo, apres le pere, Aucuns tiennēt que les nopces du Roy Louys, & de D. Isabel se firent apres ces choses l'an mil cent cinquante & quatre, & que le Roy de Nauarre se trouua à Burgos, aux pompes & magnificences d'icelles, qui furent admirés par les François, pour leur excessiue sumptuosité. Les terres de Nagera estoient lors vn des principaux gouuernemēs de Castille: car les gouuerneurs d'icelles estoient capitaines generaux des frontieres vers Nauarre. L'Infant D. Sancho designé Roy de Castille les possedoit & y auoit vn lieutenant nommé Roderigo Gomes, fils de D. Gomes de Candespina, qui estoit vn des plus grans Seigneurs de Castille,

Castille, cependant le Côte D. Raymond Beréger ne cessoit de chercher les moyés d'empieter le Royaume de Nauarre, tant il estoit desireux de le ioindre à Arragon & estoit continuellement apres Don Alphonse de Castille pour le faire declarer ouuertement, & de fait ennemy du Roy D. Sancho tant que l'an mil cent cinquante six fut derechef fait vne nouvelle ligue entre eux, & entre autres chefs de leurs conuentions pour plus grande corroboration d'amitie, le mariage futur acordé d'entre le ieune Infant d'Arragon D. Raymond, qui despuis eut nom D. Alphonse, & l'Infante D. Sancha, fille de l'Empereur D. Alphonse, & de sa deuziesme femme D. Rica, fille du Roy de Poulogne Vladislaus, qu'il auoit espousée enuiron l'an mil cent cinquante & vii. Toutesfois iamais on ne sceut induire l'Empereur Don Alphonse à nuire par effect au Roy de Nauarre qu'il aymoit, ains soubs main luy aidoit plustost, de la en auant on ne trouue memoires d'aucun acte digne de recit fait par ce Côte, si ce n'est qu'il suborna quelques infidelles cheualiers, qui passerent de Nauarre en Arragon, mesmes vn des plus grans, nommé Garcia Almorait, lequel

1156.

Nouvelle ligue contre Nauarre.

le vint trouuer a Lerida, & se fit son vassal.

1157.

Mort de D.
Alphonse
Roy de Ca-
stille.

L'an mil cent cinquante sept mourut D. Alphonse de Castille, auquel succeda en Castille D. Sancho son fils ce que sçachant D. Sancho le sage de Nauarre courut & fourragea presque iusques à Burgos, en hayne de ce que D. Sancho auoit tousiours signé les traittés, & ligues que le Comte de Barcelonne auoit fait contre son pere, & contre luy : & outre ce luy detenoit Nagera, & les terres de la riuere d'Oya, D. Sancho de Castille enuoya vne armée soubs la conduite de D. Pero Ponce de Minerua, laquelle ayant rencontré celle de Nauarre pres de Baguare elles vindrent aux mains ez campagnes de Valpierre, pres de Affencio. En l'armée Nauaroise D. Lopes Dias de Haro, Côte de Biscaye, menoit l'auantgarde. Le Comte D. Ladron de Gueuare auoit charge de l'arriere garde, avec le Comte D. Sancho de Larrincar, Inigo Ramires d'Ayuar, & autres : le Roy estoit en la bataille : Ceux de Castille passoyent en nombre ceux de Nauarre, lesquels pour n'auoir voulu attendre les forces qui leur venoyent de France furent deffaits des Castillans & contrains de se sauuer aux prochaines for-

eresses, le secours leur estant venu, & vou-
ans effacer ceste ignominie, ataquerent
es Castillans, qui leur liurerent derechef
a bataille és mesmes plaines de Valpiere,
les desfirent. Ces choses sont escrites en
quelques histoires de Nauarre, mais non
creuës, ny receuës des autres auteurs Es-
pagnols, pour-ce qu'ils y meslent des cho-
ses peu apparentes, & d'autres du tout fau-
ces, comme ce qu'ils disent, que le Comte
.Pedro Ponce de Minerua, vsa d'une li-
beralité inusitée enuers les prisonniers,
tant Nauarrois, que François, les laissant
tous aller sans payer aucune rançon, qui
n'est pas vray semblable: & aussi qu'ils af-
ferment que le Roy D.Sancho mourut en
la premiere bataille, ce qui est reproué
par les autres auteurs, & par lettres & til-
tres qui se trouuent encores, tesmoignans
qu'il vescu plus de trente sept ans apres:
par ces raisons, ce qui est inferé és histoi-
res de ces deux victoires est tenu pour sus-
pect a bon droit.

Bien est plus authentiq' ce qui est dict
du Comte D.Raymond Berenger, Prin-
ce & gouuerneur d'Arragô: c'est que brus-
lant de conuoitise d'auoir le Royaume de
Nauarre, il sollicitoit le Roy D.Sancho de

1158.

Castille par tous moyens de se declarer avec luy, & que ces Princes cōmuniquant leurs armes, coururent sus au Roy de Nauarre, & que l'an mil cent cinquante huit D. Raymond vint luy mesme en Castille acompagné de grand nombre de prelates & cheualiers pour renouueller, & amplifier leurs ligue, & accords, neantmoins sans aucun efect du coste de Castille, partant luy seul fit la guerre en Nauarre, & print Buereta & quelques autres petis forts de peu de consequence. En fin voyant que c'estoit vn os à luy dur à ronger, & qu'il s'efforçoit en vain cōtre vn ennemy, qui auoit non seulement moyen de se defendre de luy, mais aussi de l'offencer: il se rendit traitable aux persuasions de certains bons personnages: Parquoy l'an mil cent cinquante neuf apres plusieurs negotiations de paix entre ces deux Princes, ils s'entreurent, & demurerent amis, mettant fin à toutes leurs querelles, & debats, qui auoyent duré presque vingt cinq ans, le Roy de Nauarre portoit pour deuiise vne bade d'or en champ coloré, tirée des deux bouts, par deux Lions, par lesquels il entendoit lesdits deux Roys de Castille & Arragon.

1159.

*Paix entre
Nauarre &
Arragon.*

Il ne se faut esbahir si les Princes seculiers estoient en troubles pour dominer les vns sur les autres, possible avec quelque raisonnable pretexte, puis que les prelates d'Espagne leur estoient en exemple, sans aucune raison. Car la primauté sur les autres Euesques que celuy de Toledo tenoit, n'estoit recogneue de tous; car l'Archeuesque de Braga, & celuy de S. Iacques refusoient de luy obeir, mais le primat des primats, Adriam iij. enuoyant de Rome son Legat le Cardinal Hyacinte, les y contraignit par sentence.

Après la mort du Roy Don Sancho de Castille luy succeda son fils Alphóse quatriesme du nom & septiesme Roy en Castille n'estant pour lors aagé que de quatre ans, & comme ordinairement la menorité des Roys engendre des partialitez pour le gouuernement il en aduint aussi au ieune Roy D. Alphonse par la faction de deux grandes maisons de Castille, assauoir l'une de Castro & l'autre de Lara. Ces tumultes & confusions inuitoient le Roy de Nauarre D. Sancho, surnommé le sage, à faire son profit, qui est le but ou visent tous les hommes du monde: de ce faire toutesfois il auoit quelque droit, mes-

1162.
Mort du
Comte Ray-
mond de
Barcelone.

mes d'enuahir le traict de la riuere d'Oja, que l'Empereur D. Alphonse auoit emblé durant le siege vacquant, ou interregne de Nauarre & Arragon. Si se mit en armes, & entre hostillemēt en icelle Prouince, print Logroño, Entreua, & Cerezo: & passant outre, print aussi Birbiesca, & presque tout ce qui se presenta en son chemin, iusques a Burgos: rempara & fortifia toutes ces places, dōt toutesfois il ne fut long temps iouyssant. Toutes ces choses fit le Roy de Nauarre sans resistance de la part de Castille, fauorisé du temps turbulent & de l'enfance du petit Roy D. Alphōse: iuste que du costé d'Arragon il se trouuoit assuré par la paix peu auant conclue avec le Comte D. Raymond Berenger, laquelle fut d'auantage coroborée par le decez d'iceluy, qui suruint l'an 1162. en Piedmōt au bourg de saint d'Almace, prez la cité de Thurin. Ce Prince s'estoit acheminé par mer en Italie, avec son nepueu le Cōte de Prouence, pour conferer avec l'Empereur Federic Barberousse, qui pour lors faisoit guerre aux Milanois.

Reuenant au Roy de Nauarre D. Sancho, il gouerna son Royaume avec grād sagesse, & bonne iustice, ayans autour de

luy plusieurs bons, & vertueux prelates & chevaliers. Quant à ses affaires domestiques, il fut marié avec D. Sancha Infante de Castille, qu'autres appellent D. Beacia, fille de l'Empereur D. Alphonse, & d'elle eut belle generation, assavoir, D. Sancho, qui fut Roy apres son pere D. Fernand, & D. Ramir, lequel fut Euesque de Pampe-lone : car les offices Ecclesiastiques chargés de grans reuenus, n'estoyent de long temps plus chargés de pasteurs, & surueillans aux consciences, & meurs des Chrestiens, mais appanages des enfans des Roys, & fut autrement appelé D. Remy. Outre ces trois fils, elle enfanta trois filles, sçavoir est, D. Berenguela, qui fut mariée au Roy Richard d'Angleterre surnommé cœur de Lyon, & laquelle ayant eu pour douaire le pays du Mayne en France, y vescu le reste de ses iours, apres le decez de son espoux, en louable viduité, la seconde fille du Roy Sancho, & de D. Sancha, fut D. Theresa autrement Constance, qui deceda vierge; & Lacz fut D. Blâche, mariée, au Comte Tibaud de Champagne, & de Br̃e, dont eut source la race des Roys de Navarre de la famille de Champagne & Tibaud leur fils. Environ l'an mil cent

[Genealogia
de Navarre.

1165.

soixante cinq, la sentence du procez d'entre les Euesques de Pampelone, & de Saragoſſe, commenca du temps de D. Lopes, predeceſſeur de D. Viuian, avec D. Pedro de Zarroyan pour leſtandue de leurs Dioces, & iurisdicions, qui auoit eſté iugé par le Legat Hyacinte, Diacre Cardinal du tiltre de ſaincte Marie en Coſuedin, fut confirmée par le Pape Alexandre troiſieſme ſucceſſeur d'Adrien quatrieſme, eſtant a Mompelier en France, lequel par ſa bule confirma auſſi les priuileges de l'Egliſe de Pampelone, & l'ordre des chanoines reguliers de ſainct Auguſtin, inſtitué par l'Eueſque Don Pedro de Roda, ainſi qu'auoyent fait les autres Papes ſes predeceſſeurs.

1173.

L'an mil cent ſeptante trois le Roy D. Alphonſe de Caſtille entra au Royaume de Nauarre, avec vne groſſe armée, contre ſon oncle le Roy D. Sancho le ſage, inuité tant par les courſes & prinſes que iceluy auoit faictes ez terres de la Rioye, & Bureua, durant ſa pupillarité qu'auſſi a l'inſtigation du Roy d'Arragon ſon couſin, le pays duquel D. Sancho auoit aſſailli pendant que l'armée d'Arragon eſtoit au Royaume de Valence, contre les Maures:

estimant qu'en l'absence du Roy, & de la gendarmerie d'Arragon il pourroit bien faire ses besongnes. Estans doncques en armes ces deux Roys de Castille & d'Arragon, & passans par diuers endroits le Roy D.Sancho, il se trouua aucunement foible, pour leur resister, & souffrirent ses pays infinis dommages & calamités. Car du costé de Castille estât son armée vaincue, les Castillans coururent iusques à Pampelone: de l'autre costé le Roy d'Arragon print sur luy la ville & chasteau de Milagro, dont la garnison tenoit perpetuellement sa frontiere en alarme, à raison dequoy il la rasa, mais depuis elle fut rebastie par les Nauarrois. Nonobstant ces deux forces coniurées à la ruine de ce D. Sancho, il se deffendit vaillamment contre le Roy d'Arragon, luy ostant les chasteaux de Trasmis, & Caxuelos, les cheualiers plus renommés qui fussent lors au Royaume de Navarre, comme on voit par les viels tiltres des priuileges des villes & monasteres, estoient Inigo Almoravid en Ronçal, Sancho Ramires, en Aybar, Iordain en Sainte Marie de Vxue, Ximen Almoravid en Peralta, Garcia de Albero en Tudelle, & Martin Ruys en Estella les-

1177.

quels auoyent en gouuernemēt ces lieux & forteresses, & commandoyent aux armées Nauarroises de ce temps. En outre l'an mil cent septante sept le Roy de Castille entra de rechef en Nauarre avec vne armée qui fut de peu d'effet, par les courses que les Maures firent en Castille & Ar-

1179.

ragon: à raison dequoy les deux Roys ioinans leurs forces ensemble, assiegerent la ville de Cuenca. Plus l'an mil cent septāte neuf nouvelle ligue se fit derechef entre ces deux Roys de Castille & d'Arragon, pour faire guerre à celuy de Nauarre, a communs frais, & a commune cōquēste: suiuant laquelle D. Alphōse le noble Roy de Castille pressa tellemēt le Roy D. Sancho, du costé de la riuiera d'Oja, qu'il luy osta les places, dont iceluy s'estoit emparé durāt son enfance, reprint aussi Birbiesca, Cereso, Brauon, Entreua, & Lugroño: demeurant par cē moyen Seigneur, & maistre de la Rioye & Bureua, sans que depuis les Roys de Nauarre les ayent peu recouurer. A ceste perte saioignit la mort de la Royne de Nauarre, Princesse de grāde vertu, laquelle selon aucuns fut enterree en l'Eglise principale de Pampelone.

1181.

Le Roy D. Sancho de Nauarre l'an mil

cent huitante vn fortifia vne petite ville qui s'appelloit lors Gasteiz, pour seruir de barriere contre le Roy de Castille & munir sa frontiere en la prouince d'Alaua. Ce lieu despuis accreu, & augmenté de pourpris, & de peuple, fut appellé Victoire, la partie de laquelle qui de ce temps est appellée Vila de Luco, est ce bourg de Gasteiz, à la nouuelle ville il octroya, le mesme droit qu'à ceux de Logroño, l'amen-
dant & corrigeât en certains lieux: donna aux habitans plusieurs priuileges, mesmes qu'il ny auroit sur eux aucuns iuge ny gou-
uerneur estrangier, mais naturel du pays, & qu'il seroit par eux esleu, & changé, s'il ne se trouuoit fiddle, & capable: lequel priuilege s'appelloit, le priuilege Merino, selon le stile du pays. Ils ont gardé cest ordre en l'administration de leur ville, laquelle est des mieux regies d'Espagne, l'occasion de ce nom Victoria, fut pour quelque victoire obtenue en ceste contrée cōtre les Castillans, ainsi qu'il est bien à presumer: mais par le deffaut des histoires de ce temps, la particularité n'est sceuë. Apres que ceste ville fut venue en la puissance des Castillans, ils l'acrurent de beaucoup plus grand circuit, & y firent bastir les quatre parrois-

ses, de saint Michel, saint Vincent, saint Pierre, & saint Illefonce, ou Alphonse. De ce Roy D. Sancho le sage, est racomté qu'ayant enuiron ce temps, couru la terre de la Rioya & Bureua, laquelle Don Alphonse luy auoit ostée les années precedentes, & estant paruenue iusques prez de Burgos, au lieu dit Atapuerca, il donna vn coup d'espée cōtre vn Oulnée, pour marquer que iusques là s'estendoyent les limites de Nauarre: puis en retournant avec vne quantité incroyable de bestail, & autre butin, ainsi qu'il auoit vn peu passé le monastere de saint Pierre de Cardegna, l'Abbé du lieu, qui estoit vn venerable religieux, print l'estandart du Cid Ruis Dias, bisayeul du Roy Don Sancho (qui estoit enseuely en ce monastere) monta sur vn mulet, accompagné de dix de ses moynes le plus robuste desquels portoit cest estandart, & ce mist apres cest armée, piquant & courant à toute bride, tāt qu'il eut atteint le Roy deuant lequel il s'inclina fort humblement. Le Roy esbay de voir ces moynes ainsi equipés avec vn estandart de guerre, leur fit neantmoins assez bon recueil, comme il estoit deuotieux: & demandant qu'il les menoit, l'Ab-

be luy dit, qu'il estoit l'Abbé de S. Pierre de Cordeгна, & qu'il estoit venu le supplier que pour l'honneur du deffunt Cid Ruis Dias son bisayeul (qui estoit enterré chez eux) & de l'estandart d'iceluy, qu'il voyoit entre leurs mains, il luy pleust laisser la proye qu'il emmenoit. Le Roy y pēsa vn peu à la fin il se sentit tant pressé de la memoire du Cid Ruis Dias, & de la deuotion & grande veneration qu'on auoit lors enuers les religieux, qu'il leur laissa ceste grande proye qu'il auoit faite de toutes sortes de biens, pour les rendre à leurs maistres, dont chacun ne fut pas cōtant. Entre le Roy de Castille, & celuy de Navarre furent les contentions de longue durée, combien que par interualles il y eut quelque repos, mais c'estoit vne paix fourrée, ou soupçon de guerre. L'Ogro-gno & Agufero estoient, par quelque accord fait entre ces Roys, comme neutres entre Navarre & Castille, es mains de Rami de Barea: mais la cité de Calaorra estoit tenue par vn cheualier nommé Don Diego Ximenes, au nom du Roy D. Alphōse de Castille. Or pource que les guerres que ces Roys auoyēt entre eux estoeyēt avec grand deshonneur & dommage de

la religion Chrestienne, dont ils se renom-
moyét tous, le Pape Luce troisieme pour
lors regnant enuoya vn Cardinal Legat
en Espagne, pour voir de les appoin-
ter, lequel y vfa de grande diligence, mais non
auec tel effect qu'il eust bien voulu. En ce
temps le Roy Don Alphonse d'Arragon
ayant fait tenir vn Concile prouincial en
Cattelogne, en la ville de Taragone fit vn
decret entre autres, que les notaires delà
en auant ne mettroyét plus le nombre des
années du regne des Roys de France es
contrats qui se feroient en Cattelogne,
comme ils auoyent obserué iusques alors,
ains seulement l'an de l'incarnation de no-
stre Seigneur Iesus Christ: c'estoit ne vou-
loir plus recognoistre la souueraineté de
France, dont la Cattelogne, & Comte de
Barselonne mouuoit. Puis voyant que le
Roy de Castille ne luy tenoit nul acord,
de grand ennemy qu'il estoit auec le Roy
de Nauarre il deuint son amy. Pour ce fai-
re les deux Roys s'entreurent au lieu de
Boria, & firent ensemble vne alliance of-
fensiue & defensiue: la fut accordé que les
amis, & ennemis de l'vn de ces Prince se-
royent réputés pour tels, par l'autre, & se-
royent tenus de s'entreayder l'vn l'autre, à

deffendre leurs Estats , pour l'obseruation duquel accord ils mirent en gage , chacun de sa part, les villes & Chasteaux suyans: sçauoir est, de la part de Nauarre, les villes de Valtierra Ablitas, Mōtagu , sainte Marie de Vxe, Chastillon de Sanguesse , avec leurs forteresses, & de celle d'Arragon, les villes de Borja, Sob, Malon, Ruesta, & Pettillas, pour la garde de ces dix places , fut esleu de commun vouloir des deux Roys, D.Fernād Ruys d'Acagra, cheualier d'Origine Nauarrois , mais qui demeueroit en Arragon, & estoit gouuerneur & capitaine de Daroca, & Calataiub. Cestuy fit foy & serment a tous les deux Roys , de bien & fidellement garder ces places , pour les deliurer toutes dix à celuy des deux , au preiudice & dommage duquel l'autre auroit contreuenue au present traicté: lequel fut iuré non seulement par les Roys , mais aussi par les aysnés de leurs enfans, D.Sancho de Nauarre, & D. Pedro d'Arragon. Et fut adiousté qu'ou, & quand D.Fernād Ruys se voudroit descharger de la charge de ces lieux, & forteresses, que quatre cheualiers de chasque part seroyēt nommés, pour d'entre eux en choisir deux: l'un de ceux qui auroyent esté nommés par le

1190.

Roy de Nauarre, l'autre de ceux du Roy d'Arragon, es mains dequels seroyent remises les fortresses avec mesme serment, asçauoir les cinq de Nauarre au cheualier Arragonnois, & les cinq d'Arragon au Nauarrois. Ceste ligue faicte l'an mil cent nonante fut suiuite d'un autre d'entre les Roys d'Arragon & celuy de Leon, ou pareillement D. Sancho Roy de Portugal, fut attiré tous contre Castille. Ces alliances faictes & confirmées avec tous les sermens, & solemnités requises, ne produirét pas si grand orage qu'elles auoyét menasé. En fin apres que le Roy D. Sancho le sage Roy de Nauarre eut fait quelques courtes legeres en Castille, il mourut l'an mil cent nonante quatre, ayant regné quarante & trois ans sept moys, & quelques iours, le corps duquel gist en la grande Eglise de Pampelone.

1194.

De Don Sancho VIII. & dernier du nom & XXI. Roy de Nauarre: surnommé le Fort, & autrement l'Enfermé.



Le Roy de Nauarre D. Sancho le Fort à son aduenemēt à la Couronne fut conseillé de proceder enuers

euers le Roy de Castille avec prudence, c'est à dire, dissimulant iusques à tant qu'il fut bien estably: cest pourquoy le Roy D. Alphonse bastit tout a son aise la ville de Nauare, dās le pays de la Rioye, qui estoit litigieux entre eux, & sur la frontiere de Nauarre. Son furnom de Fort luy fut donné pour sa magnanimité, mais on l'appella aussi l'enfermé, à cause que sur ces derniers iours, luy estant venu vn cancer à vn pied, qui le luy rendoit gros, enflé, & douloureux, il s'enferma dans le chasteau de Tudelle, sans qu'il premist qu'aucun le vit, ny parlast à luy, sinon ses seruiteurs ordinaires, & domestiques. Ce fut le xxj. Roy de Nauarre en nombre, descendu par ligne masculine du premier Roy D. Garcia Ximenes, laquelle auoit continuée en successeurs masles par cinq cens dix huit ans, deffailant en cestuy cy par la mort de l'Infant D. Fernand son fils, deffunt durant la vie du pere, ainsi que nous dirons.

Ce Prince fut grandement estimé en vertu, prouesse, iustice, & police, de maniere que les Nauarrois tiennent que ce fut le meilleur Roy qui eut encor regné sur eux. Entre autres memoires qu'il laissa de luy, il diuertit le cours de la riuere d'E-

bro, qui couloit par Mirepoix, & le mena passer par Tudelle, de luy fort aymée, & fréquentée, laquelle il orna d'une Eglise colegiale, d'assez belle fabrique, bien & richement par luy douée. Il rempara & fortifia les places de ses frontieres deuers Castille & Arragõ, & en erigea de nouvelles, cõme en la Prouince d'Alaua, le chasteau de Treuigno: amplifia la ville de Victoria, & en la Rioye, la Garde, & sainct Vincent: & du costé de Guyenne, que les Anglois possedoyent en ce temps-là, il fortifia la ville de sainct Sebastien, & Fontarabie en Guipuscoa, mais ce fut pour autruy. Quant aux bastimens de religion, outre l'Eglise colegiale de Tudelle, il fit, & fonda pour sa sepulture, sainte Marie la Royale a Roncevaux, college de chanoines, & en outre les monasteres de sainte Marie de Hitero, & de sainte Marie de Oliua, tous deux de l'ordre de Cisteaux, dõt les Abbés ont siege, & voix es cours, ou Estats de Nauarre, comme aussi le prieur de Roncevaux: neantmoins il ne fut gueres liberal hors la necessité, a ces ceuures religieuses: parquoy il amassa grans thresors, & richesses voire plus que Roy qui fut en Espagne. Par ceste sienne chicheté, possible aduint

qu'il diminua ses terres, & perdit les Provinces d'Alaua, & Guipuscoa, lesquelles furent jointes à Castille. La juridiction de Nauuare n'auoit iamais esté tant retranchée, ny restraincte, que du regne de ces deux Roys Sanches, pere & fils.

Or ce Roy, donna luy mesme occasion au Roy D. Alphonse le noble de luy courir sus: car le voyât fort empesché a garder ses pays des inuasions des Maures, enorgueillis par la recente victoire, & meisme qu'il gisoit au liét bleffé, il luy sembla téps conuenable de recouurer ses terres de la Rioye, & Bureua, que le Roy de Castille luy detenoit. Parquoy ayant comploté avec le Roy de Leon son allié, & confederé, il entreprint la guerre contre le Roy D. Alphonse le noble, & entra l'an mil cēt II 96. nonante six dans le pays de Castille, mettant tout à feu, & à l'espée, principalement en la cōtrée de Soria, & Almacan. Le Roy de Leon s'auançant de son costé es terres de Campo, fit encor pis: car il y mena des Maures du pays d'Extremadura, avec lesquels il auoit ligue, & ne faut douter que ledit Roy de Castille n'eust esté assailly de celuy d'Arragon, si la mort dudit Roy d'Arragon ne fut suruenue l'année mesme

mil cent nonante six en la ville de Pargnan. Et fut telle l'affection de ce Roy Alphonse de Castille, de se vanger des Roy de Nauarre & Leon, que pour y pouruoir plus seurement & aysement entendre, il mesprisa les iniures & dōmages qu'il auoit receu du Miralmumin Roy Maure, & fit trefues avec luy, tant auoit-il plus à cœur la vengeance contre les Chrestiens, que contre les infidelles.

La maison de Nauarre approchant de sa fin, par faute d'heritiers masles, il est raisonnable que nous preparions les lecteurs à l'accès qu'ont eu à ceste Couronne les descendans des femmes qui en sont issues, disans quelque chose de la maison de Champagne en Frâce, ou D. Blanche, fille du Roy D. Sancho le sage, & sœur de ce Roy D. Sancho le fort, regnāt en ce tēps fut mariée. Les Comtes de Champagne ont esté des plus grans terriens de France, illustres par ancienne noblesse, tant de leur estoc, qu'à cause de leurs alliances & mariages és plus grandes maisons de l'Europe, l'an 909 est faicte mētion d'Odon premier Comte de Champagne, de Brie, & en outre de Blois, de Chartres & de Touraine: lequel fut vn grand remueur d'affai-

res, eut plusieurs contentions contre le Duc Ricard de Normandie, duquel en fin il espousa la fille en secondes nopces, fit la guerre au dernier Roy de Bourgogne, Rodolphe, & fut cause qu'il resigna sceptre & couronne à l'Empereur Conrad: la fille duquel Odon auoit eüe a femme en premieres nopces, & d'elle engendré Estienne & autres.

Cest Estienne fut Comte de Champagne l'an mil trente deux apres le decez de son pere, & Seigneur des autres Estats d'iceluy par successions fraternelles. Il mourut a la Guere sainte en Syrie, ayant engendré de sa femme Alix, ou Adella, fille de Guillaume le conquerrant bastard de Normandie, & qui conquist le Royaume d'Angleterre, Thibaud & autres enfans.

Thibaud fut Comte de Champagne, premier de ce nom, l'an mil cent vn, surnommé le grand: posseda aussi les Côtes de Brie, de Blois, & de Chartres surnommé pere des pauvres: eut a femme Mahaut Princesse Allemande de grande maison, de laquelle il eut, entre plusieurs autres enfans, Henry qui fut Comte de Champagne & de Brie apres luy, l'an mil cent cinquante vn.

1196.

1201.

Cest Henry furnommé le large, quatriesme Comte de Champagne, fut en Asie avec le Roy Louys le ieune, & puis avec Philippes Auguste, où il fit grands seruices à la cause: espousa Marie de Frâce, fille du Roy Louys septiesme dict le ieune, & de la premiere femme Leonor, Duchesse de Guienne, & Comtesse de Poitiers. De ce mariage sortirent Henry, & Thibaud, qui furent successiuemēt Comtes de Champagne, l'un apres l'autre. Henry alla à la guerre d'Asie, & se mariāt avec la fille du Roy Almaric, ou Amaury de Hierusalem, veufue de Conrad, marquis de Montferat, fut fait Roy de Hierusalem, mais s'en reuenant en France, il mourut sans enfans males. Parquoy son frere Thibaud deuziesme de ce nom se saisit de la Comté de Champagne, l'an mil cent nonante six, au preiudice de deux filles du Comte Henry defunt: & fut fiziesme Cōte Palatin d'icelle. Ce fut ce Thibaud qui espousa D. Blanche, fille du Roy D. Sācho le Sage, laquelle enfanta vn fils posthume, assauoir, apres le decez de son mary, enuiron l'an mil deux cens vn nommé Thibaud, comme le pere qui fut Comte de Champagne & de Brie, nonnobstant les preten-

tions d'une sœur qui estant née durant la vie de leur pere : laquelle en vain debatit ceste succession. Outre-ce par le decez de D. Sancho le fort, dont nous traittons à present, sans enfans, il vint a la Couronne de Navarre, par succession maternelle, Prince grandement allié es maisons de France, & d'Angleterre, duquel nous traiterons amplement en son lieu. Maintenant revenons au Roy D. Sancho, surnommé le fort, regnant de ce temps en Navarre.

Ce Prince se maria avec une Dame Françoisse fille de Raymond, Comte de Toulouse quatriesme de ce nom, qui s'appella D. Clemence : d'icelle tient-on qu'il n'eut aucuns enfans, parquoy selon certains auteurs, il la laissa, & espousa une fille de l'Empereur Federic Barberousse : toutesfois ce deuziesme mariage est assés incertain, mais quant au premier, Garcia d'Euqui, Evesque de Bayone, a laissé par escrit, qu'il en eut un fils, nommé D. Ferdinand, dit Calabaça lequel mourut du vivant de son pere, de la cheute d'un cheval, courant apres un Ours, & fut enterré en l'Eglise collegiale de Tudelle. Il n'eut autres enfans legitimes, mais bien est fait mention d'un fils bastard, nommé Guillaume,

1200.

Prince Ma-
humetiste
tenant reli-
gieusement
sa foy.

Le Royau-
me de Na-
uarre en
proye aux
Castillans &
Aragonois.

Or estans les anciennes Lignes de Castille, & d'Arragon renouvelées entre les Roys D. Alphonse le noble, & D. Pierre, ils s'armerēt au dommage du Roy de Navarre, environ l'an mil deux cens, ce que voyant iceluy, chercha de s'appuyer des Princes estrangers, & en vint iusques la, qu'il sollicita le Roy des Arrabes, Abem Joseph Mazemut, de rompre la trefue qu'il auoit faicte, pour dix ans, avec le Roy de Castille: affermans aucuns auteurs que D. Sancho alla luy mesme en personne en Aphrique traiter cest affaire avec ce Prince Mahumetiste: lequel neantmoins ne voulut rompre sa foy, bien luy fit-il present de grande somme de deniers, & de plusieurs riches ioyaux. Durant son absence les Roys coniuers entrerent par diuers endroits es terres de Navarre, où il auoit laisse pour son Lieutenant general vn cheualier appelle Alphonse Fernandes de Guendulayn: & prindrent Ayuar, & le val de Ronçal, qui demurerent au Roy d'Arragon, & d'autre costé Miranda, & Insura, lesquelles places le Roy de Castille retint à luy, estans d'acord ces deux Roys colligues de partir ainsi leurs conquestes qu'ils feroient sur le Roy de Navarre. Ce

fut tout ce qu'ils firent pour ceste année. Quant au Roy D. Sancho, il tomba malade, en son voyage, d'une maladie aigue, & pestilentielle, laquelle se resolut, & termina en fin en vn cancer qui luy dura toute sa vie comme cy deuant nous auons dit. Ceste indisposition entendue en Espagne, donna courage au Roy de Castille de poursuivre son heur, & essayer par tous les efforts a luy possible, de ioindre cest Estat aux siens, estimant que le Roy D. Sancho, qui n'auoit point d'enfans, ne la feroit pas longue, & que iceluy mort, il n'y auroit pas grande resistance qui le peut empêcher, d'autant que l'un de ses freres, Don Ramir estoit d'Eglise, l'autre ieune, & absent, & le Comte de Châpaigne, son beau frere, estoit ou mort, ou acheminé pour le voyage de la terre Sainte: quoy que ce fut, il estoit tant esloigné, qu'auant qu'il fut venu de France, debattre le Royaume de Navarre, où il auoit droict, Il esperoit d'en estre des-jà possesseur. Sur ce dessein il remet dessus nouvelle armée, & entra en Alaua, courut toute ceste Prouince, & finalement assiegea la ville de Victoria, laquelle fut vaillamment defendue par D. Alphonse Fernandes de Guendulain qui

s'estoit ietté dedans avec plusieurs bons foldats du pays d'Alaua & de Nauarre, & soustint le siege longuemēt, sans estre aucunement secouru, ny mesmes auoir nouuelles du Roy D. Sancho, tant que les viures leur commencerent à faillir. Durant ce siege vindrent vers le Roy D. Alphonse de Castille les deputés de la Prouince de Guipuscoa, luy offrir que s'il alloit en personne en ceste part, ils se rendroyent a luy, desireux de long temps d'estre vnis à la Couronne de Castille, à cause des nouueautés, & surcharges a eux imposées par les Roys de Nauarre, l'heur ou malheur desquels ils auoyent suiuis l'espace de septante sept ans. Cest offre fut tres-agreable au Roy D. Alphonse comme chose fort auantageuse: parquoy laissant au siege de Victoria pour continuer iceluy D. Diego Lopes de Haro, il se transporta en personne en Guipuscoa, laquelle Prouince se mit en sa protection, & des Roys de Castille, a certaines conditions, & liurerent entre ses mains la forteresses de saint Sebastié, & Fontarabie, ensemble le chasteau de Veloaga, qui est en la vallée d'Oriarcum frontiere de France, lieu propre pour luy assurer au besoin vn passage en Guyenne,

*Guipuscoa
acquis par
les Roys de
Castille.*

tenue lors par les Anglois, d'autant qu'il auoit espousé vne Princesse Angloise. Outre ces places il luy baillerent le chasteau d'Athau, en la frontiere de Navarre, qui est ruiné de ce temps le chasteau d'Achoros, du val de Lenix, & le chasteau d'Arrasate, dit a present Mondragon, en la frontiere de Biscaye, avec le fort qui estoit lors basti sur la montagne de Helosua, duquel aparoiſſent encor auiourd'huy les ruines, laquelle montagne est en la iurisdiction de la ville de Vergara, & est dicté autrement Arizua. Ainsi obtint le Roy de Castille, D. Alphonse le noble, ceste Province de Guipuscoa, sans venir a la rigueur des armes, & s'en retourna grandement content au siege de Victoria, qui continuoit, estans les assiegés au bout de leurs viures : à raison dequoy ils sollicitoyent par frequens messagers, selon les moyens qu'ils auoyent, le Roy D. Sancho leur Seigneur, l'aduertissant de la necessité ou ils estoient reduits, qui les iettoit es mains de son ennemy, s'il ny pouruoyoit, mais luy ne ſachant pas tout ce qui s'y estoit passé, absent, mal disposé, & esloigné de son conseil, leur fit entendre qu'ils se rendissent au Roy D. Alphonse, aux

1200.

meilleurs conditions qu'ils pourroyent. Ayant receu ceste responce, les assiegés tinrent encores bon, l'espace de dix sept iours, attédant si le Roy auroit point prins meilleur aduis, mais voyans qu'il ne leur venoit chose de sa part qui leur donnast esperance d'estre deliurés, estās extrêmement pressés de la faim, & de necessité de toutes choses, rendirent la ville, autrement par son assiette, & par l'artifice de ses murailles, & tours estimée inexpugnable. Par la prise de Victoria, le Roy de Castille fut maistre de ceste autre Prouince d'Ala-ua: la contrée de Araxa se rendit: il print Irrurita, & Maragnon, sainte Croix, & toute la vallée de Campeco. Ceste belle conquiste fit ce Roy D. Alphonse, l'année mil deux cens, partie par armes, partie par redditiō volontaire: ce qui diminua beaucoup le Royaume de Nauarre, combien qu'aucunes places se remirent derechef en l'obeissance du Roy D. Sancho, & si la Prouince d'Ala-ua, ny son hermaudad, ou confrerie, ne prindrent oncques droit, ny iustice de Castille, excepté Victoria, & Treuigno. Or pour s'assurer plus des Guipuscoans, & pour les gratifier aussi, le Roy de Castille fit rebastir en ceste Prouince,

sur son riuage maritime, les villes de Guetarra, & Motrico, lesquelles il fortifia de bonnes murailles, & tours, & doua de priuileges. Apres que toutes ces choses furent faiètes, le Roy de Navarre arriua à Carthagene, & s'escoula par Arragon dās son pays, avec grandes richesses qu'il apportoit d'Afrique, estant arriué il trouua que le Roy de Castille auoit assiegé freschement la ville d'Estella, laquelle fut deliurée du siege par le bruit seul de sa venue (tant à de pouuoir le nom, & la reparation d'un Roy present) que s'il eut demeuré d'auantage en Afrique, son Royaume de Navarre estoit totalement perdu. Ayant veu oculairement les dommages que le Roy D. Alphōse de Castille luy auoit faits, il luy enuoya des Ambassadeurs le prier de luy restituer ce que fās iustice, ny droit, il luy auoit prins durant son absence, contre la maniere de guerroyer accoustumée en ce siecle plein de loyauté, mais le Roy de Castille l'entretint par delais, & respōces ambiguës, laissant le Roy D. Sancho considerer ses pertes tout à loisir.

L'an mil deux cens trois ils conclurent 1203.
entre eux vne treue, pour la conclusion
de laquelle le Roy D. Sancho vint en per-

Treue entre
Castille, &
Navarre.

sonne avec assurance, a Guadalaiara en Castille: la fut accordé que les armes cesseroient pour cinq ans, entre les deux Royaumes, avec resolution de quelques places de celles que le Roy de Castille auoit prinſes de Nauarre: & pour obseruation de treues furent mises en depost entre main de cheualiers, nommés par les deux partis, les chasteaux d'Abusejo, Clamio, & Iuucra, de la part de Castille, & Irureta, Luzula, & saint Adrian, du costé du Roy de Nauarre, & pource que la guerre d'entre Nauarre & Arragõ duroit toujours, le Roy de Castille print sur luy la charge de les apointer, & ce pendant fit cesser les armes de toutes pars.

1207.

Le Roy de Nauarre D. Sanche le fort n'ayant eu encor assez de pertes, il luy en arriua vne l'année mil deux cens sept. Ce fut la pitoyable mort de l'Infant D. Fernand son frere, Prince bien aymé des Nauarrois, dont estoit mise au rang des calamités aduenues à ce Royaume en ce tēps, assauoir. Qu'estant celebrés par festes, & superflues resiouissances, la feste de saint Nicolas d'icelle année 1207. en la ville de Tudelle, selon la coustume des Chrestiens, ainsi que ce Prince genereux couroit à

cheual armé, faisant certains ieux, & exercices par luy ordonnés, vn porc entrepassant par les iambes de son cheual le fit tomber si mal a poinct, qu'il se froissa la teste contre vne colonne de pierre, dont il mourut treze iours apres, estant aagé de trête ans. De ce Prince, lequel les auteurs louent pour vn braue, & vertueux cheualier, n'est faite métion aucune en la guerre d'entre Castille, & Nauarre: parquoy est à presumer que le Roy son frere se doutant qu'il n'entreprint quelque nouveauté contre luy en son absence, & a son preiudice, l'auoit amené avec luy en Afrique, ores qu'il luy portast grande amitié. Ainsi sont les affaires du mōde mellées de plaisir, & d'ennui, d'amitié, & de ialousie, ou que ce ieune Prince volontairement fust allé avec son frere en Afrique desireux de voir, & se faire cognoistre.

Suiuant ce que le Roy de Castille auoit promis à celuy de Nauarre de faire auoir paix entre luy & Arragon, en fin l'an mil deux cens neuf elle fut du tout conclue: ou fut notable le deuoir qu'y fit l'Archeuesque D. Roderigo Ximenes de Toledé. Ceste paix fut faicte estans assemblés en campagne les deux Roys és enuiron de

Mort de
l'Infant de
Nauarre
D. Fernā.

1209.

*Mutinerie
en Pâpelone*

Malleu. Entre autres particularités que les Espagnols escriuent des accords d'icelle, le Roy de Nauarre presta à celuy d'Arragon vingt mille maravedis d'or, pour lesquels furent baillés en gage, & depositez les chasteaux de Gallur, Pitilla, Pina, & Esco, qui furent mis, pour le temps de six mois, es mains de D. Ximeno de Rada, cheualier, au bout desquels, si le Roy d'Arragon ne rendoit les deniers, les places seroyent mises en la puissance du Roy de Nauarre, pour en iouyr iusques à rébourcement. Les dissentions, & guerres qui auoyent duré entre Nauarre, & Arragon, par l'espace de soixante cinq ans, furent alors terminées, & fut establie bonne, & longue paix entre ces deux Estats. De ce temps il aduint grand desordre, & mutineries entre les subiets, de Pampelone, a quoy auoyent donné occasion les ieunes filles de la ville, qui s'estoyent iniuriées les vnes les autres, & comme souuent d'une petite estincelle s'allume vn grand feu, qui embrase tout vn edifice voire vne ville: ainsi ces querelles firent, que les habitans de Pampelone se diuisans en partialitez, ceux du bourg de saint Seruin, & ceux du bourg de saint Michel, pour soustenir
chacun

chacun ses femmes, vindrent aux coups, & aux meurtres, sans qu'on y sceut dōner aucun ordre, en l'absence du Roy, lequel neantmoins les appaisa, par sa presence, pour quelque temps: mais s'estant despuis retiré dedās son chasteau de Tudelle, sans plus se communiquer à personne, tant a cause du mal incurable de son pied, qui rengregeoit, que pour autres occasions, les ieunes hōmes de Pampelone recommencerent leurs insolences, & inimities, de sorte qu'un iour s'estans atachez ceux dudit bourg saint Michel, à ceux de saint Seruin, à belles armes, la furie, & rage fut telle, qu'il demeura sur le paue plus de huit cens personne, tant hommes femmes, que filles, & furent brulés plusieurs maisons, tant estoient ils montés de venimeuse rage les vns contre les autres. Ce qui fit sortir le Roy D. Sancho de sa volontaire prison, afin d'y remedier comme il fit. Entre autres remedes, qui pouuoient seruir pour l'aduenir, il cognut que la paix ne pouuoit point durer entre un grand peuple, ou estoit multitude de ieunesse, qui n'auoit gueres affaire, & qu'il estoit necessaire que entre eux sourdist tous les iours quelque haine, si on ne trouuoit moyen de les em-

*Autre mis-
tinerie en
Pampelone
avec grand
meurtre.*

*Oisiveté
mere des
querelles.*

ployer. Voyant donques que son peuple estoit adonné aux armes, plus qu'à autre exercice, il s'auisa, puis qu'il n'auoit aucune guerre avec ses voisins, de dresser quelque garnison en la frontiere des Maures, ou seroyent enuoyés les ieunes hômes de ces pays, pour se façonner a certaine discipline de guerre, & pratiquer les armes honorablemēt cōtre les ennemis des Chrestiens: A ceste cause il pria le Roy D. Iacques, ou ceux qui pour lors regissoyēt son Royaume d'Arragon, de luy vendre les fruiçts, & la iouyssance des villes d'Ademus. Castelfabib, Ferrera, Ferrelon, & la Catamor, pour sa vie, pour y dresser son escole d'Armes, & les obtint, confirmans les mesmes moyenneurs, la paix accordée entre les Roys D. Sancho, & D. Pedro, les années precedātes, laquelle commençoit a se troubler entre ces deux Estats.

Ce siecle produisit au monde des ordres nouueaux de religion tous contraires aux precedants ordre de moines: car au lieu que iceux la ne se pouuoient saouler de biens & richesses temporelles qui leur estoient données par les Roys, & grans Seigneurs, comme à l'enuy les vns des autres, ceux cy les reiectoyent, & faisoient

estat d'estre pauvres, & ne posseder rien au
 mode: le premier fut celuy des freres pres-
 cheurs, que nous appellons en France Ia-
 cobins, l'autheur duquel fut ce chanoine
 d'Osma, venu d'Espagne en France, avec
 son Euesque, pour soustenir l'autorité de
 l'Eglise Romaine contre les Albigeois, &
 leurs adherans, declarés heretiques par le
 Pape Innocent iij. Et fut le veu, & profes-
 sion de ceste regle, de prescher cõtre ceux
 qui se deuoyeroient de la foy. Environ
 le commencement de l'an mil deux cens
 vingt deux. D. Ramir Infant de Navarre,
 frere du Roy D. Sancho l'enfermé fut fait
 Euesque de Pampelone, de la charité du-
 quel les autheurs escriuent, avec admira-
 tion, qu'il donnoit tout ce qu'il auoit aux
 pauvres, & que tant plus luy abondoit,
 plus il donnoit.

Commence-
 ment de
 l'ordre des
 Iacobins,
 nommez freres pres-
 cheurs.

1222.

Le Royaume de Navarre en ce temps
 estoit assés mal gouverné, à cause de la vie
 solitaire, & enfermée du Roy, qui ne se
 communiquoit a personne, qu'à ses serui-
 teurs domestiques, & ne vouloit ouyr par-
 ler d'affaires. A ce mal survint encor la
 mort de l'Euesque de Pampelone, D. Ra-
 mir son frere lequel pouuoit encor aucu-
 nement retenir par son autorité, & reue-

1231.

rence ceux qui eussent voulu troubler cest Estat, domestiques, ou estrangers: parquoy environ l'an mil deux cens trente vn. D. Lopes Dias, Seigneur de Biscaye, qui auoit quelques terres en la souueraineté de Nauarre, incité, & soustenu par le Roy Don Fernand de Castille, trouua occasion, & pretexte de faire quelques rauagemens en ce Royaume. D'autre part, le Comte Thibaud de Champagne pretendant droit audit Royaume de par sa mere D. Blanche, fille du Roy D. Sancho le sage, eut intelligences, & pratiques secretes en Nauarre, pour estre admis a la regime du Royaume, durant la vie du Roy D. Sancho l'enfermé: dont iceluy auerti, apres longue négligence, commença à s'appercevoir de son domniage. Partant desplaisant, & despité, de ces entreprinſes, tant du Roy de Castille, que du Comte de Champagne, il se delibera de les fruster tous deux de leurs pretensions, & se vanger specialement du Roy de Castille: Il fit entendre au Roy D. l'Aime d'Arragon, qu'il auoit chose a luy communiquer, qui redonderoit grandement à son profit: & pource le prioit de se vouloir rendre a Tudelle, s'excusant de ce qu'il n'estoit luy mesme venu le trouuer,

sur l'empeschement, & indisposition de sa perſonne Le Roy d'Arragon ne faillit de venir à Tudelle: & pource que le Roy de Nauarre ne pouuoit bouger de la chambre, il entra au chasteau, & parlerent enſemble. Le Roy D. Sancho s'eſtant grandement plaint du Roy D. Ferdinand de Caſtille, qui ne ſe contentant de poſſeder tant de terres que ſes predeceſſeurs luy auoyent rauies, auoit encor nouuellement couru, & fourragé ſon pays, luy demanda conſeil, & ayde, pour ſ'en reſſentir: & ayāt diſcours pareillement ſur la deſobeiſſance & peu de reſpect du Comte Thibaud de Champagne, d'auoir attenté de trācher du Roy de Nauarre luy viuant, conclud que ſ'il vouloit faire vne ferme alliance avec luy, & entre Nauarre, & Arragon, pour aſſaillir le Royaume de Caſtille, & ne ceſſer qu'ils n'euiſſent contraint le Roy D. Ferdinand à luy reſtituer les terres de la riuiera d'Oja, Bureua, Alaua, & Guipuscoa, ou icelles conqueſtes, luy faire rendre les fruits, & reuenus d'icelles, & payer les frais, & deſpenſes de la guerre, il ſeroit content d'entendre a vne mutuelle donation des deux Royaumes fort auantageuſe pour le Roy d'Arragon, & ſon fils Don

Alphonse, assavoir, que les suruenãs d'entre eux deux heritaissent de tous les deux Royaumes. Le Roy D. Iayme trouua cela fort bõ: car il estoit ieune, & en fleur d'aage, & son fils aussi donnoit espoir de viure, la ou le Roy D. Sancho auoit desia passé la soixante huitiesme année de son aage, & au demeurant estoit si gras, & plein de humeurs, & tant trauaillé de son cancer, qu'il n'attendoit que l'heure de desloger de ce monde. Cest accord entre eux faict, ils arresterent que l'année suiuaute les gës de guerre, de l'vn & de l'autre Royaume, seroyent prests, & se trouueroyent en lieu assigné au moys de May. Rien n'estoit plus à cœur au Roy D. Sancho, que de recouurer la Prouince de Guipuscoa, estimant que par la separation d'icelle, le Royaume de Nauarre estoit priue d'vne des principales cõmodités que puisse auoir vn pays, qui est la marine, les Seigneurs, & principaux du cõseil du Roy D. Sancho, en cest accord, furent D. Garcia Almoravid, D. Sancho Fernandes de Montagu, D. Guillaume Baudouin, & D. Guillaume Iustice de Tudelle, qui est vne principale dignité. Ceux cy, & autres Seigneurs, avec les députés des villes de Nauarre, signerent les

conventions & accords d'entre ces deux
rois : ce qu'ils firent du costé d'Arragon
les plus grands Seigneurs, & qui tenoyent
les principales charges, entre lesquels sont
nommés D. Pedro Fernandes d'Acagra,
seigneur d'Albarrazin, Athon de Foces,
Grand Maistre, Guillaume de Moncade,
Rodrigo Lizaue, Artal de Lune, Simon
Garcia, Blasco Maza, Pedro Perez, Justice
Major d'Arragon, & Pedro Sanches, se-
cretaire d'estat d'Arragon. Pour fournir
à ceste guerre, il falloit que le Roy D. San-
cho mit la main à ses thresors, qui estoient
grands, car ayant fait assez longue années
une vie retirée, il avoit peu aisement accu-
muler, estant exempt de despenfes : il des-
bourça doncques au Roy d'Arragon cent
mil sols d'or, cest à dire escus, ou ducats,
par prest, & aduance, & eut en gage Her-
era, Pegna retonda, Ferrelon, & Faxiue:
& comme il estoit homme prudent, & fort
entendu au fait de la guerre, il ordonna
tresbien ce qui estoit de faire en ce com-
mencement: mais l'amour qu'il portoit à
ses thresors, gasta tout: ioinct que le temps
venu qu'il falut marcher contre Castille,
& que les armées estoient en point, il vint
nouvelles au Roy d'Arragon, que l'isle de

*Espeux au
Conseil des
Rois dom-
mageables.*

Majorque s'estoit rebellee: parquoy ayant plus à cœur de garder le sien, que d'endommager autrui, il se seruit pour soy des gens de guerre qu'auoit mis ensemble, pour la guerre de Castille, lesquels il mena à Majorque: tellement que le Roy de Nauarre se trouua foible, pour entreprendre d'entrer en Castille, ou le Comte D. Lopes de Haro estoit en armes, pour le combattre au passage. Il luy sembla que le Roy D. Iaime s'estoit moqué de luy, si qu'entrant en grande colere contre luy, il voulut rompre tout l'accord, & paches qu'ils auoyent faictes ensemble. De tout ce qu'il disoit & faisoit, estoit le Roy D. Iaime aduertit par quelques cheualiers Nauarrois peu fidelles à leur Prince, & ennuyés de ces façons de viure estranges & desdaigneuses, dont D. Pedro Ximenes de Valtierra en estoit l'un. La guerre de Majorque en bref temps paracheuée, le Roy D. Iaime retourna à Tudelle pour s'excuser, & s'offrir de satisfaire en l'aduenir, & mesme de fournir pour la guerre de Castille deux milles cheuaux, & autres forces: mais il ny eut ordre que le Roy D. Sancho voulust entrer en conserance avec luy. Dauantage, estant D. Garcia Almoraid, & D. Iean Perez de

Batezan, capitaines de l'armée qu'il auoit sur la frontiere contre Castille, a la veue des ennemis, reduits a tel point par Don Lopez Dias de Haro, qu'ils pensoient de iour à autre deuoir estre attirés a la bataille, il mit a nonchaloir eux & tout ce qu'ils faisoient: & escrit-on qu'un gentilhomme enuoyé de leur part, pour communiquer au Roy l'estat des affaires, & luy demander deux cens cheuaux de renfort, moyennant lesquels les capitaines se faisoient forts de donner bataille aux Castillans, demeura quatre iours entiers sans pouuoir auoir entrée, ny audience. Ces meurs farouches & despitueuses firent que le Roy D. Iain se retira en Arragõ, fort mal content, & que les Castillans firent des dommages en Navarre, a quoy il eut peu reparer aysement, dont il saigrit encor d'auantage, en sorte qu'il deuint insupportable a ses officiers, mesmes domestiques, qui ne pouuoient trouuer moyen de faire chose a son gré. Ce chagrin & trauail d'esprit ioint avec la grande charge de son corps replest & mal aisé, sa maladie longue & incurable avec le bon nombre d'ans qu'il auoit, le mirent au tombeau l'an mil deux 1234, cens trente quatre, ayant regné trête neuf

*Meurs e -
stranges du
Roy Don
Sächo en sa
vieillesse.*

ans, neuf mois, & dix iours. Il fut enseuely au monastere Royal des Chanoines de sainte Marie de Ranceuaux, qu'il auoit luy mesme fait construire.

*De D. Thibaut, premier du Nom, & XXII.
Roy de Nauarre, surnommé le Majeur &
Comte de Champagne, premier Roy,
qui par ligne maternelle ha regné
en Nauarre.*

SI tost que le Roy D. Sancho fut mort, les Nauarrois enuoyerent en France, au Comte Thibaut de Champagne, fils de D. Blanche sœur du Roy deffunt, luy dōner nouuelles de ceste succession a luy escheue, l'admonestant de se hastier, auant que le Roy Don Iacques d'Arragon s'en saisist, en vertu des droits pretendus, à cause du don mutuel passé entre les deux Roys a Tudelle, & par le moyen aussi des intelligences qu'il pouoit auoir au pays: en quoy le Comte ne se montra paresseux, car ayans eu des partisans en Nauarre, qui l'auoyent aduertty de tout ce qui s'estoit passé entre ces deux Roys, & finallemēt de la mort de son oncle, les Ambassadeurs le trouuerent ja en

ordre & equipage de marcher vers Navarre, ou il arriua en tēps oportun, pour faire ses affaires avec aise & commodité, a cause des empeschemens qui detenoyent le Roy D. Iayme, lesquels luy importoyent plus, que non pas de poursuiure ceste donation faite au preiudice des vrais heritiers de la Couronne de Navarre, sans raison quelconque, par vn Roy troublé de violentes passions, tant de corps, que de sprit. Aussi est certain que le Roy d'Arragon n'en fit iamais grand estat: car mesme aucuns ont laissé par escrit, qu'il quitta, sans difficulté aucune, les Navarrois (eux de ce le requerans) du serment, foy, & hommage qu'ils luy auoyent presté lors que le cōtract d'entre luy & le Roy D. Sancho defunct fut passé à Tudelle: autres disent que depuis il en fit vn don, & remit tout ce droit à D. Pedro son fils, pour le poursuiure avec le temps, comme de chose ou il y auoit peu d'esperance. Ainsi fut receu, déclaré, & Couronné Roy de Navarre Don Thibaud Comte de Champagne, avec grand contentement & resiouissance de tous les bons Navarrois. A son aduenement il iura & confirma les dats & priuileges du Royaume, & mesme les augmen-

2. Ligne des
Roys Na-
warrois.

ta en mieux, ce fut l'origine de la seconde ligne masculine des Roys de Nauarre, estant en D. Sancho acheuée la premiere, qui depuis D. Garcia Ximenes auoit duré l'espace de cinq cens dix-huit ans. Les successions tombantes en quenouilles, des estats, & souuerainetés, contre tout droit diuin, naturel, & humain, & contre tous exemples des bien ordonnés Royaumes és premiers aages, causant que les Princes estrangers incognus, & diuers en meurs, viennēt à regner sur les nations, dōt quelquesfois il en est bien pris, mais bien souvent maux, & troubles pernicioeux en sont aduenus. Or pour ce coup, les Nauarrois ne se trouuerēt point mal d'auoir vn Roy de race Françoise, lequel fut moyen d'accroistre ses forces, & la dignité de ceste Couronne, par plusieurs accessaires du costé de France: sa mere D. Blanche, fille du Roy D. Sancho le sage, & sœur du dernier Sancho, fut la premiere femme qui introduisit en Nauarre la succession feminine, combien quelle ne regnast point estant decedée auant le Roy D. Sancho le fort son frere D. Pedro Ramires de Pedrola Euesque de Pampelone, entre autres tint la main fidellement, & diligem-

ment à la conseruation des droits de ce Roy Thibaud, qui fut appellé le Majeur, à la difference de son fils, & successeur nommé Thibaud, comme luy, des faits duquel nous n'auons gueres d'enseignements par les histoires, seulement on a peu recueillir de luy par memoires, & escriptures tédans à autres fins ce que nous en traitterons. Il fut marié trois fois, selon que escriuent les Espagnols. En premieres nopces il espou-
sa vne Dame de Lorraine, fille d'un Côte de Mets, de laquelle il fut separé par auctorité du Pape, sans en auoir aucuns enfans. Sa secōde femme estoit fille de Guichard, Seigneur de Beaujeu qui peut estre, fut le troisieme de ce nom, duquel mariage n'asquit Blanche, mariée au Duc Jean de Bretagne, surnommé le Roux En troi-
siemes nopces il espou-
sa Marguerite, fille
de Archembaud, des Comtes de Foix
(possible y a il faute au nom: car de ce tēps n'est faicte mention és histoires d'aucun Archembaud de Foix) de laquelle il engendra Thibaud, & Henry, qui luy succederent l'un apres l'autre au Royaume de Navarre, & vne fille nommée D. Leonor, & D. Pedro, Seigneur de la maison de Murçabal, qui est de ce tēps destruit, autour

*Genealogie
de Navarre.*

de Mandegorria, ainsi dit en langue Biscaine, qui signifie montagne rouge. Tous ces mariages, ou au moins les deux, furent par luy contractés avant que de venir à la Couronne de Nauarre, qui fut l'an trente & trois de son aage: les meurs de ce Prince sont louées par les Espagnols, disans, qu'il estoit liberal, modeste, grand bastisseur, ayant la musique, curieux des choses appartenâtes à l'agriculture, à raison dequoy il peupla le pays de Nauarre de plusieurs especes de fruits qui n'y estoient encores, lesquels il fit porter de France: tellement qu'ils s'est conserué encor en Nauarre vne sorte de poires, qui s'appellent Thibuatinas, ou Thibaudines: sur tout il fut Catholique, & grand zelateur, de ces bastiments est le chasteau de Treuas.

De son temps fut acheué vn procès de grande contradiction, entre les moynes noirs Benedictins, & ceux de Cisteaux, sur ce que le Roy Don Sancho defunct auoit voulu changer les anciens religieux de S. Sauueur de Leyre, & y mettre de l'ordre de Cisteaux: ce qui n'auoit peu acomplir, pour la resistance que firent les Benedictins: lesquels en fin, regnant le Roy Thibaud, perdirét leur cause: mais quoy qu'ils

furent condamnés, & depossédés, s'y ne cessèrent ils iamaïs qu'ils ne fussent remis en leur ancienne possèssiõ: ce qui fut apres la mort du deuziesme Thibaud, regnant Henry son frere, auquel ils obligerent de payer six cens charges de bled par an, iusques à tât qu'ils luy eussent liuré la somme de huit mille marauedis d'or. Finalmente pour terminer les nouuelles instances que les vns & les autres faisoient continuellement, l'Archeuesque D. Sancho de Toléde, Infant d'Arragon, & celuy de Taragõne, munis de l'autorité Apostolique du siege Romain, imposerent perpetuel siléce aux moynes de saint Benoist, & remirét en possession ceux de Cisteaux. Et apres la mort du Roy D. Henry, le gouuerneur de Navarre quitta les moynes de ce tribut, pour la descharge de la consciéce du Roy, comme impost excessif, & inique. Ainsi demeurerent les moynes Cisterciens de S. Bernard, pacifiques iouyssans de ce monastere de saint Sauueur de Leyre. A l'occasion des debats, & contétions de ces freres, s'esgarerét, & perdirét plusieurs tiltres, lettres, & documents de ce monastere, qui seruiroyent de beaucoup en ce temps, pour l'illustration des affaires de

Nauarre.

*Voyage des
Roy D. Thi-
baud pre-
mier en Sy-
rie.*

Estās les affaires de Syrie, & du Royau-
me des Chrestiens en ces contrées la for-
mal maniées, & en grande decadence, le
Pape Gregoire neuuesme fit prescher la
croisade par toute la chrestienté, par les
moynes de S. Dominique, & de S. François
principalement: parquoy plusieurs Prin-
ces, & grands Seigneurs de Frâce, & d'au-
tres Prouinces voisines se croiserēt, & fut
chef de ceste expedition le Roy Thibaud
de Nauarre. Les Seigneurs & Cheualiers
Chrestiens desirans passer leurs troupes
par mer, ne peurēt estre accommodés par
les republicques de Genes, & Pize, qui
estoyēt lors puissantes de vaisseaux, a cau-
se des guerres mutuelles qu'ils auoyent
ensemble, au grand dommage de la Chre-
stienté. Les Venitiens pareillement em-
brouillés es affaires de l'Empire des Grecs
ne leur donnerent aucun moyen pour fa-
ciliter le voyage: parquoy le Roy D. Thi-
baud & sa compagnie, furent contraints
de prendre le chemin par terre, & se con-
duire par long, & perilleux voyage en Sy-
rie, où estans arriués a Antioche, avec in-
finis trauaux, ayans eu a combatre contre
la faim, les maladies & necessités de tout-
tes

tes choses, outre les ennemis, qui s'estoyēt saisis des passages, aux destroits du mont Taurus, il se trouua que les deux tiers des gens de guerre, qui estoient partis de France, Nauarre, & des frontieres d'Allemagne, estoient demeurés par les chemins, mors de maladie, ou tués par les Turcs. Le reste de ces pauvres croisés arriuerent à Acre, qui est l'ancienne Ptolomaide, d'où ils commencerent a guerroyer les Turcs, peu heureusement, d'autant que l'Empereur Federic deuziesme, ayant laissé par la Palestine des garnisons Allemandes, ne voulurent prester aucun secours au Roy de Nauarre, d'autant qu'ils reputoyent les François pour gens dédiés, & affectés au Pape, avec lequel leur Empereur auoit plusieurs controuerses, & grandes querelles. Encor aduint il, pour plus destourner l'heur du Roy D. Thibaud, que plusieurs Seigneurs qui estoient venus en sa compagnie, se desbanderent, & retournerent en leurs maisons, entre lesquels fut le Duc de Bretagne. Parquoy il fut force au Roy de Nauarre, apres plusieurs malheureuses rencontres, de s'en retourner par mer en Occident. Arriué qu'il fut en France, il y fit quelque seiour, pour visiter ses terres, &

1238.

puis passa en Nauarre. Ce voyage du Roy D. Thibaud de Nauarre ne fut point fait en compagnie du Roy saint Louys de France, ainsi qu'aucuns escriuent, ains quelques années auparavant, assauoir, l'an mil deux cens trente huit, ou celuy du Roy S. Louys fut fait dix ans apres, ou douze, selon aucuns, comme il apert par les histoires Françoises. Estant de retour en son Royaume il eut de grandes contentions avec les Seigneurs, & communautés ses subiets, ou tenans fief en iceluy, lesquels il desiroit, & luy estoit besoin, comme a nouueau venu, & estranger, contenter: ce qu'il fit, avec prudence & grande patiëce, & non moindre dexterité. Ceux qui luy baillerent le plus d'affaires, furēt D. Guillaume Visconte de Sola, & D. Raymond Arnaud Visconte de Tartax, & D. Gastó de Moncade, Seigneur de Bearn, lesquels auoyent des griefs, & plaintifs contre le Roy: il les contenta tous le mieux qu'il peut. Au Visconte de Tartax bailla Villeneau avec toute la terre de Miexa, & Hostauares, aux autres, autres choses: tellement qu'il pacifia tout. Avec l'Euesque de Pampelone, D. Pedro de Gaçolas, eut le Roy plusieurs differents, pour les droits

& immunitez de son Eglise, qui procederent si auant, que l'Euesque presuma d'excommunier le Roy, & mit interdit non seulement au diocese de Pampelone, mais en toute Navarre : ou a cause de ses pretentions & controuerses, ne se disoit messes, ny matines, sinon ou le Roy les faisoit par force celebrer, dont estoit appelle : & cependant l'Euesque estoit en Arragon, au lieu de Nauardun, d'où estant quelques fois sorti, le Roy le fit atrapper, & mettre en prison comme traistre. Ces tempestes durerēt trois ans, ou les Espagnols ne faillirent pas de ietter toute la coulpe sur le Roy. En fin par la diligente sollicitation des Seigneurs, cheualiers & prelates. L'accord fut fait entre le Roy, & l'Archeuesque, & l'interdit leuë, ce fait l'an mil deux cens cinquante trois. Le Roy D. Thibaud mourut en Iuliet & fut enterre en la grande Eglise de Pampelone : en la mesme année mourut aussi la Royne D. Blanche de Castille mere du Roy de France, Sainct Loys, laissant vn beau droict en Castille à son fils (s'il eut voulu poursuiure) & à ses descendans aussi qui tous n'en firent oncques grand comte, & suiuant sa derniere volonte elle fut enterree a S. Denis en

*Les messes
cesserent en
Navarre.*

France prez Paris, la sepulture de laquelle se peut voir encor de ce temps mil cinq cens nonante six.

De Don Thibaud le ieune deuziesme, & dernier de ce nom X XIII. Roy de Nauarre, & Comte de Champagne.

1253.

Thibaud deuziesme succeda a son pere, l'an mil deux cens cinquâte trois n'ayant encor accompli la quinzieme année de son aage, la tutelle duquel, & regéce du Royaume, estoit entre les mains de sa mere Marguerite de Foix. Les histoires de Nauarre disent que le Roy d'Arragon, D. Iayme ou Iacques, vint en personne a Tudelle visiter la Royne veufue, & le Roy Thibaud son fils : & firent là vne ligue offensive & defensiue entre eux contre Castille : offrant le Roy D. Iayme à la veufue, & à ce pupille, tout ce qu'il pouuoit, & qu'ils sceurent demander, sans preiudice toutesfois des droits qu'il pretendoit en Nauarre, desquels il cheuiroit amiablement, apres que le Roy Thibaud seroit paruenue en aage : & cependant fut accordé que lors qu'il seroit majeur, il espouseroit vne des filles du Roy

d'Arragon:affauoir D.Constance, ou D. Sancha au defaut d'elle:& en cas de mort du Roy D.Thibaud, le mariage se feroit avec D.Henry frere d'iceluy: promettant en outre le Roy d'Arragon de ne marier ses filles en la maison de Castille, sans le consentement de la Royne D. Marguerite: elle aussi promet de sa part d'empescher à son pouuoir que le Roy son fils n'espoulast aucunes des filles de Castille, legitimes, ny bastardes, specialement du secōd mariage du Roy D. Ferdinand. En ceste ligue fut compris le Roy de France, & l'Empereur, de la part de la Royne Marguerite:& voulut le Roy d'Arragon mettre condition, que la presente ligue seroit approuuée, & confirmée par autorité du Pape, dans certain terme, & qu'il y apose-
roit grandes peines, & censures pour les contreuenans. A la Royne veufue assiste-
rent D. Garcia Almoravid, Don Sancho Fernādes de Montagu, D. Garcia Gomes d'Agoucillo, D. Gonçalo Ynanes de Bat-
zau, D. Corbaran de Leot, D. Martin Gar-
ces d'Eusa, D. Pero Gonçales de Moren-
tiu, & D. Martin Gonzales de Morentiu,
D. Guerrero Sierre, Simon Giros, D. Pe-
dro Ximenes de Valtierra, & D. Lopez

Arce, doyen de l'Eglise colegiale de Tudelle : lesquels iurerent tous solennellement l'observation des articles de ceste confederation. L'assemblée partie de Tudelle, le Roy de Castille eut incontinent aduis de ceste ligue faite à Tudelle : parquoy il ordonna plusieurs compagnies de gens de cheual, & de pied, qu'il fit ache-miner à la frontiere de Nauarre, preten-dant que ce Royaume luy apartenoit, & qu'il vouloit poursuiure son fait par ar-mes. D'autre costé la Roynne D. Margueri-te regente munit ses villes, & chasteaux contre Castille de fortes garnisons, & fut pareillement secouruë du Roy d'Arragó: de sorte, que les Castellans ne passerent point auant pour ceste fois. Cependant le Roy D. Thibaud accomplit le quinzies-me an de son aage: parquoy on trouua bõ de le declarer Roy majeur, & le courõner, ce qui fut fait, l'an mil deux cens cinquante quatre, en la grande Eglise de Pampe-lone, où il iura l'observation, & meliora-tion des droits du Royaume. Des qu'il se vit auoir l'administration en main de ses affaires, il voulut que l'alliãce, & ligue que sa mere auoit faite avec le Roy d'Arragó, fut de nouveau stipulée: & pource se virèt

les deux Roys en l'Eglise appelée nostre Dame de Montagu , là où ils capitulerent , & fut dit que le Roy D. Iayme defendroit le Royaume de Nauarre contre tous, & qu'aucun des deux Roys ne feroit paix ny trefue , sans le consentement de l'autre. Pour l'assurance desquelles choses, mesmes des mariages susmentionnés, furent mis en depost , de la part du Roy Thibaud, les forteresses de Gallipienço, Arquedas, Monreal : & du costé d'Arragon, les chasteaux de Rueda, & Sos , & le lieu de Vncastello : lesquelles places deuoyent demeurer és mains de cheualiers Nauarrois , qui neantmoins seroyent absous, & quittes par le Roy de Nauarre, du serment qu'ils luy deuoyent, & de son consentement seroyent serment a celuy d'Arragon , avec reseruatiou , & promesse de rendre toutes les places à celuy contre lequel seroit par l'autre fait faute. Tout cela fut iuré , fait & promis par les Roys , & leurs principaux hommes. En ceste ligue furent aussi comprins , & nommé par le Roy de Nauarre le Roy de France, & tous ses freres: & par le Roy D. Iayme, Charles Comte de Prouence , frere du Roy de France. Cela arresté entre ses Princes, cō-

mença la guerre fort chaude, & furieuse
és frōtieres de Nauarre & Castille, a quoy
entēdoit tant plus volōtiers le Roy d'Ar-
ragon, pour ce que s'estans celle année re-
bellés les Maures du pays de Vallence, en
nombre de plus de soixante mille, sous
vn certain Alardrac leur chef, & capitaine,
le Roy de Castille les soustenoit, & aydoit
sous main, par hayne couuerte, & enuye
qu'il portoit au Roy D. Iacques : si est-ce
neantmoins que par la diligence de plu-
sieurs grans personages, il se fit inconti-
nent vne trefue de quelques mois : durant
laquelle estant venu le Roy D. Iayme en
Nauarre. D. Diego Lopes de Haro Sei-
gneur de Biscaye le vint trouuer, & se fit
son vassal, estant mal content du Roy de
Castille, qui ne fut pas petit aduātage aux
affaires de ceste ligue contre Castille : car
D. Diego estoit vn braue & vaillant capi-
taine. Le Roy D. Alphonse pretendoit les
droits anciens de ses predecesseurs au
Royaume de Nauarre, ou pour le moins
que D. Thibaud luy en fit hommage tel
que le Roy D. Garcia Ramires, & les Roys
D. Sanches, fils, & petit fils d'iceluy, auoit
faite au Roy D. Alphonse huietieme Em-
pereur des Espagnes, & aux Roys de Ca-

stille : ce que le Roy D Thibaud refusoit, alleguant que c'estoit vne recognoissance extorquée par violence, sans aucune raison, & que tant s'en falloit qu'il voulust se soumettre à chose aucune aux Roys de Castille, qu'au contraire il entendoit recouurer d'iceux les terres de Bureua, Reoya, Alaua, & Guipuscoa, & autres terres de Castille la vieille, que les predecesseurs de D. Alphonse auoyent rauies, & vsurpées des appartenances du Royaume de Nauarre. C'estoyent les causes de faire entrer en guerre ces Roys, lesquels la trefue expirée, mirent leurs gens aux champs: les Nauarrois, & Arragonnois faisans la masse de leur armée és enuirõs de Tudelle, & les Castillãs vers Alfaro, & Calaorra.

Le Roy de Castille, & celuy d'Arragon menoyent en personne les armées contraires, lesquelles estât si près l'vne de l'autre, qu'on n'attendoit que l'heure de les voir venir aux mains: mais sur-ce il n'y eut faute de bõs personages, qui s'employèrent pour empescher tel desordre. Le Roy D. Alphonse fit remonstrer a celuy d'Arragõ, que c'estoit chose indigne, & du tout contre son esperance, de voir, que luy, qui estoit son beau pere, portast les armes cõ-

tre luy, n'en ayant receu iniure ny offence aucune: & le prioit ne l'empescher en sa iuste poursuite, des droits qu'il auoit au Royaume de Nauarre, que le Comte Thibaud luy occupoit, le Roy Don Iayme luy respondit, qu'il ne pouuoit en bonne conscience, ny selon le deuoir abandonner la defense d'un ieune Prince qui luy auoit esté recommandé, les affaires duquel il estimoit comme les siennes propres. Plusieurs prelates, & gens de grande autorité festās en vain employés pour mettre paix entre ces Princes, vn simple gentil-homme Cattelan, natif de Sefalu, de la maison de la Royné de Castille D. Violant, y fit plus que tous les autres. Cestuy cy vint trouuer le Roy d'Arragon, & luy sceut si bien persuader, & avec si viues raisons, qu'il ploya son cœur a la paix. L'office fait enuers cestuy cy, fut par le cheualier reiteré a l'androit du Roy de Castille: & fut si heureuse sa negotiation, qu'il eut promesse de conferer presents de leurs differents & querelles. Parquoy estans dressées quelques tentes en vn champ entre les deux armées. les trois Roys s'entreurent & caresserent fort amiablement, se banquetterent les vns les autres, & auant que se sepa-

rer furent de bon accord. Car nonnoblât ^{Entreneue} quelque ligue qu'eusse fait les Roys de ^{des Roys de} Navarre & d'Arragon', & quelque bon ^{Castille ara} courage qu'eut mōstré le ieune Roy Thi- ^{gon & Na-} baud, si est-ce qu'il condescendit à faire ^{uarre.} hommage au Roy de Castille, ainsi qu'a-
 uoyent fait ses predecesseurs pour son ^{Le Roy de} Royaume de Navarre. Car le Roy de Ca- ^{Navarre se} stille estimant auoir gagné son beau pere ^{faiēt vassal} le Roy d'Arragon, par ceste entreueue, qui ^{de celuy de} a la verité luy seruoit de beaucoup, mesme ^{Castille.} a cause que la Royne D. Violant sa femme
 se trouua la present, demanda au Roy D. Thibaud les plus extremes choses qu'il
 peut, ne desirant rien moins que d'entrer
 en accord avec luy: mais ne luy estant rien
 refusé, ils transigerent, & composerent en
 sorte que le Roy D. Thibaud demeura vas-
 sal du Roy D. Alphonse: & fut dit qu'il
 tiendrait vn lieutenant en la court de Ca-
 stille avec ses tiltres, & que toutes les fois
 que le Roy de Navarre seroit appelé pour
 le besoin des guerres qui pouroyent sur-
 uenir, il seroit tenu de venir servir en per-
 sonne, ou par sondit Lieutenant, avec deux
 cens hommes de cheual. A toutes ces con-
 ditions condescendit le ieune Roy, ou
 pour ne se sentir assés fort pour resister a

son aduerfaire, ou se doubtant, ou s'aperceuant que le Roy d'Arragon s'estoit laissé gagner, ou bien en consideration du repos public: ioint qu'il ne faisoit rien de nouveau, & que ses predecesseurs n'eussent fait, nonobstant que D. Sancho Fernandes de Cascante, & autres cheualiers Nauarrois l'en desconseillassent, & mesme les bourgeois & habitans du bourg de saint Seruin de Pampelone, lesquels, apres que tous les autres, tant prelats, cheualiers, que communautés du Royaume eurent consenti, & approuué ceste paix, persisterent a la reprouuer, & ne si voulurent oncques trouuer: à raison dequoy ils furent chasties par le Roy comme mutins, par amendes pecuniaires, toutesfois estant quelques iours par apres son couroux passé, il considéra que ces Pampelonois estoient bons, & fidelles patriots, & ayman son honneur, & grandeur, & qu'ils auoyent resisté a sa volonté par vray zele, & amour qu'ils portoyent a la couronne de Nauarre, pour ce leur fit rendre leurs deniers: de là proceda la coustume, qui a duré, qu'es choses concernantes à Castille, ce bourg ne mettoit point son seel.

On pensoit que les affaires d'entre Ca-

stille & Nauarre d'eussent estre pour long temps paisibles, mais les effects monstre-
rent ceste année mil deux cens cinquante
sept, que la paix d'être les Princes n'est biē ^{1257.}
souuēt entretenue par autre lien, que leur
plaisir, & commodité, sans auoir esgard a
accords, sermēs, ny promesses. Car le Roy
de Castille ayant mis sus vne puissante ar-
mée, sous couleur d'auoir soupçon des
Maures, la faisoit tourner vers la frontiere
de Nauarre, pour y faire quelque notable
breiche, pendant qu'on ne se doubtoit de
luy. Parquoy les deux Roys, Don Iayme
d'Arragon, & Thibaud de Nauarre se re-
mirent hastiuement en armes : & ne tarda
gueres, que D. Henry Infant de Castille,
frere du Roy, & D. Diego Lopes Diaz de
Haro, vindrēt trouuer le Roy d'Arragon,
en la ville d'Estelle, avec lesquels ils se li-
guerent contre Castille faisant l'Infant
grandes plaintes contre le Roy Don Al-
phonse son frere, & avec eux encor plu-
sieurs grands & notables Seigneurs, qui
tous firent hommage audit Roy d'Arra-
gon, luy promettans le suiure contre tous
les Princes du monde, où illes voudroit
mener. Les choses estans en branle de ve-
nir au plus grand desordre du monde. Il

fut tant trauaillé par les conciliateurs & amateurs de paix, que lesdits Roys firent derechef nouuel appoinctement.

Or pource que les Estats que le Roy D. Thibaud auoit en France, assauoir, la Champaigne, & Brie, requeroient sa presence, ou de quelqu'un de grande autorité, la Roynes D. Marguerite s'y en alla mais elle mourut en la ville de Prouuins, d'où elle fut portée au monastere de Cleruaux, & la inhumée. A ceste cause il falut que le Roy son fils s'y acheminast, pourtant il recommanda son Royaume de Nauarre au Roy d'Arragõ, & laissa pour Senechal, & Gouverneur en iceluy vn cheualier François, appelé Geoffroy de Beaumont, dont les Nauarrois ne firent pas grand compte, & encor moins du Roy d'Arragon, auquel ils ne voulurent prester aucune obeissance: & pour-ce commença a se rompre l'amitie entre les Nauarrois, & Arragõnois, l'an 1557. Le Senechal voyant le Royaume a luy commis, entrer en troubles, vint trouuer en diligence le Roy D. Iayme qui estoit a Barcelone, & obtint de luy assurance de paix, pour quelque temps entre les deux Estats.

Le Roy de Nauarre qui estoit en Fran-

ce, trouuant ses affaires fort embrouillés, s'employoit à esclarcir, & soustenir ses droicts des Comtes de Brie, & de Champagne, qui luy estoient debatus, lesquels par la faueur & autorité du Roy saint Louys, luy furent conserués : & d'auantage fut fait le mariage de luy, & d'Isabel de France, fille du Roy, à Melun, laquelle il emmena en Nauarre. Le Roy D. Iayme fut celuy qui moyenna ces nopces, lequel presque en mesme temps donna sa fille Isabel en mariage à Philippe le hardy, fils du Roy saint Louys, & heritier de la couronne de France, a luy accordée long tēps auparauant. Or n'eut le Roy Thibaud aucuns enfans de ceste Princeesse : parquoy apres sa mort luy succeda au Royaume de Nauarre son frere Henry, ainsi comme nous dirons cy apres : Bien eut il vne fille bastarde appelée D. Marquise, la mere de laquelle estoit nommée D. Marquise Lope de Rada, qu'on peut iuger parente de Gor de Rada, qui possible pour ceste iniure se despaissa de Nauarre, & se retira en Arragon, où il fit foy & hommage de son chasteau de Rada au Roy D. Iaime. Ceste fille fut despuis mariée a D. Pero Fernandes Seigneur de Ixar, fils du Roy D. Iaime


& de Don Theresa Gil de Bidaura, qu'il auoit espousée clandestinemēt, durāt l'absence du Roy D. Thibaud, qui estoit cōme dessus est dit en France. Plusieurs choses se faisoient par excès en Nauarre, ou par la faute des gouuerneurs, ou par la ruse & finesse des Princes voisins. Vn principal cheualier de Nauarre, nommé Gonçalo Ynanes, de Batzan, se retira vers le Roy d'Arragon, & fit vn fort aux frontières d'entre Arragon, & Nauarre, qu'il nomma Bocta, d'où il fit plusieurs courses & dommages és terres de Nauarre. Quelque amitié qu'il y eust entre le Roy d'Arragon, & celuy de Nauarre, si n'y auoit il point faute de doleances, & semences de querelles entr'eux : Vne des plus apparêtes preten-tions, & couuertes que le Roy D. Iayme auoit, c'estoit qu'il disoit, que pour secourir le Roy Don Thibaud il auoit fait plusieurs grans frais, desquels il vouloit estre remboursé: & a tout propos se seruoit de elle, quand il auenoit quelque desordre. La somme qu'il demandoit estoit si grāde, que ny ce Roy Thibaud, ny son frere Hé-ry, qui regna apres luy, ne la peurent ac-quiter. Or enuiron ce temps, ou bien tost apres le passage de la Princesse Blanche
fille

filles aînée du Roy saint Louys & sœur de la Royne de Nauarre qu'on menoit en Castille, le Roy D. Thibaud arriva en Nauarre, où il essaya de mettre quelque bon ordre, & prepara les choses nécessaires au voyage d'outre mer, qu'il entendoit faire avec le Roy saint Louys son beau pere. Là il renoua avec luy l'amitié & alliance avec le Roy D. Iayme, & renouuella l'accord avec celui de Castille: & ayant laissé gouverneur en Nauarre Henry son frere Comte de Bonax, s'en reuint en France menant avec luy D. Iean Nugnes de Lara fils aîné de D. Nugno Gonçales de Lara, & plusieurs autres cheualiers Nauarrois, & Castillans. Il emmena pareillemēt avec luy sa femme la Royne Elisabeth, ou Isabel, laquelle il laissa gouvernante de ses Comtes de Champagne & Brie: puis partit avec ledit Roy saint Louys qui s'embarqua a Marseille, avec toute son armée, au mois de May, mil deux cens soixante
euf, pour passer en Syrie: mais agité par es tourmentes & tempestes marines, il luy falut prendre terre en Sicille, d'où parpres il passa en Aphrique: mais l'issuë de ceste expedition fut mal-heureuse, ainsi u'on peut voir és histoires de France.

Pour lors il y auoit plusieurs grans Seigneurs en Espagne lesquels se sentans offensés du Roy Don Alphonse de Castille firent ligue par ensemble, & la premiere chose qu'ils firent apres qu'ils leurent iurée entre eux, ce fut d'enuoyer l'Infant D. Philippe en Nauarre, pour essayer de ioindre a leur cause le regent de ce Royaume, D. Henry, pour l'interest qu'il auoit d'abaisser le Roy D. Alphonse, detenteur de tant de Prouinces, des appartenances de la Couronne de Nauarre: luy promettās les confederez (contre leur intention toutefois) de luy ayder à recouurer icelles, s'il les vouloit fauoriser, avec les forces du Royaume qu'il auoit en gouuernement, auquel ils pretendoyent faire leur demeure, & la assembler toutes leurs forces, amis & moyens. Le regent D. Henry ayant pensé, & considéré la consequence de telle entreprise, cōme sage, & ainsi qu'il estoit, s'excusa sur ce qu'il n'estoit que Lieutenant de son frere, auquel il deuoit rendre cōpte de son administration, & qu'il ne desiroit rien plus que de luy remettre son Royaume en l'estat qu'il le luy auoit baillé, sans essayer par nouuelles entreprises de remuer l'estat d'iceluy, sur incertaine espe-

rance de melioration. Auec telle responce s'en retourna D. Philippe en Castille frustré de son intēction. Peu apres eut nouuelles D. Henry de la mort de son frere, le Roy D. Thibaud, aduenue en la ville de Tripam en Sicille, au retour du voyage de Tunes, ou le Roy saint Louys estoit decedé aussi. Le Roy tint son Royaume de Nauarre l'espace de dix sept ans, & quatre mois, & estant decedé sans aucuns hoirs legitimes, son frere D. Henry luy succeda. La Royne veufue D. Isabel qui se trouua en France lors du decez de son mary receut son corps, qui fut porté avec celui du Roy saint Louys, & le fit enterrer en l'Eglise de Prouins: & soit pour le desplaisir de la mort de son mary, ou autre infirmité, elle ne suruesquit gueres à luy.

*De Don Henry le Gros premier de ce nom, &
XXIII. Roy de Nauarre: Comte de
Champagne & de Brie, & Pair
de France.*

 On Henry succeda a son frere, l'an mil deux cens septante vn. Il fut surnommé le gros, à cause 1271. u'il estoit excessiuelement gros & gras. Et

combien que la commune oppinion, soit que les hommes gras sont volontiers de douce, & benigne nature, si est-ce que ce luy fut fort aspre, & de difficile conuersation: ce qu'il monstra bien, principalement a l'endroit de Don Armingel Euesque de Pampelone, qu'il trauaillast incessamment. Les Seigneurs confederez de Castille voyās que D. Henry estoit acreu en estat, & qu'il estoit receu Roy de Nauarre, luy enuoyerent derechef D. Philippe, pour le solliciter de se ioindre a leur ligue. Le nouveau Roy D. Henry fit responce, que puis qu'il estoit deormais maistre, & n'auoit a rendre raison a personne de ses actions, il estoit trescontent de recepuoir les confederez en son Royaume, & leur ayder en tout ce qu'il pourroit: mais a la charge qu'eux prealablement viendroyent avec toutes leurs forces, & celles de leurs amis, le mettre en pleine possession des terres de Bureua, Rioya, Alaua, Guipuscoa, & autres que le Roy D. Alphonse & ses predecesseurs auoyent iniustement vsurpees, & detenues appartenantes a la couronne de Nauarre. La demande sembla grande, & difficile a l'Infant D. Philippe, & cōme celuy qui n'auoit du tout despouillé l'a-

mour fraternelle, ny celle de son pays, se resolut de repudier ceste alliance si chere, & onereuse, & partant respondit, que luy, ny ses compagnons n'estoyent de tel pou- uoir, qu'ils peussent accomplir ce qu'il leur demandoit pour lors, & si confessa fran- chemēt qu'ils ne voudroyent faire si grād dommage au Roy leur Seigneur, que de le despouiller d'une si grande estandue de pays. La responce ouye, le Roy D. Henry se desporta d'estre de leur parti, ne voulant sans grand profit rompre les accords que Nauarre auoit avec Castille, & fit sage- ment de n'attirer, vn si puissant ennemi contre luy. Don Philippes retournant en Castille, rencontra ses cōfederēs, auxquels il fit le rapport de ce qu'il auoit faict avec le Roy D. Henry, ce qu'ils approuuerent.

Au commencement que le Roy Don Henry vint a la couronne de Nauarre, il auoit eu a demesler avec D. Pedro Infant d'Arragon, pour le droit qu'il pretēdoit, comme cessionnaire du Roy D. Iayme son pere, au Royaume de Nauarre : mais il luy vint bien a propos, qu'entre le pere & le ils ressourdirent grandes contentions, & ebats: à raison desquels l'Infant D. Pedro acointa du Roy de Nauarre, afin d'estre

par luy fauorisé en ses entreprinſes , & pour luy en donner meilleur courage, enuoya par deuers iceluy vn cheualier nommé D. Guillaume de Cruillas, pour cheuir & acorder entre eux de ce pretēdu droit, dont le Roy D. Henry ne faisoit pas grād compte, toutesfois vſoit de bonnes paroles, & entretenoit ce ieufne Prince, donnant touſiours quelque crainte au Roy D. Iayme, qu'ils ſ'accorderoyēt enſemble, pour luy nuire, qui fut vn bon moyen au Roy de Nauarre pour ſ'aſſeurer d'iceluy, car D. Iayme, de peur que ceſte ligue ne ſ'effectuast, preuint ſon fils, & rechercha le Roy D. Henry d'amitie, & confederation, faiſant avec luy vne trefue de pluſieurs années, durant leſquelles il ne ſe parloit de pretentions, droits ny actions reelles, ny personnelles quelconques ainſi tint le Roy D. Henry le gros ſon Royaume paſſiblement, par les diſcordes d'autrui.

Or ſ'eſtoit marié ce Roy D. Henry auāt que de venir a la Couronne, & lors qu'il n'eſtoit que Comte de Ronai, Ieanne fille de Robert Comte d'Artois frere de ſainct Louys, parquoy elle appartenoit aux maiſons Royales de France, & d'Eſpagne. De ce mariage n'aquirent au Roy Don

Henry D. Thibaud , lequel sa nourrisse
 laissa tomber du hault d'une galerie, en la
 ville d'Estelle, & le tua : autres disent que
 ce fut son gouuerneur, ou nourriffier, qui
 le laissa imprudemment tomber, & en eut
 tel regret, que luy mesme se precipita a-
 pres l'enfant, & se brisa: autres fils n'eut-il,
 parquoy la ligne masculine des Comtes
 de Champagne finist en Nauarre en ce
 Roy, n'ayant duré que quarante ans. Il eut
 en outre de sa femme vne fille, appelée
 D. Ieâne, comme leur mere, qui vint a he-
 riter du Royaume de Nauarre, Comtes
 de Brie & Champagne, & autres Estats de
 son pere. Les auteurs Espagnols escriuēt
 que le Roy & la Royne, ses pere & mere,
 la firent recepuoir, & declarer Royne aux
 Estats de Nauarre, n'estant aagée que de
 deux ans, & sept mois, & fut moyen de
 l'vnion de Nauarre avec Frâce, pour quel-
 ques années. Ce Roy D. Henry estant en
 Nauarre lieutenant de son frere le Roy D.
 Thibaud, & n'estant encor marié, eut a-
 moureuse priuauté avec vne Dame, heri-
 tiere de la maison de Lacarra, de laquelle
 il engendra vn fils, qu'il nomma Henry,
 comme luy. Cestuy-cy estant creu, fut
 cheri par les Roys successeurs de son pere,

*Fin de la
 lignée mas-
 culine des
 Comtes de
 Châpaigne
 en Nauarre.*

1274.

& tint la dignité de Mareſchal, ou chef des armes au Royaume de Nauarre, & tiēt on que la maiſon, & noble famille des Hēry de Nauarre, Seigneur d'Ablitas, eſt deſcēdue de luy. Or les ans du regne de D. Henry le gros, furent ſeulement trois, ans ſept mois dix ſept iours. Il mourut en la citē de Pampelone, en l'hoſtel Epiſcopal, l'an mil deux cens ſeptante quatre, & fut enterre en la grande Eglise d'icelle. Il n'y a particuliere memoire de ſes faits, ni de ſon gouuernement en Nauarre, horſmis qu'il rompit vne vnion faite du temps du Roy ſon predeceſſeur Don Sancho, entre les bourgeois, & habitans de Pampelone, de ce temps diuiſēs en Nauarrerie, Bourg, & habitation, ou peuplement: la cauſe qu'il lemeut n'eſt par les auteurs miſe autrement, ſinon que cela eſtoit dommable à la citē.

*De Don Ieanne premiere du nom & XXV.
regnant en Nauarre.*

DOn Ieanne, fille vnique, & heritiere du Roy D. Henry demeura entre les mains des Eſtats de Nauarre, eſtant ſeulement aagē de trois

ans. Grands troubles s'esmeurent incontinent entre les Nauarrois, tant sur l'administration & gouuernemēt du Royaume, que sur la tutelle & nourriture de l'Infante. Le gouuernement du Royaume ou Interregne fut és mains de D. Pero Sanches de Montagu, Seigneur de Cascant: mais pour le regard de la nourriture de l'Infante, qui estoit lors és mains de la Royne veufue sa mere, il y eut grandes cōtrouerses en l'assemblée faicte a ceste ocasiō, en la cité de Pampelone: car les vns vouloyent qu'elle fut baillée au Roy Don Alphonse: & de ce nombre estoit D. Garcia Almoravid: contre ceux cy estoit D. Pero Sanches de Montagu, D. Armingel Euesque de Pampelone, avec autres en bō nombre, estoient d'aduis qu'elle fut mise és mains du Roy Don Iayme d'Arragon: mais la Royne sa mere desiroit qu'elle vint en la puissance des François, & demãdoit pour tuteur de sa fille & du Royaume Philippes Roy de France. En ces disputes & contentions, qui n'estoyent conduittes ny avec raison, ny avec modestie, la Royne craignant que quelque mal n'aduint a elle, & a sa fille, estant aydée par quelques Seigneurs, & cheualiers tenans son parti, se

desroba vne nuit, & emporta avec elle en France l'Infante qui cauſoit la querelle, où elle fut humainement recueillie par le Roy Philippes troiſieſme lors regnāt ſon couſin germain. Les Nauarrois ſachant ſon deſpart ne diſputerent plus de la fille, ains entendirent deſormais aux brigues qui ſe faiſoyent de la part des Roys de Caſtille, & d'Arragon, pour eſtre chacū deux receu Roy de Nauarre, ſoubs la faueur de leurs droits, qu'ils allegoyent reſpectiue-ment y auoir. Le premier qui fut aduerti de la mort du Roy Henry, fut le Roy D. Iayme d'Arragō, partant deſpecha prōp-tement Ambaſſadeurs vers les Eſtats, les prier de ne l'empêcher en la iouiſſance de ce Royaume, qui luy appartenoit de droit non ſeulement a raiſon de la doption, & donation que le Roy D. Sancho le fort luy en auoit fait, mais auſſi de plus long temps : pour-ce diſoient-ils que les Roys qui auoyent tenu ce Royaume deſpuis D. Alphonſe le bataillant, iuſques a ce temps, l'auoyent poſſedé par force, & ſ'y eſtoyēt introduits ſans cauſe legitime, au domage & iniure des Rois d'Arragon. Outre-cō leur remonſtrèrent, qu'il eſtoit deu par les feus Rois de Nauarre a leur Roy, ſoixante

mil marcs d'argent, qui augmentoit d'autant l'actiõ qu'il pourſuiuoit audit Royau-me, pour leſquelles choſes ils demãdoyẽt qu'ils euſſent le Roy D. Iayme, ou ſon fils le Roy D. Pedro pour leur Roy lequel ils eſtimeroient le meilleur pour eux, leur promettans bon & doux traitemẽt. D'autre part, le Roy D. Alphonſe deſirant que ſon fils D. Ferdinand de la Cerde obtint ce Royaume, luy ayant renoncẽ les droits qu'il y pretendoit d'anciennetẽ : & ſans entrer en autre requeſte, luy bailla vne armẽe, pour ſ'en emparer par voye de faiẽt, & aduint que ces deux pretẽdans ſ'entre-demanderent aide & faueur, pour vaindi-quer chacun a ſoy ce que tous deux deſi-roient & brigoient. Les Seigneurs & de-putẽs des eſtats voyans ces troubles me-nacer le Royaume de quelque grand mal, furent d'aduis d'enuoyer l'Eueſque de Pã-pelone, & le gouuerneur a Sos, pour ad-uiſer d'accõmoder en quelque faẽon leurs affaires avec D. Pedro d'Arragon, lequel ſ'y trouua, & confererent enſemble, ou ils reſolurent, que pour le regard de ſoixante mille marcs d'argẽt, ils en demeureroient à ce qu'en ſeroit dit par l'Archeueſque de Tolde. D. Sãcho frere d'iceluy D. Pedro,

estime prelat fort entier, & de bonne conscience : & quant au reste, il ne seroit procédé par armes d'un costé ni d'autre, ains avec moyens iuridiques, & paisibles : à raison dequoy ils firent treues pour quelque temps. Les ambassadeurs retournés, le lieu de l'assemblée des Nauarrois fut chargé au Pont de la Roynie, où trouuerent prelats & cheualiers du Royaume, & les députés des villes de Pampelone, Tudelle, Estella, Olite, Sanguesa, Pont de la Roynie, & autres. Là en la presence de ceste assemblée D. Garcia Ortiz d'Açagra, un des agents de l'Infant d'Arragon, demanda que le Roy D. Iaime fut receu pour Roy de Nauarre, deduisant les droits d'iceluy fort copieusement, avec promesses que cela resulteroit au grand bien de ce Royaume. Cependant qu'ils estoient en ces procédures, D. Ferdinand de la Cerde Infant de Castille entra en armes dans la pays, où il auoit plusieurs cheualiers de son parti. Venant doncques par le pays de la riuiere d'Oja, passa Ebro, & assiegea la ville de Vrana : mais voyant quelle estoit bien gardée, partit de là, & vint a Médauia, laquelle il print, & puis gaigna la tour de Moreda, & fit plusieurs autres degasts, sans trouuer

résistance en campagne. Ceste force faite aux Nauarrois du costé de Castille, fit qu'ils enclinerent plus a Arragon, & afin de pouuoir donner quelque ordre, & reparer au danger qui les pressoit, enuoyerēt derechef vers l'Infant D. Pedro, qui estoit a Tarassone, l'Euesque D. Armingel, lequel, ores qu'il fut Castillan, ne tenoit nullement le parti de D. Ferdinād, pour lors, & avec luy le gouuerneur Don Gonçalo Ynanes de Batzan, & son fils D. Iean Gō-gales de Balzan, & D. Gil Balduin, gouuerneur de Tudelle, & D. Martin Garces de Vnca. Ces députés luy firent entendre de la part des Estats, qu'ils seroyent tres-aises qu'ainsi fut, qu'il eut quelque bon droit au Royaume de Navarre, & qu'ils desiroient fort de sçauoir de luy quelle bōne amitié ils pouuoient pour le present traiter ensemble: Ausquels D. Pedro fit responce, qu'il desiroit que le mariage se promet d'entre l'Infante D. Ieanne & son fils aîné D. Alphonse son heritier: & où il viendrait à deffaillir auant qu'elle fut en aage, qu'elle seroit mariée avec D. Iaime son second: & si le mariage ne pouuoit estre accompli avec l'Infante, que ce fut avec quelqu'vnes de ses cousines germai-

nes, issue des filles du Roy Thibaud premier, spécialement de la Duchesse de Bretagne. Offert de leur bailler, pour assister au gouvernement de leur Royaume, ledit D. Alphonse son fils: leur exhiba quant & quant le droit que son pere le Roy D. Iaime auoit au Royaume de Nauarre, & la cession qui luy en auoit esté faicte: Concluant, que si ces choses ne leur estoient agreables, qu'ils aduisassent de le recepuoir luy mesme pour Roy, dās vn an. Luy remettans & deliurans librement tout le Royaume. Les Ambassadeurs renuoyés avec ceste responce, l'assemblée fut remise en la ville d'Olite, & ayans la consulte sur ce qui estoit de faire, accorderent avec l'Infant d'Arragon selon les articles qui s'ensuiuent: Que le mariage d'entre Don Alphonse d'Arragon, fils aîné de D. Pedro, & l'Infante Don Ieanne de Nauarre s'accompliroit: & où elle viendrait a mourir avant le temps, pourchasseroient les estats de luy faire espouser vne de ses cousines germaines, fille du Duc Iean de Bretagne: Et au cas que D. Alphonse vint a deceder avant que ce mariage se parfit, l'Infante ou l'vne de ses cousines seroit baillée a celuy des fils de Don Pierre, qui

seroit plus proche & habile a heriter du Royaume d'Arragon : & où les estats de Nauarre, pour quelque legitime empeschement, ne pourroient accomplir ce que dessus, ils payeroient à D. Pedro la somme de cent quarente mille marcs d'argent, pour les frais & despens qu'il auroit peu faire pour la deffense du Royaume de Nauarre, & ce des deniers du Royal patrimoine d'iceluy, outre les soixante mille marcs qui estoient desia deuz, faisant en tout la quantité de deux cens mille marcs d'argent, de l'alloy ayant cours en ce temps, payables dans vn an après le fait dudit empeschement, à compter du iour de Pasques, sans que ces accords portassent aucun preiudice aux droits & pretétions que son pere Don Iaime & luy auoient au Royaume de Nauarre, esquels les Estats promettoient de leur estre fauorables, & leur aider en tout ce qu'ils pourroient. Ces promesses furent faictes, & iurées par la pluspart des Seigneurs deputez l'an 1274. 1274. sur peine de choir en crime de leze Majesté, s'ils y failloient, excepté pour le regard des mariages, d'autant que les Princesses n'estoient en leur puissance. Mais D. Garcia Almoravid, & autres, autrement affe-

*Royaume
de Navarre
en la puis-
sance des
François.*

étés, ne trouuerēt point ces accors bons, & n'y voulurent consentir, ni les iurer, dont naquirent grands troubles & diuisions au Royaume: & n'eut aucun de ces articles effect, pource que le Roy Philippe de France print le Royaume de Navarre en sa protection, & en fit Roy son fils, auquel il fit espouser l'Infante D. Ieāne, frustrāt le Roy d'Arragō. Car la Royne Ieanne veufue de D. Henry s'estant retirée en France, avec l'Infante sa fille heritiere du Royaume, estant aduertie de tout ce qui s'estoit passé en l'assemblée des Estats d'Olite, en fut tellement picquée, qu'elle bailla sa fille entre les mains du Roy Philippes: lequel la receut, & son Royaume de Navarre, en sa protection, la faisant nourrir avec ses deux filles, Marguerite, & Blanche, qu'il auoit eues de sa deuziesme femme Marie de Brabant, lesquelles estoyent aussi petites & en mesme aage. Ceste Infante D. Ieanne creut en beauté corporelle, grace, & gentillesse, autant que Princeesse de son temps: Parquoy le Roy Philippes ne tarda gueres de la faire espouser, toute ieune qu'elle estoit, par parolles de futur, à son fils Philippes, surnommé le Bel, qui luy succeda au Royau

*Mariage
entre Philip
pe le Bel &
l'heritiere
de Navarre.*

Royaume de France.

Les choses de Nauarre estants en l'estat que dit est, D. Garcia Almoravid, grand aduersaire du gouuerneur D. Pero San-^{Querelles}
ches de Montagu, Seigneur de Cascante, ^{entre les}
& fauteur du parti de Castille, print occa-^{Nauarrois.}
sion d'entrer en querelle, & troubler le
Royaume, sur les piques qui estoient en-
tre les habitans de Pampelone, de long
temps diuisées, & mutinés les vns contre
les autres. Ceux du quartier appelé le Na-
uarrois, auoyent voulu faire certaines for-
tifications contre le bourg, en quoy ils fu-
rent empeschez par le gouuerneur, qui
estimoit que telles barrieres entre des ha-
bitans d'une mesme ville, estoient vray
accroissement, & nourriture de haines, &
seditions: ce qui est veritable: parquoy D.
Garcia prenant à soustenir les habitans de
la Nauarrerie, le Royaume en bref temps
fut tellement bandé qu'on n'entendoit
parler que d'excès, meurtres, voleries, &
autres meschancetés par toute l'estandue
d'iceluy: pour à quoy remedier, fut con-
uoquée derechef vne assemblée des Estats
en la ville de Pampelone, là où ne pouuās
conuenir du personnage du pays pour les
regir & gouuerner, il fut arresté qu'on en-

N

uoyeroit en France supplier le Roy Philippes d'enuoyer quelque Seigneur qui tint lieu de Viceroy, pour leur Princeſſe, laquelle eſtoit en ſa tutelle. Le Roy Philippes leur enuoya vn cheualier ſage, & de grande vertu, appellé Eustache Beumar, ou Bellemarche, qui fut receu, & reueré, & entre ſes mains iurerent les Eſtats fidelité à leur Royne, dont il representoit la perſonne. Ce cheualier, par prudence & moyens amiables, en peu de temps remit le Royaume en paix. Le Roy Don Iaimé d'Arragon ialoux de ce que les François empietoient ce Royaume, & eſtant hors d'eſperance des mariages arreſtés avec ſon fils D. Pedro a Olite, commença à demander l'autre chef de la capitulatiõ, qui eſtoit de luy deliurer le Royaume, & que les Eſtats luy aidaffent à leur pouuoir, pour obtenir ſes droits, ce que n'eſtant accompli, la guerre commença auçunement à ſ'eſmouuoir entre Nauarre & Arragon. La pacification eſtablie dans le Royaume par le Viceroy François, ne fut de longue durée : car aucuns cheualiers ennemis de repos, ſe mirent à ſemer des accuſatiõs, & tenir par tout propos ſeditieux contre le gouuerneur, diſans, que c'eſt choſe igno-

minieuse aux Nauarrois d'estre regis par vn estrange, & specialement essayoyent d'esmouuoir le peuple de Pampelone. Dauantage ayant pratiqué quelques gentilshommes de Castille, voisins de la frontière de Nauarre, les firent venir dedans le Royaume en façon de coureurs, & ennemis, afin de faire mettre le gouuerneur en armes, & auoir moyen en quelque rencōtre, & mēlée de s'en despecher. Le gouuerneur François voyant les affaires se troubler du costé de Castille, vint à Estella, ayant ordonné que tous les cheualiers, & gēs de guerre se rendissent là, avec leurs armes, & cheuaux, là où il eut aduertissement de la trahison qu'on luy brassoit: parquoy partant de nuict, s'en reuint à Pampelone & s'estant plaint en plein conseil de ceste perfidie, estonna grandement ceux qui n'en estoient participās, & encor plus les coupables, voyant leurs malices decouuertes. Parquoy comme souuēt il aduient que le vice remonstré, ou reproché aux mauuais, les rend plus hōteux, & enragés, ces coniurés furēt si temeraires, qu'ils luy commanderent de se retirer en France, disans, qu'il y auoit des hommes assés en Nauarre, qui s'auroyēt mieux les gou-

uerner que luy: à quoy le gouverneur respondit, qu'il ne doutoit point de la suffisance des Seigneurs de Nauarre, & que de sa part il n'auoit affecté, ny brigué ceste charge, ains luy auoit esté commadée par le Roy de France son Seigneur, tuteur, & protecteur de leur Royne, & de son Royaume: en quoy ils ne deuoyent, eux particuliers, luy donner empeschement, qu'il n'estoit pas delibeté de leur obeir: neantmoins qu'il feroit assembler les Estats, & si par commun arrest il estoit dit qu'il se retirast en France, il y obtempereroit, moyennât qu'ils luy donnassent descharge, & tesmoignage de son administration, autrement il ne pourroit comparoistre deuant son Roy, avec son honneur, lequel il estimoit plus que sa vie. L'assemblée communiquée à Pampelone, il ne si conclut rien, ne trouuant chose pour laquelle ils d'eussent refuser le gouvernement du cheualier François, parquoy apres plusieurs altercations, & propos seditieux proferés par les partisans de Don Garcia Almoravid, principal auteur de ce desordre, ils se partirent, & de ce pas coururent aux armes: tellement que le gouverneur fut contraint de se remparer, & fortifier

*D. Garcia
Almoravid
chef du
pays.*

dedans le bourg de saint Sernin: les habitants duquel promirent de le secourir, & mourir tous à ses pieds, plustost que de souffrir que luy, qui estoit lieutenant de leur Princeſſe ſouueraine, euſt aucun mal, ny deſplaiſir: là dedans ſe retira auſſi Don Corbaran de Bidaure. Contre ce bourg ſe banderent pour l'autre party ceux de la Nauarrerie, ayās pour chef D. Garcia Almoravid, & ſe mirent à faire les vns cōtre les autres tous les efforts que la colere, & fureur de gens plebeyiēs, & barbares peut conſeiller: tellement que l'authorité, ny les remonſtrances, & prieres des prelates, & autres grands perſonnages, qui ſe monſtroient neutres & moyenneurs de paix, n'y ſeruit d'autre choſe, que d'adiouſter de l'huile au feu. Ils trauaillerent grandemēt pour faire vne trefue de quarante iours, mais ce fut leur dōner loisir de ſe fortifier pour commettre toutes les cruautés qui ſ'en enſuiuirent: car les mutins de la Nauarrerie, durant la trefue, tirerent, par le moyen de l'Eueſque de Pampelone Don Armingol, grand renfort de gens eſtrangers, avec leſquels, la trefue expirée, ils ſe ruerent contre le bourg: mais voyās qu'ils ne le pouuoient forcer, ils coururent les

La Cité de Pampelone partie en deux ſeſſions.

Eueſque fauteur des ſeditieux.

*Cruautés
des sedi-
tieux Pam-
petonois.*

*Meurtre de
D. Pero Sa-
nches de
Montagu.*

champs, où estoient les vignes de leurs
contraires, qu'ils couperent, & arracherēt,
& ne pouuans assés encor assouir leurs
cruautés, tuerēt tous les petits enfans que
ceux du bourg auoyent baillé à nourrir
aux villages, les froissans, par horrible in-
humanité, contre les pierres, & murailles,
adioustant à ces impietés de fait, infinies
iniures de parolles contre leurs aduersai-
res, & au deshonneur de leur Royne. Ou-
tre ce, ayant ce peuple brutal entendu que
D. Pero Sanches de Montagu, lequel en
ce dernier tumulte auoit esté contraire au
gouuerneur Eustache de Bellemarche, se
vouloit reconcilier avec luy, vindrent de
nuit en son hostel, & le massacrerēt cruel-
lement. Telles, & autres meschancetés cō-
mirent les habitans de la Nauarrerie, con-
tre la Majesté de Dieu, & de leur Royne:
parquoy ils attirerent vn grief iugement
sur eux, car ayant esté le Roy de France ad-
uertí des desportemens des rebelles, dès le
commencemēt de leur conspiration des-
couuerte, s'en sentit grandement offensé.
Partant pour chastier ceux qui auoyent
porté si peu de respect à sa grandeur, &
causé les maux qui s'en estoient ensuiuis,
ensemble les executeurs d'iceux, il mit sus

une puissante armée, qu'il voulut mener en personne en Navarre, l'an 1276. mais^{1276.} estant arriué à Saulueterre en Bearn, contraint d'y seiourner quelque temps, a cause des neiges, qui estoient tombées en grande abondance, qui occupoyent les passages des montagnes, il fut tant sollicité par ceux à qui ce voyage ne plaisoit, qu'il résolut de s'en retourner, baillant la fleur de son armée pour conduire en Navarre a Charles (les histoires de France l'appellent Robert ij.) Comte d'Artois, lequel traaversant les monts par Iacca, vint par Sanguesa, camper à Pampelone, n'ayant voulu passer par le val de Ronçal, pource que les habitans tenoyent le parti de ceux de la Navarrie: Au secours desquels estoient entrés au Royaume quelques bandes de Castillans, lesquels se voulurent retirer quand ils entendirent la venue des François: mais estans chargés sur l'arriere garde, firent quelque perte de leurs gens: & comme ils se retiroient lentement, les François, & les Navarrois de leur parti, les assaillirent derechef sur la queue: à raison dequoy ils tournèrent visage, mais ils furent deffaits, & tournés en fuite, avec grande perte. Or pource que durant le

L'hospital a
qui tornaïs.

combat, les Nauarrois disoyent souuent aux Castillans, *A qui tornaïs?* c'est à dire, y reuenés vous? & que ceste demande plusieurs fois fut ouye, & reiterée: on dit que l'hospital qui fut basti pour enterrer les morts de ceste rencontre, fut nommé a ceste cause l'hospital *a qui tornaïs*, & s'appelle encor ainsi aujourd'huy. Le Comte d'Artois assiegea la Nauarroise, laquelle il pressa de telle façon, que D. Garcia Almoravid, qui estoit dedās avec autres siens complices en bon nombre, se defiant de la pouuoir defendre, sortit vne nuict, abandonnant le miserable peuple, destiné au chastiment qu'il auoit bien mérité. Ces chefs se retirerēt au Chasteau de Sar, d'où ils furent deslogés par les François, & cōtraints de s'enfuir en l'isle de Sardaigne.

Prise de la
Nauarrerie

Les habitans de la Nauarroise se voyans au matin sans capitaines, furent grandement troublés, & cōme gens qui estoient meilleurs brigans & seditieux, que soldats, se prindrent a crier misericorde, & demander pardon au Comte d'Artois, lequel feignant d'auoir grand pitié d'eux, ce pendāt qu'il les amusoit de parolles d'un costé, fit assaillir de l'autre les murailles, & fortifier les desgarnies de defenseurs, tant que les

foldats y entrerent au despourueu, se met-
tans à faire vne cruelle boucherie de ce ^{Cruelle}
peuple mal-heureux, ne cessans de tuer ^{boucherie}
tant que le iour leur dura, & puis la nuict ^{du peuple.}
estant venue, firent leur deuoir de piller,
& saccager, & commettre autres excès, &
violences, que la victoire, la haine, & la fu-
reur conseillent au soldat insolent, & ne se
contentans d'auoir tué les hommes, & ra-
ui leurs biens, sans espargner les lieux sa-
crés, ny prophanes, s'estendit la rage sur
les maisons, & edifices, lesquels furēt des-
molis & brullés, dont se sentirēt les autres
quartiers de la ville, qui estoient pro-
chains, passant le feu de l'un à l'autre, avec
grand ruine de ceux qui n'estoyēt en faute
autant que des coupables. Le feu se print
aussi en la chambre des comptes, ou furēt
ars, & consumés plusieurs tiltres, lettres, &
escriptures anciēnes du Royaume de Na-
uarre: le reste qui se peut sauuer fut porté
au Chasteau de Tiebas, où le thresor, ar-
chiues & chambre des comptes de Na-
uarre a esté long temps. Apres que la furie
fut cessée, les hommes qui estoient en vie,
restés du glaue, furent condamnés, & exc-
cutés a mort publiquement, comme trai-
stres: n'eschapant aucun la seuerité du iu-

gement, sinon ceux que l'innocence de leur enfance excusa, & furent tous les biens de ce peuple confisqués. Ainsi fut destruite la Nauarrerie de Pampelone, par iuste iugement de Dieu, en punition des cruautés brutales que les mutins, habitans d'icelle, auoyent exercées contre l'aage innocent, les villages autour de la cité, & leurs autres rebellions & laschetés. Pour le meurtre commis en la personne de Don Pero Sanches de Montagu de Cascante, & autres excès, & dommages, furent accusés, & appelés en iugement aux Estats de Nauarre pource assemblés, les apres nommés, D. Gonçal Inigo, Iean Inçalbis & son fils, Simon de Varris, Michel Graces de Varris, Garcia Perez de Licoani, Pero Ximenes de Sabalca, Simon Perez de Opaco, Enego Gil de Vrdanis, Sancho Inignes de Vrdanis Gonçaluo de Arbiçu, & Ruy Gonçales son frere, Sancho Perez de la guerre, & Ochoa Perez son frere, Iean de Armendaris, Iean & Sanches le Biscain, tous lesquels ne comparoissant point, firent leur cause plus griefue, leur faisant partie Ruy Perez de Eschales, Ferdinand Perez de Eschales, Michel Peris de Subica, & Pedro d'Aybar. Par ces exe-

cutions, & procédures, le surplus des turbulents intimidés, se contint, & demoura le Royaume en paix pour vn temps.

L'an mil deux cens huitante vn il y eut ^{1281.} vne entreueuë du Roy D. Alphonse de Castille, de l'infant D. Sancho, & du Roy D. Pierre d'Arragon, au lieu dit Campillo, és enuiron d'Agreda, où fut iurée ligue & confederatiõ, entre eux contre tous les Princes du monde, mesme acorderēt de faire la guerre cõtre Nauarre, à moitié de cõqueste entre Castille & Arragõ, mais le Roy de Castille ne pouuāt riē faire pour la diuisiõ auenue entre luy & son fils D. Sancho qui le desposseda, les Arragõnois seuls se battoyēt avec les Nauarrois, sans aucune espargne, mesme ceux de Sos, & Filera, cõtre les habitans de Sanquesse: & estoyēt si acharnés les vns sur les autres, qu'il y eut bien à faire à les despartir: neantmoins la bonne diligence d'Eustache Bellemarche gouuerneur de Nauarre, fit cesser les armes, & accorderent trefues pour quelque temps. Bellemarche retourna en France, & en son lieu gouerna le Royaume de Nauarre vn Cheualier nommé Guerin d'Amplepuits. Le Roy de Frãce Philippe iij. estant protecteur de ce Royaume pour

sa niepce la Royne Ieanne, auoit aussi occasion de penser aux affaires d'Espagne en ce que les enfans de D. Ferdinand de la Cerde, nais de sa sœur D. Blanche auoyēt esté non seulement deboutés par le Roy D. Alphonse du droit de succession en la Couronne de Castille qui leur appartenoit, comme enfans de son fils aîné, mais outre ce estoient ces deux Princes, D. Alphonse & D. Ferdinand de la Cerde, detenus prisonniers par le Roy d'Arragon au Chasteau de Xatina : & d'abondant estoit aduerti, qu'outre les essais des Arragonnois du temps passé, leur Roy auoit fait nouuel accord avec Don Sancho de Castille a Campillo, pres de Tarassone, où estoit capitulé entre autres choses (comme nous auons dit) qu'ils assailleroient le Royaume de Nauarre a communs frais, & partiroient la cōqueste d'iceluy par moitié. Item que s'estans derechef veuz Don Sancho de Castille, & D. Pedro d'Arragon, l'Infant auoit cédé au Roy D. Pedro tout le droit qu'il pretendoit en Nauarre, promettans de n'y faire iamais la guerre sans sa volonté, afin qu'il fut plus libremēt aidé des forces d'Arragon, pour deposséder son pere. Contre toutes ces machina-

*Machina-
tions des
Castillais &
Arragonnois
contre Na-
uarre.*

tions estoit le Roy Philippe assés sage, & puissant: & de fait, y pourueut suffisamment: de sorte, qu'elles reüssirent toutes vaines, pour le regard de Nauarre. Sollicita toutesfois en vain le Roy de Castille, & celuy d'Arragon, pour la deliurâce de ses nepueux, qui estoient a Xatina. Il enuoya en Nauarre bon nombre d'hommes de cheval, pour la tuition du pays, & pour estre prompts a autres occasions, que le temps pourroit amener. Les diuisions qui estoient entre les Seigneurs de Castille, les vns tenans le party du Roy D. Alphōse, les autres celuy de D. Sancho son fils, furent opportunes aux François, & Nauarrois en plusieurs choses, car le Royau-me de Nauarre seruant de retraicte a tous ceux qui estoient en la mauuaise grace de D. Sancho, plusieurs des principaux hommes de Castille, & lieux dependans, se venoyent ioindre a ses troupes Nauarroises, & Françoises, & faisans des courses dans la Castille, tenoyent tousiours ce Royau-me de Nauarre en reputation, & faisoÿēt redouter les forces d'iceluy, lequel en peu de temps changea souuent de gouuer-neurs: car apres Eustache de Bellemarche, & Buerin Amplepuiets, y furent enuoyés

1283.

Guillaume de Broëde, & puis Jean de Cōflans Seigneur de Dampierre, Marechal de Champagne, lequel y estoit l'an mil deux cens huittâte trois, lors qu'entre autres Seigneurs de Castille estoient refugiés en Nauarre Don Nugno de Lara, Don Pero Aluares des Asturies, Don Ramir Dias, Don Ferdinand Ruis de Cabrera, & Don Ferdinand Ruis de Saldaigne, lesquels se ioignans avec autres qui tenoyent bon au pays : assauior l'Infant Don Iayme de Castille Don Jean Nugnes, Don Aluar Nugnes, & autres tous aidés des troupes Françoises, & Nauarroises, faisoient des courses iusques à Toledé, avec grâde destruction & ruine d'hommes & de biens : car le Roy de France en vouloit à l'Infant D. Sancho comme vsurpateur du droit de ses nepueux D. Alphonse, & D. Ferdinand de la Cerde : & non moins estoit ennemy du Roy Don Pedro d'Arragon, tant à cause de la detention de ses nepueux, & les complots d'avec Castille, que pour les choses aduenues au Royaume de Naples entre les Arragonnois, & François, ainsi que nous dirons. Ces coureurs, qui estoient vne com-

petente armée de quatre mille cheuaux, & grand nombre de gens de pied, retournans deuers Toledé, auoyét deſſein d'entrer en Arragon, & d'affaillir Taraffonne: ce qu'entendant le Roy D. Pedro, qui tenoit garniſon a Longrogne, avec trois cēs cheualiers pour la defence de Caſtille, enuoya prier l'Infant Don Sancho, de ſ'acheminier celle part, afin de le ſecourir contre les François, & Nauarrois, qui venoyent deſtruire ſon Royaume d'Arragon, ce que l'Infant fit incontinent: & ſ'eſtant ioinct avec le Roy D. Pedro, ſauuerent Taraffonne: neantmoins perdirent les Arragonnois le Château de Yl, encor qu'il fut bien deffendu par Ximeno de Artreda: perdirent auſſi Lerda, & Filera, qui furent baillés en garde a ceux de Sangueſſe: Baylo, & Arbuiſ furent deſtruits, & paſſerent les François & Nauarrois iuſques à Verdun. Comme ils ſ'en retournoyent de là, l'armée du Roy Don Pedro, & de Don Sancho ſe trouua en lieu qu'elle ne pouuoit fuir la bataille, que les François leur preſentoient: mais les Cheualiers Caſtillans réfugiés, qui les accompagnoyent, leur

dirent qu'ils auoyent volontiers couru le pays, & faict leur deuoir és assauts des places qu'ils auoyent prinſes, mais que de coucher la lance contre Don Sancho, ce n'estoit leur intention : c'est à dire que de piller, & brigander les villes, & les pauvres innocents, qui ne pouuoÿēt-més des querelles des grands, ils le faisoÿent volōtiers, mais qu'ils ne se vouloyent adresser aux Seigneurs, qui leur pouuoÿent donner impunité de toutes les méſchācetés qu'ils auoyent faictes, & qui auoyent moyen de se vanger d'eux, s'ils se mōstroyent trop aspres ennemis. Ainsi se retirerēt les troupes Françoises, & Nauarroises vers Pampelone, d'où aucuns Seigneurs Castillans retournerent trouuer Don Sancho, ayant fait leur paix.

Ce dāger où se trouua le Roy D. Pedro fit qu'il pourchassa trefues avec Nauarre pour quelques mois : car il auoit mesme plusieurs choses à desmeler avec plusieurs cheualiers d'Arragon & Cattelogne, qui se sentoÿent fort greués de luy, pour la rigueur & aspreté de ses mœurs, & tirannique façon de commander, s'adressant mesme à son propre sang, contre tout respect des loix, & de nature. Ce fut luy mesme
qui

qui fit les vespres si renommées, dictes Siciliènes, qui abusa par diuerfes fois Charles de France Roy de Naples, qui fut excommunié par le Pape Martin successeur de Nicolas iij. qui despouilla son frere propre du Royaume de Maiorque.

L'an mil deux cens huitante cinq le Roy 1285. de France Philippe iij. & son fils Philippe le Bel Roy de Nauarre estans entrés en Cattelogne, auoyent prins Parpignan, ruiné, que villes que chasteaux, iusques au nombre de vingt sept, mis le siege deuant la ville de Gironne. Les viures pour le cāp estoient portés de Narbonne, aux prochains haures, & ports d'Empurias, Roses & autres, & de là quelque peu d'espace de chemin par terre, avec garde des gens de cheval. Ce que le Roy d'Arragon voulant destourner, & avec ce, faire butin des deniers qu'il sçauoit qu'on portoit pour le payement des gens de guerre, vint dresser vne embusche de cinq cens cheuaux, & enuiron deux mille hommes de pied, entre la mer, & le cāp des François: Dequoy ayant eu le Roy de France aduertissement par ses espies, enuoya au deuant, par le cōseil du Connestable de France, trois cens hommes d'armes choisis, sous la charge

d'iceluy, lesquels arriués au lieu des embusches, & recognus estre en petit nombre, furent incontinent environnés & assaillis, avec grands cris, par les Arragonnois, qui pensoient bien les desfaire: mais les François, qui estoient venus là pour combattre, les rébarerent si bien, que quoy qu'ils fussent inferieurs en nombre, ils se monstrent plus qu'esgaux en vaillance & courage. Les Arragonnois animés par leur Roy present, faisoient grand deuoir: tellement que ne cedant les vns aux autres la meflée dura assés long temps sans aduantage, iusques à ce que le Roy Don Pierre, heurté d'un coup de lance, & blessé grieuement en la face, se retira du combat: par quoy les gens se monstrent lors vaincus. La cauallerie se sauua avec le Roy, mais quant aux pietons, ils furent tous taillés en pieces: Il y mourut sur le champ, tant d'une part que d'autre, beaucoup de noble, le Roy D. Pierre s'estant fait porter à ville-Franche, mourut tost apres de sa blessure.

*Mort du
Roy d'Ar-
ragon.*

Or estant le Connestable de France de retour au siege de Garone, il fut recueilli avec tous les signes de ioye qu'il est possible, les assiegés sçachant la mort de leur

Roy Raymond de Cardonne qui cōman-
doit dedans, rendit la ville au Roy. En ce
lieu la peste se mit au camp du Roy, par-
quoy fut contraint retourner en France
& rompre son armée, & estant à Parpignā,
où l'armée parvint à grande difficulté, il y
rendit l'ame, ayans les Arragonnois occu-
pé tous les pas des mōtagnes, il fallut gai-
gner le chemin pied a pied avec l'espée.
Durant l'année 1286. la guerre dura touf- 1286.
jours entre les Nauarrois & Arragonnois.
Il y auoit pour Viceroy en Navarre, vn
gentilhomme nommé Clement de Lau-
nay : vn capitaine Nauarrois nommé D.
Iean Corbaran qui auoit la charge de la
fronteire d'Arragon, fut defait, & prins
par D. Pedro Cornel Arragonnois. Les
Nauarrois aussi entrās en Arragon y fou-
ragerent tout ce qu'ils trouuerent deuant
eux, & sur la fin de l'année fut fait trefue,
laquelle dura peu, car souuent il falloit ve-
nir aux mains, & prindrent les Nauarrois
sur les Arragonnois Sauueterre l'an 1289. 1289.
l'année suiuate 1290. la Royne Ieanne de
Navarre accoucha d'un fils, nōmé Louys,
qui fut par apres heritier des deux Royau-
mes, & surnommé Hutin. Le Royaume
de Navarre ayant changé de gouuerneur

1293.

y auoit en l'an mil deux cens nonâte trois vn cheualier François nommé Hugues de Conflans : neantmoins les grands Estats, & charges du Royaume, gouuernements, & capitaineries particulieres estoient bail-
lés, pour le plus aux Nauarrois naturels, & comptoit on en ce temps, en Nauarre, à liures, sols & deniers, à la maniere de France, sur tout estoient pourueus, & diligem-
ment gardées les frontieres deuers Arra-
gon, où par le passé on auoit fait grand bresche & prins plusieurs places qui de-
meurerent à Nauarre, par le traité de Ta-
rascon, ou pour le moins en paix faisant,
ne fut fait aucune mention de les rendre.
Estant Merino, ou Preuost de Pampelone
Diego Sanches de Garris, fut mis le feu
de nuit, dedans la ville, par Symon de
Ardaiz, Michel de Alcanegui, & Garcy Sa-
ches, gès de basse cōditiō, desireux de mal-
faire, dont furent brulées plusieurs mai-
sons. Ces garnemens prins, furent pendus
& estranglés: Le gouuerneur rempara, &
fortifia plusieurs lieux, & maisons par le
Royaume, principalemēt aux frontieres:
fit aussi desloger les Anglois du pays en-

1295.

viron l'an 1295. a cause des guerres qui se
demenoyent cruellement entre les Roys

de France & d'Angleterre. Iusques a ce temps dura la confederation d'entre France, Nauarre & Castille : assauoir , iusques au decez du Roy D. Sancho : mais alors, pour les partialités renouvelées d'être ses enfans, & ceux de la Cerde, toute amitié se rompit.

L'An mil deux cens nonante six estant ^{1296.} la Castille diuisée par guerres ciuiles, les Nauarrois & Arragonnois ayans paix entre eux, entrerent en Castille conduits par D. Alphonse de Cerde, qui se disoit Roy de Castille, tellement qu'on veid vne pitoyable reuolte en tous les endroits d'Espagne, la peste s'estant mise au camp des Nauarrois & Arragonnois, ils furent contrains se retirer & faire trefue, laquelle ils rompirent incontinent apres, se saisissant de la Iuifverie de la Cité de Nagera, lieu fort de nature, & où ils se fortifierent: disans, qu'ils la tenoyent au nom de l'Infant D. Alphonse de la Cerde, qu'ils appelloyēt Roy de Castille : & comme ils vouloyent proceder plus auant és terres du Traict de la riuiera de Oya, ils furent repouffés par D. Iean Alphonse de Haron qui les assiegea en la Iuifverie, & les pressa tellement, qu'ils furent contrains de la quitter, & se

1300.

rendre pareillement : aussi furent rendu
au Roy Jacques d'Arragon les villes d'
Lerda, Vlsitera & Sauueterre, afin de fair
vne paix ferme entre ces deux Royaume
d'Arragon & Nauarre: l'An mil trois cens
Alphonse de Roiced, estoit gouuerneur
en Nauarre, lequel enuoya en Castille vn
Ambassadeur de la part du Roy Philippes
le Bel, & de sa femme D. Ieanne Royne
proprietaire de Nauarre, pour demander
les terres de l'ancië patrimoine de la cou-
ronne de Nauarre, vsurpées par les Roys
precedents de Castille, lequel Ambassa-
deur estoit vn cheualier Nauarrois, qui fut
renuoyé par la Royne Marie, & son con-
seil, avec les meilleures raisons, & plus gra-
cieuses parolles qu'ils peurent. Le Roy de
France estoit lors fort empesché contre
les Flamens de Bruges, & autres, contre
lesquels il auoit receu vne notable route,
avec mort de plusieurs grans Seigneurs,
entre lesquels estoient Robert Comte
d'Artois, Regnaud de Nesle, Connestable
de France, & plus de deux cens autres per-
sonnages de renom. L'Ambassadeur re-
tourné, le gouuerneur eut conseil avec
l'Infant D. Alphōse de la Cerde, D. Iean
Nugnes de Lara, & autres ennemis de Ca.

stille, lesquels conclurent d'enuoyer au Roy Philippes D. Iean Nugnes, & autres Ambassadeurs, afin qu'il authorisast les promesses faictes en ceste assemblée, qui estoient de conquerir pour Nauarre, toutes les terres d'Oya, & le Royaume de Castille pour D. Alphonse de la Cerde. Ces Ambassadeurs furent bien receus en la cour de France, & soudain despechés, avec aprobaton de tout ce qui auoit esté faict, & escriuit le Roy au gouuerneur, qu'il donnast toute ayde, & assistance aux refugiés de Castille, contre le Roy D. Ferdinand.

Durant ces choses, l'Euesque de Pampelone, Arnaud de Puyane, Basque de nation, tint trois sinodes, pour la reformatiõ de son clergé qui en auoit bon besoin. Aussi la Royne de Nauarre D. Ieanne se voyant d'aage, fit bastir en la Cité de Paris le fameux clergé de Nauarre, qui y est, doüant iceluy de bonnes rentes, en Champaigne, tant pour l'entretenement des regents, & professeurs en Theologie & es sciences humaines, que de la Chapelle, & ministres d'icelle. Ceste mesme Princesse edifia la ville appelée Pont de la Royne en Nauarre, autrement dite Cares; & ayant vescu en France sans aucunement reuenir

*Bastiment
du College
de Nauarre.*

1305.

en Nauarre, l'espace de trente & vn an, ou enuiron, mourut l'an mil trois cens cinq, laissant Louys, Philippes & Charles, lesquels regnerent en France, & Nauarre, successiuellement l'un apres l'autre, & Isabel, qui fut Roynie d'Angleterre, mariée à Edouard deuxiesme fut enterrée aux Cordeliers de Paris, vn an apres le decés de ceste Dame.

De Louys Hutin, premier du nom XXVI. Roy de Nauarre, & 46. de France.

Louys fils du Roy Philippes, & de D. Ieāne, surnommé Hutin, premier de ce nō entre les Roys de Nauarre, succeda à sa mere audit Royaume. Il ne s'intitula point Roy, sinon apres qu'il se fut fait couronner à Pampelone, mais seulement fils aîné, & heritier du Royaume: son surnom de Hutin signifie mutin, ou rioteux, qu'il acquit estant paruenue à la couronne de France, ou bien deuant mesmes, selon aucuns, soit pour auoir suscitē des noies, soit pour les auoir apaisēes. Dés que la mort de la Roynie fut sceue en Nauarre, les Estats s'assemblerent à Pampelone, & aduiserent d'enuoyer

Ambassadeurs en France, pour supplier le Roy Philippes de leur enuoyer Louys son fils, leur Prince naturel, & ayant escrit lettres à cest effect au nom des Estats, furent despechés l'Euesque D. Arnaud de Puyana, & Fortun Almorauid, bien & honnorablement accompagnés : lesquels arriués en la Cour de France, remontrèrent aux Roys le grand ennuy que le peuple de Nauarre portoit de la perte de leur Royne, & souueraine Dame, pour la consolation duquel ils supplioyent que leur nouveau Roy Louys s'y acheminast au plustost qu'il pourroit, accompagnant ce desir extreme des Nauarrois de raisons necessaires, d'autant qu'ils auoyent grandes plaintes à faire du gouuernement des Vicerois, qui auoyent administré les affaires du Royaume, au grand detrimement, & foule d'iceluy: à quoy auoit donné occasion la perpetuelle absence du souuerain magistrat, lequel n'auoit peu voir à l'œil l'estat de son pays, & son peuple, mais s'estoit tousiours seruy des yeux, & des oreilles d'autrui, dont les rapports sont volontiers faux, & l'effect, & verité, ou teue, ou dissimulée. Ceste requeste sembla iuste aux Roys pere, & fils : neantmoins le Roy

Louys, ne vint en Nauarre que deux ans apres, cependant il se maria en France, à Marguerite fille de Robert, Duc de Bourgongne, de laquelle il eut en dot cinquante mille liures en argent, & les terres de Gien sur Seine: duquel mariage issit Jeanne, qui fut Roynne de Nauarre, mariée à Philippes Comte d'Eureux, fils de Louys de France, par laquelle les Roys de Nauarre ont querellé droit en la Duché de Bourgongne contre les Roys de France: car ayant eu Robert Duc de Bourgongne pere de ceste Marguerite, plusieurs enfans, la plus part d'iceux ne laissa aucuns hoirs, & la posterité de ceux qui eurent enfans defaillit aussi tost, ne demeurant de la maison de Bourgongne autre race que celle de ceste Dame, mariée à Louys Hutin.

Durant la dilation du nouveau Roy de Nauarre à venir en son Royaume, il y eut des gouuerneurs, ou Viceroyes, a la maniere accoustumée. Les grans troubles aduenus en France les années precedentes, à cause des querelles d'entre le Roy Philippes le Bel, & le Pape Boniface viij. auoyent causé plusieurs desordres, dont estoit aduenue vne famine extreme par tout le Royaume. Le Pape Boniface auoit excō-

munié le Roy Philippe, & bailla s^{on} Royau-
me en proye à qui le pourroit occuper:
mais luy mesme fut la proye des François,
le successeur duquel, Benoist xj. absout
le Roy, sa maison, & son Royaume, lequel
ne tint le siege Papal que huit mois. Apres
son decés, grandes controuerses, & bri-
gues furēt a l'election d'un nouveau Pape:
tellement que le siege fut vacquant plus
de dix mois, ne se pouans accorder les
Cardinaux François & Italiens assemblés
a Peruse, lesquels en fin conuindrent, que
trois Cardinaux François seroyent nom-
més par les Italiens, ou bien trois Italiens
par les François, l'un desquels seroit esleu
Pape par l'autre faction, les Italiens vou-
lurent estre les nominateurs, pource nom-
merent trois prelates François, qu'ils sça-
uoyent estre mal contens, & ennemis du
Roy Philippes, entre lesquels estoit l'Ar-
cheuesque de Bordeaux, Bernard, Basque
de nation, qui fut esleu Pape par les Fran-
çois, & a la requeste du Roy Philippes. Ce
fut ce Pape qui fit venir en France la cour
Romaine l'an mil trois cens & cinq, il
fut nommé Clement cinquiesme. Ce Pa-
pe octroya au Roy de France les decimes
Ecclesiastiques, pour reparation des de-

gasts que les guerres auoyent causé, & le droit de patronnat sur quelques Eglises delaisées, pour les pourvoir de ministres, dignes de leur charge. Le Roy Louys acompagna son pere durant tous ces remuemens d'affaires, & partant ne peut si tost venir en son Royaume de Nauarre comme il eut bien desiré, joint qu'il estoit bien ieune: neantmoins les depesches, & lettres de toutes sortes s'expedioyent en son nom, & non en celuy de son pere. Depuis que les Roys de France vnirent par mariage, la couronne de Nauarre a la leur, cessa toute la querelle du droit de superiorité que les Roys de Castille pretendoyent en iceluy, lequel ayant iadis acquis par leur puissance surmontante celle de Nauarre, ils perdirent aussi par mesme droit de plus pouoir, qui estoit lors du costé de France. Le Comte de Poictiers, Philippes frere du Roy Louys Hutin, avec lequel le Roy d'Arragon auoit pourchassé de faire le mariage de sa fille Marie, moyennant qu'on le fit Roy de Nauarre, fut marié l'an 1306. a Ieanne fille de Othelin Cōte de Bourgongne: les nopces duquel se firent a Corbeil, apres lesquelles le Roy de Nauarre, Louys s'achemina en son

1306.

Royaume, bien accompagné de noblesse Françoise. Estant a Pampelone, il fut couronné, avec grand contentement, & ioye de tout le Royaume, l'an mil trois cens 1307. sept, & lors commença a se nommer Roy, estant aagé seulement d'environ seize ans. Il iura de garder les droits, & Loix du Royaume, & puis voyagea, visitant les villes, & places d'iceluy, avec grand concours de ses vassaux, & subiects, qui auoyent esté long temps sans voir leurs Roys, & Princes souverains, envers lesquels le Roy se monstra doux & affable. Toutesfois estant en la ville d'Estella, il fit arrester prisonniers D. Fortun Almoravid, & Martin Ximenes d'Ayuar, qui s'estoyent formalisés pour les priuileges de la noblesse de Navarre, contre les gouuerneurs François, & s'estoyent entremis au gouuernement pour la garde, & conseruation du pays, dont les Nauarrois se trouuerēt aucunement scandalisés : neantmoins il les paya de raisons, & sortant de Navarre pour retourner en France, emmena ces deux prisonniers. D. Fortun mourut en prison, mais Martin sortit par la faueur du Comte de Valois, lequel toutesfois ne vescu gueres apres. Il fut suivi par plus de deux cens gentils-

hommes Nauarrois, lesquels il appoinct en France, tant pour les rendre plus affectionnés par biens faits, & les accoustümer aux mœurs Françoises, qu'aussi pour auoir commis autant d'hostages par deuers luy, de ceux dont il auoit defiance.

1308.

1310.

Le Pape Clement v. ayant fait vn acte memorable, qui poisa fort aux Italiens, & aux autres nations, d'auoir transporté le siege Papal en France, entreprint encor vne autre affaire digne de non moindre renom: les Cheualiers Templiers accreus en richesses, estoient enuyés par les plus grands: tellement que le Pape meü, ou de conscience, & desir de reformer les vices, ou voulant participer au butin, fit informer, l'an mil trois cens huit, contre eux par toute la chrestienté, les citans tous de comparoistre au Concile par luy publié, deuoir se tenir pour cest effect, l'an mil trois cens dix, en la Cité de Vienne en Dauphiné.

Auant & depuis ce Concille, estans par les informations faite entre ces Cheualiers, plusieurs attraincts de griefs, & enormes crimes, grandes executions s'en ensuiuirent, plusieurs furent esteins par feu, & autres diuers suplices. Aucuns les ont

voulu excuser, & ont laissé par escrit, qu'õ les a faiet mourir, à cause de leurs grandes richesses. Le Pape prononça ceste sentence contre eux, presens les Roys de France & de Nauarre, Charles Comte de Vallois, Philippe, & Charles freres de Louys Hutin, & autres. Ainsi eut fin l'ordre des Tēpliers, qui auoit duré enuiron deux cens ans. Des despouilles de ces Templiers, les Cheualiers de saint Iean de Hierusalem furent enrichis, lesquels auoyēt, l'an 1308. gaigné l'Isle de Rhodes, & aydē à destruire les Templiers, le Pape & le Roy de France partirent les meubles confisqués d'eux.

Fin de l'ordre des Tēpliers.

Autres ordres de Cheualiers eurēt origine des ruines de cestuy cy, comme ceux dicts de Christus en Portugal, par le don & diligence du Roy Denis, lequel leur assigna rentes, ordonnāt qu'ils porteroyēt pour marque vne croix blanche, enchassée dans vne croix rouge.

Au Royaume de Valence l'ordre dict de nostre Dame de Montesa, qui est sous la regle de Cisteaux, leur fut baillé plusieurs places appartenantes aux Templiers.

L'an mil trois cens dix, les Nauarrois 1310. cōmencerent leurs vieilles querelles con-

*Deffaitte
des Arra-
gonnois.*

*Autre def-
faiite.*

1312.

tre ceux d'Arragon, desquels (quelques accords qui fussent ensuiuis) ils ne furent oncques bons amis: & sortans de Pitiella, lieu qui lors estoit du Royaume de Nauarre coururent les terres voisines d'Arragon, faisans des maux inestimables: de quoy prouoqué le Roy Don Iacques, enuoya vne armée assieger ceste place, mais ils furent defaits par les habitans de Sanguesse, ville frontiere de Nauarre, aidés de quelque gendarmerie Françoisse, estans depuis rentrés les Arragonnois en Nauarre, ayant couru iusques a la ville d'Olite, & fouragé le pays, ils furent derechef chargés par ceux de Sanguesse, & autres des lieux voisins, ainsi qu'ils pensoient passer la riuiere d'Arragon, au gué de S. Adrien, furent derechef encor deffaits, avec grand perte de leurs gens, & de l'estandart Royal d'Arragon, que ceux de Sanguesse emporterent, à raison dequoy, & en memoire de leur vertu, & vaillance, ils portent pour armoiries, par octroy du Roy Louys Hutin, les bandes de gueulles d'Arragõ, mais en champ d'Argent.

L'an 1312. furent les troubles de Lyon sur le Rosne, entre les habitans de la ville, & leur Archeuesque Pierre de Bresse, a
cause

cause de l'vsurpation qu'iceluy faisoit sur la iustice du Roy : le Roy Philippes y enuoya son fils le Roy de Nauarre ; lequel print ce prelat prisonnier, & l'enuoya au Roy son pere : à raison dequoy, & pource qu'il auoit osé mettre la main sur vn Archeuesque, il fut apellé Hutin. Ces citoyés pacifiés retournerent encores à tumultuer, mais ils furent chastiés, par le mesme Roy de Nauarre. Ce fut lors que la Royne de Nauarre Marguerite, les Comtesses Ieanne de Poictiers, & Blanche de la Marche, qui auoyent espousé les trois freres enfans de France Louys Hutin, Philippes & Charles furent accusées d'adultere, & mises prisonnieres au Chasteau Gaillard, desquelles la Comtesse Ieâne de Poictiers fut trouuée innocēte, mais la Royne Marguerite de Nauarre, & la Comtesse Blanche conuaincues, furent condamnées à perpetuelle prison, où Marguerite mourut tost apres, les adulteres furent executés à mort par diuers, & aspres suplices. C'estoyent Philippes, & Gautier d'Aunoy freres. Vn huissier de la chambre qui seruoit de maquereau, fut pendu & estrâglé. C'est de ceste Royne de Nauarre qu'on recite, que voyant passer quelque beau

P.

Troubles à
Lyon.

Surnom de
Hutin donné
au Roy
Louys & la
cause.

Princesses
accusées
d'adultere.

ieune homme, elle le faisoit prendre, & amener secrettement la nuict en sa chambre, & qu'apres auoir prins son deshonneste plaisir avec iceluy, le faisoit ietter dedas la riuiere de Seine, afin qu'il ne s'en ventast: ce qui fut en fin descouuert. De là vint ceste ambiguë sentēce, *Reginam interficere, nolite timere, bonum est.*

Adiournement deuant
Dieu donné
au Roy de
France &
au Pape.


1313.

Peu apres mourut en Frāce le Roy Philippes le Bel, laissant le sceptre des François à Louys Hutin son fils Roy de Nauarre. Aucuns tiennent que ce Roy Philippes, & le Pape Clement eurent vn adiournement deuant Dieu en la ville de Bordeaux où on executoit vn Cheualier Templier en leur presence, natif de Naples, lequel les voyans en vne fenestre pour voir ladicte execution, cria a haute voix disant, puis qu'il n'y a puissance au monde à laquelle ie puisse appeller de la sentence donnée, ie vous aiourne tous deux à comparoistre deuant Dieu dans l'an present: & de fait, dans ceste année mil trois cēs treze, & l'vn & l'autre moururēt: Louys Hutin auoit desia regné huit ans en Nauarre, quand il obtint la Couronne de France. Des affaires qui se passerent en Nauarre despuis que ce Roy fut venu a la

Couronne de France, n'y a pas grande memoire, aussi ses iours furent brefs : car dix huit mois apres il mourut en l'aage florissant & non meur de 23. ans huit mois, & vn iour au bois de Vincennes, le cinquiesme du mois de Iuin, l'an 1315. fut enterré à S. Denis, & fut le troiesme Roy de Nauarre de ceux qui furent enterrés en France, laissant sa seconde femme Clemence, fille de Charles ij. Roy de Naples, & sœur du Roy Robert, grosse d'un fils qui ne vescut point : de sa premiere femme Marguerite il laissa vne fille Jeâne qui par apres fut Royné de Nauarre comme tantost nous dirons, & durant la grossesse de ladicte Clemence, le Comte de Poictiers, Philippes de France, fut esleu regent des deux Royaumes de France & Nauarre, pour administrer iusques à ce que l'enfant qui naistroit, s'il estoit malle, auroit ataint l'aage de quatorze ans : & là où se seroit vne fille, qu'à elle & à sa sœur Jeâne, apartiendroyent le Royaume de Nauarre, & Comtés de Champagne, & Brie: mais que luy succederoit a la Couronne de France par droit de coustume, cōforme, & à l'ordre que Dieu a mis en nature, & suiuant les bonnes constitutions des anciens Estats,

de ne recepuoir à la Couronne vne femme qui est faite pour estre regie, & non pour commander.

*De Philippes le long second de ce nom. XXVII
Roy de Nauarre, & XLVII. de France
V. de ce nom.*

 E fut l'an mil trois cens quinze que le Roy Philippes le lōg vint à la Couronne de France, & Nauarre, plusieurs Seigneurs estoient d'auis, qu'estant decedé l'Infant Iean Posthume du Roy Louys Hutin, les Royaumes de France, & de Nauarre appartenoyent de droit successif à Ieanne de France, fille d'iceluy, & de Marguerite de Bourgogne. Ceux qui tenoyent ce parti, estoient Eude Duc de Bourgogne, Louys Comte de Neuers, & Himbert Dauphin de Viennois, mais pour les appaiser il bailla au Duc de Bourgogne, Ieanne sa fille aînée en mariage, & pour dot le Côte de Bourgogne patrimoine d'icelle, au Comte de Neuers la secōde nommée Marguerite, & Marie la troisieme au Dauphin. En ceste façon il leur ferma la bouche, reculant Ieanne sa niepce du Royaume de Nauarre.

re, qu'on ne luy pouuoit debatre. Or de tout ce qui se passa en Navarre durant son regne, ne se trouue relation digne de recit: seulement est faite mētion d'un gouuerneur pour luy au Royaume de Navarre, nommé Ponce de Morentin, qu'aucuns appellent Seigneur de Rouffillon, autres Viscontes d'Anay: de l'Euesque de Pamplone, D. Arnaud de Barbaztan: Aymar Seigneur d'Archias, Don Martin d'Ayuar alfier du Royaume, D. Inigo Perez de Rada cheualier, D. Jean Arnaud d'Espeleta, de l'Abé de Lerin, de D. Martin Inanes de Vrris, D. Pedro Ximenes de Mirafuentes, Capitaines, D. Garcia Martines de Oclaoqui, Diego Martines de Vrris, & Michel Martines de Artella cheualiers, qui constituoyent le conseil d'Estat du Royaume, il mourut l'an 1321. d'une fièvre quarte: il a regné cinq ans deux mois en Navarre & en France: sa mort fut à Fontainebleau: son corps fut enterré à S. Denis, son cœur au Conuent des Cordeliers de Paris, & ses entrailles, en celuy des Iacobins, selon la coustume introduite du temps du Roy S. Louys: & fut des Roys de Navarre le cinquiesme qui fut enterré en France.

*De Charles le Bel Premier du nom, XXVIII.
Roy de Nauarre, & XLVIII. de France
quatriesme de ce nom.*



V Roy Philippes, mort sans enfans masles a Fontainebleau, succeda son frere Charles le Bel l'an. 1321. és deux Royaumes de France, & de Nauarre. Or auoit Charles, lors qu'il estoit encor esloigné de ces successions, repudié Blanche sa femme, conuaincue d'adultere, comme il a esté dit cy dessus, laquelle eut la vie sauue, pource qu'on trouua que le mariage se pouuoit defaire, sans mort, par autorité du Pape: d'autant que Charles le Bel estoit son parrain, & l'auoit tenue sur les foins. Partant il espousa en secondes nopces Marie fille de l'Empereur Henry de Luxembourg, & sœur du Roy Iean de Boësmé. Au commencement du regne du Roy Charles premier du nom, estant gouuerneur ou Viceroy du pays de Nauarre, le susnommé Ponce de Morentin, le chasteau de Gorriti fut emblé par ceux de Guipuscoa sur les Nauarrois: pour cela, & pour autres occasions le gouuerneur ayant dressé vne grand armée, entra en Guipuscoa, delibéré de mettre le pays

*Le mariage
du Roy
Charles le
Bel.*

*Gorriti
prins sur
Nauarre.*

au feu, & à l'espée : pource commençant par le chemin de Toulouse en Guipuscoa, brûla Beraftegui, & fit des maux incroyables, sans espargner les lieux sacrés, ny les prophanes. Poussant outre vers Bertibar, l'armée Navarroise fut arrestée au bas des montagnes par les Guipuscoans, qui s'estoyent assemblés en nombre de huit cēs (aucuns disent huit mil) en armes, sous la conduite de Bil Lopez de Oñes, Seigneur de Larrea, qui s'estoit saisi des pas estroits, & lieux aduantageux, par où l'armée deuoit passer, ayant mis au haut des rochers, & precipices, aucuns paifans, lesquels, lors que le fort de l'armée, entrée bien aduant par ces difficiles passages, marchoit, laisserent rouler des tonneaux pleins de pierre, à ce préparés, qui en acablèrent vn grand nombre, & outre ce, mirent tel desordre en l'armée, que se presentans, & donnans dedans furieusement les huit cens soldats armés qui estoient aux passages, ils mirēt en fuite, & totale route ce grand nombre d'ennemis, en faisant vn carnage merueilleux, gaignant tout le bagage, qui estoit de valeur de plus de cent mil liures, chose presque incroyable, eu esgard a l'inegalité des forces, mais qui est

*Deffaitte des
Navarrois.*

toutesfois tesmoigné non seulement par les memoires de Guipuscoa, mais aussi par ceux de Nauarre: tant est perilleux le hazard de la guerre. Entre les morts de renom de l'armée Nauarroise furent trouués vn frere du Viceroy, & en outre Don Michel Sanches Alaués. Don Martin de Ronçal, Martin Vrtis, le Seigneur de Rosobel, Jean Corbaran de Leet, Jean Martines de Maudrano, Jean Henriques, Don Martin de la Pena, Pero Sotes, Jean Lopez de Vrras, Merni Maieur de la Montagne, Pierre de Ayuar, Martin de Vrsa fils de Martin de Ayuar, qui portoit l'estandart Royal, & autres iusques au nombre de cinquante cinq cheualiers. Entre les prisonniers fut Martin de Ayuar, & vn autre sien fils, le nombre des soldats fut tres-grand, & de ceste rencontre sont encor de ce temps chantés chansons tant en Castille, qu'en Guipuscoa, au lágage du pays: de là eurent commencement autres guerres qui se demenerent depuis entre Nauarre & Castille. L'an mil trois cés & vint quatre estant decedée la Royne Marie, le Roy Charles se remaria pour la troisieme fois, a Ieanne fille de Louys de France, Comte d'Eureux, & sœur de Philippes

d'eureux, lequel fut Roy de Nauarre quelque temps apres, à cause de sa femme Ieāne fille du Roy Louys Hutin, heritiere de Nauarre. Et ce mesme an, la Nauarrerie de Pampelone, par permission du Roy Charles, fut commēcée a rebastir, quarāte huit ans apres qu'elle auoit esté destruicte par le Comte Robert d'Artois. Ce Roy Charles le Bel, ny son frere Philippes le long ne virent oncques le Royaume de Nauarre, à raison dequoy plusieurs se debordoyent, en licences & excès, spécialement es frontieres, outre la volonté de leurs Princes, conuians, & dissimulans en icelles les gouuerneurs, & Viceroyes, qui de leur costé visoyent a leur proffit, & suiuoyent leurs passions plus qu'ils ne cherchoyent l'honneur, & seruice de leur maistre. Parquoy entre les Nauarrois, & Aragonnois des frontieres de Sanguesa, & du Real, & autres places limitrophes, quelque accord que les Roys eussent ensemble, tousiours y auoit des courses, pilleries & autres violences, tellement que les Aragonnois estoient cōtrains de tenir tousiours grandes garnisons en ces lieux là: dont le Roy d'Arragon se plaignoit au Roy Charles, lequel commandoit assés

1328.

qu'on vescu en voisins, & amis, mais il n'estoit point obey. Or l'an 1328. deceda le Roy Charles le Bel, au bois de Vincennes, ayant regné sept ans, & quelques iours, laissant la Royne sa femme enceinte, laquelle acoucha d'une fille, nommée Blanche, femme future de Philippes Duc de Orleans : il fut enseuely a saint Denis en France. Grandes querelles, & diuisions furent apres la mort de ce Roy, tant en France qu'en Nauarre. En France, pour-ce que durant la grossesse de la Royne, Edouard Roy d'Angleterre, fils d'Isabel de France, sœur du Roy deffunt, disoit le gouuernement luy appartenir. D'autre part Philippes de Valois, cousin germain des trois derniers Roys morts, maintenoit qu'a luy appartenoit la regence, comme proche heritier de la couronne de France.

La mort du Roy Charles sceuë en Nauarre, ces peuples qui auoyent acoustumé a viure licentieusement, & pour n'auoir de long temps veu la face de leurs Roys, estimoient auoir acquis liberté de faire tout ce qu'ils vouloyent & leur venoit en teste se mirent à tumultuer, & à esmouuoir seditions en toutes les villes de ce Royaume de Nauarre. En fin leur colere se deschar-

gea sur les Juifs qui estoient espars par les villes en grand nombre, odieux aux chrestiens, tant à cause de la diuersité de religion, que pour les excessiues vsures, par lesquelles ils espuisoyent toute la substance d'iceux : partant ils se meirent à les faccager par tout, ainsi comme ennemis à Estella, Viana, Funes, Marzilla, & autres lieux, avec si grande cruauté & auidité de raur, qu'on dit qu'ils firent mourir plus de dix mille personnes de ceste secte, hommes, femmes, & petits enfans. Pour remedier ausquels excez, & aussi retrancher la source, & origine d'iceux, les Estats de Navarre s'assemblerēt en la ville du Pont a la Roync, pour aduiser, sans aucun respect, à qui deuoit appartenir le Royaume de Navarre, ou au Roy Edouard d'Angleterre, ou a la Comtesse D. Ieanne d'Eureux. Les Estats furent tenus à Pampelonne, ville capitale du Royaume là où les voix furent diuerses, d'autant qu'il y en auoit beaucoup tenant le parti d'Angleterre : autres & a meilleur droit, tenoyēt pour la Comtesse qui estoit en mesme degré que le Roy d'Angleterre, mais fille d'un fils, & le Roy d'Angleterre fils d'une fille. Ainsi fut la Comtesse d'Eureux, Ieanne,

declarée vraye, & legitime heritiere du Royaume de Nauarre, l'an 1328. ayant esté le Royaume vacant enuiron quatre mois. Et attendant qu'elle, & le Comte Philippes son mary vinssent prendre possession du Royaume, declarerent regent & Viceroy D. Iean Corbaran de Leet, alfier du Royaume, & Iean Martines de Medrano.

*De Philippes troisieme du nom, & XXXIX.
Roy de Nauarre, surnommé le Noble,
Comte d'Eureux.*



Philippes Comte d'Eureux, fils de Louys de France, qui fut fils de Philippes iij. fils du Roy S. Louys, est par nous compté pour 29. Roy de Nauarre, fut surnommé le Noble. Dès que l'election en fut faicte par les Estats de Nauarre, ils enuoyerent Ambassadeurs au Roy de France, Philippes de Valois, luy declarer les raisõs que les Roys esleuz auoyent au Royaume, qui auoit esleu les Estats à faire election, & par mesmes Ambassadeurs le firent entendre a Philippes d'Eureux, & a sa femme, les sommans de venir prendre possession du Royaume, & le gouuerner. Le Roy de

France ne donna aucun empeschement, parquoy les esleuz Roys de Navarre se preparerent pour s'y acheminer, & y arriuerent enuiron le commencement de l'an mil trois cens vingt neuf, tres-agreables^{1329.} au peuple, qui n'auoit veu Roys au pays de long temps. Les prelates, cheualiers, & gēs sages du Royaume, auant leur venue, auoyent couché par escrit les conditions auxquelles ils les vouloyent receuoir en la succession du Royaume de Navarre: lesquelles auant que faire les solemnités du Couronnement, & iurement, ils presenterent à Philippes, & à Ieanne sa femme, esleuz pour les considerer & accorder, ce qu'ils firent, sans difficulté. Les Estats assemblés en la ville de Pampelōne, ces conditions furent iurées par iceux, dont les articles principaux s'ensuiuent.

*Articles
iurés par
les Roys de
Navarre.*

I. Promirent aux Estats de maintenir, & garder les droits, loix, vs & coustumes, libertés & priuileges du Royaume, tant par escrit, que nō escrits, & desquels ils estoient en possession & vsage, à eux & a leurs successeurs à iamais, sans les leur diminuer, ains plustost augmenter.

II. Qu'ils annulleroyent tout ce qui auoit esté fait au preiudice d'iceux par les Roys

leurs predecesseurs, & par leurs ministres, sans delay, & nonobstant empeschement quelconque.

III. Que dans le terme de douze ans aduenir ils ne feroyēt battre autre monnoye, que celle qui auoit cours pour lors au Royaume, & qu'en toute leur vie ils ne batroyent plus que d'une sorte de monnoye nouvelle: & qu'ils feroient part des biens & reuenus, profits & emoluments du Royaume aux subiets.

IIII. Qu'ils ne receuroyent a leur seruice, outre le nombre de cinq personnes estrangers, mais se seruiroyent des naturels du pays.

V. Que les forteresses, & garnisons du Royaume feroient par eux baillées a gentilshommes nais, & habitans au pays, & non a aucun estranger: lesquels en feroyēt hōmage a la Royne, & recongnoistroyēt les tenir pour elle, & pour le legitime heritier du Royaume.

VI. Qu'ils ne changeroient, ny angageroyent le Royaume, pour quelque autre Estat qui fut au monde.

VII. Qu'ils ne vendroyent, ny angageroyēt aucune chose du patrimoine Royal, & ne feroient loy, ny statut contre le

Royaume, ny contre ceux qui deuroyent legitiment succeder en iceluy.

viii. Qu'au premier fils que Dieu leur doneroit, ayant acompli l'aage de vingt ans, ils laisseroyēt libre, & desbrigué le Royaume, à condition, que les estats leur payeroient, pour leurs frais de despenſes, cent mille Sanchots, qui estoient espees d'or courans alors, ou autres espees du coin du Roy de France equivalants.

ix. Que si Dieu ne leur donnoit enfans, en ce cas ils remettroyent le Royaume, apres eux, libre, & sans aucun empeschement avec ses forterefſes, es mains des Estats, pour en inuestir ceux a qui de droit il appartiendroit.

x. Que s'ils contreuenoyent a aucune chose des dessusdictes, ou partie d'icelles, les subiects seroyent quittes du serment, & subiection qu'ils auoyent enuers eux.

xi. Ces articles iurés, & promis par le Roy, & la Royné, ils furent solēnellement couronnés, & oingts, & leur presterent les deputés des Estats, Seigneurs, & dignité du Royaume, foy & serment d'obeissance, en la grande Eglise de Pampelone: & depuis, sur la forme de gouverner le Royaume, furent prins, entre le Roy, & la Royné, re-

*Couronnement de
Philippe
d'Eureux.*

*Brie &
Châpaigne
du patri-
moine de
Navarre.*

glements opportuns, lesquelles choses ecrites furent enuoyées en France, & accordées, & corroborées par le consentement du Roy Philippes de Valois, à Paris, ceste mesme année 1329. Le Roy Philippes de Valois retint de l'heritage de sa cousine les Comtés de Brié & Champagne, & quelque temps apres il luy bailla autres terres en recompense.

*Genealogie
de Navarre.*

Les Roys de Navarre Philippes & Iéane eurent les enfans suiivants, Charles, lequel succeda au Royaume, Philippes Cōte de Lōgueuille, Louys Comte de Beaumont le Royer, & depuis Duc de Duras, Jeanne mariée au Vicomte de Rohan, Marie Royne d'Arragon, femme de Don Pedro le ceremonieux, Blanche Royne de Frāce, derniere femme de Philippes de Valois, & Agnes Comtesse de Foix, mariée a Gaston Phebus : partie desquels estoyent nais avant leur election, partie nasquirent apres. Louys troisieme fils de ce mariage fut Comte de Beaumont en Normandie, pour auoir espousé l'heritiere de ceste maison, de laquelle il eut vn fils appellé Charles de Beaumont, qui espousa en Navarre la fille du Vicomte de Mauléon, & fut premier porte-banniere du Royau

Royaume, par bien fait, & faueur du Roy Charles son oncle. Et de ce Charles de Beaumont est descendu la maison de Beaumont en Navarre. Apres la mort de la Comtesse de Beaumont, Louys espousa Ieanne fille & heritiere du Duc de Duras en la coste de Mardoine vers la mer Adriatique, & en fut intitulé Duc. Or apres ces choses faites en Navarre, ainsi que nous auons recité, le Roy Philippes ayāt nouuelles que le Roy de Frâce acheminoit vne puissante armée contre les Flamens rebelles, qui auoyent chassé Louys leur Prince, & fait infinis outrages aux officiers du Roy, en fait, & en parolles, partit de Navarre: pour ne faillir au besoin à celuy qui luy auoit laissé tant humainement prendre la possession de ce Royaume, & laissa en Navarre, pour gouuernante, la Royne Ieanne. Il se trouua à la bataille que le Roy Philippes de Valois donna à Cassel aux Flamens, où vingt mille d'iceux demeurerent sur le champ: au moyen dequoy le Côte Louys fut remis en son estat, & les Flamens dōptés. Ceste guerre finie, le Roy de Navarre reuint en son Royaume: ce fut lors que l'Infant D. Alphonse de la Cerde, fils de D. Ferdinand aîné du Roy D. Alphonse

*Souche de la
maison de
Beaumont
en Navarre*

*Donatiõ de
l'Infant D.
Alphonse a
la couronne
de Navarre.*

*Ambassade
de Navarre
en Castille.*

l'Astrologue, mal traité en Castille, d'où il pretendoit la couronne, fit donnation a la couronne de Navarre des droits qu'il pretendoit en Guipuscoa, Alaua, & en la Rioja, & autres terres, lesquelles en effect auoyent esté du Royaume de Navarre autressois, & vsurpées, & retenues par les Roys de Castille. Aucuns afferment que ceste donation fut faite l'an 1330. Quoy qu'il en soit, le Roy Philippes desireux d'ordonner la iustice, & la bien faire administrer en son Royaume, qui en auoit bon besoin: auoit besoin d'entretenir paix avec ses voisins, enuoya au Roy D. Alphonse Roy de Castille, Ambassadeur pour rechercher son amitié. Les Ambassadeurs trouuerent le Roy en la ville de Talavera de la Rioja, duquel ils furent bien receuz. Leur legation portoit, qu'ayant esté par plusieurs années le Royaume comme priué de souverain magistrat, & presque abandonné par ses Roys, ce n'estoit merueilles s'il estoit aduenue que plusieurs choses se foyent faictes contre les anciennes alliances, & accords d'entre les maisons de Castille & Navarre, car que se soucioient les Viceroyes, & gouverneurs commissionaires, hommes estrangers, & qui n'auoyent

aucune conuenance de mœurs, ny autre lien d'amitié avec les Espagnols, comme il en allast, pourueu qu'ils fussent obeis au pays, & qu'ils se peussent vâter d'auoir plutost fait iniure, q̃ recuë, y tenans cōtinuelles garnisons de gens estrangers, prompts a tous excès? dont il estoit aduenu que Dieu, quelquesfois en auoit fait iugemēt, & mesme en la derniere rencontre près de Bertibar: ou par vn chastiment extraordinaire, & merueilleux, Dieu auoit supleé à la negligence des quatre prochains Roys, qui auoyent tenu le Royaume de Nauarre, lesquels s'en estoient si peu souciés, qu'à peine l'auoyent ils daigné regarder de loing, mesme les deux derniers ne s'en estoient oncques approché à plusieurs lieux, de maniere, que la licence entre les mauuais s'estoit tousiours augmentée, & continuée iusques a present que les legitimes heritiers de la couronne de Nauarre estoient reuenus a leur possession, ayant par le decez du Roy Charles le Bel, esté appelé Philippes Comte d'Eureux, mary de leur vraye Royne D. Ieanne, pour y regner, lesquels auoyēt dressé ceste Ambassade vers luy, pour luy faire entendre ces choses, comme a Prince voisin, & amy,

avec lesquels ils desiroyēt entretenir paix, & concorde, par tous les bons offices, que Princes, & estats voisins peuuent recevoir les vns des autres. Le Roy Don Alphonse ayant ouy ceste Ambassade, accommodée aux desseins des nouveaux Roys de Navarre, palliant, & adoucissant ainsi les choses advenues avant leur election entre ces deux Royaumes, respondit qu'il estoit fort aise de ce que les Navarrois auoyent eu occasion de recouurer pour Roys ceux a qui de droit cesté courōne appartenoit, & que de sa part il entendoit, & desiroit conseruer perpetuelle amitié avec le Roy Philippes, & la Roynne Ieanne, & le mon-
strer par effect en tout ce qui se presente-
roit: ce qu'il feroit entendre a tous ses sub-
iets, afin que de la en auant les vassaux de
leurs Roys, tant Navarrois, que François,
fussent bien traittés en Castille, & ou aucun
mal, ou dommage leur seroit fait, qu'il fut
amendé: qu'ils auertissent de sa part leurs
Roys de faire le semblable en leurs terres.
Les Ambassadeurs rapportans cela, don-
nerent grand contentement au Roy Phi-
lippes, lequel, pour donner lieu à la iusti-
ce, qui estoit fort detraquée, establit vne
nouuelle court de Parlement en Navarre.

qui fut appelée nouvelle, à la difference de l'ancienne, estans nommés de sa part, & de celle des trois Estats du Royaume personnes idoines: Mesme Ambassade, en substance, fut par luy enuoyé en Arragon, & en Portugal, qui furent aussi renuoyez avec responce agreables. Les choses ainsi remises en quelque meilleur estat, & forme qu'auparauāt, le Roy, & la Roynes'en retournerent en France, laissant pour gouverneur vn gentil-homme François nommé Henry de Guliac, ou de Solibert, mais avec pouuoir vn peu plus limité que ceux des autres Viceroyes, & gouverneurs precedents. Tel estoit l'Estat de Navarre iusques à l'an 1331. Que le gouverneur de Navarre Henry de Solibert, a l'instigation, comme il est croyable, de D. Ieā Manuel, & de Don Iean Nugnes de Lara, entra en querelle avec le Roy de Castille: & d'autāt qu'il congnoissoit bien que les forces de Navarre n'estoyent suffisantes pour offencer beaucoup le Roy de Castille, & que celles de France, outre qu'elles estoyent esloignées, auoyēt assés a quoy s'employer cōtre les Anglois, s'acointa du Roy d'Arragon, sous l'appast, & esperance du mariage de D. Ieāne fille aînée du Roy Phi-

1335.

lippes de Nauarre, avec l'Infant d'Arragõ, D. Pedro, heritier de la couronne. Pour cest effet fut enuoyé en Cattelogne, en la cité de Tortose, D. Pero Gõçales de Morentin, où il fut fort bien veu par le Roy, lequel ayant ordonné l'Archeuesque de Saragoffe, D. Pedro de Luna, pour traiter de ce mariage avec luy, le conclurent, ainsi que nous dirons, & accorderent qu'il s'accompliroit dans certain temps, & pendãt D. Pedro aideroit les gouuerneurs de Nauarre presents, & aduenir en toutes les guerres qu'ils auroient pour le Royaume de Nauarre. Le principal moteur de ce mariage estoit D. Iean Alonzo de Haro, Seigneur de Los Cameros, qui s'estoit nouvellement adioint avec D. Iean Manuel, & cherchoit occasiõ de nuire au Roy D. Alphonse. La Royne de Nauarre Don Ieanne estant en France, acoucha ceste année de l'Infant D. Charles heritier du Royaume de Nauarre, & de la côté d'Eureux. En fin l'an 1335. il y eut quelques emotions en Nauarre, le gouuerneur Héry de Solibat residoit au chasteau d'Olier, avec trois mille liures d'estat, & les places fortes du pays estoient gouuernées par cheualiers fidelles mis par les Estats. Et les

chasteaux de la riuere desquels estoit Merin ou gouuerneur Arnould de Leet, estoient tenus par les capitaines suiuians.

Au chasteau de Cortes commandoit Iean de Soisi, a Herrera, Pero Sanches de Varelo, a Pena Ronde, Pero Ximenes de Funes, a Corella, Pero Sanches de Montagu, fils de Fortun, a Araciel, Inigo Asnar de Corella, a Sancho Abarca, Mathieu Saillant, a Esteca, Garci Perez de Dax, a Valtierra, Geofroy de Villaribo, a Cadreita, Gançalo Perez de Gorrociain, a Comparosso, D. Alphonse d'Espagne, a Ablitas, Iean Martines de Necuesa, a Arguedas, Pero Sanches de Montagu, fils de Pero, Artaxone estoit tenu par les habitans, le chasteau de Rade par Simon Martines de Barasoayn, pour les heritiers d'Oger de Mauleon, par faute d'hommage. En la Merindad, ou ressort de Sanqueza, dōt estoit Merin ou gouuerneur, Oger de Gramont, a sainte Care, Iean Regnaut le chat, au chasteau de Murillo, Diego Perez d'Esperun, a saint Martin de Vnx, Garci Ximenes de saint Martin, a Vxue, D. Alphonse d'Espagne, a Gallipianco, Pedro Arnould de Vrtauia, a Cascda, Estienne de Cornailles, a Pegna, Pierre de Cuyucro,

au Viel chasteau de Sangueffa, Garci Arnaldes d'Ezpeleta, a Petiella en Arragon, D. Martin Fernandes de Sarasa, a Pintano, D. Simon de Sotes, a Ongaçayria, Helias Martines de Irurozqui, a Loguin, Ican Martines d'Eufa, a Yrurlegui, Martin Garcia d'Ollaoqui, a Valcarlos, Martin Inignes de Vrsa. a Rochefort, Lobet de Narbais, a Monteyran, Pierre Sanches de Olcaratea, a Rochebrune, Guillaume Arnaud Durdos, a Guerga, Ican de Sauain, a Tiebes, Garci Michel de Echayrê, a Chasteau neuf, Rodrigue d'Ayuar, a Burgui, Pierre Aznar de Ezcurra, a Ysaba, Martin Garcia de Leyun, a la Merindad, ou ressort de Pampelone, tenoit le casteau de Toloina, Ferdinand Dias de Villaalta, a Afa, Ican de Rouuray, a Labraca, Ican de Bulli, a Oro, Ican Fernandes de Baquedan, a Falces, Bernard de saint Pelage, a Carcar, Pierre Garcia de Ciraquegui, a Lana, Ican Botayroa, & Martin Sanches de Villamera, a Andofilla, Roger d'Alamaina, a Resa, Corbaran de Lect, a Acagta, Romieu Martines d'Arronis, a Peralta, Alphonse Dias de Morentiu, a Artafona, Diego Sanches d'Eulate, a la Tour de Viana Ican Velez de Medrano, au chasteau de Toro,

Diego Lopez d'Alfaua, a Maragnõ, Martin Sanches d'Azedo, au chasteau de la garde, Jean Moreuant, au chasteau de Milagro, Renaud de Bouray, au chasteau de Montiordan, Alphonse Perez de Morentiu, a Lerin, Garci Sanches d'Espeleta, a Funes, Ordonis de Blandiaco, a Arcas, D. Pedro Ximenes de Mirafuentes, au chasteau de Mirande, Lope Perez d'Agnoa, au chasteau de Belmarques, Philippes de Coynon, a la Tour de Mendauia, Sancho Perez de Lodosa, au chasteau de Celatãbor, Michel Ramires de Cufia, au chasteau de Larraga, Sancho de Licaracu, Lesquels capitaines de Fortereffes estoyēt tous salariés par le Roy, & iouissoyent de plusieurs droits, & preeminences, iouxte les loix, vs, & coustumes du Royaume de Navarre. Or se traittoit tousiours le mariage d'entre l'Infante de Navarre, & l'heritier d'Arragon, D. Pedro, par D. Pedro de Lune Archeuesque de Sarragosse, & D. Pedro Gonzalles de Morentiu, & autres deputés, lesquels ayant esté longuement ensemble en la ville de Cortes, le conclurent l'an mil trois cens trente quatre. 1234. Les conditions furēt, que le Roy Philippes de Navarre constituoit cent mille

*Guerre en-
tre; Navar-
re & Ca-
stille.*

lanchos, qui valent autant de liures tour-
nois, de dot à sa fille D'on Ieanne : & pour
gaige & assurance du futur mariage, furent
baillés en depost, de la part de Nauarre,
Lescart, Arquedas, Sainte Care, Murillo,
Gallipienco, & Murgni: & de celle du Roy
d'Arragon, Fayos, Boria, Malon, Camp-
daliub, Sos & Sauueterre: & furent les ar-
ticles signés par les parties, avec plusieurs
cheualiers, a Daroca. Le Roy de Castille
entendant ceste alliance, ialoux, & pre-
uoyant qu'on ne cherchoit qu'occasion
de guerre, escriuit au gouuerneur, qu'il n'a-
uoit oncques entendu que ses subiets por-
tassent dommage aux Nauarrois, & que si
de leur part il auoit esté commis chose qui
requist restablissement, il estoit prest à le
faire : mais le gouuerneur faisant l'oreille
sourde à tout ce qui luy estoit escrit: persi-
sta en son propos, & se faisit, par armes, du
monastere de Hilero, qui estoit lors en la
possession de Castille, qui auoit esté aupara-
uant de Nauarre. Le Roy de Castille
voyant que c'estoit a bon escient, enuoya
par deuers le Roy d'Arragon, le prier de
faire en sorte, que son fils D. Pedro ne se
ioignit point aux Nauarrois, pour leur ai-
der au dōmage de Castille. Le Roy d'Ar-

ragon se trouuant fort malade, respondit, que son indisposition ne permettoit point qu'il peut entendre à tels affaires, & que si son fils auoit volonté de fauoriser les Nauarrois, il ne l'en scauroit empescher, estât en l'estat qu'il estoit. Ceste responce diuulguée entre les Arragonnois, l'enuie leur creut de se renger avec les Nauarrois & partant Don Lopez de Luna, qui estoit le plus grand Seigneur du Royaume, D. Michel Perez Zapata, & Lopez Garcia, accompagnés de plusieurs autres cheualiers, que l'Infant D. Pedro leur donna, iusques au nombre de cinq cens cheuaux, vindrēt trouuer le gouuerneur de Nauarre a Tudelle, & de la entrans avec les forces de Nauarre dans le pays de Castille, y firent vn grand degast, emmenans force butin, sans qu'aucun se presentast pour leur faire teste: dont le Roy de Castille aduerti, fut tres-deplaisant, donnans ordre le plus prompt qu'il peut de fournir la frontiere de gens de guerre, enuoyant le prieur de saint Iean, D. Alphonse Ortis, vers Don Iean Nugnes de Lara, à fin qu'il print la charge de defendre le pays, avec les gens qu'il luy donneroit: mais D. Iean quelque reconcilié qu'il fut avec la Royne se vou-

*Arragon-
nois en fa-
ueur des
Nauarrois.*

lut oncques fier en luy, & ne bougea de Biscaye, encor que le Roy luy promist de luy donner Morales & Villelon, & plusieurs autres choses: ce que voyant le Roy D. Alphonse fit capitaine de ceste guerre Martin Fernandes Puerto Carrero, & enuoya avec luy a la frontiere D. Diego Lopez de Haro, fils de D. Lopez le petit, D. Ferdinand Rodrigues de Villalobos, D. Jean Garcia Manriques, D. Rodrigues de Cisneros, D. Pero Nugnes de Gusman, & le frere d'iceluy, Ramir Flores, D. Lopez Dias d'Almacau, D. Gançalo Ruis Guon, D. Gonçallo Nugnes Daca, D. Aluar Rodrigues Daca, Alphonse Fernandes Cornel, Gargi Lasso de la Vega, & son frere Gonçalo Ruis de la Vega, Pero Ruis Carrillo, Jean Alphonse de Benauides, Jean Rodrigues de Sandoual, Sancho Sanches de Royas, & plusieurs autres cheualiers de nom, lesquels ne firent aucun refus de marcher sous Martin Fernâdes, ores qu'il y en eut entre eux assés qui estoient de plus grande maison que luy, d'autant qu'il representoit la personne de l'Infant Don Pedro de Castille, & auoit desployé l'estandart d'iceluy, estant ordonné par le Roy pour son lieutenant & capitaine ge-

neral : & mesmes comme le Roy voulut faire quelques excuses , disant , qu'il eut desiré que son fils fut en aage de pouvoir monter a cheual, & qu'il le leur eut volontiers baillé pour capitaine , ils respondirēt que non seulement ils obeiroient a Martin Fernandes Puerto Carrero, qu'ils cognoissoient bon cheualier , puis qu'il le leur bailloit pour chef , mais encore à vn moindre , voire mesme a vn valet d'estable, s'il le commendoit.

Obeissance
des soldats
de Castille
& honneur
qu'ils portēt
a la vertu
d'un simple
cheualier.

Le gouverneur de Navarre estāt aduertit de ceste armée Castillane qui se dressoit, munit le monastere de Hitero , y enuoyant D. Michel Perez Zapata , cuidant qu'ils le viendroyent assaillir. Les Castillans estās tous assemblés en Alpharo, laissant le monastere, s'acheminèrent droit vers Tudelle , iceux descouverts, soudain les Arragonnois , & Nauarrois leur saillirent a l'encontre, sans se soucier d'attendre le retour de Michel Perez, qui auoit mené vne partie de leurs forces a Hitero. Or estoient les Castillans plus forts de gens de cheual, & en lieu propre pour bien s'en seruir, parquoy venus aux mains, encor que les Nauarrois fissent grand deuoir, neantmoins ils furent mis en route, &

repouffés vers la ville, avec grand meurtre, & prinse de plusieurs. Il est a noter que ce ieu se fit sans le gouuerneur, & sans D. Lopez de Luna, lesquels ne sortirent aucunement de Tudelle: de sorte que l'armée Nauarroise, & Arragonnoise se pouoit dire sans chef, parquoy ils furent chassés, & batus iusques aux portes de la ville. Les Castillans victorieux, retournās vers Alpharo, rencontrèrent Michel Zapata avec ses troupes, reuenans de Hitero, lequel renga ses gens a la faueur d'un fossé, qui le deffendoit des ennemis, encor bouillans de fureur de la fresche victoire, & qui s'essayoyent de franchir outre, dont plusieurs se trouuerent mal: toutesfois la multitude des Castillans les surmonta, & fut Michel Perez mesme aterré, & prins prisonnier, avec plusieurs autres, & sans la nuit, il ne faut douter, disent les histoires, que tous les Nauarrois, & Arragonnois, en ceste derniere rencontre, n'eussent esté mis a mort. Ainsi doublement victorieux les Castillans se retirerent avec force prisonniers, & grand butin a Alfaro, sans se hazarder, pour quelque iours, de rentrer en Nauarre, car aussi biē ces victoires leur auoyēt assés cher couté. Ceux qui estoient

au monastere de sainte Marie de Hitero, ores qu'ils fussent assés bien remparés, & pourueus de victuailles, n'oserent demeurer là, ains le quiterent, & puis d'iceluy s'emparerent les Castillans, lesquels allerent assaillir le chasteau de Tudegnen, ou estoit garnison de Gascons & Nauarrois, qui le rendirent : persuadez par les belles raisons d'un moyne Castillan, qui estoit dedans avec eux. Les Castillans prenans courage de ces heureux succès, rentrerent puis par trois diuers endroits en Navarre, fouragerent le pays, & y firent tout le mal qu'ils peurent, retournâs en leur pays avec forces prisonniers, & grande quantité de bestial. D'autre part les peuples de la Province de Guipuscoa entédans que la guerre se demenoit és frontieres de Castille, Navarre & Arragon, sans attendre autre mendment entrèrent hostilement en Navarre, a la conduite de Lopez Garcia de Lazcario, qu'ils creerent leur capitaine, & saccagerent grande espace de pays du ressort de Pampelone, en fin mirent le siege deuât le chasteau d'Unsa, qu'ils prirent. Le Roy de Castille aduerti de ces heureux exploits des siens, voulut arester le cours de leurs victoires, craignant qu'il

ne s'alumaſt vn feu de guerre entre Frãce & Caſtille, qui ne ſe pourroit ſi toſt eſteindre : pource manda qu'on ſe contint, ſe contentans de defendre les terres de la couronne, ſans entrer ſur celles de ſes ennemis : meſmes reuocqua la plus part des capitaines, & cheualiers qui eſtoyēt ſoubs la banniere de l'Infant D. Pedro, que conduiſoit Martin Fernandes Puerto Carreiro. Luy & quelques autres obeirent à l'inſtant : mais Garſi Laſſo de la Vega, & Gonzalo Ruys ſon frere firēt encor vne courſe, menans des troupes de gens de guerre dans le pays de Nauarre du coſté de la Soſiere, ou ils laiſſerent des pitoyables marques, bruſlans, & ruinans tout ce qu'il ſe trouua en leur voye. Les nouuelles de ces excès paſſerent en France, eſmeurent pluſieurs parents, amis & ſubiets du Roy Philippes, à ſe reſſentir des maux que les Caſtillans auoyent faits en Nauarre, entre leſquels Gaſton Seigneur de Bearn, & Comte de Foix ſe haſta de paſſer les Pyrenées auec grand nombre de ſoldats Bernois & Gaſcons, ayant fait reueuë de ſoldats a Viane, qui eſt a vne lieuë de Logrogno, il les mena dans les terres de Caſtille, ou il fit du degaſt, ainſi qu'auoyent
fait

fait les Castillans en Nauarre, puis se vint camper deuant Logroño : les habitans duquel lieu indignes de voir leurs ennemis si pres d'eux, sortirent sur iceux, a la conduite d'un gentilhomme du pays, nommé Ruis Dias de Gaona, mais ils ne furent pas les plus forts, ains furent rudement, & avec grand meurtre repoussés dans leurs murailles, estans poursuivis de si pres, que sans la hardiesse de Ruis Dias de Gaona, lequel, avec trois compagnons, fit teste a l'entrée du pont, aux ennemis, tant que les autres fussent mis a sauueté dans la ville, & laissé les portes assurées, ils fussent entrés pesle mesle, & eussent prins Logroño ceste iournée la. Or employa cest Escuyer sa vie pour le salut de sa patrie, imitant, mais avec moins d'heur, l'exemple du Romain Horace Cocles : car il fut tué sur le pont avec ses compagnons. Le Comte de Foix n'estant peu paruenir à son esperance, de gagner par ceste auenture la ville de Logroño, ramena ses gens a Viana. Cependant le Roy de Castille aduerti de sa venue, auoit donné ordre que plusieurs bandes de gens de pied, & de cheual s'acheminassent vers la frontiere, avec intention qu'ayant la dressé vne forte armée, ils

entraissent en Nauarre s'il venoit a propos de sorte qu'il y auoit aparence qu'on deust voir vne guerre pernicieuse entre ces deux puissans Royaumes. Car il est bien à presumer que le Roy de France s'en fut meslé bien auant, pour la faueur de son cousin Philippes Roy de Nauarre, & pour ne donner occasion aux Espagnols de presumer de sauter si aisément les limites dont nature a borné ces deux nations. Mais il pleut a Dieu qu'en ceste esmotion de courages d'une part & d'autre arriua en Nauarre Iean Archeuesque de Rheims, qui alloit en pelerinage a saint Iacques de Gallice, lequel voyant ceste guerre esmeue entre les Nauarrois & Castillans, pour legeres occasions escriuit vne lettre au Roy de Castille, l'admonestant d'entendre a la paix. Ce Roy qui n'en estoit pas moins desireux, que l'Archeuesque, print ceste occasion fort a propos, montrant que la reuerance d'un grand prelat l'inclinoit a obtemperer a ses saints aduertissemens, luy enuoya Martin Fernandes, Puerto Carro & D. Gil Carrillo de Albornos archediacre de Calatraua en l'Eglise de Toledo. Par l'aduis, & resolution de ces trois personages, ausquels fut adioint Ferdinand

Sanchez de Vailledolit, notaire maieur, ou secretaire de Castille, fut accordé la paix en ces conditions. Que entre D. Philippes Roy de Nauarre, & Don Alphonse Roy de Castille, leurs vassaux, & subiets seroit paix, & cessation d'armes pour vn temps limité: Que quatre Commissaires seroyent nommes, deux de chacune part, pour le restablissement & restitution des prinſes faictes, d'une part & d'autre, & pour la reparation de tout ce qui se commettrait de là en auant au preiudice de cest accord: Que le monastere de sainte Marie de Hitero seroit rendu aux moyennes, lesquels le tiendroyent en neutralité, iusques a la decisiõ, de quel ressort il estoit & ce à fin que le seruice diuin ne fut interrompu, & sans que de la part des Nauarrois, ny Castellans leur fut donné aucun trouble, ny empeschement: Que les chasteaux de Tudegné, & Vrsa demureroyent es mains du Roy de Castille, iusques à ce qu'il fut cognu iuridiquement des differents, & a sentence definitive: Que pour le regard de la propriété du monastere de Hitero seroyent esleuz arbitres, vn Nauarrois, l'autre Castillan, & pour tiers vn Cardinal Romain, agreable aux deux par-

1338.

ties, qui en iugeroient : & que cependant
cesseroient toutes rancunes & malveil-
lances entre ces deux Royaumes, Roys, &
subiets. Ces articles arrestés, furent depuis
confirmés par les deux Roys. Nous auons
dit cy deuât que D. Pedro Infant d'Arra-
gõ deuoit espouser l'Infante D. Jeanne de
Nauarre fille aînée de Philippes d'Eureux
Roy de Nauarre, mais ce mariage n'eut
point d'effet, car il appliqua plus son cœur à
Marie deusiesme, fille dudict Philippes &
sœur de Ieâne, est entre autres accords, q
en deffaut de hoirs masles laditte Marie
heriteroit de Nauarre, des-heritant par ce
moyen Jeanne fille aînée, & en outre fut
donné en dot soixante mille sanchos, &
pour assurance fut baillé plusieurs places
& chasteaux en depost des deux costés
iusques à l'an 1338. quelle fut mariée en la
ville d'Alagon, faisant la ceremonie l'E-
uesque de Chaalon, le Roy de Nauarre ne
si peut trouuer, d'autât qu'il acompagnoit
le Roy de France aux guerres qu'il auoit
contre les Anglois & estoit presque touf-
iours en France, laissant pour gouuerneur
en Nauarre des Vicerois François, dont
est fait mention d'un Regnaud de Pons,

& d'un Guillaume Brahe, au temps desquels les loix du duel estoient en grand pratique en Nauarre, tât entre la Noblesse, qu'autres manieres de gens. Or s'estant enuiron l'an 1343. composées les guerres d'entre les François & Anglois, plus par faute de moyēs de la pouuoir faire qu'autrement, lors Philippes Roy de Nauarre obtint congé d'aller visiter son Royaume, & y alloit a propos, de voir le siege d'Algezire, dont le bruit estoit grand par toute la chrestienté. Or ce desir luy creut estant en Nauarre, pour les choses qu'il en oyoit dire, spécialement quand il entendit qu'il se deuoit donner bataille, cōme il y en auoit apparence, & que s'y attendoit le Roy de Castille. Partant le Roy Philippes inuita plusieurs de ses amis, faisant leuée de gens tant de Nauarre que de France, ordonna de charger plusieurs munitions, & viures aux ports de Guipuscoa, où il s'achemina, apres auoir donné aduis du tout au Roy D. Alphonse menant avec luy seulement cent hommes de cheual, & trois cens hommes de pied, qui se trouuerent pres autour de luy, grand honneur luy fut fait en toutes les villes de Castille, par où il passa, l'ayant ainsi ordonné le Roy, il arriua à

Seuille environ le printemps où le Roy de Castille luy enuoya des Ambassadeurs au deuant, pour luy dire la bien venue, & le mener a Xeres de la frontiere, où se deuoient trouuer plusieurs grãds Seigneurs, & gensdarmes, pour l'accompagner, tant pour l'honorer, que pour la seureté de sa personne, a cause de l'armée des Maures qui estoit campée sur le fleuue Guadiara. Ainsi fut cōduit le Roy de Nauarre a Xeres, & de la au camp, avec tous les signes d'amitié qu'il eut sceu desirer au deuant duquel sortit le Roy, accompagné de plusieurs grands Seigneurs Castillans, estrangers, François, Anglois, Allemans & autres nations. Le Roy de Castille fit cest honneur au Roy de Nauarre, de ne deliberer de chose de consequence, sans l'admettre en son conseil, noyoit, ny respondoit aux Ambassadeurs, que luy present. Le Roy de Nauarre de son costé se monstroït en tout affectionné, & desircux de luy complaire. Plusieurs escarmouches furent faictes en ce temps, ou les gents de Nauarre, & Gascons se monstroyent vailants & courageux : neantmoins est fait mention par les histoires d'Espagne d'vne grande occasion de donner vne route in-

signe aux Maures, qui se perdit par la faute du Comte Gaston de Foix, lequel, ce iour la, auoit la cōduite des Nauarrois, & Gascons, neantmoins ils en parlent en passant & comme de chose incertaine, & possible peu equitablement, adioustans que de hôte le Comte demanda son congé, causant certaines excuses, de ne pouuoir demeurer, tant sur-ce que ses gens n'estoyent pas biē payés, que sur le besoin qu'on pouuoit auoir de luy en France: & qu'il ne fut possible de le retenir, pour quelques prieres & remonstrances que luy sceut faire le Roy de Nauarre, ny mesme le Roy de Castille, qui luy offroit tout contentement. En somme, selon les auteurs Espagnols, il partit avec bonne troupe de bons cheualiers, & soldats, & emmena avec luy son frere: mais estant a Seuille, il mourut, qui donne à entendre que son indisposition causa sa retraite, ou plustot les blessures receues en vne furieuse escarmouche qu'il soustint contre les Maures saillis d'Algezire, en laquelle noz histoires Françoises afferment mesmes qu'il fut tué, C'estoit le pere de Gaston Phebus, duquel il sera parlé cy apres. Le Roy Philippes de Nauarre mesmes tōba malade, & autres Seigneurs

aussi, ce qui procedoit de la temperature de l'air d'Andalousie, trop ardent pour les François, lesquels ne changeoyent rien de leur maniere de viure acoustumée, pour estre en pays diuers du leur, la maladie du Roy de Nauarre fut telle, que conseille par ses medecins des'oster de là, & se faire porter France, il falut qu'il print congé du Roy de Castille, lequel ne laissa aucun office d'amitié pour le soulager: mais estât seulement venu a Xerez, force luy fut d'arrestér là, rengregeât le mal, duquel il mourut au mois de Septembre 1343. Il auoit regné en nauarre quinze ans, & cinq mois ou enuiron. Son corps fut porté à Pampelone & enseuely en la grande Eglise d'icelle cité, par tous les endroits ou son corps passa, és terres de Castille, furent faittes grandes ceremonies, & apparées de dueil, par commendements du Roy D. Alphonse de Castille. Les auteurs Espagnols qui ne flatent point les François, escriuent que le mal empira au Roy Philippes, de desplaisir, à cause de quelques fautes que firent aucuns François des siens, en vne embusche dressée contre les Maures, ou par leur trop grande hastiueté fut perdue vne belle occasion d'en defaire


grand nombre. Les Seigneurs Anglois aussi appellés par leur Roy, laisserent le camp: & ainsi demeura, selon que les auteurs racomptent, le Roy Don Alphōse avec ses Espagnols, & ceux de Portugal, & d'Arragon estoient a sa solde, ce qui semble bien estre escrit par les Espagnols, afin que l'honneur de la prise des Algezires ne soit communiqué à tous. Apres la mort dudit Roy Philippes Jeanne de Navarre sa veufue gouverna son Royaume dont elle estoit proprietaire, assés prudemment combien quelle eut des subiets mal aisés a manier, & qui ne cherchoient que querelles. Tousiours entre ceux des frontieres de Navarre (notamment les habitants de Sanguesse, & les Arragonnois) estoient noises, & riottes, nonn obstant lesquelles elle sceut bien entretenir l'alliāce & paix avec le Roy D. Pierre d'Arragō son gendre, voire mesme apres la mort de sa fille D. Marie: de sorte que tant qu'elle vescu, le Roy D. Pierre supporta toutes les insolences des Navarrois qui couroyēt quelquesfois bien avant en ses terres, sans en faire grand semblant, pour l'honneur, & amitié qu'il portoit a sa belle mere: mesmes ne fit plaintes, ny se ressentit ainsi qu'il

*Jeane Roy-
ne de Na-
uarre grãde-
ment hono-
r e en Fra-
nce, pour ses
vertus &
sagesse.*

cut peu, & deu faire, de ce que s'estans re-
bell s les Estats d'Arragon, & autres con-
tre luy. Plusieurs faisoient leurs retraicte
en Nauarre, & de la tiroient aide d'armes,
de viures, & autres choses pour luy faire la
guerre. Il est bien croyable que le Roy
d'Arragon se monstra patient en ces cho-
ses, afin de ne rompre autres desseins qu'il
auoit, & ne s'incommoder, & embrouiller
en plus grands affaires. Car scachant que
la Roynne Ieanne de Nauarre sa belle mere
estoit grandement honor e en France,
il entretenoit son amiti ,   fin de s'aider
de son moyen, pour luy rendre le Roy
Philippes de Vallois fauorable, lequel luy
en vouloit aucunement, a cause du Roy
D. Iacques de Majorque. Et fit si bi  ceste
Dame, qu'elle maintint la paix entre eux,
& reno a les alliances pass es, par vn trait-
t  de mariage, qu'elle mit en auant, d'en-
tre Charles, fils du fils aisn  du Roy Phi-
lippes, & vne des filles du Roy D. Pedro,
& de sa fille D. Marie. Or est t ceste Prin-
cesse venue en France, pour donner ordre
aux terres, & estats quelle y auoit, avec
Charles & Philippes les enfans, ayant lais-
s  gouterneur en Nauarre messire Iean de
Conflans Seigneur de Dampierre, Ma-

reschal de Champaigne, elle mourut a
Conflans sur la fin de l'année mil trois cēs 1349.
quarente neuf, cinq ans apres le decēs de
son mary, ayant tenu le Royaume de Na-
uarre enuiron vingt deux ans, à laquelle
succeda son fils Charles, qui fut surnom-
mé le mauuais.

*De Charles deuxiesme de ce nom & XXX.
Roy de Nauarre.*

 Charles succeda a la Couronne
de Nauarre apres la mort de sa
mere, il fut surnommé le mau-
uais pour les troubles qu'il causa, tant deça
que dela les monts Pyrenées, & l'estrange
façon qu'il auoit en les meurs. Estant ap-
pellé des trois Estats de son Royaume, il y
vint l'an mil trois cens cinquante, & fut 1350.
couronné en la cité de Pampelone, en
l'assemblée pource faite a la maniere de
ses predecesseurs, iurant l'ebseruation des
loix, & immunités du pays: son couronne-
ment fut acompagné de quelque liberali-
té enuers l'Eglise Cathedrale de Pampe-
lone, a laquelle il donna, entre autres cho-
ses, vne grande croix d'argent, esmaillée
d'azur, a fleur de lis. Durant son couron-

nement, s'esmeurent aucuns peuples mutins, pretendans l'infraction de leurs privileges, lesquels le Roy chastia rigoureusement, par suplices cruels, & en grande quantité, si que le remede passa la maladie de beaucoup. Par mesme violence il travailla la noblesse de Nauarre, de maniere quelle diminua grandement, se monstrent en tous ses faits inconstât, volage & leger à croire: s'il eut quelque chose de bon, ce fut vn certain honneur qu'il porta aux Ecclesiastiques, & aux gens de lettres. Des son aduenement le Roy d'Arragon auoit enuoyé vn sien secretaire par deuers luy, nommé Pierre de Tarrega, pour cōfirmer l'aliance qui estoit entre ces deux Royaumes: & peu apres luy despecha derechef autre Ambassade: assauoir, D. Lopez Côte de Luna, & D. Jean Fernandes de Heredia, Chastelain d'Amposta, pour plus ample confirmation, & renouation de la ligue, & confederation d'entre eux: proposans au Roy de Nauarre alliance par mariages, à fin de tenir les Royaumes d'Arragon, & de Nauarre vnis en amitié l'vn avec l'autre: car le Roy d'Arragon craignoit grandement que le Roy D. Pedro de Castille, qui estoit Prince aspre, & dangereux, &

peu fidelle, ne luy rompit la paix, reprenāt les querelles de la douairiere d'Arragon, & de ses enfans, & qu'il ne se ioignit avec celuy de Nauarre, par quelque alliance a luy preiudiciable. A ceste cause proposerent les Ambassadeurs le mariage du Roy D.Charles de Nauarre, avec vne des filles du Roy de Sicille de la maison d'Arragon. Et pource qu'il estoir bruit que le Roy de Castille, lequel n'auoit encor cōclu le mariage de Blanche de Bourbon, pretendoit despouser Blanche de Nauarre, sœur de ce Roy Charles, & veufue du Roy de France Philippes de Vallois, il fut prié de l'empescher. Le Roy Charles qui auoit volonté, & conseil de prendre femme en France, s'excusa de celuy de Sicille, & assura le Roy d'Arragon, pour le regard de la Roynne d'ouairiere de Frāce, quelle ne se remarieroit plus : car c'estoit coustume obseruée en France de tres long temps, que les Roynes demeurans veufues, en quelque ieunesse que ce fut, ne se ramarioyēt plus. Au reste accorda aux Ambassadeurs de se trouuer, & entreuoir avec le Roy d'Arragon: mais auāt que cela s'effectuât, le Roy D.Pedro de Castille, qui auoit esté aduerti de tout ce qui estoit passé entre le Roy

1351.

D. Charles, & les Ambassadeurs d'Arragon, fit tant qu'il attira le Roy de Nauarre a Burgos, ou ils s'entrecarefferent au possible, & s'entrefirent grands, & riches presents, l'an mil trois cens cinquãte vn. Avec le Roy Charles se trouua en ceste veuë son frere Philippes. Estant de retour en Nauarre, ayant plusieurs grandes entreprises en la teste. Il s'apresta pour passer en France: dequoy estant le Roy d'Arragon aduertí, il l'enuoya sommer de sa promesse, de se trouuer ensemble, ce qu'il accorda, assignant le lieu de leur entreueuë a Momblanc, ou, par mesme moyen, il visiteroit, en passant par Huesca, ses niepces D. Constance, & D. Ieanne Infantes d'Arragon, Ainsi s'achemina le Roy D. Charles pour aller en France, menant avec luy ses deux freres D. Philippes, & D. Louys. La veuë de ces deux Princes à Momblanc ne les rendit pas meilleurs amis, ne concludant ensemble ce que le Roy D. Pedro d'Arragon auoit esperé.

Le Roy de Nauarre venu en France, commença a remuer beaucoup de choses: car outres les Comtes de Champagne, & de Brie, qu'il maintenoit luy appartenir, il querelloit la Duché de Bourgogne, à

cause de sa mere la Roynne Ieanne, issue de ceste maison de Bourgogne de par sa mere, & plusieurs autres pretentions: en quoy le Roy Iean n'auoit pas intention de luy faire droit, le trouuant ainsi par conseil, il eut pour principal aduersaire vn autre Charles, ou Iean selon les histoires de France, Connestable de France, de la maison de Castille, Comte d'Angoulesme, fils de D. Alphonse de la Cerde, dont aduinrent grands scandalles, meurtres, & rebellions par le Royaume de France. Estant le Roy de Navarre en ces poursuites, par voye de droit, par deuant les Estats du Royaume de France, & les cours de parlement & sieges de iustice d'iceluy. Le Roy Iean le cuidant pacifier, & rendre plus traitable, luy donna vne de ses filles en mariage: & en recōpense de ce qu'il demandoit, luy bail-la Mante & Meulan: mais cela ne luy abaissa pas le cœur, ains fit cōtraire effect. Ceste Princesse appellée Ieanne, fut seule femme espousée de ce Roy Charles de Navarre, lequel eut d'icelle ample & noble generation. En premier lieu de ce mariage n'asquit Charles qui fut Roy apres le pere, Philippes lequel mourut ieune, Pierre, qui fut Comte de Mortaing en

*Genealogie
de Navarre.*

Normandie. En outre, nasquirent d'eux les filles suiuanes, Marie qui fut Comtesse de Denia, mariée a D. Alphonse d'Aragon, Blanche qui mourut en l'aage de treze ans, & Ieanne Duchesse future de Bretagne, & despuis Royned'Angleterre. Du Comte de Mortaing susnommé, quelques histoires disent estre issu vn fils nommé Pierre de Peralta, lequel fut Cōnestable de Nauarre, souche, & origine des Marquis de Falses, par ligne feminine toutesfois qui sont aussi Comtes de saint Esteuan. Auuant que le Roy D. Charles se mariaist il eut vn fils bastard, nommé Don Leon de Nauarre, ou Leonel, d'ou sont descendus les Marquis de Cortes, Marechaux de Nauarre: Ce Leonel fut engendré d'vne damoiselle de la maison d'Euse. De luy n'asquit D. Philippes premier de ce lignage, Marechal de Nauarre: de ce Philippes D. Pedro, de luy D. Philippes & D. Pedro freres, de D. Pedro, vn autre D. Pedro, tous successiuemēt l'vn apres l'autre Marechaux de Nauarre. En ce dernier D. Pedro faillit la ligne masculine de D. Leonel: car il laissa seulement vne fille, nommée Don Hieronima de Nauarre, qui fut femme, en premieres nopces, de
D. Iean

D. Iean le Benauides, cheualier Castillan, lequel fut aussi Mareſchal de Nauarre, a cause d'elle, & en secondes nopces espouſa D. Martin de Corduba, & Velasco, Cōte d'Alcaudete, qui a esté de nostre temps Mareſchal de Nauarre, ceste est la poſterité en Nauarre du ſang Royal, descendant de ce Roy Charles, lequel pourſuiuant aſſurement ſes droits contre le Roy de Frāce, poſſeſſeur du Duché de Bourgongne, & d'autres terres qui auoyent esté patri-moine de ſes predeceſſeurs, eut pour aduerſaire, comme nous auons dit, Charles d'Eſpagne (qu'aucuns nomment Iean) Conneſtable de France, & Comte d'Angoleſme, fils de D. Alphonſe de la Cerde, Infant de Caſtille : & furent telles les inimitiés qui ſ'engendrerēt entre eux, à cause de ces procez, & pretétions, qu'à la fin le Royaume de France ardit de guerres ciuilles, ſ'en meſſant les Anglois, attirés par le Roy de Nauarre, qui ſe rāgea, & appuya d'iceux : lequel pour ſe vanger de ſon ennemi, le Comte d'Angouleſme, & Conneſtable D. Charles d'Eſpagne eſtans lors en Normandie tous deux, le fit guetter, & ſurprendre de nuit dans la ville de l'Aigle, & maſſacrer dedans ſon liēt, par le

ministere de D. Rodrigo de Vris, D. Jean Ramir, d'Arellau, D. Corbaran de Leet, des Barons de Garro, & Antiede, & autres cheualiers, & soldats Nauarrois. Et tant s'en falut qu'il dissimulat ce fait, que mesme il le publia, confessa, & maintint qu'il auoit esté fait par son commendement, & qu'il auoit esté iustement occis: dequoy le Roy, & toute la court, furent en grands troubles, voyant l'audace du Roy de Nauarre indõptable, & nourrie par plusieurs qui luy adheroyent en son Royaume, outre la confederation qu'il auoit avec les Anglois. à laquelle mesmes il essaya d'attirer le Roy D. Pierre d'Arragon, qui toutesfois ny voulut entendre, à cause qu'il estoit allié du Roy de France, & qu'il faisoit estat d'entretenir l'amitié d'iceluy. Pour obuier aux maux que telles fureurs pouuoient produire: il falut que le Roy Jean dissimulat, & par promesses d'impunité, dons, & reditions de villes & places, selon les demandes, & pretensions du Roy de Nauarre: essayast de rõpre ceste alliance, qu'il auoit traittée avec les Anglois, iusques, mesmes, a luy bailler le Duc d'Anjou son fils en ostage, pour le faire venir à la cour, où estât venu, le Roy fit semblant

de luy faire son procès, mais ce fut vne farce iouée: car l'ayant fait venir deuant luy, a genoux, requerāt pardon, il luy pardonna le meurtre du Connestable, & tout ce qu'il auoit commis contre la couronne de France, & son autorité, intercedant pour luy la Royne Blāche, veufue du Roy Philippes, sa sœur, & la Royne Ieanne sa femme, mais ceste pacificatiō fut bien tost troublée: car le Roy de Nauarre estimant que le Roy de Frāce auoit pluſtoſt dilayé son couroux, pour le luy faire ſentir en autre temps qu'oublié, ne ſe ſeparoit point des alliāces faites au preiudice du Royaume de France, entretenāt touſiours ſecrettes pratiques, tant dedans, que dehors le Royaume. Et comme il eſtoit turbulent, & touſiours ſaiſi de deſfiance, & ſoupçon, ayant le Roy Iean fait aſſembler les Eſtats de ſon Royaume, & remonſtrant les neceſſités de la guerre, demāda deniers pour ſoudayer trente mille hommes, le Roy de Nauarre voulut empescher ceste ſubvention, & y contredit a ſon pouuoir: neantmoins elle fut accordée. Le Roy Iean extremement faché de l'audace, du Roy de Nauarre, qui au lieu de luy eſtre aydant, comme bon gendre, & qui auoit fraichement

*Emprison-
nement du
Roy de Na-
uarre.*

esté par luy absous d'un grand crime, se
mōstroit dur aduerfaire a tous ses desseins,
attēdoit occasion propre pour le chastier,
laquelle se presenta à propos en la ville de
Roüan, à la reception, en Normandie, du
Dauphin Charles, qui auoit esté nouvel-
lement, par luy pourueu de ceste Duché
où se trouuerent les grands Seigneurs du
pays, notamment le Roy de Nauarre, cō-
me Comte d'Eureux, membre de ladiete
Duché, lequel ne se doutāt d'aucune cho-
se, fut surprins avec plusieurs autres Sei-
gneurs & cheualiers, estant à table bāque-
tant avec le nouveau Duc, le tout par de-
liberation, & complot acordé entre le pe-
re & le fils. D'entre ceux qui furent lors
pris, le Comte de Harcourt, les Seigneurs
de Grauille, Maubuō, Colinet & Doublet
eurent les testes tranchés, autres furent
pandus, par le commandement du Roy.
Le Roy de Nauarre fut enuoyé prison-
nier au Chasteau Gaillard sur Seine, & de
la mené à Paris, & finallemēt au fort d'Al-
leux en Palluel: les procès faits a tous, cō-
me criminels de leze Majesté, leurs biens
confisqués & mis és mains du Roy, mais il
les falloit gagner a force d'armes: car la
ville d'Eureux, celle de Harcourt, & autres
se trouuerent munies de bons soldats Na-

uarrois, & autres de ce parti, qui firent refus de les rendre au Roy, se fiās au secours des Anglois, qui tenoyent Calais, & troubluyent grandemēt le Royaume de France, tant du costé de la Picardie, que de celuy de Guienne, lesquels, l'an mil trois cēs cinquante six, entrerent en Normandie, s'estans ioints avec eux Philippes frere du Roy de Nauarre, & Godefroy oncle du Comte de Harcourt. Le Roy Iean auoit aduerti de ceste procedure le Roy D. Pedro d'Arragon, afin qu'il ne luy semblat aduis qu'il eut rien fait a la legere, estant chose deuē a la raison, que les Roys quelques souuerains qu'ils soyent, iustificient leurs actions, & les mettent en euidence, sur peine d'encourir blasme, & d'estre reputēs tirans, & hays de tout le monde, cōme violēts, & iniques. Le Comte Gaston Phebus, lors tenant le Comté de Foix, qui auoit espousē vne sœur du Roy de Nauarre, nommée Agnes, se ressentit plus qu'aucun autre de la prison d'iceluy, passant en Espagne, il essaya de smouuoir le Roy D. Pedro d'Arragon son beau frere, pour se declarer aduersaire du Roy Iean, s'il ne deliuroit le Roy de Nauarre, mais le Roy D. Pedro ne luy voulut obtemperer, car il

estimoit l'amitié de France estre tresseur appuy de ses Estats, & Royaume, ioint qu'il doubtoit tousiours de guerre entre luy, & le Roy D. Pedro de Castille, bien promit il d'interceder pour luy enuers le Roy Ieã, & le prier de vouloir vser de clemence, & traiter son prisonnier, sans passion, ains avec l'ordre de Iustice, & encores de nexiger sur luy tout son droit, eu esgard qu'il estoit Roy, & son gendre, & d'ailleurs du sang de France: ce qu'il fit de grande affection, enuoyant au Roy de Frãce Ambassadeurs pour c'est effet: parquoy le Roy Iean, tant par les sollicitations du Roy de Arragon. que des Roynes susmentionnées, & autres grans Seigneurs de son Royaume, fit entendre au Roy de Nauarre qu'il s'aprestat de respondre aux charges & accusatiõs de son procureur general, & qu'il luy permettoit de prendre des aduocats, & gens du conseil, de quelque natiõ qu'il voudroit, pour sa iustification, l'assurant qu'il ne l'empescheroit en ses defenses: que s'il se trouuoit qu'il luy eut fait aucun tort, qu'il luy en feroit telle raison, & satisfaction, qu'il s'en contenteroit: mais si au contraire il estoit conuaincu de crime de leze Majesté, c'estoit a luy a luy faire

grace, ou non, selon qu'il luy plairoit. Suivant cela on entra en procès, par voye de Justice: mais dans peu de iours la prinse du Roy Iean aduint en Guyenne, par les Anglois, qui fit cesser ces moyens iuridiques. *Prise du Roy Iean.* Apres la prinse du Roy Iean, le Dauphin, & Duc de Normandie son fils, vindrent à Paris, ou par l'aduis des Estats assemblés, luy furent ordonnés cinquante Conseillers, pour administrer & regir le Royaume. Par ceux cy entre autres choses, fut proposée la deliurance du Roy de Navarre, mais le Dauphin son beau frere, l'empescha. Durant sa prison, Louys, son ieune frere, vint en Navarre, pour gouverner le royaume, lequel fut pratiqué par le Roy D. Pedro d'Arragon, & receut de luy aide, & secours contre le Roy de Castille, qui luy auoit meu aspre guerre. Cepédant on cherchoit tous les moyēs de faire sortir le Roy de Navarre, lesquels en fin on trouua, par le moyen de Philippes de Navarre frere du Roy Charles, Iean de Pinguignac gouverneur d'Artois, & autres François acompagnés de D. Rodoric de Vrriz, D. Corbarā de Leet, D. Charles de Artieda, D. Fernando de Ayaua, & du Baron de Garro, qui le tirerent du chasteau d'Aleux

en Palueil, où il auoit esté prisonnier dix huit mois, lequel lieu ils eschelerent de nuit, tuant le capitaine & les gardes: & tient-on que Louys Duc d'Anjou, l'un des enfans de France, y tint la main, contre ce que desiroit le Dauphin son frere Duc de Normandie, lequel eust bien voulu que le procès du Roy de Nauarre eut esté fait, & parfait, afin qu'estans ses biens confisqués, il vint à se saisir de plusieurs belles terres qu'il auoit en Normandie: ioint que imposant le Dauphin plusieurs gros tributs sur les peuples de France, il craignoit que le Roy de Nauarre ne se mit du costé du peuple, mutiné a cause de ces charges en plusieurs lieux, notamment en la ville de Paris. Le fait de ces cheualiers fut longuement loué spécialement en Nauarre: en memoire desquels & pour le bon service qu'ils auoyent fait a leur Roy, leurs noms furent escrits en la chambre des Comptes du Royaume de Nauarre. Le Roy Charles eut plusieurs affaires en France contre le Dauphin son beau frere, neanmoins il y eut, en fin, quelque espee de reconciliation entre eux, estant le Roy de Nauarre porté, & soustenu par les Parisiës, & leur preuost des Marchans Estienne

Marcel, & par l'Euesque de Chaalons, parquoy il fut ordonné, par quelque forme de Iustice tenue, que les biens meubles, & immeubles du Roy de Navarre luy seroyent restitués, & que les choses qui estoient passées seroyent oubliées: & mesmes, que les os de ceux qui auoyent esté executés à Roüan, seroyent baillés aux parents pour estre enseuelis honorablement, & toute note d'infamie ostée, & que leurs biens confisqués seroyent rendus aux legitimes heritiers. Mais quelque promesse de paix que le Dauphin fit en cest endroit, si monstra il despuis par effect, qu'il n'en auoit aucune volonté: A raison dequoy grands troubles s'en ensuiuerent, ioint que le Roy de Navarre persistoit en ses demandes, d'estre mis en possession des Duché de Bourgogne, Comtes de Brie & de Champagne, ancien patrimoine de ses predecesseurs. Le Roy de Navarre de son costé mit gens ensemble, tant de ses partisans François, que de ses subiets de Navarre. Le Dauphin aussi de sa part assembla grand nombre de gensdarmes, & se demena la guerre autour de Paris quelque temps, les Parisiens tenâts le parti du Roy de Navarre, lequel se vint par-

Mort d'Estienne Marcel Preuost des Marchands.

quer à saint Denis: le Dauphin, & son armée demeurant à Conflans, & pont de Charctō, exclus de Paris, iusques a ce que par ceux de sa faction, ayant esté occis Estienne Marcel preuost des Marchands, il fut introduit avec ses gens, en la ville, par la porte saint Antoine. En ce temps se conclud le traité de Bretigni, sur la deliurance du Roy Iean: parquoy on trouua bon de reconcilier ces Princes, & par la bonne diligence de plusieurs moyēneurs furent faits amis le Dauphin, & le Roy de Nauarre, lesquels, a cet effect, s'entreurent a Pontoise; mais ce fut vne amitié pleine de soupçon: car ayant le Roy de Nauarre receu certaine somme de deniers des Parisiens pour licētier les Anglois, & Nauarrois dont il s'estoit serui, & les faire desloger des villes de Mante, & Meleun, & autres és enuiron de Paris, il n'en fit rien, ains les reteint, & soudoya de nouveau, se rendāt par ce moyen suspect au Dauphin, & à toute la France. Le Roy Iean en fin mit d'accord le Roy de Nauarre avec le Dauphin son fils, & de sa part le receut en sa bonne grace, iurant le Roy Charles de Nauarre de luy estre fidelle à iamais, 1361. Apres s'estre reconcilié l'an 1361, il se retira

en Navarre, ayant eu de sa femme la Royne Jeanne vn fils, en la ville de Mante: lequel fut nommé Charles, comme luy, & qui luy succeda au Royaume. Ceste mesme année 1361. le Roy D. Pedro de Castille essaya de tirer à son parti, & embrouiller en la guerre qu'il deliberoit faire contre le Roy d'Arragon, le Roy Charles de Navarre lequel estoit fraischement venu de France en son Royaume de Navarre, desiré, & bien receu, comme celuy qui auoit esté long temps absent. La premiere chose qui fit y estant arriué, fut de bien recompenser les Seigneurs & cheualiers qui l'auoyent serui, & secouru en ses affaires de France, entre lesquels estoit le plus remarquable D. Rodrigo de Vrriz, lequel eut pour ses bons seruices le gouuernement des ressorts de Sanguesse, Olite & Tudelle, le Baron de Garro eut autre sorte de recompense, ne se voulant arrester en Navarre, car il estoit cheualier errant, & cherchant la guerre, partant retourna en France. Or comme toutes choses eussent esté assés paisibles en Navarre iusques alors, il se presenta occasion d'y remuer, & troubler tout, a la venue des Ambassadeurs du Roy D. Pedro de Castille, Inigo

Le Roy de
Navarre
pratique
par celuy
de Castille.

1362.

Lopez de Orofco, & Arrias Gonçales de Valdez, lesquels vinrent congratuler, au nom de leur maistre, le rechercher d'amitié, & nouvelle ligue, & le prier de vouloir se trouuer en lieu où les deux Roys peussent conferer, de presence ensemble. Le Roy Charles fut fort aise de ceste Ambassade: & comme il estoit tousiours en opinion d'auoir guerre contre le Roy de France, iusques à tant qu'il luy eut restitué les terres qu'il pretenoit luy appartenir, faisoit estat de l'amitié de Castille, pour s'en preualoir en tel besoin. Il promit donc aux Ambassadeurs d'aller a Soria en Castille: & ayant accordé premieremēt avec ses Ambassadeurs quelque forme de paix, s'y achemina l'an 1362. menant en sa compagnie son frere Louys, & le Captal de Buch, grand Seigneur en Guyenne, l'Abbé de Fescan, & autres, tāt Nauarrois que François. Le Roy de Castille se trouua au lieu assigné, & les receut en toute demonstration d'amitié, & pour le premier acte confirmerent, & validerent les articles de paix, & alliances contenans ligue offensive, & deffensiue contre tous. Apres quelques iours passés en festes, & ieux d'armes, & autres esbatemens, le Roy de Castille

ayant conuié celuy de Nauarre à vn grād festin, luy dit, qu'il auoit quelque chose à luy dire: à raison dequoy, estans entrés en vne galerie, le Roy de Castille luy tint tels propos, en presence de D. Garcia Aluarez de Toledé, maistre de saint Iacques, de Inigo Lopez de Oroasco, Martinjanes de Seuille grand Thresorier, Martin Lopez de Cordoue grand chambellan, Martin Fernandes cheualier du Seel secret, tous du conseil priué d'iceluy, & aussi des principaux Seigneurs, & cheualiers qui auoyēt accompagné le Roy Charles: Mon frere,, (dit-il) puis que nous auons fait serment,, de nous aider l'vn l'autre cōtre nos enne-,, mis, ie vous veux biē declarer, que la paix,, que i'ay avec le Roy d'Arragon, a esté fait-,, te contre ma volonté, & au detrimēt de,, mon honneur: car Aben, Alhamar, Roy,, de Grenade, s'estant confederé avec luy,, couroit mes terres d'Andalousie, & ce fut,, la cause qui me fit condescendre à faire,, paix, à fin de chastier ce Maure: maintenāt,, que i'ē ay eu ma raison, ie ne me sens obli-,, gé a garder ceste paix, sinon que les places,, que i'ay rendues me foyent rebailées, &,, les frais de la guerre, causée par le Roy de,, Arragon, payés: parquoy suiuant la pro-,,

» messe que vous m'aués faicte, iurée: ie vous
» somme de m'aider en ceste guerre, de voz
» forces, & de vostre personne. Le Roy de
Navarre fut fort esbay de ce langage, & se
trouua surprins, ne sachant que respōdre:
car il estimoit que le Roy de Castille n'a-
uoit aucuns ennemis, quand il iura la paix,
& alliance susmentionnée. En fin il mōstra
d'estre fort desireux de faire ce que le Roy
D. Pedro de Castille vouloit, mais demā-
da tēps pour pouuoir conferer a part avec
ses conseillers, qu'il auoit la amenés. Tous
furent d'aduis, qu'il obtemperat au Roy
D. Pedro: car autrement il y auoit danger,
qu'estant sa personne au pouuoir d'iceluy,
il ne luy iouast quelque mauuais tour, cō-
me il estoit temeraire & cruel, & sans au-
cun respect: ioint qu'estāt le Royaume de
Navarre despourueu, & les forces de Ca-
stille assēs grandes autour d'eux, il estoit à
craindre, que s'il se monstroit retif, & luy
refusoit ce qui luy demandoit, avec sa de-
tentiō, il ne fit aussi quant & quāt courir le
pays a ses gens, avec notable dommage de
luy, & des Nauarrois ses subiets, il les creut
& fit respōce au Roy de Castille, que luy,
& ses moyens estoient à son commande-
ment, pourueu qu'il luy rendit la pareille,

s'il receuoit incommodité, pour s'estre réduit ennemy du Roy d'Arragon son beau frere. A ceste faute l'amena doncques l'alliance de Castille, par luy tant recherchée, pour s'en seruir contre les François, qu'il ne fit aucune difficulté de se mettre es mains du plus infidelle Prince de la terre.

Donc suiuant cest accord, le Roy de Nauarre ne faillit à la promesse de Soria, enuoyant defier le Roy d'Arragon, fondé sur ce que durant ses affaires, & prisons de France, il ne l'auoit voulu secourir: a quoy s'offrant le Roy d'Arragon de luy satisfaire par bōnes raisons, il n'en voulut entendre aucune. Ayant doncques assemblé plusieurs gēsdarmes, il vint assieger la ville de Sos, laquelle il print, & puis Sauueterre, peu apres il receut deux mille hommes Castillans qu'il disposa avec ses Nauarrois sur les frontieres d'Arragon, où ils firent plusieurs pillages, meurtres & bruslements. Le Roy d'Arragon entendant bien que la guetre que le Roy de Nauarre luy faisoit, estoit chose forcée, aduisa de le diuertir, & separer, par moyens subtils, de l'alliance de Castille. Pour ce faire, sçachāt que le Roy Charles estoit tousiours en querelles pour la Duché de Bourgongne,

Guerre dénoncé de la part de Nauarre au Roy d'Arragon.

& autres terres, avec le Roy de France, il enuoya vers le Roy Iean D. Iean Fernandes de Heredia son Ambassadeur lequel estant venu en Auignon, ou ayant eu plusieurs parlements avec les Seigneurs du Conseil du Roy de France, exploicta si bien qu'on se contêta de remettre les differens en iugement, & arbitrage du Roy d'Arragon son maistre, & de six Cardinaux: ce qui fut cause que les Roys de Nauarre & d'Arragon, de la en auant, commencerent a auoir secrettes intelligences ensemble, au preiudice de Castille.

En fin l'Abbé de Fescan Legat du Pape, essaya de mettre paix entre ces Princes, & obtint du Roy de Castille, que D. Louys de Nauarre s'y employast, lequel alla parler au Roy d'Arragon à Buriana, & amena a Moruiedro, au Roy de Castille, le Comte de Denia D. Alphonse d'Arragon, qui fut despuis premier Connestable en Castille, & Marquis de Vilena, & avec iceluy D. Bernard de la Cabrera, & autres: mais toutes leur diligences furent vaines, car le Roy D. Pedro de Castille ne vouloit ouyr parler de paix, sinon que le Roy d'Arragon luy promist de tuer D. Henry Comte de Transtamare, D. Tello freres, ce qu'il
refusa

refusa de faire au commencement, montrant d'auoir horreur d'un acte si meschant, que de trahir ainsi ceux qui auoyent eu recours a sa protectiõ, & l'auoyent serui: neantmoins despuis il n'en fit aucune conscience, se voyant pressé, & ses terres par trop endommagées par le Roy de Castille, & s'accorda avec le Roy de Nauarre, pour tuer D. Henry, ce que Dieu ne permit, car il auoit destiné D. Héry au Royaume de Castille, & Leon, & pour fieu, & chastiment exemplaire du tiran D. Pedro, lequel promit au Roy de Nauarre de luy bailler la ville de Logroño, s'il vouloit tenir la main à ce meurtre. Pour ce faire les deux Roys d'Arragon & Nauarre accorderent vne entreueüe a Sos, feignant le Roy Charles de vouloir quitter l'alliance de Castille. Pour assurance, & garde de la ville ou se deuoyent trouuer les deux Roys, fut choisi pour cappitaine, & gouverneur Don Iean Ramires de Arellam, cheualier Nauarrois, Chambellan du Roy Charles, lequel print pour son lieutenant son frere Ramir de Arellam, avec trente hommes d'armes, trente lanciers, vingt arbalestiers, & autres soldats. Les Roys entrèrent en Sos, avec chacun deux homes,

& auoyent esté mandés D. Henry, & D. Teillo, pour s'y trouuer. D. Henry vint accompagné de huit cens hommes à cheual, lesquels ayant laissé hors de la ville, il entra dedans, luy troisieme, ainsi qu'auoyent fait les Roys. Leans entra aussi l'Abbé de Fescan, mais ne sachant rien de ce qui se brassoit contre D. Henry. Ayans les Roys traité & deuisé longuement de leurs affaires, par semblant, estimans que l'ocasion estoit oportune de faire despatcher D. Henry, ils parlerent secrettement

D. Ieã Ramires d'Arcillan chevalier vrayement noble, ne veut estre ministre de la trahison brassée contre le Comte de Trãstamare.

avec D. Jean Ramires, l'incitât d'exécuter ce meurtre, & luy faisant grandes promesses: mais ce chevalier, qui auoit le cœur noble, & vertueux, n'y voulut oncques consentir, disant, qu'il aimoit mieux mourir cent fois, que de tacher sa renommée d'un crime si execrable que cestui-là. Les Roys voyans qu'ils auoyent en vain espéré que cestui-cy deust estre ministre de leur trahison, ne sceurent que faire, sinon dissimuler l'entreprise, & se retirer en leurs terres, enioignans silence a D. Jean Ramires. De cest acte genereux D. Ieã Ramires d'Arcillan merita louange immortelle, outre ce que Dieu l'honnora grandement despuis, l'ayant adressé en Castille au tẽps

que ce D. Henry y regna , par lequel il fut aymé, & cheri, & obtint d'iceluy la seigneurie de los Cameros. De luy sont descendus les Comtes d'Aguilar de la famille d'Areillan. Or ceste affaire mal entrepris, n'ayant peu estre executé, fut lors dissimulé & teu. Desia en autre temps estoient passés pour parler & accors entre ce Roy D. Pedro d'Arragon, & son frere D. Ferdinand Marquis de Torfose, au dommage de Don Henry, pource qu'ils le voyoient desireux de regner en Castille , duquel Royaume Don Ferdinand estoit legitime heritier, si D. Pedro le cruel mouroit sans enfans procrées de loyal mariage : toutefois ce ne fut oncques l'intention du Roy d'Arragon de bien faire a Don Ferdinand son frere, ny luy pourchasser honneurs, ny aduentages quelconques : mais comme il estoit homme plein de desdaigneuse enuie, & sans amour, ny grace aucune enuers ceux qui luy faisoient seruice, il mettoit facilement tout en hazard , n'espargnoit personne, & dissimuloit enuers tous pour la commodité presente. Or D. Henry qui le congnoissoit bien, sceut aussi dissimuler à son tour, & se garder de luy, le maniant si dextrement, que par les moyens, & for-

ces d'Arragon, il se fit voye pour paruenir a ses desseins. Et de fait, peu apres pratiqua vne nouuelle, & tres estroitte ligue avec iceluy, en consequence de laquelle furent enuoyés en France D. Iean Fernandes de Heredia, & François de Perillos, capitaines du Roy D. Pedro d'Arragon, avec argent, pour soudoyer gens de guerre.

Or le Roy d'Arragon, desireux d'estre hors de ceste guerre de Castille, faisoit tousiours tenter, par le Roy Charles de Nauarre, s'il pourroit amener celuy de Castille a quelque bon apoinctemēt, mais cestoit temps perdu: parquoy les Roys de Nauarre & d'Arragon se resolurent de faire entre eux vne ligue, pour confirmatiō, & lien de laquelle ils accorderent mariage entre l'Infante Don Ieanne sœur du Roy Charles, & l'Infant d'Arragon Don Iean Duc de Gironne, heritier d'Arragon, aagé lors de quatorze ans. Et en outre le Roy d'Arragon s'obligeoit de bailler cinquante mille florins, pour desengager quelques villes que le Roy Charles auoit engagées au Comte de Foix Gaston Phebus son beau frere: Item de luy soudoyer certain nombre de gens d'armes, contre quelques ennemis que ce fut, notamment six cens

hommes à cheual des gens de Nauarre contre Castille; & si c'estoit contre Frâce, de luy en soudoyer mille, & luy aider par mer & par terre de toutes ses forces, au besoin: & en outre luy quitta à perpetuité, pour demeurer a la couronne de Nauarre, Saluatierra, & le lieu dit le Terme du Real. Pour assurance desquelles choses, qui estoient fort au grand honneur & aduantage du Roy de Nauarre, celuy d'Arragon promit de mettre en depost la ville de Iacca, Vncastillo, Sos, Exea, & Tiermas, qui seroyent cōmises a la fidelité de Raimond Allemand de Ceruillon, cheualier Arragonnois, auquel pour cest effect seroit remis le serment d'hommage, & vasselage qu'il auoit enuers le Roy d'Arragon, & iureroit fidelité à celuy de Nauarre, pour luy liurer les places mises en ses mains, s'y de la part d'Arragon estoit contreuenu aux accords sus escripts. Le Roy de Nauarre, de sa part, promit de quitter l'alliance du Roy de Castille, & luy faire la guerre, & a ses enfans: & de sa part mit en depost, ou gage, la ville & chasteau de Sanguesa, Gallipienço, Vxue, Aybar, Caseda, Pitelles, & la Penna: & en outre la personne d'Arnaud Seigneur de Luse, son cham-

Accord entre Nauarre & Arragō contre Castille.

bellan, fort agreable, & priué : lesquelles choses furent iurées sur l'hostie, au lieu de Vncastillo, presens les Comtes de Trãstamare, Ribagorca, & autres, ausquels les Roys recommanderent de tenir ceste aliãce secreete. Ce ne fut pas assés à ces deux Roys de se munir contre l'effect du Roy de Castille, pour leur seurté & deffense, mais en outre voulurent partir entre eux la peau de l'Ours avant que l'auoir pris, diuisant le Royaume de Castille, en sorte, qu'au Roy Charles de Nauarre deuoit demeurer la Cité de Burgos, avec toute Castille la vieille, toute la terre des môts d'Occa, iusques aux limites de Nauarre, & la mer Occeane, en ce compris la terre de Guipuscoa, Alaua & Biscaye, & dauantage les villes de Soria, & Agreda. Et pour le Roy d'Arragõ furent assignés le Royaume de Toledé, & Murcia: conspirerēt aussi la mort du Roy D. Pedro de Castille, offrant le Roy d'Arragon a celuy de Nauarre deux cens mille florins, & la propriété des villes, & chasteaux de Sos, Vncastel, Exsea & Tiermas, s'il le tuoit, ou le luy liuroit prisonnier : & sans cela luy offrit la Cité de Iacca, avec son territoire, & vallées, des maintenant. Pour plus dissimuler

*Partage du
Royaume
de Castille
avant que
l'auoir con-
questé.*

ces menées, ils ordōnerent que D. Louys frere du Roy de Nauarre se mettroit a courir les terres d'Arragon, mais qu'il se laisseroit prendre prisonnier par Don Alphonse Comte de Ribagorça : ce qui fut fait, mais Louys de Nauarre fut bien tost deliuré, & sceut si bien le Roy de Nauarre couvrir ses intentions, que celuy de Castille ne s'en peut apperceuoir pour lors. Ce dernier complot fut ainsi machiné entre ces deux Roys, sans le communiquer a personne, a cause du Comte de Trāstamare D. Henry, avec lequel le Roy d'Arragon faisant autres diuerſes menées : car le Roy D. Henry affectant ouuertement le Royaume de Castille, sur lesperance des faueurs qu'il attendoit de France, promettoit au Roy d'Arragon, que s'il luy aideoit de sa part, il luy bailleroit, en pleine propriété, & droit souuerain, la sixiesme partie des terres qu'il conqueſteroit par son aide, & moyēs en Castille: à quoy preſtoit l'oreille le Roy D. Pedro d'Arragon, toujours inique enuers son frere D. Ferdinād Marquis de Tortoſe, auquel du droit, apartenoit le Royaume de Castille, si D. Pedro le cruel mouroit sans enfans legitimes. Or ces marchés n'estans tellement

couverts que l'Infant D. Ferdinand n'en sentist le vent, il en fit si grãd bruit, & s'escarmoucha de façon, que le Roy d'Aragon, & le Comte de Transtamare furent d'aduis de s'en despecher duquel conseil fut D. Bernard de Cabrera, ce qui fut executé tost apres: car voyant l'Infant D. Ferdinand qu'il estoit aussi peu asseuré en Aragon, qu'en Castille, & à ceste cause se voulant retirer en France, le Roy d'Aragon son frere eut moyen de le faire arrester, & tuer au chasteau de Buriane, territoire de Valence.

1363.

L'an 1363. mourut le Roy Jean de France, estant retourné en Angleterre, pour deliurer les ostages qu'il auoit baillés, ne pouuant induire les Estats du Royaume de France d'accomplir les capitulations accordées avec l'Anglois. Ceste nouvelle entendue par le Roy Charles de Nauarre, il s'apresta aussi tost pour passer en France, auquel Royaume son beau frere Charles cinquiesme auoit succedé: mais ceste guerre d'Aragon l'auoit si bien enuelpé, qu'il ne peut: parquoy ses affaires allerent assés mal au deça des mōts Pirenées. Bertrand du Guesclin cheualier Breton, qui despuis fut Connestable de France, au

nom du nouveau Roy, luy print Mante, & Meulant, & autres places en Normandie, & en mesme temps mourut son frere Philippes, qui luy vint fort mal a propos, pour les remuemens qui ensuiuerent en France, a l'aduenement de ce nouveau Roy.

L'année 1364. renouellerent derechef ^{1364.} leurs alliances les deux Roys de Nauarre, & Arragon, mais aucunement differentes, & changées, estant ja descouuert celuy de Nauarre ennemi de D. Pedro de Castille. Ils se trouuerent pour cest effect à Sos, accordant de continuer ceste guerre contre Castille, sans qu'il fut licite a luy de faire paix, ny trefue, sans la volonté de l'autre: Que le Roy D. Charles de Nauarre ne feroit aucun accord avec le Roy de France, que celuy d'Arragõ n'y fut compris. Baillerent l'un à l'autre ostages, pour assurance de leurs conuentions, assauoir, de la part du Roy d'Arragon son fils D. Martin, & de celuy de Nauarre vn fils de D. Louys son frere, & les enfans de D. Iean Ramires d'Arcillan, de Don Martin Henriques, du Seigneur de Grammont, de D. Bertrand de Gueuarra & autres. Ces conuentions furēt iurées par les principaux cheualiers,

& villes d'une part & d'autre. Et pource que les sommes de deniers promise a la capitulation de Vncastello, au Roy de Nauarre estoient fort augmentées, il fut dit, que des maintenant le Roy d'Arragon luy deliureroit cinquante mille florins comptant a Sos, & pour le surplus luy feroient baillées en gage la cité de Iacca, Sos, Vncastel, Tiermas & Exea. Autre accord particulier fut fait entre le Roy Don Charles, & le Comte de Trástanare Don Henry, entre les mains duquel deuoient demeurer les ostages. Le Roy de Nauarre promit d'entrer en personne en Castille, & y faire la guerre : & pour s'assurer de D. Henry, voulut auoir en ostage, de sa part, sa fille D. Leonor, qui fut depuis Roync de Nauarre, & vn sien fils bastart, nommé D. Alphonse Henriques. Le Comte promist, que si quelque iour il obtenoit le Royaume de Castille, il n'empescheroit point que le Roy de Nauarre ne iouist des terres de l'ancien patrimoine de Nauarre, vsurpées par les Roys de Castille, & plusieurs autres.

Or estoient les conseils d'entre le Roy de Nauarre, & du Comte Don Henry de Transtamare secrets, & separés d'avec le

Roy d'Arragõ, lequel se gouuernoit, pour le plus, par l'aduis de Bernard de Cabrera, cheualier sage, & de grande experiance, par lequel il estoit souuent destourné de ce ou les autres le vouloyent faire condescendre: a raison dequoy le Roy de Nauarre, & le Côte D. Henry luy en vouloyent. Ioint que comme priué conseiller, & de plus grande autorité, il estoit hay des autres Seigneurs Arragonnois, moins fauorisés. Parquoy s'estant derechef assemblés ces Princes en Almudear, le Roy de Nauarre, & les Comtes de Trástmare, & de Ribagorca conspirerent d'oster ce conseiller au Roy d'Arragon: & firent en sorte, qu'ils le mirent en la mauuaise grace d'iceluy. D. Bernard estant aduerti qu'on le vouloit prendre, se voulut retirer, & fuiant arriua en Nauarre a Carcastello, les habitans duquel lieu voyãs qu'il estoit poursuiui par Garci Lopez de Sese, fermerent les portes de la ville: mais estants sommés par Garci Lopez, au nõ des deux Roys, de luy liurer D. Bernard: ils le retindrent, attendans le commandement du Roy, lequel leur manda qu'ils le liurassent es mains de Garci Lopez, & par luy fut mené à Murillo, où il demeura quelque

temps , en esperance d'estre deliuré : mais il estoit tant mal voulu du Roy de Nauarre, & du Comte de Transtamare, que par importunes accusations, & charges ils ne cesserent point, iusques a ce qu'ils l'eussent fait mourir. Ce Bernard de Cabrera auoit esté autresfois cōtraint de venir a la Cour, & s'employer aux grans affaires d'Estat, où il estoit fort aduisé, auant l'an 1346. lors qu'ennuyé du monde il auoit deliberé de se faire moyne. Le Roy l'auoit cheri, & aduencé, aussi en receut plusieurs bons conseils, & tresprofitables seruices, tant es guerres de son Royaume, qu'en celles de Sardaigne, & de Castille. Mais comme les courtisans plus ils cherchent la grandeur, & l'hōneur de leur Prince, & sont par eux plus honorés, & aimés, tant plus sont ils subiets aux enuies, & mal vueillances: ainsi en print il à cestui-cy: car ayant, pour trop adherer au Roy son maistre, acquit l'ini-mitié de tous les Princes, & grands Seigneurs du Royaume, lors que par les menées du Roy de Nauarre, & du Comte de Transtamare, il se trouua prins, il n'y eut personne qui luy fut fauorable: ains quasi par vne commune conspiration luy fut fait sommairement son procès, & consti-

tué iuge d'iceluy sa propre nourriture l'Infant Don Iean Prince de Gironne, lequel seant au tribunal, & ayant pour assesseur Dominique de Cerdagne, Iustice majeur d'Arragon (qui deuoit estre defenseur de l'opressé, pour le deu de sa charge, & office) prononça sentence de mort contre ce pauvre vieillard decrepit. Il fut mené au marché de Sarragosse, illec decapité, & sa teste portée au Roy, qui estoit à Barcelonne: tels salaires ont souuent les plus fidelles conseillers des mal aduises Princes, Ainsi mourut miserablement vn des plus grands personnage, en noblesse, sens & vertu, qui eut esté de long temps en Arragon, lequel, sans le Roy son maistre, auoit executé choses, tres-grandes, & le Roy, sans luy, oncques n'auoit fait chose qui vallust. Le fils dudit Bernard nommé Bernardin auoit espousé Marguerite de Fois, fille du Viscomte de Castelbõ, & de Constance de Lune.

*Mort de
Bernard de
Cabrera
pour auoir
esté trop fi-
delle serui-
teur de son
maistre.*

Or pour reuenir aux promesses & capitulations faictes entre les deux Roys de Nauarre, & Arragon, elles n'auoyēt point l'execution deuë, & si les ostages accordés n'estoyent point deliurés: car ce n'est pas chose ordinaire, en tels traittés, que les

*Perpetuelle
desfiance
entre les
Princes.*

faits suiuent les parolles, estants les Princes tousiours agités de desfiance les vns des autres. Parquoy le Roy de Nauarre ne receuant deniers du Roy d'Arragon, ne luy fournissoit point de gens de guerre, pour opposer à l'armée de Castille, reuenue és terres de Valence, & si commençoit à penser a plusieurs desseins, peu fauorables au Roy d'Arragon. Si le Roy de Nauarre, ayant trompé le Roy de Castille, essayoit d'en faire de mesme à celuy d'Arragon, le Roy d'Arragon, de sa part, n'en faisoit pas moins contre celuy de Nauarre: car il auoit enuoyé en France ses Ambassadeurs, lesquels traiterent, en la cité de Toulouze, avec les deputés du Roy de France Charles cinquiesme, & avec Louys Duc d'Anjou frere d'iceluy, vne ligue, par laquelle les François promettoyent d'aider au Roy d'Arragon à conquerir le Royaume de Nauarre, & en despoullier le Roy Charles, & l'ayant conquis, s'obligeoyent de luy fournir tousiours cinq cens lances, contre quiconques le voudroit repousser de la possession d'iceluy. Le Roy d'Arragon promettoit aussi de son costé d'aider aux François à cōquerir la Guienne, & en chasser les Anglois. Ces accords

furent faits l'an 1364. estans en inimitié les ^{1364.}
Rois Charles cinquiesme de France, &
Charles deuxiesme de Navarre. Mais cō-
me ils estoient François, & beaux freres,
ils s'accorderent despuis, faisant paix en-
semble: parquoy le Roy d'Arragon perdit
ses peines, & ne luy seruit l'alliance, pour-
chassée en France, a chose quelconque. La
guerre continua neantmoins toute ceste
année entre les François, & les partisans
du Roy de Navarre en France : mais l'an
1365. la Roynie Jeanne femme du Roy de ^{1365.}
Navarre se hâta de venir à la cour de Frā-
ce, traiter la paix d'être les deux Roys, dōt
l'un luy estoit mary, & l'autre frere : car le
Roy d'Arragon ne cessoit de solliciter le
Roy de France, pour l'effect de l'alliance
convenue l'an precedent à Toulouse, spe-
cialement pour la conqueste de Navarre:
à raison dequoy il luy auoit enuoyé encor
cette année nouueaux Ambassadeurs. Le
Roy de Navarre estant aduerti de toutes
ces choses, pressa fort la Roynie sa femme
de s'acheminer, encor quelle fut enceinte.
Son voyage n'aporta lors qu'une breue
treue: mais despuis la paix se fit, par la grād
diligence des deux Roynes Jeanne fem-
me du Roy de Navarre, & Blāche sa sœur,

1366.

& par l'adresse, sens, & prudence de Capital de Buchs lors prisonnier des François, pour les partialités de Nauarre. Estant la Royne a Eureux, l'an 1366. elle acoucha d'un fils nommé Pierre, qu'on appella Cōre de Mortaing, & apres ses couches elle se retira en Nauarre, avec son fils aîné Charles, aagé lors de quatre ans, & celuy quelle auoit enfanté de nouueau.

En ce temps le Roy D. Pedro le cruel, Roy de Castille auoit forte & aspre guerre contre D. Henry son frere naturel qui vouloit deschasser du Royaume de Castille le legitime Roy pour s'y mettre, cōme despuis il fit : or durant ceste premiere guerre, le Roy de Nauarre, ne bougea en faueur de l'un, ni de l'autre de ces Princes contendants : mais ayant sceu que le Roy Don Pedro de Castille s'estoit retiré a Bayonne, depossédé de son Royaume, il le vint voir, & se trouua present aux accords, & prouesses que firent le Prince de Galles, Edouart & luy : puis estant de retour en Nauarre, il fut fort sollicité par D. Henry, de se ioindre de son costé, mais il s'estoit ja obligé par promesse au Roy D. Pedro de Castille, & au Prince de Galles, de leur donner libre passage par ses terres.

Le

Le Roy d'Arragon aduertí de toutes ces choses, pressoit fort, par ses Ambassadeurs, le Roy de France, d'esnouuoir la guerre aux Anglois, & au Roy de Nauarre: à quoy il promettoit de se ioindre de sa part, pour diuertir l'orage qui venoit sur le nouveau Roy de Castille D. Henry, lequel il essaya de faire receuoir aussi en ceste ligue: & de fait, il y auoit guerre perpetuelle és frontieres d'Arragon & de Nauarre. Or nonobstant les choses susdittes, tant sollicita, & pratiqua D. Henry le Roy Charles de Nauarre, qu'il luy fit oublier les promesses faictes par luy, a Bayonne, au Roy D. Pedro de Castille, & aux Anglois, & vint trouuer iceluy D. Henry a Sainte Croys de Campeço, luy promit, & iura d'estre de son costé, & d'empescher a son pouuoir, le pas de Nauarre, a l'armée Angloise: ce qui eut grandement serui a rompre tous les desseins & entreprises du Roy dechassé, car il n'auoit és passages des Pirenées rien qu'il le fauorisat, que les villes de S. Sebastien, & de Guetaria en Guipuscoa. A ces promesses, solennellement faictes par le Roy de Nauarre au Comte D. Henry, assisterent D. Gomes Manrique, Archeuesque de Toledé, D. Lopez Fer-

*Inconstance
du Roy de
Nauarre.*

nandes de Luna , Archeuesque de Sarragosse, D. Alphonse d'Arragon, Comte de Denia, & Marquis de Villena, Bertrand du Guesclin, & plusieurs autres grâds Seigneurs de Castille, France & Arragon. Et fut arrestée confederation & ligue entre les Roys d'Arragon, de Nauarre, & Don Henry, a commune defense contre tous, promettant le Roy Charles de se tenir prest avec les forces de son Royaume, pour se trouuer en personne en la bataille qu'on estimoit qui se deust donner: pour assurance, dequoy fut mis en depost, es mains de l'Archeuesque de Sarragosse, le chasteau de la garde: & celuy de S. Vincet, en la puissance de Bertrand du Guesclin: & celuy de Buradon, baillé en garde a D. Iean Ramires d'Arcillan. En recompense des bons offices que D. Henry esperoit du Roy Charles, il luy promit bailler la ville de Logroño, en propriété, à luy & aux siens, il y auoit aparence que les affaires du Comte Henry passeroient mieux, que celles de Don Pedro, & partant le Roy Charles esleut de se tenir du costé des plus forts, comme il luy sembloit. Le Roy de Castille depossédé, & le Prince de Galles

entendans ceste ligue, la trouuerent fort estrange : or estant l'Anglois plus familier du Roy de Nauarre, se plaignit grandement a luy, essayant de le ramener a ses premieres promesses, ce qu'il fit : luy faisant derechef quitter, par insigne inconstance, le parti du Comte Don Henry, & du Roy d'Arragon, moyennant les promesses qu'on luy fit, de luy bailler, outre Logrogno, la cité de Victoria, qui tenoit encor le parti du Roy Don Pedro, il s'obligea donc par contraire iugement, de leur bailler passage, & de se trouuer en personne, avec sa gendarmerie, en la bataille, en leur faueur, excusant sa legereté sur ce que le Royaume de Castille appartenoit de droit a D. Pedro, & faisoit avec cela ses desseins de se preualoir de l'amitié, & des forces des Seigneurs Anglois en ses querelles, & pretentions qu'il auoit contre le Roy de France, qui luy troubloit grandement ses affaires. Or les conuentions que le Roy Don Pedro de Castille fit avec le Prince de Galles furent telles. Il luy donna des lors la Seigneurie de Biscaye, & Castro de Ordiales, & en outre payer les gens de guerre qu'il meneroit

*Deuxiesme
inconstance
du Roy de
Nauarre.*

*Paches entre le Roy
de Castille
& le Prince de Galles.*

1367.

en Espagne : laissa es mains des Anglois, en ostage, ses trois filles D. Beatrix, Constance & Isabel : promit la cité de Soria a Jean Chandos Connestable en Guyenne pour l'Anglois, & a plusieurs autres Seigneurs & cheualiers autres places, & villes de Castille. Et sur ces accords, pleins de bonne esperâce, puis qu'il auoyent le Roy de Nauarre pour amy, s'acheminèrent avec grande & puissante armée, pour remettre le Roy Don Pedro en son Royaume, au printemps de l'an 1367. Or le Roy Charles, ou troublé en sa conscience, a cause des serments qu'il auoit tant de fois faulx, ou pour autre raisõ, ne se voulut trouver en ceste rencontre du Roy D. Pedro, & du Comte D. Henry, ainsi qu'il auoit promis, ains sous couleur d'aller à la chasse se fit prendre prisonnier, par complot accordé, a Oliuier de Manny, cheualier Breton, qui tenoit le chasteau de Boria au nom de Bertrand du Guesclin, quil auoit en don du Roy d'Arragon, auquel il fut enfermé : & pour ne monstrier d'estre du tout desloyal, il laissa à Pampelone D. Martin Henriques de l'Acarra son grand escuyer, & porte enseigne, avec trois cens lances, luy commendant qu'il se ioignit

à l'armée Angloise, & combatit en icelle. L'armée Angloise arriua à la Cueua, ou Combes de Pápelone l'an 1366. conduite par le Prince de Galle, non point par charité, ny amour qu'il portast au Roy Don Pedro dechassé, ains pource que l'honneur, & la loüange qu'auoit acquis Bertrand du Guesclin, d'auoir establi le Côte D. Henry pour Roy de Castille, ne laissoyt point dormir ledict Prince de Galles, lequel estant à Nagera il escriuit a D. Henry, l'intitulant Comte de Transamare, estant au demeurant sa lettre pleine de toute courtoisie, l'admonestant de quitter le tiltte de Roy, pour le bailler à D. Pedro vray heritier. Pour responce, D. Henry dit, qu'il ne pouuoit entendre à aucun accord avec celui qui auoit, contre tout droit naturel, meurtris tant de personnes du sang Royal de Castille, qui faisoit à tous propos faux serments: En fin ils s'entreheurterent si asprement, es enuiron d'Aleson, qu'en fin D. Henry fut defait demeurant entre les mains des Anglois plusieurs grands personnages tant François, Nauarrois, que Castillans, la plus part des Castillans furent massacrés par commandement du Roy D. Pedro. Ceste victoire aduint le troisiés-

*Cruauté du
Roy Don
Pedro.*

me iour d'Auril l'an 1367.

Le Roy de Nauarre aduertí de ceste victoire. pensa qu'il estoit temps de sortir de sa cachette, pource pressa Oliuier de Manny de le laisser sortir : mais la difficulté estoit que ce cheualier vouloit estre payé de son bien seruir, pour auoir pris le Roy prisonnier. Le Roy Charles luy bailla son fils puîné, D. Pierre, en ostage, luy promettant que s'il le vouloit venir trouuer a Tudelle, il luy bailleroit là tout ce qu'il luy auoit promis & dauantage. le bon cheualier print l'Infant D. Pedro, le mit dedás son chasteau de Boria, deliura le Roy, & peu apres, par grande simplesse, le suivit a Tudelle : mais il ny fut pas si tost entré, qu'on l'empoigna & le mit on en prison, iusques a ce qu'il eut rendu l'ostage. Avec luy deuoit estre faisi vn sien frere, par le commandement du Roy : mais ainsi qu'il se vouloit sauuer, en fuyant par dessus vn toict, il fut tué par ceux qui le poursuoyent. Le Roy Charles escriuit incontinent au Roy d'Arragon, se plaignant du tort que les Bretons, tenant le chasteau de Boria, & Magallon, luy auoyent fait, & que mesme ils luy detenoyent son

filz, lequel il auoit esté contrainct de bail-
ler en ostage, & entendoit qu'ils le vou-
loyent mener en France: ce qu'il le prioit
d'empescher mettans bonnes gardes sur
les passages en ses terres. Disoit d'auan-
tage, qu'ils le menaçoient de courir les
terres de Nauarre, se fians au port & fa-
ueur qu'ils auoyent d'Arragon, pour lors:
parquoy le prioit de ne leur donner for-
ces, ny aide quelconque en telles entre-
prises, & de ne trouuer point mauuais
s'il menoit vne armée deuant Boria, pour
deliurer son filz de Prison. Pour faire
ceste Ambassade fut enuoyé en Arragon
Garci Sanches prieur de Ronceual, le-
quel non seulement executa bien sa char-
ge, mais d'auantage entra en traicté de
mariage entre les Infants Charles aîné
de Nauarre, & Don Leonor d'Arragon,
fille du Roy Don Pedro. Le Roy d'Ar-
ragon qui n'auoit besoin d'ennemis, d'au-
tant qu'il craignoit le Roy de Castille,
fit cesser tous les troubles de Borja, &
commanda aux Bretons de rendre l'In-
fant Pierre, lequel estant porté à Tudel-
le, Oliuier de Manny fut aussi deliuré
de prison. Quant au mariage, encor

que le Roy d'Arragon le desirast, & sollicitat fort, le Roy de Nauarre, ayant retiré son fils, ne se soucia d'y entendre, voulant premierement voir à quoy reuiendroyēt les remuements de Castille qui furent tels que D. Henry derechef par laide des François remit sus vne seconde armée.

Quant au Roy de Nauarre, il recouura les places qu'il auoit baillées en depost, faisant ligue avec le Roy d'Arragon, & D. Henry, en quoy il fut aidé par le Roy D. Pedro de Castille, & a la faueur de la victoire qu'il auoit obtenue : toutesfois il nobtint d'iceluy, ny Logrogne, ny la ville de Victoire, qu'il luy auoit promises, & si ne peut retirer des mains de D. Iean Ramires d'Areillan, cheualier de biē & d'honneur, la place de Buradon, dont il auoit esté esleu gardien, & depositaire, disant qu'il ne suiuoit point l'heur des Princes, ny leur passions, mais l'equité de la foy promise, & iurée. Ce bon cheualier s'estoit retiré en Arragon, des la bataille perdue, quant D. Henry se sauua de France, au seruiue duquel il ne tarda gueres despuis a se mettre.

*Integrité de
Don Iean
Ramires
d'Areillan.*

Le Prince de Galles, auant que partir d'Espagne, auoit tramé vne ligue ferme

entre les Roys regnans en Espagne, & luy, avec diuers desseins, en laquelle il se faisoit fort de faire que le Roy de Navarre se maintiendrait fidelle, & fourniroit bon nombre de gen darmes. Quant à celuy d'Arragon, il embrassoit la ligue (ce sembloit de grande affection, estimant qu'il ne pouuoit mieux faire que de se joindre, pour lors, au Roy de Castille victorieux, & aux Anglois, pour conclusion, & arrest de ceste confederation, iournée fut assignée aux Ambassadeurs de tous les Princes a Tarbes : ce pendant les perfidies du Roy D. Pedro de Castille facherent tellement le Prince de Galles, qu'il s'en reuint à Bordeaux tres-mal content. Au iour assigné comparurent les Ambassadeurs des Roys de Navarre & Arragon, & du Prince de Galles a Tarbes, où despuis arriuerēt ceux de Castille. Les inclinatiōs des Princes estoient telles, que le Roy d'Arragon eut bien voulu tenir le parti de D. Henry, s'il eut osé, mais il suiuoit la fortune: celuy de Navarre estoit plus incliné au Prince de Galles : mais quoy que ce fut ils vouloyent se preualoir de l'occasion des troubles, & tirer chacun sa part des terres de Castille : le Roy d'Arragon vouloit Mur-

*Lignes plei-
nes d'infide-
lité des
Princes d'a-
lors.*

cia, & autres villes : celuy de Nauarre demandoit les Prouinces de Guipuscoa, & Alaua, & nommement victoria, Sauueterre, & Treuigno, & plusieurs villes en la Rioja : le Prince de Galles pretendoit Biscaye, Castro d'Ordiales, & plusieurs autres lieux, prometans tous de se bander contre D. Henry, & luy empescher le passage en Espagne, si ces choses leur estoient accordées, & baillées par Don Pedro : sinon ils auoyent aussi bonne volonté de se liguier avec D. Henry, s'il leur faisoit telles promesses. Ainsi estoit mis le Royaume de Castille a l'encant. D'autre part le Roy Edouart, pere du Prince de Galles, & le Roy d'Arragon faisoient leurs menées a part, pour partir entr'eux le Royaume de Castille, & Leon, & y donner lieu au Roy Charles de Nauarre : ainsi se penoyent ces Princes de partir entr'eux ce que Dieu auoit ordonné a autre, & furent leurs propositions, & disputes a Tarbes telles, & de tant de choses, que ne pouuans rien conclure, ils remirent leur assemblée a Oleron, où ils firēt encor moins, d'autant que D. Henry avec son armée Françoisse sur leur pourparler entra en Arragon avec Bernard bastard du Comte de Foix, puis

en Castille ou se rendirent a luy plusieurs villes & places, ensemble plusieurs gentilshommes fuyans la fureur de Don Pedro. Et l'an 1368. Pendant que le Com-1368.
te D. Henry pressoit de pres Toledé, les villes de Victoria, Saluatierra, d'Alaua, & Logroño, qui renoyent le parti du Roy D. Pedro, fachés de la continuelle guerre que les Guipuscoans, & autres voisins, leurs faisoient se rendirent au Roy Charles de Navarre. A ceste reduction seruit beaucoup au Roy de Navarre D. Tello, qui tenoit Biscaye, qui estoit lors en mauvais mesnage avec son frere D. Henry. On dit qu'ayans les habitans de ces villes fait entendre au Roy D. Pedro leurs nécessités, il leur fit entendre qu'ils tinssent bon pour luy, tant que possible leur seroit, & que quand ils ne se pouroyent plus defendre, qu'ils se rendissent plustost a Don Henry son frere bastard, sans se desioindre de la Couronne de Castille, que non pas au Roy de Navarre, qui les retrancheroit de ce corps. En ce temps aussi le Roy Charles de Navarre, pour faire deniers, dont il avoit besoin, vendit a la ville de Viana, le

1368.

droit appellé Fontadera, ensemble le lieu dit Agoncillo, & bourgs de Vrlicilla, & Lacagurria, avec leurs appartenances, par lettres dōnées a Olite le septiesme Aoust, ceste année 1368. Estant ja mort D. Pedro Roy de Castille, occis de la main propre de D. Henry son frere bastard le 23. iour de mars, de laquelle plusieurs chargēt Bertrand du Guesclin, comme luy ayāt fausse sa foy, & promesse de le mettre en lieu de seurte. Apres la mort du Roy D. Pedro, D. Henry luy succeda la grādeur, & l'heur de ce Roy fut suspecte aux Roys de Navarre & d'Arragon, lesquels traitterent ligue entr'eux, se restituerent l'un a l'autre certaines ville & chasteaux. Avec eux par apres se mit le Roy de Portugal, d'Angleterre & de Grenade, jaloux des prosperités de ce nouveau Roy de Castille, lequel estant receu pour Roy, licentia Bertrand du Guesclin, auquel il donna plus de six vingts mille doubles d'or contant outre plusieurs villes & places. Estant de retour en France il fut fait Connestable: Or quāt aux affaires d'entre Castille & Navarre, plusieurs difficultés se presentoyēt au nouveau Roy Henry, pour l'absence du Roy Charles de Navarre, ne se voulant ingerer

la Royne D. Ieanne sa femme, qui gouuernoit le pays cependant, d'arrester, ny résoudre aucune chose sur la restitution des villes de Logrogno, Sauueterre, Alaua, Victoria, & Sainte Croys de Campeçoz, vsurpées sur la couronne de Castille. Car le Roy Charles ayant sceu, des l'an 1370. que les Anglois & François venoyent derechef aux mains, estimant que c'estoit occasiõ propre pour recouurer les terres, & droits qu'il pretendoit estre de son ancien patrimoine, possédées par le Roy de France, auoit passé les monts, estant en Normãdie, en la ville de Cherbourg, sans s'aprocher de la cour de France, ne se fiant aucunement de son beau frere le Roy Charles cinquiesme a son partement, D. Ieanne sa femme estoit gouuernante, & pour conseil luy auoit donné D. Bernard Focaut Euesque de Pampelone, & D. Iean Crusat doyen de Tudelle. Par la Royne gouuernante furent rendues au Roy d'Aragon les villes de Sauueterre, & la Real, & ligue traitée avec le Roy, leurs accords tendoyent au dommage de Don Henry Roy de Castille, lesquelles choses furent ratifiées par le Roy Charles : lequel estant pratiqué, & appaisé aucunement par le

1372.

Roy de France, fit paix avec luy, qui dura environ cinq ans : à raison dequoy il s'apresta pour retourner en Nauarre sur la fin de l'an 1372. Attendant lequel retour, la Roïne sa femme sollicitée pour raison des villes cy dessus declarées qui s'estoyent rendues au Roy de Nauarre, ne sceut prendre autre meilleur expediant, pour contenter le Roy Don Henry, que d'accorder que le Pape Gregoire xj. qui auoit fraichement succedé a Urbain cinquième fut iuge de ce different, & que iulques a ce qu'il eut enuoyé vn Cardinal avec suffisant pouuoir, pour en determiner, les villes demeureroient es mains de Don Iean Ramires d'Areillan cheualier de grand vertu, & estime, qui les tiendrait comme en depost, au nom du Pape. Cela accorda la Roïne, afin que le Royaume se trouuast entier, & paisible au retour de son mary: mais nonobstant cest accord, le Roy D. Henry ne laissa d'essayer s'il pourroit auoir ces places par armes: & aduint que Sauucterre, Alaua, & sainte Croys se reduirent a son obeissance: mais Victoria, & Logroño demurerent en depost es mains de Don Iean Ramires d'Areillan. De cest excès du Roy Don Henry se plai-

gnit le Roy Charles au Pape Gregoire xj. en Auignon, puis vint en diligence en son Royaume de Nauarre pour le deffendre contre l'armée du Roy Henry de Castille, qui menaçoit d'entrer en ses terres, s'il ne luy rendoit ses villes de Logroño, & Victoria. Le Roy D. Charles luy remonstra, que puis qu'il auoit esté accordé de décider ce different, par le iugement du Pape, & qu'il y auoit en Espagne vn Legat: assauoir, Cardinal Guy de Bologne Euesque de Portuëse, qu'il estoit content qu'iceluy en cognust, & iugeast, ce que le Roy Don Henry luy accorda: & partant estoit venu le Legat à saint Dominique, ayant eu communication des droits, & allegations des deux Roys, les mit d'accord, aux conditions qui s'ensuiuent: Que les villes de Victoria, & de Logroño, seroyent restituées au Roy de Castille: que l'Infant de Nauarre D. Charles, prendroit en Mariage D. Léonor Infante de Castille, fille du Roy D. Henry, avec dot de cent mille doubles, a la celebration du Mariage, & outre, & par dessus ladite somme le Roy Henry débourceroit, au mesme tēps, vint mille doubles au Roy de Nauarre pour les frais qu'il auoit faits durāt le tēps qu'il auoit tenu lescdites places

Accord entre Nauarre & Castille.

Que pour assurance de l'accomplissement de ce mariage, l'Infant D. Pedro puisnay de Nauarre, demeureroit en ostage en Castille, és mains de la Roynne D. Ieanne, iusques a ce que l'Infant D. Charles fut paruenue en aage suffisant. Ces choses arrestées d'une part & d'autre, les deux Roys s'entreuirent en la ville de Brione, lesquels confirmerent derechef tout ce qui auoit esté accordé: & estant de retour le Roy de Nauarre en son pays, il enuoya incontinent son fils D. Charles, pour fiancer l'Infante D. Leonor, lequel vint a Brione, bien accompagné des grands Seigneurs de Nauarre: & illec furent faites les fiancialles, avec grand feste, & magnificence: les villes de Victoria, & Logroño furent rendues, & apres le retour de l'Infant Don Charles, D. Pedro son frere fut enuoyé és mains de la Roynne de Castille, pour y estre en ostage, suivant l'accord.

Le Roy de Nauarre ayant donné ordre à cest affaire, rechercha les deportements de ceux qui auoyent administré son Royaume durant son absence: & ayant trouué que plusieurs fautes auoyent esté commises par l'Euesque de Pampelone, & le doyé de Tudelle, qu'il auoit laissé, pour

conseillers à la Royne sa femme, iceux craignans d'estre chastiés, s'absenterent. L'Euesque print le chemin de Rome, où il paruint à sauueté, & illec il acheua le reste de sa vie: mais quant au doyen, qui se voulut sauuer en Castille, il fut suiui, & atteint prez de Logroño, & là tué par le commandement du Roy: Tost apres la Royne Ieanne retourna en France, où elle ne vescu pas long temps.

Sur la fin de ceste année 1373. le Roy D. 1373.
Charles, & son fils aîné vindrent à Ma-
dril trouuer le Roy Don Henry, auquel le
Roy de Nauarre fit entendre que pour
oster vn grand desboubier, & trouble en
ses affaires, qui pourroit luy estre meu de
la part du Roy Edouart d'Anglerre, &
d'Edouart Prince de Galles, fils d'iceluy,
il deuroit embrasser leur amitié, laquelle il
auoit charge de luy offrir, à cōdition, qu'il
rompit l'alliance, & confederation qu'il
auoit avec le Roy de France leur ennemi:
& moyennant ce ils promettoient de ne
donner aucun aide aux filles du feu Roy
D. Pedro, lesquelles estoient en Angleter-
re, priās le Roy Edouart, & le Prince son
fils, instamment, de les vouloir remettre
en l'heritage paternel, ioint que Iean Duc

*Le Roy de
Nauarre
essaye en
vain de di-
uertir le
Roy de Cas-
tille de l'a-
mitié de
France pour
le ioindre à
l'Anglois.*

de l'Anclastre auoit espousé D. Constance, l'une d'icelles, à cause de laquelle il prétendoit le Royaume de Castille luy appartenir, comme tenant lieu d'aînée du Roy D. Pedro, déclaré legitime, & rendue en ceste qualité par les États du Royaume: Toutes lesquelles prétentions seroyent par les Anglois laissées, & mises à neant, s'il se deportoit de l'alliance de France: & aussi qu'il deliurast quelque quantité de ducats au Prince de Galles, en acquit de ce que le Roy D. Pedro son frere luy estoit demeuré redeuable. Ces choses furent mises en auant par le Roy de Nauarre, comme ayant charge des Princes Anglois ennemis de France, auxquels il auoit tousiours adheré, & adheroit, pour les torts qu'il disoit luy estre faits par le Roy de France son beau frere: amenant plusieurs raisons apparentes, pour induire le Roy D. Henry à se ranger à ce parti: mais luy, qui ne tenoit la couronne de Castille d'autre, apres Dieu, que des François, ne voulut se monstrier ingrat, ains respondit resolument, qu'il ne quitteroit iamais l'amitié de France, tant qu'il viuroit: mais que s'il ne tenoit qu'à desbourcer quelque somme de deniers, pour contenter l'Anglois, qu'il estoit bien

content de le faire : ce que le Roy de Nauarre dit n'estre suffisant, le prioit en outre de ne prendre en mauuaise part ce qu'il luy en auoit dit, puis qu'il en auoit charge du Roy d'Angleterre. Le Roy D. Henry dit, qu'il ne luy pouuoit sçauoir mauuais gré de ce qu'il luy auoit dit, & ainsi le Roy de Nauarre retourna en ses pays. Telle response sceuë par le Prince Anglois, luy despleut grandement : car le Roy de Castille donnoit grand contrepois a leurs affaires, pour l'aide, & secours qu'il donnoit par mer aux François, ayant vne bonne quantité de vaisseaux de guerre, conduits par messire Ambroise Bocanegra Geneuois son Admiral, qui tenoit le passage entre France & Angleterre tellement empesché, qu'outre plusieurs petites prises qu'il auoit faictes, il donna vne route a vne flotte d'Angleterre: enuiron ce temps, prenant 36. vaisseaux, avec leurs charges prez la Rochelle, où fut pris prisonnier le Comte de Pemebroch general de l'armée, tellement que ce n'estoit sans cause que les Anglois essayoyent de desioindre le Roy de Castille d'avec celui de France.

Le Roy de Nauarre n'ayant donc rien peu faire comme nous auõs cy dessus dit,

enuers le Roy de Castille, comme il estoit turbulent, & ennemi de repos, forma vne nouuelle querelle au Roy D. Henry, sur le payement de cent cinquante mille doubles qu'il auoit promis pour le mariage de sa fille Don Leonor: car le Roy de Nauarre refusa cent cinquante mille reales d'argẽt, qui estoient en ce payement, disant, que le Roy de Castille estoit tenu de luy payer la somme en or. Ces reales en fin furent perdues pour le Roy de Nauarre, a l'occasion des querelles qui suruinrent depuis. L'Infant Don Pedro, second de Nauarre qui auoit esté en ostage, fut rendu. En ce temps fut le Roy de Nauarre aduerti, que *Trahison* *desconuerte.* D. Rodrigo de Vrris, cheualier qui s'estoit grandemẽt employé à son seruice en toutes affaires, tant en France, qu'en Espagne, auoit secrettes intelligences avec le Roy D. Henry de Castille, lequel desiroit de se saisir de la ville de Tudelle sur Ebro, & Caparose, nonobstant les accords, & affinities contractées avec luy. De ces places estoit Merin, & gouuerneur D. Rodrigo, lequel pour cest effet estãt pratiqué, auoit promesse du Roy D. Henry de grande recompẽse en Castille, & de luy faire espouser vne siene niepce, fille d'un de ses freres.

Le Roy Charles informé de toutes ces choses, en fut grandement desplaisant: car il aimoit D. Rodrigo, & pour le destourner de ceste si peu honneste entreprise, il luy fit entendre, qu'il auoit sceu le traité du mariage qu'il faisoit en Castille, l'admonestant de n'y entendre en façon aucune, sans le consentement de son conseil. Don Rodrigo estimant que le Roy ne sçauoit rien des autres menées, ains seulement pouuoit auoir senti quelque vent du mariage, ne se foucia de chose qu'on luy eut dicté, ains se mit en chemin, comme pour aller à nopces. Estant venu à Pampelone, il fut arresté par le commandement du Roy, & enquis sur la trahison, ne pouuant reietter les indices qu'on luy monstroït, fut condamné à auoir la teste tranchée: ce qui fut exécuté, en secret toutesfois, pour l'honneur de sa famille, auxquels le corps fut baillé, & par eux enterré au monastere de saint Augustin à Pampelone. De ceste mort eurent telle frayeur plusieurs autres cheualiers de Navarre, auxquels les façons de faire du Roy Charles n'estoyent agreables, qu'ils depaïserent, se retirant où ils pensoient estre les biens venus. Ceci aduint l'an 1376. auquel les villes de Pampe-1376.

*Execution
de Rodrigo
d'Vris.*

lone, Pont de la Roynne, Garde, S. Vincēt, Arcos, & sainct Iean de Pied de Port, approuuerent le mariage d'entre l'Infant D. Charles, & D. Leonor de Castille, avec les serments, vsés en ce temps, ce que procura le Roy Charles, afin de plus autoriser la future succession.

1377.

L'an 1377. l'Infant D. Charles de Nauarre desireux de visiter la Couronne de France, pressa tant le Roy son pere, qu'il eut son congé: dequoy il fut fort desconseillé par le Roy D. Henry de Castille son beau-pere, qui sçauoit quelle occasion auoit le Roy de France de hayr le Roy de Nauarre. Car outre qu'il auoit tasché de rendre le Roy de Castille Anglois, il auoit engagé, & liuré à iceux Anglois la ville de Cherbourg en Normandie, & fait plusieurs autres traicts, au dommage des François. Nonobstant cela, l'Infant Don Charles ne laissa de s'acheminer, faisant estat qu'il n'auoit point offencé le Roy son oncle, & que des differents qu'iceluy auoit avec son pere, il n'en pouoit rien, & qu'au pis aller, il se retireroit es terres que le Roy son pere auoit en Normandie, & n'approcheroit la cour, sans as-

seurance. En ceste deliberation il partit de Nauarre, fort bien accompagné, entre lesquels estoient Baudoin Belloferant, capitaine de plusieurs places en Normandie appartenantes au Roy de Nauarre. Iacques de la rue Chambelan du Roy, le Seigneur d'Ortubia capitaine de la Garde de l'Infant, Basque de nation, Pierre d'Estampes, Docteur en Theologie, & autres. Le Roy de France aduerti de ceste venue le fit prendre, dès qu'ils furent en France, Iacques de la rue, lequel fut trouué saisi de quelques papiers, qui accrurent grandement le soupçon aux François. Iceluy mis a la torture, confessa que le Roy, son maistre, auoit comploté avec les Anglois, que s'il vouloit promettre au Roy de Nauarre le Duché de Guyenne, & luy payer deux mille lances, il feroit guerre aux François, y employant toutes les forces de son Royaume de Nauarre, & de ses terres de Normandie, parquoy il fut serré en bonne & seure garde. L'Infant estant grandement fasché de la prise de ce cheualier, ne sçachant les choses qu'il auoit manifestées, vint trouver le Roy à Senlis, avec sauf-conduit, le

suppliant de deliurer ce prisonnier: à quoy le Roy fit responce, qu'il ne le deliureroit point, mais luy feroit faire son procès & à son pere, auquel il entendoit confisquer tout tât de terres qu'il auoit en son Royau-
me: & au surplus luy commanda de ne partir de la cour, sans son congé. D'auantage, le Roy fit venir deuant luy Baudouin Belloferant, luy enjoignant de se desaisir en ses mains, ou de ses capitaines, de toutes les places & forteresses qu'il auoit en charge du Roy de Nauarre: ce que Baudouin ne pouuant s'excuser, promit de faire, & en fit ferment. Neantmoins le Roy luy bailla gardes, iusques à ce qu'il eust accompli ce qu'il promettoit. Messire Ferdinand d'Ayanes cheualier Nauarrois, gouverneur pour le Roy de Nauarre es terres de Normandie, fut aussi pris, lesquels avec Jacques de la ruë, & Pierre d'Estampes fut enuoyé à Paris. Sur cele Roy escriuit aux Princes, & Potentats estrangers, sur ces emprisonnemens, faisant grandes querelles, & plaintes contre le Roy de Nauarre son beau frere: & tost apres commença la guerre aspre & cruelle contre les Nauarrois, en Normandie, dont Philippes frere

du Roy Louys Duc de Bourbon, & Bertrand du Guesclin estoient chefs, lesquels en peu de temps, prindrent la pluspart des villes, chasteaux, & forts appartenants au Roy de Nauarre, & n'y eut que Cherbourg, lequel, tenu par les Anglois, souffrit le siege l'espace de sept mois, sans que les François le peussent prendre. Cependant le Roy de France fit surprendre D. Pierre puisné de Nauarre, & sa sœur Marie, a Breteuil, lesquels toutesfois il tint en libre prison, & fort honnorablement. En mesme tēps fut prins au chasteau de Bernay, vn secretaire du Roy de Nauarre, nommé Pierre du Tertre, duquel, par voye de tourments, on descouurit beaucoup de pratiques, & menées du Roy son maistre. Cestui-cy, avec Jacques de la Rue, furent condamnés à mort, leurs corps separés en quatre quartiers & mis aux principales aduenues de Paris.

*Jacques de
la Rue, &
Pierre du
Tertre exe-
cutés à
mort.*

Ces nouuelles entendues en Nauarre, le Roy Charles fut grandement troublé, tant pour la prison de ses enfans, que perte de ses pays, & ce qui le tenoit en plus grand pensément, estoit ce que le Roy de France, pour iustification de l'emprisonnement de ses enfans, auoit informé tous les Prin-

*Natinel de-
speré du
Roy Char-
les de Na-
uarre.*

ces Chrestiens de ses portements, & les incitoit contre luy, singulierement le Roy D. Henry de Castille contre lequel il se-
stoit montré reuesche, & desdaigneux en toutes ses actions, nonobstant leurs alliances. Et comme il estoit d'esprit farouche, inconsideré, & abandonné de toute raison, se mit a imaginer plusieurs mauuais desseins, pour preuenir ceux qu'il craignoit, & desia regrettoit la mort de D. Rodrigue Vrris, qu'il auoit fait mourir, & duquel il auoit tiré tant de bons serui-
ces, & le bannissement de plusieurs autres cheualiers, qui luy eussent fait bon besoin alors : mais il esperoit que les Anglois estoient vn bon appui pour luy en tout euenement : & sur ce fondement il voulut essayer de surprendre la ville de Logrogno, qui estoit le rempart de Castille contre Nauarre, estimant qu'il estõneroit le Roy Don Henry par cest exploit, s'il luy succedoit, ou l'empescheroit grandement, & feroit paroistre aux autres qu'il n'auoit pas le cœur failli : mais voyant que la place estoit bien munie, & sagement gardée par la diligence de Don Pedro Manrique, gouuerneur de ceste frontiere, il le fit pratiquer par pro-

messes de grands biens qu'il luy donneroit en Nauarre, & auant main, la somme de vingt mille doubles. Don Pedro qui estoit bon seruiteur de son maistre, & au reste cheualier d'honneur, aduertit le Roy de Castille, de toute ceste menée: & receut le Roy ceste nouuelle iustement ainsi que les Ambassadeurs du Roy de France arriuerent a Sauille, pour le presser instamment de faire la guerre au Roy de Nauarre: ce qu'il accorda promptement: & escriuit a Don Pedro, qu'il entretint ce marché avec le Roy de Nauarre, & taschaft, le plus dextrement qu'il pouroit, de l'atraper dans Logroño, & l'y retenir prisonnier. Don Pedro ayant receu telle responce, monstra tous les signes possibles, qu'il desiroit complaire au Roy de Nauarre, luy assigna temps propre pour luy liurer la ville, receut aussi quelque partie des doubles ducats. Cependant fit entrer secrettement, & a la file bon renfort de soldats dans Logroño: & pour mieux s'asseurer de biẽ executer ceste entreprise, & ne hasarder rien, fit entrer en la ville de Nauarre, qui n'est distãte que de deux lieuës, Don Pedro Gonçales de

*Traicté
double.*

Mandoça, avec six cens lances, lequel faisoit bruit d'auoir querelle avec D. Pedro Manriques. Les choses ainsi ordonnées, il ne restoit sinon que le Roy de Nauarre fut si mal auisé, que d'entrer dans Logroño: ce qu'il estoit resolu de faire, contre l'aduis de tout son conseil, qui l'assuroyent que D. Pedro n'estoit pour faire vne telle lacheté, & en outre le conseilloyent de tout laisser, & entretenir la paix qu'il auoit avec le Roy de Castille. Pour tous ces bons conseils il ne laissa de venir au temps ordonné, iusques au pont de Logroño, accompagné de quatre cens lances, portant son enseigne Royale messire Martin Hénriques. Au deuant d'iceluy faillit D. Pedro Manriques, faisant entrer les Nauarrois coyemēt dans la ville, où les logis estoient ja faits, & s'attendant d'y mener le Roy, l'y inuitoit fort courtoisement: mais soudain il luy print vne opinion du malheur, où il alloit se plonger, se retira du pont vers Viane, disant, qu'il n'y vouloit pas entrer, pour lors, en personne. Ce fut vne bonne inspiration. D. Pedro voyant que la proye luy estoit eschappée, fit deualiser beaucoup de Nauarrois qu'il tenoit,

aucuns tués, autres prisonniers, & autres se sauuerēt: entre lesquels fut messire Martin Henriques, lequel voyant l'Emeute, saisi de son enseigne, gaigna le pont, où il se trouua enfermé deuant & derriere entre ses ennemis, ou apres auoir combattu ne pouuant passer se ietta avec son estandart en leau & se sauua à nage, cōme aussi fit le Seigneur d'Olaogui, lesquels paruenus au Roy luy racōterent le tout: dequoy il ne s'esmerueilla pas beaucoup, neantmoins il en fut grandement faché, pour la perte qu'il auoit fait de beaucoup de bons hommes Par ce fait fut euidentement rompue la paix entre Castille & Navarre. Le Roy de Castille depescha son fils D. Iean, Prince en la fleur de sa ieunesse desirieux d'honneur, lequel dressa vne armée pour entrer en Navarre. A ceste cause le Roy Charles aduerti de ces preparatifs, apres auoir consulté avec ses estats, passa à Bordeaux, pour demander aide, aux Anglois: ce qu'il eut: car il emmena avec luy six cēs lances, qu'Anglois, que Gascons, sous la charge de messire Thomas Treuet Anglois, & du sieur de Berbecin Gascon.

Grande hardiesse.

Guerre ouverte,

Le Roy de Navarre et recours aux Anglois.

Or l'an 1378. la guerre se demena fort 1378. entre Castille & Navarre faisant les vns

Finance de
Navarre
épuisée.

Meurtre de
Thomas
Treuet An
glois.

sur les autres grandes courses & pilleries, & furent si grans les frais de ceste guerre, que le Roy de Navarre consuma entièrement toutes ses finances, sans que son fils Charles, venant a regner, trouuast vn seul ducat és coffres de la Thresorerie Royale. En la vilie du Pont de la Roynie, messire Thomas Treuet, capitaine des Anglois, fut tué par les habitans, à cause de quelques insolences. L'Infant D. Iean de Castille entra hostilement en Navarre, faisant contenance d'assiéger saint Vincent, mais estant la place forte par nature, & par art, & bien munie, ils se retirèrent a Logrogno, où s'estant ioint a luy D. Pedro Manriques, tous ensemble r'entrèrent en Navarre, où ils ne trouuerent aucune resistance: car le Roy Charles se tenoit sur la deffensive: parquoy les Castillans bruslerent Laraga, Artaxoua, & plusieurs autres places, iusques aux portes de Pampelone: deuant laquelle cité l'armée Castillane sejourna vn mois entier, estant Don Iean logé au village de Gorrays: pendant lequel sejour ceux qui tenoyent la forteresse de Thiebes, la rendirent a Don Pierre Manriques, qui la brusla: cestoit vn chasteau edifié par le Roy Thibaud premier,

dans lequel , dès le temps de Philippes le Bel, comme en lieu fort, & de grãde seur-
té, auoyent esté tenus les tiltres , registres,
& papiers principaux du Royaume, les-
quels furent tous bruslés a ce coup, au
grand dommage du public. En fin voyans
les Castillans qu'ils n'estoyent assés forts
pour prendre Pampelone, ils deslogerent,
& vindrent assieger Viane , laquelle ils
prindrent , apres plusieurs combats. La
Garde fut aussi prise, puis voyans l'hiuer
aprocher, se retirerent en Castille, Don
Iean alla trouver son pere à Toledé, au-
quel il donna raison de ce qui s'estoit pas-
sé en Navarre, & par ensemble ordonne-
rent vne nouvelle armée pour retourner
au Printemps en Navarre. On trouue par
quelques memoires de ce temps, que le
Roy de Navarre se plaignit grandement
de plusieurs cheualiers Navarrois, qui se
monstrerent peu fidelles en ceste guerre,
mesmes ayans esté rapellés de ban, & re-
stitués par luy, entre lesquels estoyent
nommés Don Ramir Sanches de Asiayn,
& Don Iean Ramir de Areillan le ieu-
ne : ceux-cy, & autres se retiroyent
l'un apres l'autre vers le Roy de Ca-
stille, où ils trouuoient bon & gra-

*Tiltres du
Royaume
de Navarre
bruslés a
Thides.*

*Prise de
Viane &
la Garde.*

*Messire Jean
de Fresnay
gouverneur
de Navarre.*

*Paix entre
Castille &
Navarre.*

cieux accueil, au lieu des rudesses, & rigueurs du Roy Charles : tellement que la noblesse de Navarre diminuoit tellement, qu'elle se reduisoit presque au néant. Le Roy Charles estant au deça des monts, son Royaume estant regi par messire Jean de Fresnay, chevalier François, & son Chambellan, lequel l'aduerit du nouveau appareil de guerre qui se faisoit en Castille: sur quoy ayant meurement deliberé, se voyant foible, sans argent, & mal serui des siens, se resolut d'appaiser le Roy Henry. Pour-ce luy enuoya vn Ambassadeur, à Burgos, pour l'induire a quelque accord: ce qu'il ne refusa nullement, ains respōdit qu'ils ne le trouueroient point difficile, n'y mal aisé à condescendre a ce qui seroit trouué raisonnable. Parquoy le Roy de Navarre se seruit encor ceste fois de Don Ramir Sanches de Aslajn, l'enuoyant à Burgos, avec le prieur de Roncevaux, homme de lettres, & d'autorité. Ces Ambassadeurs furent ouys par le Roy Henry : & ayans discouru sur les conditions de la paix, elle fut conclue en ces articles. Amitié perpetuelle se iureroit entres les Roys, & Royaumes de Castille & Navarre, sans que celuy de Castille s'alienast

lienast aucunement de la confederation
qu'il auoit avec le Roy de France: Que les
estrangers, Gascons & Anglois seroyent
renuoyés hors les terres de Nauarre: Que
les villes prinſes par le Roy de Caſtille ſur
celuy de Nauarre ſeroyent rendues: Que
le Roy de Caſtille preſteroit vingt mille
doubles d'or, preſentement, au Roy de
Nauarre, pour la ſolde des gens de guerre
qu'il deuoit licentier: pour aſſurance de
la reſtitution deſquelles la ville de la Gar-
de demeureroit en gage au Roy D. Hen-
ry: Que le Roy de Nauarre, pour aſſeu-
rance de l'entretienement de ces articles
de paix, & qu'il ne la romproit en façon
quelconque, bailleroit en depoſt vingt
places du Royaume de Nauarre a D. Iean
Ramires d'Arcillan, notamment le cha-
ſteau d'Estella, dont les garniſons ſeroyēt
payées par le Roy de Nauarre, & que Tu-
delle receuroit garniſon de Caſtillás: Que
l'Arraga, Mirande, & ſainct Vincent ſe-
royent du nombre des vingt places, leſ-
quelles ſeroyent ainſi tenues pour dix ans,
& iceux expirez ſans contrauention, tou-
tes ſeroyent rendues au Roy de Nauarre,
ou ſon ſucceſſeur. Ces choſes accordées,
& iurés, la guerre ceſſa, au biē & profit ge-
Y

neral des deux Royaumes. Ce fait, le Roy de Nauarre vint à Alfaro, visiter l'Infant D. Jean de Castille, & là accomploit partie du contenu en la capitulation, puis peu apres a l'entreueüe qui se fit du Roy de Castille & de Nauarre, fut paracheué le reste de leurs accords, qui furent fort desauantageux pour le Roy de Nauarre, receuant en ce le fruit de son inquietude, comme il auoit fait en France.

*Salair des
turbulents
est deshon-
neur, &
dommage.*

1380.

L'an 1380. mourut Charles cinquiesme dit le sage Roy de France, de son viuant il n'y eut aucun moyen de reconciliation entre luy & le Roy de Nauarre son beau frere, parquoy son fils Charles demeura prisonnier, iusques à la mort dudit Roy de France: apres luy regna Charles sixiesme son fils, ieune, en la tutelle des Ducs Philippes de Bourgongne, & Jean de Berry ses oncles, lesquels se monstrent si difficiles aux poursuittes que faisoit le Roy de Nauarre, pour la reconciliation, & la deliurance de son fils, qu'ils le firent entrer en pensement, & deliberation de les faire empoisonner tous deux: parquoy ayant trouué vn Anglois propre à ce qu'il brassoit, l'enuoya a la cour de France, garni de certaine poudre mortelle, à fin de

*Detestable
entreprise
du Roy
Charles le
mauais.*

faire mourir ces deux Princes, luy promettant grandes recompenses en l'aduenir, s'il mettoit en effect ce qu'il luy enioignoit, & deflors luy garnit la main de doubles d'or. L'Anglois fit tout le possible, pour accomplir la charge qu'il auoit, mais ses frequentes allées, & venues és cuisines des Ducs, avec ce qu'il estoit Anglois, le firent soupçonner: tellemēt qu'estant pris, avec la poudre, & ayant cōfessé qu'il auoit là esté enuoyé, pour faire mourir les Ducs de Bourgogne & Berry, à cause qu'ils empeschoyent la deliurance de l'Infant de Nauarre, il fut decapité. Ceste faute despleut grandement au Roy Charles de Nauarre, ne sçachāt plus par quel moyen recouurer son fils.

Durant cest ennui du Roy, il auint que querelle s'esmeut entre messire Fillot de Grantmont Seigneur de Grantmont, au deça des monts, & D. Ramir Sanches d'Asyain, pour choses concernantes le seruice de leur Prince. D. Ramir estoit accusé, par le Seigneur de Grantmont, d'auoir mesme attenté cōtre la personne du Roy: tellement que venans a l'espreuue des armes, par ordonnance des Iuges delegués par le Roy, & estants comparus au iour

*Querelle
entre sub-
iers.*

assigné ces cheualiers pour combattre, telles furent les importunités des parents, & amis d'une part & d'autre, que le duel cessa, & demurerent tous deux a la disposition, & bon plaisir du Roy, lequel les fit mettre en prison, l'un (assçauoir, le Seigneur de Grantmont) au chasteau de la ville de saint Jean de Pié de Port, l'autre dans Tafalla. Le Seigneur d'Asiayn ayant esté quelque temps en ceste ville prisonnier, a la garde de certains soldats Picards, trouua moyen de corrompre ses gardes: de sorte qu'il se saisit du capitaine du chasteau, & de la place mesme. Le bruit de cest aduventure entendu par la ville, les habitans se mirent incontinent en armes, assiegeant le chasteau, lequel par la trahison d'un des soldats mesmes, qui auoit trahi le capitaine & la place, fut reprins, & en iceluy, D. Ramir Sanches d'Asiayn & ses complices, auquel le Roy, tant pour ce fait, que autres passés, fit trancher la teste, & confisqua ses biens, & furent pareillement executés les soldats qui luy auoyent aidé a se saisir du chasteau de Tafalla. Quant a messire Fillot de Grantmont, il demeura trois ans en prison, & puis fut deliuré.

*Trahison
des subiet
punie.*

Or cependant le Roy D. Charles estant

en grand pensément de son fils detenu en France, fit solliciter, par D. Leonor sabru, qui s'estoit retirée en Castille, le Roy Don Jean, frere d'icelle, grãdement allié, & amy des François, de luy estre aidant, & interceder pour la deliurance de l'Infant Don Charles. Le Roy de Castille desireux de gratifier a sa sœur, s'employa enuers le ieune Roy de France, & ses tuteurs, & les importuna par tant de messages, lettres & Ambassades, qu'ils mirent l'Infant Charles de Navarre en liberté. Quant à D. Pedro son frere puisnay, & D. Marie sa sœur, ils auoyent esté pieça relachés. D. Charles, tost apres sa deliurance, passa en Navarre au grand contentement de tous les Navarrois. Grande fut la malice du Roy son pere, d'entreprēdre vne telle meschanceté contre les Princes de France, lesquels donnerent tesmoignage de leur generosité, de consentir à la deliurance de l'Infant, qui ne pouuoit-mais de la coulpe de son pere, lequel en toutes ses actions mōstroit vne aspreté de nature telle, qu'il neur sceu poursuiure ses droits, ny traiter d'affaire aucun avec les autres Princes, sinon en cholere & desdain: & où il ne pouuoit obtenir ce qu'il pretēdoit, auoit recours aux

*Après nati-
rel du Roy
D. Charles
de Navarre.*

mauuais artifices, desirant de se vanger de ceux qui luy faisoient quelque iniure, par tous moyens.

Il auoit vne sœur nommee D. Agnes, mariée au Comte Gaston de Foix, dit Phebus, laquelle, pour les mauuais tours qu'il pouuoit auoir fait au mary d'icelle, fut fort mal traittée d'iceluy : de sorte que elle fut contraincte de laisser sa cōpagnée, & se retirer en Nauarre, & tost apres fut suiuiue par vn sien fils quelle en auoit eu, nommé Gaston, cōme son pere, où estans tous deux bien reccus, & honorés par le Roy Charles, iceluy conferāt avec sa sœur, du mauuais traitement qu'elle auoit eu de son mary, conceut vne telle haine contre le Comte Gaston, qu'il atiltra le ieune Gaston leur fils, pour empoisonner son pere, & luy bailla d'vne poudre venimeuse, l'aduertissant que c'estoit vn medicamēt propre, pour faire changer la mal-veuillance que le Comte auoit contre luy & sa mere, en bonne amitié. Ce ieune Seigneur simple, & mal-aduisé, croyant ce que le Roy son oncle luy disoit, reuint en Foix, chez son pere, en intention de luy assaisonner quelque viande, avec ceste poudre; mais il ne sceut si biē iouer son personnage, qu'en

*Machinatio
du Roy de
Nauarre,
contre le
Cōte Gaston
de Foix,
son beau-
frere.*

jettant la poudre dans vn mets, il ne fut
 apperceu par les cuisiniers, ou autrement
 descouvert: parquoy le Comte fit prendre
 ce sien fils, & vniue heritier, & le fit mou- *Mort misé-
rable du
jeune Gastō
de Foix.*
 rir en prison miserablement: de sorte qu'il
 ne laissa apres luy, sinon des fils bastards
 qui ne succederent point à la Comté de
 Foix: l'un desquels estoit Bernard, qui ser-
 uoit le Roy Henry ij. de Castille, en la con-
 quete du Royaume, contre le Roy Don
 Pedro, & luy fut recompensé, & donné des *Origine, &
suite de la
maison de
Medina
Celi.*
 terres, & Estats en Castille, duquel descen-
 dirent les Ducs de Medina Celi, ou Zelin,
 dont la race maternelle appartient au sang
 de Castille, comme ensuit D. Ferdinand
 de la Cerde, fils aîné du Roy D. Alphon-
 se le sage, où le Philosophe laissa deux fils,
 D. Alphonse & D. Ferdinand. De D. Al-
 phonse marié en France, sortirent Don
 Louys, Comte de Clermont, & D. Char-
 les, ou Iean, selon autres, Connestable de
 France, & Comte d'Angoulesme. Don
 Louys Comte de Clermont, espousa en
 Andalouzie, D. Leonor de Guzman, fille
 de Don Alphonse Perez de Guzinan, &
 fut Seigneur de Hulna, & du Pont sainte
 Marie, & autres terres de par sa femme:
 duquel mariage issirent Don Louys, Don

Ican, & D. Isabel de la Cerde. Ceste Don Isabel fut par le Roy Don Henry ij. apres qu'il fut establi Roy de Castille, mariée a Bernard bastard de Foix, & eut en dot Medina Celi, avec tiltre du Comte, d'eux nasquit D. Gaston, surnommé de la Cerde, laissant ce nom de la maison de Foix, & Bearn. Il fut deuxiesme Comte de Medina Celi: & espousa D. Mencia de Mandoça, fille de D. Pierre Gonçales de Mandoça grand Seigneur en Alaua, & d'elle eut vn fils nommé D. Louys marié avec Don Ieanne Sarmiento, fille de D. Diego Perez Sarmiento, desquels nasquit Don Gaston de la Cerde ij. qui espousa D. Leonor de Mandoça, fille de Don Inigo Lopez de Mandoça, Marquis de Santillana, dont sorrit D. Louys, qui fut successeur de la Comté, laquelle fut erigée en Duché en luy. Don Louys espousa Don Anne de Nauarre, & Arragon, fille naturelle du Roy Charles Prince de Nauarre, & Arragon.

Or tels que nous auons dit, estoient les deportements du Roy Charles de Nauarre, lequel en fin Dieu frappa de lepre: ce qui luy fit laisser le soing des affaires du monde, & s'adonner aux œuures pies, qui

estoyent de bastir & instituer chapelles, fonder messes, pour soy & ses parens defunts, & pour ce laisser rentes aux Ecclesiastiques : sur tout procura de viure en paix avec les Princes Chrestiens. Estant l'Infant Charles arriué en Nauarre enuirõ le cõmencement de la guerre d'entre Castille & Portugal, le Roy D. Iean demãda quelque renfort de gens de guerre Nauarrois, pour mener avec luy, à quoy le Roy de Nauarre consentit volontiers, recors des bons offices qu'il auoit fait enuers les François, pour la deliurance de son fils, lequel il enuoya, bien accompagné, a ceste guerre, n'y pouuant aller en personne, a cause de son indispositiõ. L'Infant fit quelque seiour avec sa femme D. Leonor, qui estoit en Castille: & puis passât outre, vint trouuer le Roy au camp deuant Lisbone, où il ne demeura gueres, estant le Roy D. Iean contraint, par la peste, qui ruinoit son armée, de leuer le siege, & reuenir en Castille: & licentia l'Infant son beau-frere, en toute amitié, & fort content de luy.

L'an 1386, le Roy Charles maria sa fille 1386.
Ieanne a Iean de Montfort Duc de Bretagne, duquel elle eut quatre fils, & trois filles: & puis en secondes nopces espousa

Henry de l'Anclastre Roy d'Angleterre. Il pacifia aussi ceste année, les seditiōs que ceux de Pampelone auoyent esmeues entr'eux, faisant chastier les Autheurs d'icelles, entre lesquels estoient, des principaux vn nommé André de Turilles, lequel fut executé par Iustice.

Vaste inge-
ment de
Dieu.

Ce fait, se trouuant fort malade de lepre, ainsi que disent les Espagnols, & nos histoires Françoises, de mal acquis, par ses paillardises, qui estoit possible, vne espee de verolle, dont il languit long temps, il apella des medecins, qui le pensoyēt, vns d'eau ardent, pour le restaurer, y mirent le feu, qui de là se print au pauillon de son lit, dont il brusla, sans pouuoir estre secouru: autres disent qu'il fut enuelopé, & coufu dedans vn linceuil, trempé de l'eau ardent, & que le chirurgien voulant couper le filet de sa cousture, avec vne bougie, le feu enuahit soudain le linceuil & brusla le Roy, qui en estoit enuelopé: tant y a qu'il finit ses iours en grande perplexité de maladie, dās la ville de Pampelone, l'an 1386. l'an cinquante cinq de son aage, & trante sept de son regne, & fut son corps enueuly en la grande Eglise de la mesme cité, où estoit le cœur de la Roync sa femme de-

cedée en France l'an 1378. ses entrailles a 1378.
saincte Marie de Roncevaux, & son cœur
a saincte Marie d'Vxue.

*De Charles III. du nom & XXXI. Roy de
Nauarre, surnommé le noble.*

AV Royau^{me} de Nauarre succe-
da doncques Charles iij. du nom
en l'ordre des Roys de Nauarre.
Il fut surnommé le noble, pour sa liberali-
té, priuauté, & autres vertus, qui le firent
priser, & aimer a tous les Princes Chre-
stiës ses voisins, & en general a toutes ma-
nieres de gens: il estoit aagé de vingt cinq
ans, quand il vint a la Couronne. Et lors
du decez de son pere se trouuoit en la
ville de Pinnafiel en Castille, avec le Roy
D. Iean son beau-frere, duquel il print cō-
gé, avec larmes infinies ayant receu les
nouuelles: & telle fut la beneuolence &
singuliere affection que le Roy de Castille
luy portoit que dès le commencement de
son regne, il obtint d'iceluy la pleine, &
entiere restitution des villes, & chasteaux
de Tudelle, saint Vincent, Viane, Guardé,
Estelle, Mirande, Larraga, & autres qui
estoyent en depost, depuis la derniere pa-

*Liberalité
du Roy D.
Iean de Ca
stille, enuers
le Roy*

Charles 3.
de Navarre
son beau
frere.

cification faite avec le Roy D. Henry de Castille, & ce nonobstant que le terme de dix ans capitulé ne fut escheu: outre ce, luy fit present des vingt mille doubles d'or, prestés au feu Roy son pere, & le quita de la responce qu'iceluy auoit faite de vingt mille liures, pour la deliurance de messire Perlas de Tortiu Anglois, prisonnier en Castille. Tels & plus grans biens fit le Roy D. Jean de Castille au Roy Charles iij. de Nauarre son beau-frere, & semblablement a la Royne Don Leonor sa femme, & aux filles qu'il auoit eu d'icelle, lesquelles estoient, en ce temps, en Castille: & fit en outre, suiure, & accompagner le nouveau Roy, allant en son Royaume, par les principaux de sa noblesse, lequel estant arriué en Pampelone, & illec receu, avec grande magnificence, & allegresse, par les Estats du Royaume, le premier acte qu'il fit, pour le gouuernement d'iceluy, fut, de resoudre avec ses subiets, & conseillers, d'adhérer au Pape Clement septiesme, residant en Auignō, & reietter Urbain vj. ainsi que faisoient les Roys de France, & de Castille, avec protestation, neantmoins, de ne se vouloir, pour cela, separer de l'Eglise Apostolique, ains d'obeir a ce qui seroit sur le

Le Roy de
Nauarre
durant le
schisme, a-
dhère au
Pape d'A-
uignon.

schisme ordonné, par le concile general: puis il chercha l'alliance des Princes voisins, par les moyens ordinaires, leur enuoyant ses Ambassadeurs, spécialement en Arragon, où il fit ligue, & amitié avec le Duc de Girone heritier d'Arragon, & mesmetraitta de marier sa fille aînée D. Ieanne, avec D. Iaques aîné, du Duc de Girone, en intention d'vnrir la couronne de Navarre avec celle d'Arragon, d'autant qu'il n'auoit aucuns enfans mâles, mais ce mariage ne sortit effect.

Sur le commencement de l'année 1387. 1387.
la Royne Leonor sa femme tomba en vne
fascheuse & longue maladie, qui causa plu-
sieurs ennuis entr'eux: il eût d'icelle les en-
fans suiuaus, Don Ieanne aînée, qui fut
femme de Iean de Foix fils d'Archêbaud,
D. Marie, qui mourut fille a Pampelone,
D. Blanche, qui fut Royne de Sicile, & de
Navarre, D. Beatrix Côtresse de la marche,
femme de Iacques de Bourbon, D. Isabel,
aussi decedée fille. Apres ces cinq filles,
eurent le Roy Don Charles & la Royne
Leonor, D. Charles leur fils qui mourut
ieune, & D. Louys, qui ne vescut que six
mois de compagnie pourchassée, hors
mariage, vn fils, nommé D. Godefroy de

Genealogie
de Navarre.

Nauarre, qui fut Mareschal du Royaume, & Comte de Cortes, & vne fille dicte D. Ieanne de Nauarre, laquelle fut mariée a Inigo Ortis d'Estunega, fils de D. Lopez d'Estunega. De ces enfans fait mention le testament de ce Roy, qui est en la grande Eglise de Pampelone, où sont aussi nommés les freres d'iceluy, messire Pierre Cote de Mortaing, & Leon bastard, & Don Marie aussi bastarde de Nauarre, mariée au Comte de Denia.

13.87

L'an 1387. estant en ferueur les guerres d'entre Castille & Portugal, passerent & repasserent par Nauarre les troupes Francoises, que conduisoit le Duc Louys de Bourbon, au secours du Roy D. Iean, qui furent bien pourueues, & traitées amiablement par le Roy Charles, lequel apres la retraicte d'iceux, & l'accord fait par le Roy de Castille avec le Duc de Lancastre, vint a Calaorra, ainsi que nous auons cy deuant dit, se coniouir avec le Roy D. Iean, de ceste pacification.

La Royne D. Leonor, ayant esté deux ans sans porter beaucoup de santé, & ne trouuant remede par aucun art de medecine, fut conseillée de changer d'air, & s'en aller en Castille, où il y auoit esperance,

qu'humant l'air de sa naissance, elle recouroit sa santé. A ceste cause le Roy Don Charles son mary, qui l'aimoit, la mena luy mesme, vers le Roy D. Iean frere d'icelle, avec lequel ayant demeuré quelques iours en festes, il passetemps diuers, en la ville de Nauarette, & s'en retourna, & laissa illec la Royne Don Leonor, pour y demeurer, iusqu'à ce qu'elle eust recouuré sa santé. La Royne fut non seulement bien receue, & traittée par le Roy de Castille son frere, ains defrayée, & toute sa maison, & honorée autant qu'il fut possible. Estant en ceste aise, elle commença a se porter mieux, & en bref recouura sa premiere bonne disposition: mais comme le corps valut mieux de ce chāgement d'air, l'esprit d'icelle en receut grand dommage: car fut pour les commodités, & passetemps qu'elle receuoit en ceste grande, & magnifique cour de Castille, ou pour autres occasions, elle print opinion d'y demeurer, & ne retourner plus en Navarre, causant ce sié peu raisonnable propos sur vn mauvais traitement qu'elle disoit auoir receu du Roy Charles son mary, qui ne l'aimoit point, disoit elle, estoit chiche en son endroit, que ses reuenus ne luy estoient bien

*D. Leonor
Royne de
Navarre
sans amitie,
& legere.*

payez, que les cheualiers, & officiers Castillans, qui estoient a son seruice, n'estoient bien veus ny respectés en Nauarre, & autres telles excuses de femme, a qui la vanité, chés autrui, reluisoit plus, que l'honneur en sa maison: ce que le Roy D. Iean escoutoit d'affectiō fraternelle, mais avec grand mescontentement, sçachant, ou se doutant biē, que c'estoyent pretextes peu veritables. Quand le Roy Charles sceut qu'elle se portoit bien, il luy escriuit diuerses fois, qu'elle s'en retournast avec luy en son Royaume, dequoy elle s'excusoit trouuant ores vn empeschement, ores vn autre: tellement qu'en fin, cognoissant l'intention d'icelle, il y employa le Cardinal D. Pedro de Lune Cattelā, mais sans fruit: car la Royne voulāt capituler avec le Roy son mary, mettoit en aduent conditions si hors de raison, qu'il fallut chercher autres moyēs. Desia estoient passés deux ans, que elle demouroit en Castille, ne cessāt le Roy son mary d'vser de tous les moyens amiables qu'il pouuoit, pour la faire retourner, & differoit mesme de se faire couronner Roy de Nauarre, pour le desir qu'il auoit de celebrer ceste ceremonie en la compagnie d'icelle, & la faire couronner pareillement

lement avec luy : mais voyāt qu'il perdoit temps de luy escrire, & enuoyer messagers, il enuoya D. Ramir d'Arcillan, & D. Martin d'Ayuar Ambassadeurs au Roy de Castille, estant en Guadalajara, aux Estats, le prier d'interposer son autorité enuers sa sœur D. Leonor, à fin de la faire retourner en Navarre, viure avec le Roy son mary, ainsi que Dieu & l'honnesteté le commandent. Le Roy ouyt benignement les Ambassadeurs, & s'offrit de faire, en cela, son deuoir, ce qu'il fit: car estant allé trouver sa sœur, en son logis, le iour suiuant, il luy remonstra que c'estoit chose iuste, & raisonnable, puis qu'elle se portoit bien, & que son mary la demandoit, qu'elle allast le trouuer: & pour mieux la persuader, luy promit, que si elle n'auoit en Navarre l'estat, & entretenement conuenable a sa grandeur Royale, qu'il luy departiroit de ses biens, & luy bailleroit grande compagnie de Cheualiers & damoiselles, pour la rendre en Navarre, avec l'honneur qu'il luy appartenoit. Elle n'ayant de quoy contredire aux Iustes remonstrances du Roy son frere, luy respondit, neantmoins, en ces termes: i'ay grande obligation a vostre benignité, Monsieur, pour plusieurs rai-

Remonstrance fraternelle du Roy de Castille a la Royne de Navarre.

Excuses de la Royne de Navarre.

*Replumes
de la Royne
de Navarre
contre son
mary.*

„ fons, outre le bon conseil qu'il vous plaist
 „ me donner presentement, auquel ie co-
 „ gnoy bien que vous cherchez mon hon-
 „ neur, & mon profit. Le Roy mō Seigneur,
 „ & mary se doit aussi souuenir de vostre li-
 „ beralité, & amour fraternelle, vſée enuers
 „ luy, en choses de grande consequence, en
 „ ma faueur: car sans ce que vous-vous em-
 „ ployastes, à ma requeste, enuers le Roy de
 „ France, qui le tenoit prisonnier, possible
 „ eust-il trouué plus grandes difficultés en sa
 „ deliurance, qu'il n'a eues. Estant venu en
 „ Espaigne, il scait quels honneurs, & dons il
 „ a receu de vous, du viuant du Roy son pe-
 „ re: & lors qu'il vint a succeder a la couron-
 „ ne de Navarre: tout le monde a veu, com-
 „ me liberalement vous luy aués rendu les
 „ places, que vous poués iustement retenir
 „ en Navarre, dépositées a la paix faite en-
 „ tre voz peres: vous luy auez outre ce, quit-
 „ té vingt mille doubles d'or, & la responce
 „ faite pour ce Seigneur Anglois, prison-
 „ nier de guerre montant vingt mille liures:
 „ vous me fistes partir de ce vostre Royau-
 „ me, si tost que le Roy Charles, pere de
 „ monseigneur, fut decedé, pour aller en sa
 „ maison, ou ie portoy tout ce que j'auoy de
 „ bon, & de precieux, pour comparoistre

plus honnorablemēt entre les Nauarrois, ,
 avec les dames & damoiselles de ma suite, ,
 nées de grandes familles, toutes choses ,
 reuenantes a l'honneur, & commodité du ,
 Roy mon Seigneur : mais au lieu de recō- ,
 gnoistre cela enuers moy, il me desplaist ,
 grandement de dire, & ne le puis dire sans ,
 rougir, qu'il ne ma receuë ny traitée ainsi ,
 qu'il deuoit, ny les miens aussi. Certaines ,
 prouisions m'ont esté, par luy ordonnées ,
 par chacun mois, pour l'entretienement de ,
 ma maison, & de mon estat, & de mes fil- ,
 les, dont i'ay esté tousiours si mal payée, ,
 que souuent i'ay esté contraincte d'enga- ,
 ger mes bagues, pour contenter mes ser- ,
 uiteurs, les plaintes desquels il me faloit ,
 ordinairement ouyr a ceste cause. Outre ,
 ce, estant deuenue malade en Nauarre, ,
 d'vne maladie dangereuse, & qui presque ,
 me conduisit au dernier pas de ma vie, i'ay ,
 esté deüement informée, que la langueur ,
 ou i'estois entretenue, ne procedoit d'ail- ,
 leurs, que de certaines herbes nuisantes, ,
 qui me furēt baillées par vn medecin Iuif, ,
 enuoyé par le Roy mon Seigneur, pour La Roynie
 me penser. Je croy bien que ces herbes ne de Nauarre
 me furent pas baillées par son commen- taxe conuer
 dement, ny de son sceu, & ja a Dieu ne Roy son
 mary.

„ plaise, que cela entre en ma pensée, mais
„ ie trouue fort estrange, que m'en estant
„ plainte, il n'ait daigné s'en informer à plein,
„ & punir ce mauuais medecin, comme il
„ meritoit. Voyant que mon indisposition
„ ne s'amendoit aucunement, ie luy requis,
„ en grace, qu'il me laissat venir en Castille,
„ en vostre maison, ou, graces à Dieu, & à
„ vostre bon recueil, j'ay recouuré ma sen-
„ té: mais cependant que ie suis icy, en ceste
„ aise, j'ay sceu que plusieurs flatteurs, &
„ mauuais seruiteurs du Roy mō Seigneur,
„ & miens, m'ont chargé de plusieurs calō-
„ nies enuers luy, qui l'ont grandement irri-
„ té contre moy: de maniere, que ie ne sçay
„ comme mō estat, ny mesme ma vie, pourra
„ estre asseurée en Nauarre, sy ainsi que vous
„ me persuadés, ie m'en reuay: Parquoy ie
„ vous supplie, Monseigneur, au nom de
„ Dieu, & pour l'amitié fraternelle, qu'il
„ vous plaise deliberer sur mon retour vers
„ le Roy mon Seigneur, & mary, que j'aime,
„ & reuere, avec voz bons & fidelles con-
„ seillers, & pouruoir à la seureté de ma vie
„ & de mon honneur: car si en quelque fa-
„ çon ie tomboy en danger, ou receusse
„ quelque indignité, vous y auriés interest.
Ces paroles, accompagnées d'une con-

tenance composée à pitié, firent grandement esmouuoir le Roy Don Iean, lequel ayant promis à sa sœur qu'il aduiferoit à son affaire de toute affection, en conféra avec les gens de son conseil, & leur mit en consideration les propos que la Royne de Nauarre luy auoit tenus, les faisant tous iurer, qu'ils luy donneroyent bon, & fidele conseil sur le retour d'icelle vers le Roy son mary. Les conseillers, ayant meurement deliberé entr'eux, comparurent deuant le Roy, & luy dirent, qu'il auoit esté trouué bon par eux, qu'il fit iurer le Roy Charles son beau-frere, de bien, & honorablement traiter la Royne Don Leonor sa femme, & que pour assurance de cela il baillast en depost quelques places de Nauarre és mains de cheualiers non suspects, & moyennant ce il leur sembloit que la Royne se pouuoit assurer de retourner en Nauarre, & viure librement avec son mary. Le Roy de Castille trouua bon ce conseil, & ayant fait appeller sa sœur D. Leonor, le luy declara, l'exhortât de l'escuire, ce qu'elle monstra luy estre peu agreable, neantmoins elle y cōsentit, n'ayāt excuse legitime d'y contredire: parquoy le Roy D. Iean ayant fait appeller deuant luy

Royne se
defiant de
son mary.

les Ambassadeurs de Nauarre, les voulut renuoyer avec ceste responce, mais eux repliquerent que le Roy leur maistre feroit bien tous les serments qu'on voudroit, mais de bailler places en main tierce, il n'en feroit rien : remonstrant plusieurs raisons pertinentes, pour lesquelles il ne deuoit faire telle chose. Apres plusieurs allegations, & disputes sur ce faites, la Royne dit, que s'il plaisoit au Roy son mary de iurer, & promettre entre les mains du Pape Clement, du Roy de France, & du Roy son frere, qu'il la traitteroit bien, elle s'en retourneroit. Les Ambassadeurs respondirent, que le Cardinal D. Pedro de Luna auoit desia propose tels serments, & que le Roy leur maistre auoit respondu, qu'il n'estoit besoin de mesler le Roy de France entre les differents de luy & de sa femme, & que quant aux autres il n'en feroit difficulté. Les disputes croissant, & s'ebrouillans de plus en plus, au grand regret du Roy de Castille, qui cognoissoit bien que la Royne sa sœur estoit retenue d'ailleurs, & que les choses alleguées contre son mary estoient pures calomnies, il se trouuoit en grande peine : car de fait il portoit singuliere amitié au Roy Charles de Nauarre.

re, & a la Royne sa femme aussi. Les Ambassadeurs desormais hors desesperance de pouuoir obtenir le retour de la Royne, demanderent que l'Infante D. Jeannie fille aînée de Navarre, & a laquelle la succession du Royaume appartenoit, a faute de males, leur fut deliurée, pour la mener en Nauarre au Roy son pere, puis qu'il pouoit faire estat de n'auoir autre enfans de la Royne, persistante en son peu raisonnable propos, de vouloir viure hors de la cōpagnie d'iceluy. La Royne s'excusa, & dict, que ce n'estoit point son propos, de vouloir viure separement d'auec le Roy Charles, mais desiroit estre asseurée de sa vie. Et salut que le Roy son frere, qui tousiours l'exhortoit de se laisser conseiller, & croire ce qu'il luy disoit, enuoyast le President de sa chancellerie Aluar Nugnes de Villa Real, en Nauarre, pour informer sur les herbes empoisonnées, qu'elle disoit luy auoir esté baillées par le medecin Iuif, & rapporter les depositions des tesmoins, qu'elle nomma : mais ce fut vne information faicte sans partie aduersé, & au grand scandale du mariage de la Royne D. Leonor : parquoy, par aduis du conseil Royal de Castille mesme, elle fut supprimée. Or

*Informatiēs
de nul ef-
fect.*

*Infante de
Nauarre
restituée à
son pere.*

demeurant la Roync obstinée, de ne vouloir retourner vers son mary, le Roy de Castille fit tant enuers elle, qu'elle consentit de renuoyer sa fille aisnée Don Ieanne: car il luy remonstra, que cela adouciroit aucunemēt le Roy de Nauarre enuers elle. Outre, qu'il y auoit danger, si elle la retenoit, qu'il ne se despitaist, & n'instituast heritier de son Royaume son frere Pierre Comte de Mortaing. Or à la verité il importoit grandement aux Nauarrois, que ceste fille fut en la puissance de son pere, car ils craignoient, que la mere ne la mariaist a quelque Castillan, contre la volonté d'iceluy, & au preiudice de la liberté du Royaume. La fille fut accordée aux Ambassadeurs, & deliurée a iceux, avec vne des sœurs, bien & royalement accompagnée, dès la ville de Roya, ou le Roy, & sa sœur vindrent pour l'acheminer iusques en Nauarre, ou elle fut receuë, avec grand contentement du Roy & des Nauarrois: neantmoins demeura iceluy fort picqué, de la rebellion, & mespris de la Roync sa femme.

Voyant auoir trauaillé en vain, pour faire que la Roync sa femme reuint à luy, desirant qu'elle receut la couronne avec

luy, selon l'exemple des autres Roynes, qui l'auoyent precedée, se resolūt de ne differer plus son couronnement : partant fit assembler les Estats de son Royaume en la cité de Pampelone, là où fut faicte la solemnité de son couronnement telle qui s'ensuit.

S'estants assemblés les deputés du clergé, de la noblesse, & du tiets estat, & les Ambassadeurs des Princes estrangers, en la grande chapelle de l'Eglise Cathedrale, les Euesques en leurs habits pontificaux, l'Euesque de Pampelone Don Martin de Salua, qui fut despuis Cardinal, dit telles parolles au Roy.

Roy, nostre naturel Seigneur, il cōuient, avant que vous receuiés le Sacrement de la sainte Onction, que vous prestiés a vostre peuple de Navarre le serment accoustumé de prester en ce Royaume de Navarre, par les Roys voz predecesseurs. A quoy le Roy respondit, qu'il estoit prest de iurer: lors luy estāt presentée vne croix & le liure des Euangilles, iceluy estendant sa main dessus, profera hautement ces parolles.

Nous D. Charles par la grace de Dieu Roy de Navarre, Comte d'Eureux, &c.

*Ceremonie
du couron-
nement du
Roy de Na-
uarre,*

*Formulaire
du serment
que les Roys*

de Nauarre
prestent a
leur peuple.

Iurōs a nostre peuple de Nauarre, sur ceste croix, & sur les saincts Euangiles, par nous
 „ manuellement touchés, & a vous les pre-
 „ lats, & riches hommes des cités, & bonnes
 „ villes, & a tout le peuple de Nauarre, pour
 „ tous voz droits, loix, vs, coustumes, fran-
 „ chises, libertés & priuileges : sçauoir est,
 „ que chacun d'iceux, ainsi que sont, seront
 „ par nous maintenus, & gardés a vous, & a
 „ voz successeurs, tout le temps de nostre
 „ vie, sans les rompre: les meliorant, & non
 „ les empirant, en tout, ny en partie : & que
 „ toutes les violences, & forces, qui pour-
 „ roient auoir esté faictes a voz predeces-
 „ seurs auxquels Dieu pardoint, ou a vous,
 „ par nous ou noz officiers, ou se feroient
 „ en l'aduenir, nous les osterons, & cōmen-
 „ derons faire cesser, & amender bien, & en-
 „ tierement: selon que de droit, & en bonne
 „ verité elles seront manifestées par gens de
 „ bien, & fidelles. Apres le iuremēt du Roy,
 „ les deputés des estats du Royaume, selon
 „ leur rang, s'estans leués, iurerent pareille-
 „ ment en la maniere qui sensuit.

Forme de
serment des
subiets du
Roy de
Nauarre.

Nous N.N. Barons de Nauarre, tant en
 „ nostre nom, que de tous les cheualiers, &
 „ gentilshōmes du Royaume, iurōs a vous,
 „ Roy nostre Sire, sur ceste croix, & sur ces

quatre saints Euāgiles, par nous manuellement touchés, de garder, & defendre fidellement vostre personne, & vostre terre & de vous aider a garder, maintenir, & defendre les droits, & loix, de tout nostre pouuoir.

En telle forme iurerent les procureurs, & deputés des cités & villes, chacun selon les droits, loix, vs, coustumes, priuileges, franchises, & libertés, dōt ils iouissoient. Ces serment, prestés d'une part & d'autre, horsmis par le clergé, qui ne iure point, le Roy se retira en la chapelle de S. Estienne de la mesme Eglise, ou il se despouilla des vestements dont il estoit vestu, & s'estant mis vne robe de soye blanche en telle ceremonie accoustumée, & appropriée, fut ramené, par les Euesques de Tarassonne, & de Dax, a la grande chapelle, ou estoient apprestés les choses necessaires, a son onction. Illec estant le Roy environné des Euesques, il fut oint d'huile par l'Euesque de Pampelone, avec les prieres, & suffrages en tel cas accoustumés: & a l'instant, s'estant le Roy despouillé de ceste robe blanche, fut reuestu d'autres habits Royaux, & fort riches, & s'aprochant du grand autel, où estoit vne espée, & la couronne Royale, &

*Onction du
Roy.*

*Le Roy prêt
l'espée, la
couronne &
le sceptre.*

*Le Roy por-
te un pa-
vois.*

le sceptre Royal, il ceignit l'espée de sa main, & la tirant hors du fourreau, la haussa en haut, en signe de Justice, & après laremit, puis il print la couronne, & se la mit en teste, & finalement print le sceptre en la main : cependant les prelates continuoyent leurs oraisons, & prieres. Ces choses ainsi faites, le Roy monta sur vn pavois, ou escu, ou estoient peintes les armoiries de Navarre, lequel estoit soustenu par les députés de la noblesse, & ceux de la cité de Pampelone, & trois contrées d'icelles, Bourg, Peuplement & Navarrerie, tant au nom de ladite cité, que des autres cités, & villes du Royaume, selon qu'il auoit esté ordonné par le Roy : sur quoy fut faite protestation publique par les députés des cités d'Estella, Tudelle, & villes de Sanguesa, Olite, & autres, qui n'auoyent peu mettre la main pour aider a soufleuer l'escu, dans lequel estoit le Roy porté, que cela fut sans preiudice pour lors, & pour l'aduenir, a leurs communautés. Ainsi fut esleuë le Roy par ces députés, qui crierent par trois fois en langage Espagnol, Real, Real, Real.

Estant ainsi le Roy porté dans cest escu, a la façon des anciens François, il ietta des pieces de monnoye parmi le peuple, &

puis fut leué de là, par le Cardinal D. Pedro de Lune, Legat du Pape, qui se trouua a ceste ceremonie, & par les Euesques de Pampelone, & Tarassone, & mené seoir en vn siege Royal, haut esleué, en grande magnificence cōtinuans tousiours les prelats, & autres Ecclesiastiques, leurs prieres, & oraisons, finissans par vn *Te Deum Laudamus*, alternatiuement chanté. Ces choses ainsi paracheuées, le Procureur general du Roy nommé Garcia de Leach au nom du Roy, l'Euesque de Pampelone pour luy & tous les Euesques, & Clergé du Royaume, les deputez des nobles, & des villes, & cōmunautés en demanderent acte a Pierre de Godeille notaire Apostolique, a Pierre de Iatariis clerc, & notaire Apostolique du Diocese de Pampelone, & a Jean de Ceilludo notaire, & secretaire du Roy: ce qui leur fut octroyé, & expédié en forme. Pour le dernier acte de ceste solemnité, fut chātée la messe par l'Euesque de Pampelone, ou le Roy, suiuant la coustume de ses predecesseurs, offrit drap d'escarlate, or & argent. Ce couronnement se fit la quatriesme année du regne de ce Prince: assauoir, au mois de Feurier mil trois cens nonan- 1390. te. Et pour faire plus particulier recit des

hommes qui se trouuerent en ceste assemblée, deputez pour les estats, ou autrement, y tenans rang: En premier lieu y fut present D. Pedro de Lune Cardinal diacre du tiltre de sainte Marie en Cosmedim, Legat à Latere, en Espagne, du Pape Clement, reseat en Auignon, D. Martin Salua Euesque de Pampelone, D. Iean de Calorra, & la Calcade, D. Pedro de Tarasfonne, D. Ferdinand de Vic d'Osone, Don Pierre d'Ampurias, D. Iean D'ax, D. Frere Garcie d'Eugni de Bayone, confesseur du Roy, tous Euesques: Item l'Abbé de Irache, le Doyen de l'Eglise collegiale de Tulle, les Abbés des monasteres de saint Sauueur de Leyre, Dela Oliua, Yrancu, Hitero, & S. Sauueur de Vrax: le Prieur de l'ordre de saint Iean de Ierusalem, les dignités chanoines, & clergé de l'Eglise de Pampelone, pour l'estat Ecclesiastique, pour la noblesse, & ordre militaire, s'y trouuerent D. Leonor de Nauarre frere bastard du Roy, D. Arnaud Raimond Seigneur de Grammont, D. Arnaud Sanches Seigneur de Luse, D. Pierre Seigneur de Laxaga, D. Martin Henriques de Lacarra Marschal du Royaume, D. Ramir d'Areillan, D. Martin Seigneur de Mearcan,

& de saint Iulien, D. Iean de Vcara, Don Ferdinand d'Ayanc, messire Martin d'Ayuar, D. Bertrād de Laccara, D. Aluar Dias de Medrano, D. Ximen Garcia Viscomte de Baigner, D. Pierre Sanches de Corella, D. Pierre Inigues d'Vxue, D. Martin d'Artieda, D. Pierre Arnaud de Garo, D. Iean Gaston de Vrrros, D. Garcia Ramirez d'Assayn, D. Iean de Bearn, le ieune D. Pierre Sanches de Licaracu, D. Iean Rodrigues d'Ayuar, D. Raimond d'Esparca, & Don Pierre d'Ayanc: ceux cy furent accompagnés de plusieurs autres Seigneurs & gentilshommes, ainsi qu'il estoit conuenable à la grandeur d'un tel acte. Comparurent aussi les deputés des communautés, & bonnes villes du Royaume: assauoir, de la cité de Pampelone, Bourg, Peuplemēt & Navarrie d'icelle, qui estoient trois quartiers, où contrées de la cité, ayant chacun son Iuge, & Iustice a part, chose qui les entretint long temps en diuision. & causa esmeutes, & seditiōs lamētables, dōt nous en auons recités aucunes cy deuant: mais ce Roy, par conseil prudent, les reduisit en vn corps, & fit cesser ceste occasiō, au grād bien, & repos des habitans: Item, les deputés d'Estella, de Tudelle, Sangueffe, Olite,

du pont de la Roïne, d'Arcos, qui de ce temps est de Castille de Viana, de la Garde, qui est aussi du ressort de Castille, de S. Vincent, de S. Jean de Pie de Port, de Montréal, de Roncevaux, de Lumbier, de Villefranche, d'Aquilar de Bernedo, vnie aussi a la courõne de Castille, auioird'huy, & de Lans. Outre ces deputez, honnorerent ce couronnement plusieurs Barons, Cheualiers, & Seigneurs de Castille, France, & Angleterre, & les Ambassadeurs des Roys & Princes Chrestiens, nommement le Viscomte Jean de Fussenaguet, le Seigneur de Casteinau Raimond Bernard D. Alphonse de Lune Archediacre de Gironne, le docteur Jean Fernandes de Arana, Don Diego Lopez d'Estunega grand Thresorier, Diego Lopez de Logran maître d'hostel du Roy de Castille, messire François de Pau d'Arragon, messire Sicart de Montagu, messire Bernard de Rostaing Basque. Tous les dessus nommés, & autres en grand nombre, furent tesmoins de ce qui se passa en ceste ceremonie, ainsi qu'il appert par les actes, & escritures, qui sont en la chambre des comptes du Royaume. Le mois de Iuliet ensuiuant tōba le cœur du temple où estoient celebrés ces choses,

ses, qui donna occasion au Roy, & autres d'y contribuer plusieurs dons, & aumônes. La mort du Roy D. Jean de Castille survint lors tresmal a propos pour le Roy de Navarre : car outre qu'il l'aimoit, & estoit de luy fraternellemēt aymé, il estoit instrument propre pour dompter l'opiniastreté de la Royne D. Leonor, laquelle donna beaucoup de peine despuis au Roy son mary, avant que de la pouvoir faire desloger de Castille, & se retirer avec luy.

A l'aduenement du Roy D. Henry a la couronne de Castille, le Roy D. Charles de Navarre enuoya Ambassadeurs se condouloir de la mort du deffunt, & cōiour de son assomption, & faire telles autres ceremonies, vsitées a l'aduenement des nouveaux Rois, offrant l'Ambassadeur de Navarre toute amitié, & aide de la part du Roy de Navarre son maistre. Et prierent le Roy D. Henry de Castille, de faire enuers sa tante la Royne D. Leonor, qu'elle reuint en Navarre viure avec le Roy son mary: à quoy ceux du conseil s'estans employés de toute affection, n'auencerēt riē, car elle les repoussa, avec les mesmes excuses qu'elle auoit alleguées au Roy Don Jean decedé, tant prenoir-elle de conten-

*La Royne
de Navarre
ne veut re-
tourner vers
son mary.*

*Estat de
Cōestable.*

tement de viure en la cour de Castille, où elle s'embrouilla parmi les diuisions qui suruinrent durant la minorité du Roy D. Henry, & fit tant qu'elle se fit cōtinuer les pensions que le feu Roy D. Iean souloit luy bailler, & encor d'auantage. Par la sollicitation de laquelle, & d'autres du conseil on osta l'estat de Connestable a Don Alphonse d'Arragon, qui en auoit iouy neuf ans, peu apres elle esmeut nouueaux troubles en Castille, s'estant iointe avec le Duc de Benauent, & le Comte de Gijon.

Le Roy de Nauarre entendant que sa femme auoit dōné cause au Roy D. Héry d'estre mal content d'elle, à raison de ses menées, & turbulentes pratiques és affaires de Castille, estima que l'occasion estoit propre pour la faire venir en Nauarre, à quoy elle repugnoit tant qu'elle pouuoit & pource renuoya ses Ambassadeurs vers le Roy D. Henry, qui furent messire Martin d'Ayuar gouuerneur, & capitaine de Tudelle, & vn docteur, lesquels trouuerēt la cour a Alcala de Henares, & prierent le Roy de vouloir moyenner enuers la Roynne sa tante de se disposer a venir en Nauarre viure avec son mary, comme le deuoir le requeroit : que si elle ne pouuoit

estre induitte a ce faire, qu'il luy pleut interposer son autorité, a ce que les Infantes ses filles leur fussent deliurées, pour les ramener au Roy leur pere, lequel tiendrait cela a grand benefice de luy. Le Roy Don Henry desiroit grandemēt que ceste femme se retirast, car elle ne seruoit en Castille a autre chose qu'a entretenir troubles: *La Royne Leonor sert de troubles en Castille.* mais comme il estoit d'esprit doux, & bening, il ne se pouuoit résoudre a vser de contraincte. Partant il respondit aux Ambassadeurs, que sa volonté estoit de complaire en cela, & en toutes autres choses au Roy leur maistre, & qu'il feroit tout son possible, pour persuader sa tante de s'en aller, pour ce despecha vers elle vn messager, avec lettres fort persuasives: mais elle respondit, pour excuse, ce qu'elle auoit fait plusieurs fois. Pour le regard de ces filles, dit, que puis qu'elle en auoit enuoyé deux au pere, on luy pouuoit biē laisser les deux autres, pour sa consolation. Le Roy veüe ceste respōce dit aux Ambassadeurs, qu'ils sen retournassent, & assureassent le Roy de Navarre, de sa part, qu'il feroit en sorte, que la Royne sa femme se retireroit vers luy: mais qu'il ne trouuast point mauuais, si premierement il vouloit essayer tous

moyens amiables, & bien seants à Princes conjoints en tel degré de parentage: & que pour le moins, si elle perseueroit en son obstination, il luy enuoyeroit les Infantes ses filles. Les Ambassadeurs, apres auoir renouuellé les vieilles ligues, & l'amitié d'être les deux Princes, où plusieurs grâds Seigneurs de Castille entrerēt, s'en reunirent en Nauarre, donner raison a leur Roy de la negotiation par eux faicte.

Le Roy de Castille estant venu à Vailledolit, fut derechef requis de la part du Roy de Nauarre, de sa promesse: sur quoy il print terme de deux mois, pour r'enuoyer la Roynne, & ses filles, sans qu'il y eut aucune faute: puis ayant fait consulter son conseil quelle assurance la Roynne de Nauarre pouuoit raisonnablement demander a son mary, luy estant rapporté, qu'en iurāt, par le Roy D. Charles, quelques cheualiers principaux, & deputés des cités, & villes de Nauarre, qu'elle seroit bien, & honnorablement traitée, elle n'auoit cause de contredire, ny reculer de s'en aller vers son mary: Il enuoya, avec les Ambassadeurs de Nauarre, vn gentilhomme, pour faire entendre au Roy leur maistre ce qu'il trouuoit par son conseil, & pour recepuoir

ce serment. Car D. Henry Roy de Castille desiroit fort qu'elle deslogeat de ses pays, mais il ne sçauoit comment la mettre hors honnestement & avec son honneur.

*D. Henry
desire sa
tante hors
son Royau-
me.*

Or elle-mesme en appresta l'occasion: car quand elle eut entendu, que le Duc de Benauent, & les autres de la ligue s'estoyēt reduits à l'obeissance du Roy, elle craignāt quelque surprinse, fit tant que le Connestable Don Pedro vint à Roa, avec deux cens lances, & quelques gens de pied, & lors se voyāt comme asseurée, elle enuoya par deuers le Roy, luy demander asseurance, & sauf-conduit pour venir en cour, se iustifier, mais le Roy estimant que le Duc de Benauent, le Connestable & sa tante, & tous ses ligues en general gardoyent en leur cœur la mesme volonté qu'auparuant, se resolut de les chastier l'un apres l'autre, & partant fit arrester ceux qui de la part de la Róyne de Navarre luy auoyent esté enuoyés: puis estant venu à Burgos, mit en deliberation, en son conseil, ce qui estoit à faire. Là estoient l'Archeuesque de Tolde, les maistres de saint Iacques, & Calatraua, l'Admiral D. Diego Hurtado de Mendoza, D. Iean Hurtado, D. Ruy Lopez d'Aualos, & autres, dont aucuns

*De Federic
de Beauve
prisonnier.*

*La Royne
de Navarre
redemptée.*

estoyent entrés armés au conseil, par le commandement du Roy. Le Duc de Beauvent y vint aussi, nonobstant qu'aucuns de ses amis l'eussent aduerti de se retirer, & qu'on auoit deliberé de le prendre. Ainsi qu'il entra où se tenoit le conseil, le Roy sortit, feignant de vouloir aller souper, & dist tout haut, qu'ils aduissent ce qu'il falloit respondre à la Royne de Navarre. Là le Duc fut arresté prisonnier, mis au chasteau de Burgos, puis à Monreal, & finalement du temps du Roy Iean au Chasteau d'Almodauar del Rio pres de Cordoue, où il acheua ses iours: cela fait, luy fit saisir toutes ses terres, & pareillement celles de sa tante la Royne de Navarre: & luy mesme en personne, accompagné de nombre de gensdarmes s'achemina à Roa, où elle estoit, pour l'assiéger, & prendre: de quoy le Connestable, qui estoit avec elle, aduerti, l'abandonna, & s'en alla en Gallice. La Royne se voyant delaissee, se mit à faire grandes lamentations, remplissant tout le chasteau de Roa de pitoyables cris: & pour plus esmouuoir à pitié, s'habilla de deuil elle, ses filles, ses damoiselles, & femmes, enuoyant son confesseur au deuant du Roy, pour sçauoir quelle estoit la

volonté enuers elle, puis qu'il venoit ainsi avec armée. Le Roy luy dist quelques raisons qu'il auoit de ce faire, puis marcha outre, iusques à Valera, d'où il enuoya Ieã Hurtado de Mendoza, & Ruy Lopez d'Aualos vers la Royne, ausquels, elle pleine de larmes, & en habit, & contenance de dueil se plaignit grandement du Roy son nepueu, disant, qu'il luy vouloit oster ses biens: pour ce demanda assurance, pour aller parler à luy. Les habitãs de Roa pensans à leur seureté, enuoyerent offrir au Roy la place, s'il luy plaisoit les receuoir pour luy, & ne les aliener plus, dont le Roy fut content, y entrant peu apres, vers lequel la Royne estant venue, ils entrerent dans vne Eglise, & illec eurent plusieurs propos ensemble. Finallement le Roy luy accorda la iouyssance du reuenu de Roa, Sepulueda, Madrigal, Areualo, retenant a soy la Iustice, luy commandant de le suivre a Vailledolit, où estant, & cognoissant par assés bonne experience, les mœurs de la Royne sa tante, il resolut de l'enuoyer en Nauarre vers le Roy. Charles son mari: à quoy nonobstãt l'estat où elle estoit pour lors, elle repugnoit autant qu'auparauant: parquoy le Roy craignant qu'elle ne se

*Resolution
de renuoyer
la Royne de
Nauarre.*

despartit à la desrobée, & s'en alla en fermer en quelque place forte, qui luy cousteroit encor beaucoup a auoir: commanda au Prieur de saint Iean de mettre des gardes au logis d'icelle, & luy s'en alla a Tordesillas. La Roynie cogneut alors, qu'il falloit a bon escient qu'elle retournaist en Nauarre, sans autres asscurances, que celles que le Roy son mari auoit données de promesses seules, & de fermets, & puis que tous moyens luy deffailloyent d'excuse, ou de delay, elle enuoia prier le Roy son nepueu de bien considerer ce qu'il faisoit, en la voulant contraindre de s'en retourner en Nauarre par force: & puis que la chose estoit de si grande importance, que de son honneur & de sa vie, elle le prioit de la mettre en deliberation aux sages de son cōseil, prelatz & gens de lettres, à fin d'auiser ce qui estoit raisonnable qu'elle fit. Le Roy fort aise de ce qu'elle luy faisoit entendre, commit l'affaire aux Euesques de Palence, & Zamora, par l'aduis desquels il fut conclud, que la Roynie D. Leonor deuoit retourner vers son mari, & que le Roy son nepueu l'accompagneroit iusques aux limites de Nauarre: ce qui luy fut fait entendre, à fin qu'elle se dispo-

fast d'obeir: elle acquiesça, mais à son grād regret: parquoy le Roy reuint a Vailledo-
lit, & de là prindrent ensemble le chemin
de Navarre, ayant enuoyé les deux deffus-
dits Archeuesques, ensemble l'Euesque
d'Albi, François, & autres à Tudelle, ad-
uertir le Roy D. Charles de la venue de sa
femme, & prendre de luy de nouueau le
serment, de la bien, & honnorablement
traitter.

*Acquiesce-
ment de la
Royne de
Navarre.*

Au deuant de la Royne vindrent l'Ar-
cheuesque de Sarragosse, accompagné de
plufieurs cheualiers de Navarre, de France
& d'Arragon, ausquels elle fut remise, avec
ses filles, aux limites de Castille, & de Na-
uarre, au grand contentement du Roy D.
Henry, à qui elle auoit esté en charge plu-
sieurs années, par son esprit turbulent, &
ambitieux. Le Roy D. Charles monstra,
par effect, qu'il n'auoit iamais eu mauuaise
volonté contre elle: car il l'a receut, & tous
ceux qui estoient en sa compagnie, avec
grand honneur, & demōstration d'amour
& de ioye: la traitta humainement, & l'hō-
nora autant qu'elle eust sceu desirer, & or-
donna, que festes, & signes de ioye fussent
faits par tout le Royaume de Navarre, à
cause de la venue de la Royne D. Leonor.

*La Royne
D. Leonor
en Navarre.*

de Castille. Et pource que iusques à ce temps ils n'auoyent eu ensemble aucun enfât male, il voulut faire iurer aux Estats de son Royaume pour-ce conuoqués à Pampelone, quelques mois apres le retour de la Royne, les Infantes ses filles pour heritieres legitimes du Royaume, & de ses autres Estats, lesquelles succederoyent l'une au defaut de l'autre, iusques à la der-niere viuante. Il fit faire le sermēt aux sub-iets, selon qu'il estoit acoustumē en Espa-gne, & pour euitier guerres & seditions, dōt il auoit l'exemple tout recent aux pays voisins d'Arragon, & de Valence.

1397. Depuis que la Royne D. Leonor fut re-
iointe au Roy de Nauarre son mari, elle
acoucha d'un fils en la cité de Pampelone,
lequel comme le pere, fut nommé Char-
les, mais il vescu peu. La tranquillité en ce
Royaume fut grande sous ce Roy Char-
les, lequel vescu fort content de sa fem-
me, apres son retour, & la laissa regente en
son lieu, lors qu'il passa en France, qui fut
l'an mil trois cēs nonante sept : car il auoit
plusieurs grands affaires à demesler avec le
Roy Charles sixiesme, qui luy detenoit
plusieurs places saisies dès le temps de
leurs peres, & plusieurs fois l'auoit sollicité

en vain, par Ambassadeurs, de luy en faire raison: partant il falut qu'il y allast en personne. Auant que partir, il ordonna estre payé à la fabrique de la grande Eglise de Pampelone, ruinée quelques années auparavant, le quarantième denier de tout le reuenue de son Royaume, pour douze années, dont elle fut rebastie & reduite en l'estat, & forme qu'on la voit à present. De ce, y a lettres données à S. Jean de Pié de Port, par ce Roy, ceste année mil trois cēs nonante sept, au mois de May. Son voyage de France ne luy seruit de guerres: car outre que le Roy de France n'estoit pas conseillé de se deffaisir des places qu'il tenoit, notamment en Normandie, l'amitié que le Roy de Nauarre auoit avec les Anglois luy estoit suspecte & odieuse, cōbien que ceste amitié n'estoit au dommage des François, estant plustost vne neutralité, à fin de viure en paix avec tous, qu'autre alliance, ny confederation.

Voyant doncques qu'il n'estoit pas le bien venu, il s'en retourna incontinent en Nauarre, d'où il r'enuoya quelque temps apres en France, vers le Roy, le Cardinal de Pampelone, qui s'estoit retiré en Nauarre, apres plusieurs maux soufferts en

*Jeanne de
Navarre
Duchesse
de Breta-
gne demeu-
re veufue.*

Auignon, pour le Pape Benoist. Iceluy vint de si bonne diligence, & moyens si opportuns, qu'il inclina le Roy de France, & son conseil, à donner recompense au Roy de Navarre, de ses terres : parquoy falut que derechef il retournaist passer les Pyrenées. En ces entrefaictes mourut le Duc de Bretagne Jean de Montfort, mari de Jeanne sœur de ce Roy Charles de Navarre, laquelle auoit de son mary quatre enfans, Jean, qui fut Duc, Richard Artus & Giles. Ceste Princeesse fut depuis espousée par Henry de l'Anclastre Roy d'Angleterre quatriesme de ce nom, celuy qui priua son cousin le Roy Richard de la Couronne, & le fit mourir de faim en prison, duquel elle n'eust aucuns enfans, au moins qu'il se trouue par escrit. Or le Roy Charles ayant fait iurer son fils Charles, par les Estats de son Royaume, pour heritier d'iceluy, maria sa fille aînée D. Jeanne a Jean fils aîné d'Archambaud, qui auoit succédé au Comte de Foix, & de Bearn, par le decez de Mathieu de Castelbon, la seconde de ses filles nommée D. Marie mourut fille: & quant a la troiesme, estant peu auant decedée la Roynes Marie de Sicile, qui auoit laissé par testament, ce Royaume a Don Martin son

mari, fils du Roy D. Martin d'Arragon, il pensa de la faire Roynie de Sicile, & la faire espouser à ce ieune D. Martin veuf. Il enuoya donc pour cest effect, ses Ambassadeurs au Roy d'Arragon, lequel fut fort content, & consentit à ce mariage, non obstant qu'on luy eut présenté plusieurs autres bons partis pour son fils D. Martin Roy de Sicile, & que les Siciliens du conseil d'iceluy fissent leur possible, pour luy faire entendre au mariage de Ieanne sœur du Roy l'Adiflaus de Naples. Les conuentions furent faictes entre le Roy d'Arragon, & les Ambassadeurs, tât de Nauarre, que de Sicile, entre lesquels estoit Pierre Serra Cardinal de Cattanea, au lieu dit Altura, au Royaume de Valence, l'an mil quatre cens vn, & fut dit, que le Roy de Nauarre bailleroit en dot cent mille florins a la fille, du coing d'Arragon: assauoir, quarante mille comptant, & les soixante mille restans dans certain terme, pour lesquels il bailleroit en gage les villes, & chasteaux d'Arguedas, sainte Cara, Murillo, & Gallipienço: le Roy d'Arragon obligerait, pour le douaire, les villes & chasteaux de Sos, Sauueterre, Vncastillo, & Rueste. Et pource que les mariés estoient ioints

*Mariage
du Roy de
Sicile Don
Martin &
de D. Blā-
che de Na-
uarre l'an
1401.*

par quelque lien d'affinité, seroit procurée la dispense du Pape Benoist. Pour la confirmation, & execution de ces choses, les Roys d'Arragon, & de Nauarre s'entreuerent aux limites de leurs Royaumes, entre Cortes & Mallen, où ils iurerent ce qui auoit esté conuenu. Avec le Roy de Nauarre iurerent D. Leonor de Nauarre son frere, D. Charles de Beaumont alfier majeur, D. Martin de Lacarra Marechal, D. François de ville Espela Chancelier du Royaume, Jean Ruis d'Ayuar superintendant des finances, & D. Frere Martin d'Oloaqui prieur de S. Iean, & autres comme firent plusieurs Seigneurs, & prelates de la part d'Arragon. Cela fait, fut mené le Roy d'Arragon à Cortes, où ayant esté festoyé magnifiquement par le Roy de Nauarre, luy fut deliurée l'Infante D. Blâche, Princesse d'excellente beauté, laquelle il emmena en ses terres, & ayant fait vne armée à Valence de plusieurs galeres, l'enuoya en Sicile au Roy D. Martin son fils, sous la charge de D. Bernard Cabrera cheualier Cattelan, l'an mil quatre cens deux. Ceste dame fut en fin Roynede Nauarre: car tost apres le plaisir de ces nopces, suivit la mort de D. Louys ij. fils du Roy de Na-

uarre, aagé de six mois, & nō gueres loing de celle de D. Charles son aîné, lesquels deux Infants sont enterrés en la grande Eglise de la cité de Pampelone, & si D. Blanche suruescut a sa sœur aînée D. Ieāne: & partant la couronne de Navarre tōba en succession de filles, faisant derechef le Roy iurer, pour son heritiere au Royaume, sa fille aînée Don Ieanne, & son mari D. Jean de Foix. Ceste mesme année vacqua le siege Episcopal de Pampelone, par la mort du Cardinal D. Martin de Salua Euesque de ceste cité, lequel auoit passé le lxxj. an de son aage, en grandes peines & trauaux, pour soustenir le parti du Pape Benoist d'Auignon. En son lieu obtint l'Euesché Don Michel de Salua son nepueu, qui fut depuis fait Cardinal par le Pape Benoist, à la suite duquel il mourut deux ans apres a Monaco.

Or estant pour la troisieme fois rappellé le Roy de Navarre en France, son voyage fut plus a son proffit que les precedets, car il obtint du Roy Charles sixiesme, la terre de Nemoux, erigée lors en Duché, & en outre douze mille liures tournois de rente annuelle, à prendre sur les deniers du domaine de Brie, & Champagne, &

*Titre de
Côte d'Eureux
hors
de la mai-
son de Na-
uarre.*

*Bastimens
faits par le
Roy Don
Charles 3.
de Navarre*

certaine bonne somme d'argent comptant pour toutes prétentions, & droits, auxquels il renonça, ne pouvant autre chose faire moyennant lesquelles choses cessa le titre de Comte d'Eureux en la maison de Navarre, prenant celuy de Duc de Nemours. La ville de Cherbourg en Normandie, tenue au nom du Roy de Navarre par le Mareschal D. Martin Henriques, fut par cest accord, liurée aux François: les lettres, & expeditions duquel paracheuées, le Roy D. Charles s'en retourna en Navarre, par diuers chemin: car il passa par Languedoc, & Cattelogne, où il visita le Roy D. Martin a Lerida, avec grand contentement, & plaisir des deux Princes alliés. Delà passant par Sarragosse, se rendit en ses terres, où il s'adonna depuis a faire bastimens en plusieurs lieux, mesmes les deux somptueux palais qui sont l'un en Tafalla, l'autre en Olite, lesquels de ce temps, tombēt en ruine, par faute de reparations, spécialement celuy d'Olite, où ont accoustumé de loger les Mareschaux de Navarre: & disent les Espagnols, qu'il auoit intention de tirer vne chaussée, au chemin pavé, & couuert, pour pouuoir aller, en tout tēps, sans incommodité, de l'un à l'autre de ces deux

deux lieux qui ne sont distants que d'une petite lieuë. Le pont d'Estella sur la riviè-
re d'Ega, est aussi ouvrage de ce Roy, qui,
pour avoir vescu en cōtinuelle paix, avoit
deniers à foison, pour employer en telles
structures. Pendant qu'il avoit esté en Frā-
ce, on avoit tenu quelque propos de ma-
riage d'entre sa dernière fille D. Beatrix, &
D. Jaques fils du Comte d'Urgel, du sang
Royal d'Arragō, lequel pour certains em-
pêchements, n'eut aucun effect : partant,
estant le Roy de retour, il la maria avec le
Comte de la Marche Jacques de Bour-
bon. Les nopces se firent en la cité de Pā-
pelone, l'an mil quatre cens six, avec gran- 1406.
de solemnité, & ample concours de no-
blesse, tant Espagnolle, que Françoisë, en-
viron le commencement de la guerre de
Grenade, & peu de iours avant que le Roy
D. Henry de Castille mourut : dont la nou-
velle fut grievue au Roy D. Charles, grand
ami, & allié de la maison de Castille.

L'an mil quatre cens vint se fit le maria- 1420.
ge de l'Infant D. Jean d'Arragon, fils deu-
zième du Roy D. Ferdinand deffunt, avec
la Roynë de Sicile veufue D. Blanche In-
fante de Navarre. Par le traicté accordé
des l'an précédent, il fut dit, que au cas que

Conventions
d'entre l'In-
fant D. Ieā
frere du
Roy d'Ar-
ragō, & D.
Blanche de
Nauarce
veufue du
Roy Don
Martin de
Sicile.

l'Infante heritiere presumptiue du Royau-
me de Nauarre (car desia estoit decedee sa
sœur aînée la Comtesse de Foix sans en-
fans) iroit de vie a trespas auant que son
mari, ayant, ou non ayant enfans, iceluy
neantmoins regneroit tout le reste de sa
vie en Nauarre apres le Roy Charles son
beau-pere. De ceste condition, & promes-
se iurée resulterent plusieurs troubles en
Nauarre. Outre l'expectatiue du Royau-
me fut baillé a l'Infant D. Iean, par le Roy
Charles, en dot de D. Blanche sa fille qua-
tre cens vingt mille florins d'or, du coing
d'Arragon, six sols & huit deniers, somme
fort notable pour vn Roy de Nauarre, ar-
gument de ses grandes richesses, amassées,
& mesnagées durant la longue paix de son
regne. Pareillement fut accordé, que les
terres, & forteresses que l'Infant possedoit
au Royaume de Castille, & Arragon, se-
royent affectées à l'heritier qui n'aistroit
de ce mariage succedant en la couronne
de Nauarre. Or possedoit l'Infant en Ar-
ragon les Duchés de Candie, & de Mom-
blanc, le Comte de Ribagorça, & la cité
de Balaguer, & en Castille le Duché de Pi-
gnafiel, l'Infantazgo, & la Seigneurie de
Lara: & en outre, les villes de Cuellar, Ca-
strorleris, Villalon, & Haro: puis obtint

encores Alua de Tormes, Olmedo, Paredes de Naua, Maiorga, Villorado, Cerezo, Medina del Campo, Arauda de Dudro, Roa, & Colmeuar, & autres places, lesquelles, és tēps subsequēs, il perdit toutes par guerres qu'il eut contre Castille, les titres, & lettres estants demeurés és archives de Nauarre. Ce contract, & les conventions de mariage furent iurées par les trois Estats du Royaume. Et fut longuement disputé entre l'Infant D. Iean, & les Cōseillers du Roy de Castille, quelle part il deuoit celebrer ses nopces : en fin il obtint congé de quarente iours, pour les aller faire en Nauarre, où il s'achemina, accompagné de grande noblesse Castillane. D'icy en auant ce D. Iean s'intitulera Infant de Nauarre & d'Arragon. Les nopces paracheuées, reprenant le chemin de Castille, avec D. Blanche sa femme, il rencontra messagers de la part de D. Sancho de Royas Archeuesque de Toledé, qui l'aduertissoit d'un grand excés commis par l'Infant D. Henry son frere maistre de S. Iacques, le sollicitāt de se haster de retourner en cour.

Le fait fut tel, que D. Henry, troisiēsme fils du feu Roy d'Arragon D. Ferdinand

*Acte teme-
raire de D.
Henry frere
du Roy
d'Arragon.*

desireux despouser la plus ieune sœur du Roy D. Jean de Castille, D. Catherine, & auoir le Marquisat de Viena pour dot, se desiant de la pouuoir obtenir, se resolut de l'auoir par forces, pource entra vn iour, accompagné de trois cēs hommes armés, dans Tordefillas, où estoit la cour, & s'empara de la personne du Roy, fauorisé par le Connestable D. Ruy Lopez d'Aualos. L'Infante D. Catherine, a laquelle n'estoit agreable le mariage de l'Infant D. Henry, entra au monastere de sainte Claire de celle ville, d'où elle fut despuis ostée, d'autant que D. Henry emmena le Roy a Segonia, & de la à Stuila, promettant de ne luy vser aucune force, quant au mariage. L'Infant de Nauarre, & Arragon D. Jean ayant sceu ces nouuelles, reprouua grandement le fait de D. Henry son frere, se disposant de luy estre contraire en tout ce qu'il pourroit : parquoy il conuoqua, a Olmedo, tous ses amis, & ceux d'entre les Seigneurs, & chevaliers à qui cest excès desplaisoit, de sorte qu'en peu de iours il assembla bien trois mille lances. D'autre costé l'Infant D. Henry se preparant à la guerre, s'estoit muni de gensdarmes presque en pareil nombre, en la cité d'Auila.

Estans les parties prises d'entrer en vne
 furieuse guerre, la Royne D. Leonor veuf-
 ue d'Arragon, & mere de ces deux Prin-
 ces, se mit entre deux, travaillant en sorte,
 que toute ceste gendarmerie se retira, ex-
 cepté mille lances, qui demurerent à la
 garde du Roy: puis venant au traité des
 nopces, l'Infante D. Catherine estant in-
 stamment priée par le Roy son frere, qui
 n'estoit point libre de prendre D. Henry
 pour son espoux, n'y vouloit entendre en
 façon quelconque. D. Henry estant touf-
 iours le plus fort prez la personne du Roy,
 croyant que son frere D. Jean fut contrai-
 re a ses desseins, empescha qu'il ne vint fai-
 re la reuerence au Roy, & sans se foucier
 d'iceluy, ny de ceux qui le suiuoyent, con-
 uoqua assemblée de ses partiaux, en forme
 d'Estats, où il fit aprouuer le fait de Torde-
 fillas, & ordonner ce qu'il voulut: mesmes
 fit faire lettres au n^o du Roy, adressées au
 Pape, par lesquelles il le prioit d'octroyer à
 l'Infant D. Henry les terres de la maistrise
 de saint Jacques en propre heritage a luy,
 & aux siens, en tiltre de Duché: demande
 impudente, & pour telle reiectée par le ^{Demande}
 Pape, puis se maria D. Henry, avec l'Infan- ^{impudente}
 te D. Catherine sa cousine germaine, luy ^{de D. Hen-}

faisant assigner, pour dot, le Marquisat de Vilena, en tiltre de Duché, ce qu'il ne luy dura gueres d'autant que peu apres le Roy se mit en pleine liberté, puis par arrest du conseil fut degradé du tiltre de Marquis de Vilena, & ses terres saisies par commandement du Roy.

1421.

En ces entrefaiçtes acoucha a Pignafiel D. Blanche Infante de Nauarre d'un fils l'an mil quatre cens vingt vn, lequel fut présenté au baptesme, par le Roy, a Olmedo, & fut nommé Don Charles : Aluar de Lune fut son second parrin : D. Iean pere de l'Infant, festoya le Roy, & toute la cour magnifiquement, & en toute liberalité. Deux ans apres cest enfant fut porté en Nauarre, à l'instance du Roy D. Charles son ayeul, qui erigea lors Viana en Principauté, affectée aux aînés de Nauarre, annexant a la ville, & chasteau de Viana, celles de la Guardie, saint Vincent, Bernedo, Aquilar, Vxeneuilla, Pomplation, saint Pedro, Cabiedo, Val de Campero, Maragnon, Toro, Herrera, & Buradon & en outre, luy donna Corela, & Cintruenigo, Peralta & Cadreita, ces quatre dernières desiointes de la principauté en Seigneuries à part : & és Estats assemblés à Olite, le

fit iurer heritier du Royaume de Nauarre, apres le decez de l'Infant D. Iean son pere: ce fait, peu apres il deceda de mort soudaine en la ville d'Olite, au mois de Septembre, où il s'ocupoit a faire bastir: Prince regreté des siens, & des estrangers, pour ses vertus, & paisible nature: lequel outre ces choses, mit paix perpetuelle en la cité de Pampelone, iadis & auant luy diuisée en trois regions, dictes Bourg, Peuplemēt & Nauarrerie, gouuernées par trois diuers Iuges, avec iurisdicions separées, lesquelles il abolit, & reduisit le tout sous vne mesme iustice, abolissant a iamais ces nōs factieux, mettant sur iceux vn seul gouuerneur & magistrat, l'an mil quatre cens vingt cinq auquel il mourut, fut le lxxiij. de son aage, & trente neuf de son regne, avec neuf mois: & fut mis son corps en l'Eglise de Pampelone, au mesme sepulchre de la Royne Leonor sa femme.

*Mort du
Roy Charles
de Nauarre.*

*De Don Iean premier du nom, & XXXIIII.
Roy de Nauarre.*



Pres Don Charles succeda au Royaume de Nauarre D. Iean son gendre, à cause de la Royne

Bb iiij

D. Blanche sa femme, passant la couronne de Nauarre de la maison de France en celle de Castille, & Arragon, par faute d'hoirs mâles, ce qui dura toutesfois peu de iours: il estoit aagé d'environ vingt huit ans, quand il commença à regner en Nauarre. Lors du decez du Roy D. Charles, il estoit au camp du Roy D. Alphonse, lequel irrité contre le Roy de Castille a cause de la prison de D. Henry son frere, s'estoit mis en armes, ayant son ost és costés d'Arragon, & Nauarre, autour de Tarassone, lequel il fit entrer és terres de Nauarre, aussi tost que la nouuelle vint de la mort du Roy, puis fut fait telle ceremonie: D. Iean qui deuoit succeder, demeura trois iours enfermé, lesquels passés, il monta a cheual, accompagné du Roy son frere, & faisant porter l'estendart de Nauarre, par vn cheualier nommé Nugno Vaca, & marcher deuant luy vn heraut, vestu de sa cotte d'armes de Nauarre, criant, Nauarre, Nauarre, pour le Roy D. Iean, & D. Blanche sa femme: se promena plusieurs tours par tout le camp, trompettes sonnans, & suivi de plusieurs cheualiers, & gentilshommes Castillans & Arragonnois a pied, sans que toutesfois il s'y trouuaist aucun Nauarrois: car la no-

blesse de Nauarre de son costé, en fit autāt
 à Olite, pour la Royne D. Blanche leur
 Princesse naturelle, non sans mistere, puis
 allerent en Castille, pour cause de l'emprisonnement de D. Henry leur frere. Durāt
 leur dit voyage, les Estats de Nauarre s'assemblerent, faisant nouueau iurement au
 Prince de Viane D. Charles. La Royne
 Blanche fut la premiere qui reuint en Nauarre, & peu apres y arriua le Roy son mary, ayāt fait renōciation de certaines sien-
 nes terres de Castille, en faueur de son fils
 D. Charles, aagé lors de sept ans, où furent
 renouvelées les ligue, & confederations
 d'entre Castille, Nauarre & Arragon, ayāt
 le Roy D. Iean ample pouuoir du Roy D.
 Alphonse son frere. Ceste mesme année
 1428. fut institué l'ordre des Hyeronimites
 en Espagne, a laquelle donna commence-
 ment Frere Lopez d'Oluiedo, docteur es
 droits, & religieux à saint Barthelemi de
 Lupicana.

1428.

*Institution
des Hiero-
nimites.*

L'an mil quatre cens vingt neuf, le iour
 de la Pentecoste furent couronnés le Roy
 D. Iean, & la Royne D. Blanche sa femme,
 a Pampelone, les trois Estats du Royaume
 assemblés, & les droits, priuileges, & liber-
 tés du pays par eux iurés. D. Martin de Pe-

1429.

Sacre du
Roy de Na
uarre,

ralta Euesque de Pampelone fit la ceremonie de l'onctiõ, & autres accoustumées en tel cas. Là furent presents les Ambassadeurs des Princes estrangers, l'Euesque de Calahorra, celuy de Tarassone, & celuy de Bayonne, avec plusieurs Seigneurs & chevaliers, tant de Navarre, Castille qu'Arragon. En ce couronnement furent derechef iurées, & confirmées les conuentions matrimoniales d'entre le Roy D. Iean, & D. Blâche heritiere, faictes du temps du Roy D. Charles pere d'icelle.

Au partir que fit le Roy de Navarre de Castille, il y laissa son amy, & familier Diego Gomes de Sandoual Comte de Castro Xeris, lequel fit incontinent reparer la ville de Pegnafiel, Portillo, & Castro Xeris, chose qui donna a penser au Roy D. Iean de Castille, & qu'il auoit quelque entreprise a son domnage, & que le Roy de Navarre s'en estoit allé mal affectonné enuers luy : en laquelle oppinion il fut confirmé par les nouuelles qu'il eut, qu'en Navarre, & Arragon on faisoit leuée de gens de guerre, de pied, & de cheval, combien qu'o couurist cela sous le voile de les vouloir enuoyer en France, au secours du Roy Charles, guerroyant contre les Anglois,

joint qu'ayant esté traicté quelque accord & pacification entre Castille, Nauarre, & Arragon, ores que le Roy de Nauarre l'eut accordée, & signée, celui d'Arragon n'y auoit voulu entendre. A ces causes le Roy de Castille enuoya Ambassadeurs en Nauarre, pour sçauoir quelle estoit l'intentiõ du Roy de Nauarre, & se plaindre de ce que faisoit le Comte de Castro: Ausquels fut respondu, qu'il ne se machinoit chose aucune contre luy, & que les gensdarmes qu'on leuoit, n'estoyent point pour mener en Castille, & que quãd bien on les y meneroit, ce seroit pour chose qui ne pourroit desplaire au Roy leur maistre. Or estoient en effect le Roy D. Iean de Nauarre, celui d'Arragon, & D. Henry leur frere, coniuers contre le gouvernement de Castille, voulant abaisser ceux qui estoient trop grands, & en esleuer d'autres, qui estoient deprimés, & chassés: sur tout le Roy de Nauarre estoit en ialousie enragée, pour la grandeur du Connestable Aluaro de Lune; & comme il estoit d'esprit turbulēt, ne cessoit de chercher occasion de querelles, entretenant son frere le Roy Don Alphonse d'Arragon en la haine qu'il auoit conceue contre le Roy de Castille, à cause

*Ligue cõtre
Castille.*

de l'emprisonnement de D. Henry: par quoy estant ainsi disposés ces deux Princes, toutes choses se preparoyēt a la guerre dequoy la Royne D. Blanche, & les Estats de Nauarre, estoient en grand souci. Le Roy de Castille de sa part se pourueust, faisant assembler gensdarmes de tous endroits, pour resister, tāt au Roy de Nauarre, qu'à celuy d'Arragon. Là dessus le Roy de Nauarre enuoya s'excuser, & requerir le Roy de Castille de s'entreuoir, mais ses excuses ne furent creües, ny l'entreueüe accordée. Estans les gens du Roy en ordre de marcher, le Connestable s'achemina vers la frontiere d'Arragon, & le Roy mena le reste de ses forces vers Pignasiel, ou s'estoyent fortifiés le Côte de Castro, & l'Infant D. Pedro frere des Roys d'Arragon & Nauarre, leur autre frere D. Henry essaya de mettre gens dans Toledé, mais les habitans l'empeschèrent. D'autre part, les Roys d'Arragon, & de Nauarre entrerent en Castille, avec deux mille cinq cens hommes d'armes, & quelques gēs de pied, sans que le Connestable leur peust empeschier l'entrée, auxquels se ioignit D. Henry leur frere avec deux cens vingt hommes de cheuaux, contre les promesses faictes,

ils coururent iusques prez de Cogolludo, & paruenus a Xadraque, leur estant en queuë le Connestable, ils luy presenterent la bataille, laquelle il refusa, aussi que le Cardinal de Foix fils d'Archambaud, & la Royne Marie d'Arragon, se mirent entre eux, & moyennerent, que les deux Roys s'en retourneroyent en leurs Royaumes, & que le Connestable de Castille prieroit le Roy son Seigneur de restituer au Roy de Navarre les terres qu'il auoit en Castille qui luy auoyent esté saisies, mais l'indignation du Roy de Castille estoit si grãde, qu'il ne fit compte de tout ce qu'on auoit capitulé, ains mãda à tous ses subiets, qu'ils teinsent les Nauarrois pour ennemis, & leurs fissent la guerre à toute outrance.

Le Roy de
Castille in-
digne cõtre
celuy de
Navarre.

La guerre estant declarée par le Royau-
me de Castille, les Biscains, & Guipuscoãs,
Alauois, & Riojans se ietterent soudain en
Navarre, où ils firent des maux inestima-
bles. Le Roy de Castille manda à celuy
d'Arragon, qu'il espargneroit ses terres,
s'il se vouloit separer d'auec le Roy de Na-
uarre, ce qu'il refusa, parquoy le Conne-
stable de Castille entra en son pays où il fit
de grans rauages, puis luy manquant les
viures, fut contraint se retirer vers Medina

*Sancho de
Londogno
grand enne-
mi des Ca-
stillans.*

Celi; puis de la à Burgos, où vindrent Ambassadeurs, de la part des Roys d'Arragon, & de Nauarre, pour traiter de la paix; celui de Nauarre remonstroit particulièrement au nom de la Royne D. Blanche, & de son fils D. Charles, qu'ils n'auoyent fait chose, pourquoy on leur deut auoir saisi leurs rentes, & pensions, mesme le douaire de la Royne, laquelle n'auoit oncques cōsenti aux querelles d'entre les Roys; mais il leur fut respondu quelle estoit complice de la guerre, puis qu'elle auoit vendu ses bagues pour fournir deniers au Roy son mary, & fait autres demōstrations de cœur ennemi. Celuy qui plus faisoit de maux aux Castillans estoit vn cheualier nommé Sancho de Londogno mareschal du Roy, issu de la maison de Londogno, prez d'Ordugna, Mēbre de Biscaye. Cestui-cy courant la Rioya, vn iour, fut surprins, par les embusches que luy auoit dressées Diego Perez Sarmiento capitaine de la Bastide, & emmené dans celle forteresse prisonnier: mais ceste perte fut tost recompensée par Ruis de Mandoça le chauue, natif de Seuille, qui seruoit neantmoins fidèlement le Roy de Nauarre, qui estant parti de Tudelle, avec quatre cens cheuaux, &

vingt cens piétons, courant la contrée d'Agreda, contre lequel D. Inigo Lopez de Mandoça Seigneur de Hita, & Buitrago, qui tenoit illec garnison pour le Roy de Castille, estant failli, & venu au combat au cháp d'Arauiana, il demeura vaincu, avec mort, & prison de plusieurs Castillans, tels furent les effets de la guerre l'année 1429. 1430.

*Defaite
de Castil-
lans.*

L'an mil quatre cens trente, le Roy D. Jean de Castille s'aprestoit pour faire la guerre au Roy de Navarre, auquel il en vouloit, & n'oubliant forte aucune de rigueur, se resolut de le priver totallemét de tous les biens, que luy & les siens possédoient en Castille, sans espoir d'y iamaïs plus r'entrer: pourtant il donna à plusieurs siens fauoris tout ce qui luy appartenoit en Castille. Cependant l'Euesque de Calaurra D. Diego d'Estuniga, ou Suniga, & son oncle D. Pietro d'Estuniga Comte de l'Edesma, Iustice majeur de Castille, avec les forces de la frontiere, prindrét par eschelles la ville de Guardé en Navarre, distante de deux lieuës de Logrogno: le chasteau se fit combattre, & cousta beaucoup de bõs hommes aux deux parties, & mesmes lors qu'il fut renforcé de nouveau secours enuoyé par le Roy de Navarre, faisoient

*Terres du
Roy de Na-
uarre en
Castille cõ-
fiskées, &
données.*

*Perfidie des
Navarrois.*

*Prise de la
Garde par
les Castil-
lans.*

courfes, & sanglantes faillies fur les enne-
mis, qui tenoyent la ville: mais a la longue
ils furent referrés, & pressés tellement,
qu'ils capitulerent de se rendre, si dans cer-
tains iours ils n'estoyent secourus, pendāt
lesquels cesseroyent les armes: & si le cours
leur venoit, seroyent tenus les assiegés d'e
aduerter l'Euesque, à fin qu'il fit ce que bō
luy sembleroit. Cela accordé, le capitaine
de la place assiegée fit vne mine soubs ter-
re, par laquelle il fit entrer grand nombre
de soldats, que le Roy de Nauarre luy a-
uoit enuoyés, le terme pris, estant prest à
expirer, le capitaine aduertit l'Euesque,
que le secours estoit arriué, & à l'instant
souurit ceste mine au milieu de la place,
d'où sortirent des soldats Navarrois en
grand nombre, qui commēcerent à char-
ger sur les assiegeans, avec grand trouble
& confusion de l'Euesque, & de tous les
Castillans, lesquels neantmoins irrités de
ceste perfidie, se mirent en telle deffence,
qu'ils rembarerent les Navarrois dans leur
fossé, & contre le chasteau. L'affaire n'e-
stant succedée aux Navarrois à souhait, &
leur deffaillant les viures, ils abandonne-
rent peu a peu la forteresse: ainsi demeura
la Garde, ville, & Chasteau en la puissan-
ce du

ce du Roy de Castille.

Estant la cour en Astudillo, arriua vn Ambassadeur de la part du Comte Iean de Foix pere de Gaston, qui espousa despuis Leonor heritiere de Nauarre, lequel suplia le Roy D.Iean de Castille, que son plaisir fut, que le Comte son maistre s'employat, pour mettre paix entre luy, & les Roys de Nauarre & d'Arragon: à quoy le Roy de Castille respondit, qu'il sçauoit bon gré au Comte de Foix de sa bonne volonté, & l'en remercioit, mais qu'il n'y auoit moyen de paix. D'ailleurs, le Comte d'Armignac, ennemi du Roy de Nauarre, & du Comte de Foix, ayant donné tous les empeschemens qu'il auoit peu du costé de Gascongne, à ce qu'aucun secours ne passast de France, en faueur du Roy de Nauarre, & pour ceste cause fait de grâds frais, enuoya prier le Roy de Castille de le rembourcer, auquel furent assignés, & payés dix mille florins d'or. Celle année fut fait Comte de Haro D. Pedro de Velasco, capitaine general de la frontiere de Nauarre. Le Roy Castillan estant à Burgos, eut nouuelles que l'Infant D. Pedro, courant le pays es enuiron de Zamora, auoit pris le chasteau d'Alua de Liste: & estant puis passé a Of-

*Côte d'Ar-
mignac ne-
nemi du
Roy de Na-
uarre.*

*Comte de
Haro.*

*Accord entre
Castille,
Nauarre
& Arragõ.*

ma, où l'armée de Castille se dressoit, arriuerent par deuers luy vn frere Cordelier confesseur de la Royne de Nauarre D. Blanche, qu'on intituloit Archeuesque de Tyr, messire Pierre de Peraut grand maistre de l'hostel du Roy de Nauarre, & messire Ramir doyen de Tudelle conseiller du Roy, Ambassadeurs pour le Roy de Nauarre: ensemble ceux de la part d'Arragõ, pour traiter & conclure la paix, a quelque pris que ce fut. Les difficultés furent grandes, toutesfois les raisons & remonstrances des Ambassadeurs, en fin admises, trefues furent accordées, au lieu de Majano, pour cinq années, tant par mer, que par terre, entre les Roys de Castille, & D. Henry son fils Prince des Asturies d'une part, & le Roy D. Alphonse d'Arragon, D. Jean Roy de Nauarre, D. Blanche sa femme, & D. Charles Prince de Viane leur fils d'autre: Esquelles trefues entrèrent, pour la part du Roy de Castille le Comte d'Armignac, & de celle des Roys freres, le Comte de Foix. Fut aussi accordé par icelle, que le Comte de Cortes D. Godefroy de Nauarre, beau-frere du Roy D. Jean, qui auoit fuiui le parti de Castille, ne seroit molesté, ny inquieté en la iouissance de ses biens,

ny autrement. Ce cheualier s'aresta longuement en Castille, faisant bon seruice au Roy de Castille és guerres contre les Maures, mesme seureté fut accordée pour le regard des Infants D. Henry, & D. Pedro: & pour iuger des differents durant la trefue, furent nommés sept personnages de Nauarre & Arragon, & sept du costé de Castille, le siege desquels seroit en la ville de Tarassone, & Agreda, alternatiuement. En ceste maniere cessa la guerre d'entre Castille, Nauarre & Arragon, au grand dommage du Roy de Nauarre: car il demeura despouillé de tout ce qu'il auoit de biens en Castille, & en outre, de la ville de la Guardie en Nauarre. Et d'auantage quelque paix qu'il y eust entre Castille & Nauarre, le Roy D. Iean de Castille, ne laissoit de nourrir tousiours occasions de querelles: & entretenoit le Comte d'Armignac grand ennemi du Roy de Nauarre, luy fournissant argent, afin qu'il seruist comme d'une espine au pied d'iceluy, pour le tenir tousiours mal-aisé du costé de France, & par ce moyen l'empescher de rien attenter contre Castille. Et pour plus grand preuue de son mal talent contre ce Prince, ne se contentant de luy auoir osté ses ter-

Roy de Castille se defiant de ce luy de Nauarre.

res de Castille, luy fit demolir le chasteau de Pegnafiel.

1432.

Neiges mer-
veilleuses.

L'an mil quatre cens trente deux sur la fin de l'année tomba en Nauarre, & Arragon telle quantité de neiges, que les villes & bourgades en furent comme assiegées, continuant a neiger par l'espace de quarante iours, tellement qu'on ne pouuoit aller d'un lieu a autre, & aduint, que par le long seiour d'icelles sur la terre, plusieurs animaux, mesmes des plus sauuages, & oiseaux de toutes sortes, se venoyent rendre aux lieux habités, entrans par les maisons, pressés de la faim, se laissoient prédre aux hommes, ainsi que s'ils eussent despouillé leur naturel farouche, & fussent deuenus priués, presage des maux qui depuis auindrent en ce pays.

1434.

Don fait
par le Roy
de Castille
au Comte
d'Armi-
gnac.

L'an mil quatre cens trante quatre, le Roy de Castille donna au Comte d'Armignac, son grand amy, pour s'estre tousiours monstré grand ennemi du Roy de Nauarre, les villes de Cangas, & Tinco, avec tiltre de Comte. Celle mesme année le Roy de France enuoya Ambassadeurs en Castille pour renouueller l'aliâce d'entre les deux Royaumes de France, & Castille, auxquels le Roy Castillan donna au

dience en grande majesté: Là ils virent vn lion tres-priué, couché aux piez du Roy, non sans fort grande merueille, & esbaiffement.

La trefue d'entre Castille, Nauarre, & Arragon estant expirée l'an 1435. vindrent Ambassadeurs à la cour de Castille, de la part des Roynes d'Arragon, & de Nauarre, suplier le Roy de prorogatiō de trefue, pour l'absence de leurs maris, ce que le Roy D. Iean leur oētroya pour quelques mois: à quoy seruit de beaucoup d'y auoir enuoyé D. Iean de Lune cousin du Connestable qui gouuernoit le Roy son maître. Ces deux Roys freres estoient allés en Italie, a la poursuite du Royaume de Naples, où les choses estoient passées cōme s'ensuit. Apres que le Roy D. Alphonse, rapellé en Espagne, pour les affaires qui le touchoyēt de prez, la Roynē Ieāne, & son fils adopté Louys d'Anjou eurent quelque relasche, & moyen de recouurer la cité de Naples, & autres places du Royau-me, restoit seulement le Prince de Tarente Iean Antoine des Vrsins partisan du Roy D. Alphōse, qui faisoit teste au Duc Louys d'Anjou, lequel guerroyant en Calabre, fut surprins d'vne fièvre ardente, dont il

mourut a Cosenza, sans laisser aucuns enfans, l'année 1434. en laquelle aussi passa de ceste vie la Roynne Jeanne, laissant par testament, ou vray, ou faux, heritier du Royanme de Naples, Rene d'Anjou Duc de Lorraine, frere de Louys iij. defunct, lequel estoit alors prisonnier au chasteau de Salins en Bourgongne, pour la deliurace duquel les recteurs, & gouverneurs du Royaume, esleuz apres la mort de la Roynne, enuoyerent Ambassadeurs en France: mais aussi les affectiōnés à la maison d'Arragon, appellerent le Roy D. Alphonse, lequel peu auant, estoit venu en Sicile, ayant laisse en Arragon la Roynne D. Marie sa femme, auoit amené quant & luy, son frere D. Jean Roy de Nauarre, qui auoit aussi laisse le regime de son Royaume a la Roynne Blanche sa femme, Roynne proprietair de iceluy. Avec eux plusieurs cheualiers Arragonnois & Nauarrois; passerent au Royaume de Naples, venāt assieger Gayette, dans laquelle y auoit trois cens Geneuois, enuoyés par le Duc de Milan Philippe Marie Angelo, qui tenoit le parti de Rene d'Anjou. Les assiegés se sentās pressés, firent entendre au Duc le besoin qu'ils auoyent d'estre secourus, lequel prompt-

ment donna ordre de dresser vne armée a Gennes, gouuernée par Blaise Araxeto, lesquels se dresserent vers l'isle de Ponce: dequoy aduerti le Roy D.Alphonse, print dix-neuf gros nauires, & onze galleres, resolu d'aller en personne, rencontrer ses ennemis: Ayant donc fait voile, vinrent a rencontrer l'armée Geneuoise, laquelle consistoit en douze grandes nauires, trois galeres, vne galeace, & vne fuste. Estant en veuë, l'vn de l'autre, le general de l'armée Geneuoise enuoya vn trompette dans vn esquif, faire entendre au Roy d'Arragon, que leur intention n'estoit point de leur nuire, ains seulement pour tirer hors de Gayete leurs soldats, citoyens & marchâs avec leurs marchandises, & biens, & les emporter a Genes, le trompette fut retenu bonne espace de tēps, qui fut employé en cōsultes, on fut resolu qu'il falloit donner dedans: y ayant apparence que les Geneuois auoyēt enuoyé ce trompette pour ce qu'ils estoient faillis de cœur, pour ce commencerent a crier bataille, bataille, & quant & quant, a tirer coups d'artillerie: à quoy fut promptement respondu par les Geneuois, de sorte que s'acrochant nauire a nauire, le combat fut aspre & cruel, & par

*Le Roy de
Navarre
prisonnier.*

assez bonne espace douteux, tāt que trois grosses nauires laissées en arriere garde par les Geneuois, ayāt gagné vent en poupe, vinrent de roideur hurter à trauers les nauires Arragonnoises, qui en fin perdirent tout, demeurant le Roy d'Arragon prisonnier, comme aussi le Roy de Nauarre, qui vint au pouuoir de Galiot Lomelin ensemble tous leurs principaux capitaines Arragonnois & Nauarrois, & plus de six cens soldats, treze nauires furent prises, & la plus part des galeres bruslées : sur la fin du combat ils deliurerent plus de quatre cens prisonniers soldats, sans les mariniens, retenans seulement les principales personnes, car la multitude des prisonniers de petite estoffe ne fait qu'espescher, vray est que parmi la multitude de ceux qui furent mis en liberté, se sauuerent plusieurs cheualiers de grand lieu, qui ne furent recog nus. Par ceste route fut leué le siege de Gayette, & les prisonniers menés a Sa uone, d'où ils furent depuis, par le cōmandement du Duc de Milan distribués en diuerses prisons, assauoir le Roy D. Alphonse a Pauie, & le Roy de Nauarre à Milan.

Ces piteuses nouuelles troublerent grandement les Roynes d'Arragon, & de Na-

uarre. Toutesfois la prison de ces Princes, fut breue: car estant le Duc de Milan courtois, visitant souuent ces prisonniers, il fut si bien persuadé par le Roy D. Alphonse, que son profit, & de ses Estats seroit beaucoup plus euident de soustenir le parti des Arragonnois, que celuy des François, que vaincu par les raisons d'iceluy, il les laissa lors aller libres, sans rançon aucune, ains au contraire leur fit plusieurs beaux, & riches presëts, apres les auoir traittés Royalement plusieurs iours. Il fit conduire le Roy de Nauarre, & Don Henry son frere iusqu'à Porto Venere, par six cës cheuaux, pour leur garde, & pour seruir le Roy D. Alphonse: à raison dequoy les Gencuois indignes se rebellerent contre le Duc. Si la nouuelle de la route, & prise des Nauarrois causa grand dueil en Nauarre, le plaisir en fut d'autant plus grand, quand on sceut sa deliurance, lequel s'estendit iusques en Castille, où le Roy de Nauarre estoit fort desiré, par plusieurs a qui la grandeur du Connestable D. Aluaro de Lune desplaisoit. L'vn d'iceux, assauoir, l'Admiral de Castille Don Federic despecha vn messager a la Royne Blanche, l'aduertissant, que l'absence de son mari estoit fort

1436.

prejudiciable a luy, & a tous ses amis, pour ce que ses aduersaires prenoyēt tout a leur aise tel accroissement qu'ils desiroyent: semblables aduertissements luy furēt bail-
lés par plusieurs autres cheualiers Castil-
lans, parquoy elle enuoya en Italie, au Roy
son mari, trois cheualiers de sa maison: a-
sçauoir, messire Jean Henriques de Lacar-
ra, Sancho Ramires d'Aualos escuyer trā-
chant, & le Seigneur de Vertis, affin de ha-
ster son retour, mais luy & le Roy d'Arra-
gon son frere estoient fort enuelopés en
la guerre de Naples durāt l'année mil qua-
tre cens trente six, où la Duchesse de Lor-
raine Isabel, femme de Rene d'Anjou pri-
sonnier, estoit venue, & avec l'aide du Pape
Eugene defendoit vaillamment le droit
de son mary. Les Roys freres aduertis des
affaires d'Espagne, par leurs amis, & serui-
teurs, furent d'avis d'enuoyer vers le Roy
de Castille vne cōmune Ambassade, pour
traitter avec luy de paix à quelques bōnes
conditions. Les Ambassadeurs trouuerēt
la cour a Toledē, où ayant exposé au Roy
leur charge, il pleut a Dieu qu'apres plu-
sieurs conserances, & altercations, la paix
se conclud, moyennant les promesses de
mariage d'entre l'Infante D. Blanche de

Nauarre, avec le Prince des Asturies Don Henry de Castille, aux conditions suivantes:

*Conditions
de paix en-
tre Castille,
Nauarre,
& Arragó.*

Que le mariage s'accompliroit dans certain temps entre le Prince Henry heritier des Royaumes de Castille, & D. Blanche fille aînée du Roy D. Jean de Nauarre, à laquelle, en douaire, se ront assigné le Marquisat de Viena, les villes de Medina del Campo, Olmedo, Coca, Roa, & Arauda: du reuenue desquelles terres le Roy Don Jean de Nauarre iouyroit les quatre premières années: Que si de ce mariage ne naissoient aucuns enfans, le Roy de Nauarre auroit dix mille florins d'or de rente annuelle, assignés sur les reuenus de Castille.

Qu'à la Roynie de Nauarre D. Blanche, & à son fils D. Charles seroit baillé pareillemēt assignation de dix mille florins d'or par chacun an, leur vie durant.

Qu'à tous les cheualiers qui auroient, durāt les guerres, & querelles passées, prins parti d'une part & d'autre, seroyent remises les offences, & iceux restitués en leurs biens, & dignités, excepté de la part de Castille, Don Jean de Sotomajor, maistre qui fut d'Alcantara, & le Comte de Castro

Xeris, & de la part de Nauarre D. Godofroy de Nauarre Comte de Cortes.

Item qu'a l'Infant D. Henry frere des Roys d'Aragon & Nauarre, seroyent assignés cinq mille florins d'or de rente hereditaire par an; & a l'Infante D. Catherine sa femme, baillés comtant cinquante mille florins d'or, pour son dot.

Ces articles accordés, la paix se publia és Royaumes de Castille, Aragon & Nauarre, & fut enuoyé a Azagno, avec pouuoir suffisant D. Pedro d'Acugna, fils de Lopez Basques d'Acugna Seigneur de Buédia, faire au nom du Prince D. Henry les premieres promesses: & fut accordé, que les fiançailles solempnelles se feroient en Alfaro, là où se trouua, au temps assigné, le Prince D. Henry, accompagné du Connestable de Castille Aluaro de Lune, & de plusieurs autres Seigneurs, cheualiers & prelates, lesquels estants arriués deux iours auât l'Infante, aduertis qu'elle estoit à Corella, luy allerent au deuât, avec toute leur suite. La Roynie de Nauarre mere de l'Infante, le Prince Charles son frere, l'Euesque de Pampelone, avec plusieurs autres prelates, messire Pierre de Peralta grand maître de l'hostel du Roy, messire Leon

de Garo, & autres cheualiers, plusieurs dames & damoiselles de Navarre venoyent en compagnie d'icelle, tous en equipage digne d'une telle solemnité, laquelle se celebra en Alfaro, l'an 1437. stipulant, & receuant les promesses D. Pedro de Castille Euesque d'Osma, estant les deux fiancés aagés seulement de douze ans. Le Prince D. Henry donna plusieurs beaux, & riches ioyaux a l'Infante, & vſa de meſme liberalité enuers les dames, & cheualiers de ſa compagnie, & ſuite, puis ayant paſſé quatre iours en Alfaro, en grande feſte, & reſiouiffance, les parties ſe ſeparerēt, retournant chacun en ſes terres, & maiſons. Par ceſte paix, furent auſſi reſtitués au Roy de Navarre la ville, & chasteau de la Garde, & les chasteaux d'Asaturuquen, Buradon: & du coſté de Guipulſcoa, furent rendus les chasteaux, & places de Gorriti, Cobono, Toro, Araciel, & Saragna, que les Guipulſcoans auoyent pris durant les guerres. D'auantage furent rendus au Roy de Navarre la ville de Briones, quant a la Seigneurie, & reuenu, demeurant toutesfois le domaine ſupreme au Roy de Caſtille. Ceſte paix fut promiſe, & iurée, ſur peine de trois cens mille florins d'or, payables

Principalles
villes de
Nauarre.

1438.

Pierres
tombantes
du Ciel.

par le contreuenant, & confirmée par les grandes dignités de chacun Royaume, tant Ecclesiastiques, que seculiers, & deputés des principales villes & cités, cōme Pampelone, Estelle, Tedelle, & des villes Sanguesse, Olite, Arcos, Biāce, S. Vincent, & autres, & furent ces accords mis en forme par Barthelemi de Renes secretaire du Roy D. Iean de Nauarre, & de la Royne Blanche sa femme, & par Alphonse Perez de Bintero grand thresorier & secretaire du Roy de Castille. Celle mesme année, qui fut l'an mil quatre cens trente huit, furent apportées au Roy de Castille, des pierres, qu'ō disoit estre tombées du Ciel en grande abondāce, en Madernelo, maison appartenant au Connestable, lesquelles ores qu'elles fussent assés grandes, estoient neantmoins si legeres, qu'encor quelles tombassent sur les personnes, ne les offençoient aucunement, chose merueilleuse, & tenue pour prodige, presageāt les maux qui auindrent en Castille ceste mesme année, car le Cōnestable D. Aluaro de Lune, outre ce qu'il estoit insolent & auare, estoit aussi peu fidelle à son Roy, de sorte que la plus grande part de Castille se mit en armes contre luy, mesme le Roy de

Castille eut nouuelles, que le Roy de Nauarre, & son frere D. Henry, accompagnés de cinq cens hommes d'armes, estoient entrés en Castille, & ne sçachant sous quel pretexte, attendu l'accord puis n'agueres conclu entr'eux, il enuoya par deuers le Roy de Nauarre, les prier de se renger de son parti, & de venir a la cour: le Roy de Nauarre obtépera, & vint a Cuellar trouuer le Roy, avec six cheuaux seulement, dont toute la cour fut grãdemēt resiouye. Or estoient ils venus à la sollicitation des Seigneurs cōfederés, & aussi incités par le desir qu'ils auoyent de pouuoir recouurer ce qu'ils auoyent perdu en Castille. Le Roy de Nauarre s'estant separé des autres & venu vers le Roy, receut grand hōneur, & bon traictement: mais l'Infant D. Henry ne s'auança point, ains demeura avec ses troupes, lesquelles il mena à Pignafiel, où on luy ouurit les portes, l'ayant ainsi commandé le Roy: & tost apres eut conserance avec le Roy de Nauarre son frere, a Minguela, pres de Cuellar, s'entendant fort bien avec luy, sans toutes-fois en faire semblant. Car le Roy de Nauarre demeura avec le Roy de Castille, & Don Henry se retira a

1439.

Vailedolit, avec les Seigneurs de la ligue. Peu apres arriva D. Rodrigo de Villandrado, premier Comte de Ribadeo, amenant trois mille hommes de guerre au service, & secours du Roy D. Jean son Seigneur. Les Roys de Castille, & Navarre, luy allerent au deuant iusques à Pignafiel: Ce renfort, & autres occasions, firent qu'au mois d'Octobre de l'an 1439. la paix fut cōclue, où entre autres articles estoit, que le Roy de Castille recompenseroit le Roy de Navarre, & D. Henry son frere, des biens qui leur auoit ostés, mais ceste paix ne se pouoit establir pour les estranges deffences en quoy on entretenoit le Castillan, de sorte que le Roy de Navarre, voyant ces façons de faire, s'acheminèrent de Madrigal où ils estoient, vers la cour, mais le Roy de Castille leur enuoya defendre d'y venir: parquoy le Roy de Navarre mena quelque nombre de gens de guerre vers la cite d'Auila dont il s'empara. De là le Roy de Navarre escriuit au Roy de Castille vne lettre, pleine de remonstrances, de bons & salutaires conseils, acusant grandement le Connestable de Castille de plusieurs crimes, d'auarice, cruauté, tyrannie, insolence, & mespris des Princes, & Seigneurs, voire

voir du Roy mesme, en la presence du- *Grand au-*
 quel il auoit bien osé tuer vn escuyer, & *dace &*
 mesme s'estant vn valet, pour fuir sa furie, *excez du*
 venu ietter aux pieds du Roy, comme en *Connesta-*
 tres-assurée franchise, il l'auoit batu quasi *ble de Ca-*
 en son giron, à coups de baston, estendant *stille.*
 le bras par dessus les espaulés du Roy, sans
 porter aucune reuerence a la dignité d'i-
 celuy, à toutes lesquelles choses le Roy de
 Castille ferma les oreilles, mais voyant
 que toutes choses tendoyent mal pour
 luy, pacifia le tout aux mieux qu'il peut. Ce
 fait, il luy sembla temps de celebrer les
 nopces du Prince D. Héry, & de l'Infante
 de Nauarre, estant desia passés trois ans
 depuis les fiançailles, & se trouuants les es-
 poux chacun en l'aage de quinze ans: le
 lien de proximité qui pouuoit empescher
 leur conionction fut dissout par le Pape
 Eugene iij. Estant doncques mandée l'In-
 fante, elle entra en Castille l'an 1440. ac- 1440.
 compagnée de la Royne Blanche sa mere,
 & de son frere le Prince de Viane, ensem-
 ble de plusieurs Seigneurs & prelates. Elle
 fut receüe, en la ville de Logrogno, par
 D. Alphonse de Cartagene, Euesque de
 Burgos. D. Inigo Lopez de Mandoça Sei-
 gneur de Hita, & par le Comte de Haro

*Noces de
l'Infante de
Navarre.*

*Le Prince
D. Henry
froid &
impuissant.*

D. Pedro de Velasco. De là le Prince Don Charles s'en retourna en Navarre avec son gouverneur D. Jean de Beaumont, lequel, au nom du Prince administroit le Royaume, la Roynne sa mere absente. La Princesse, & toute sa cōpagnie arriuerent a Vilhorado, maison du Côte de Haro, où fut grandement festoyée, & honorée en magnificence de festins, jeux d'armes, & inuentions rares, & somptueuses, & encor plus en Birbiesca par le mesme Comte. De mesme fit D. Pedro d'Acugna en Duegnas, où le Prince D. Henry vint trouuer son espouse, à laquelle il fit dō de plusieurs beaux ioyaux, & elle à luy, puis s'acheminèrent à Vailledolit, où elles s'acheminèrent. Au deuant d'icelles sortirēt les Roys, & tous les grands de la cour, qui firent vne magnifique entrée en la ville, & descendirent la Roynne, & la Princesse au logis du Roy de Navarre, & peu apres firent les nopces, lesquelles furent celebrées avec grande pompe, mais la mesaventure de ceste Princesse espousée fut telle, que le Prince Don Henry se trouua impuissant à consommer le mariage, ce qu'elle dissimula vertueusement par longues années. L'an 1441. les troubles recommencerēt derechef en Castille pour cause du Con-

nestable, les Seigneurs confederez estoyēt au Royaume de Toledē, ensemble le Roy de Nauarre, pour secourir D. Henry, lesquels entendans que le Roy procedoit contre eux a la rigueur, repasserent les monts, reuenans vers Medina del Campo, & Oliuiedo villes du Roy de Nauarre, dont celuy de Castille s'estoit faisi. Estants aprochés de Medina, consumans le temps en demandes, & responces, ceux d'Oliuiedo receurent les gens du Roy de Nauarre, l'armée duquel croissoit de iour en iour, se vint loger es pasquiers de Medina, a deux traits d'arc de la ville, dans laquelle le Cōnestable entra avec plusieurs autres la nuit suiuite avec force caualerie. Dedans ladiete ville le Roy de Nauarre auoit deux cheualiers affectionnés à son seruice, assauoir Aluaro de Bracamont, & Fernand Rejon, avec lesquels il fit en sorte, qu'une nuit estant de garde le Cōnestable, ne se souciant de faire les rondes en personnes, ils donnerēt entrée au Roy de Nauarre, par le quartier appelé nostre Dame de l'Antigna, lequel entrāt avec les Seigneurs confederés furieusement dedās la ville avec leurs forces, cōtre lesquelles il ne fut questiō de se mettre en deffence: car

le Roy de Castille ſçachât affés qu'on n'en vouloit qu'à ſon Conneſtable luy cōmander de ſe ſauuer. Eſtant euadé, le Roy ſe retira ſur la place de ſainct Antolin, ſans ſe donner grand penſement pour ceux qui entroyent, leſquels vindrent incontinent luy baiſer les mains. Et le Roy de Nauarre luy fit la reuerence ſans luy baiſer la main. Puis pour mettre vne bōne fin à ces troubles, les Roys de Caſtille, & Nauarre, firēt vn compromis en preſence de tous les Princes preſents, és mains de la Roynie Marie de Caſtille, que le Conneſtable ſortiroit de la Cour pour ſix années prochaines & conſecutiues, qu'il n'eſcriroit aucunes lettres au Roy, & que par le Conneſtable ſeroit baillé quelques places en depoſt, enſemble ſon fils: Que le Roy de Caſtille recompeneroit celui de Nauarre. Alors commença l'Admiral Don Federic d'eſtre fort en la grace du Roy de Caſtille, nō ſans ialouſie du Roy de Nauarre, qui en eut volontiers fait du bruit, à ſa façon accouſtumée: mais ſon impatience fut retenue par le Comte de Caſtro ſon ancien, & fidelle ſeruiteur, lequel luy remonſtra, que cela ne pouuoit redonder qu'au profit de luy, & des autres Seigneurs de leur ligue:

pour adiouster plus estroit lien a laquelle, il luy conseilla, puis que la Royne Blanche sa femme estoit nouvellement decedee, d'espouser D. Jeanne fille dudit Admiral: continuans tousiours ces Seigneurs a ourdir la ruine du Connestable, laquelle en fin ils virent.

La Royne de Navarre, despuis qu'elle eut conduit sa fille en Castille, n'en partit plus. Elle estoit Princesse religieuse, & grandement adonnée aux deuotions, & pelerinages, principalement es lieux dediés a la vierge Marie, où elle fit aucuns voyages durant les troubles cy dessus mentionnés, en quoy s'occupât, aduint qu'elle deceda à sainte Marie de Nieua, l'an mil quatre cens quarante deux, là où son corps a esté enseveli, il est incertain entre les Espagnols: car il ne s'en trouue marque, ny monument en Espagne combien quelle ordonnast, d'estre portée a sainte Marie d'Vxue, & que la prieuré d'Ayuar fut annexée a celle Eglise, ce qui toutesfois n'a pas esté fait. Par la mort de ceste Princesse la succession du Royaume de Navarre tomba a son fils Charles Prince de Viane, lequel pour lors auoit accompli la xx. année de son aage, nourri par les Sei-

Mort de la
Royne Blanche de Navarre.

1442.

gneurs de Beaumont, de laquelle maison Louys estoit le chef, qui despuis estant fait Connestable de Nauarre, par le Roy D. Jean, fut le premier de ce lignage pourueu de ce tiltre, & dignité. Les Seigneurs de Castille ayans, avec tant de contétions, & combats, amené le Cōnestable, & ceux de son parti, au profond des miseres, cōmencerent à se piquer entr'eux, & à se bander en petites ligues & partialités, dōt les amis du Connestable se sçauoyent tresbien seruir. L'Euesque de Segobia D. frere Lopez de Barientos, outre-ce qu'il estoit fort ami du Cōnestable, ayant ou craignant d'auoir diferent, avec D. Jean de Pacheco grād familier du Prince Don Henry, trocqua son Euesché pour celle d'Auilla, à cause que le Prince faisoit presque ordinairement sa demeure a Segobia, possible voulut-il que cest eschange seruit de voile a ce qu'il pretendoit finement faire, faisant semblant de hayr, & fuir le Prince D. Henry, lors qu'il auoit le plus d'enuie de s'insinuer en sa grace, y remettre le Connestable, & le retirer de la ligue du Roy de Nauarre. Tost apres D. Pedro Suarez de Tolde Seigneur d'Orpela, fauorisé par le Prince D. Henry de Castille, se fortifia en cōtenance d'ennemi

*Artifices de
l'Euesque
D. Frere
Lopez de
Barientos.*

dans Talauera: ce qu'estât sceu par le Roy de Castille, qui se trouuoit lors en S. Marie de Naua, avec le Roy de Nauarre, pour célébrer l'ā reuolu de la Roynne D. Blāche de Nauarre defūcte, les deux Roys s'acheminērēt celle part, avec quelques gēs de guerre, & contrainquirent ceux de dedans de se rendre. De là, tous ensemble allerēt a Tolède, & par chemin virēt le Cōnestable D. Aluaro de Luna a Escalona, où le Roy, & la Roynne furēt ses cōperes d'vne fille qu'il eut. Le Roy de Castille estāt a Ramaga fut sollicité par le Roy de Nauarre de faire cōstituer prisonniers plusieurs estās en cour, fauorisans le Cōnestable, luy baillant garde beaucoup plus grāde que de coustume: ce qu'il endura: car il estoit pusillanime, & de cœur nullement Royal, mesme endura que D. Henry Henriques frere de l'Admiral & Ruis Dias de Mādoça fussent perpetuellemēt en sa chambre à veiller & espier ce qu'il faisoit, pour en aduertir le Roy de Nauarre, & sō gēdre le Prince D. Hēry. Or est-il croyable q̄ ce fait fut de la ruse de D. frere Lopez de Baneuto n'agueres Euesque de Segobia, lequel tēdoit à dōner occasiō aux cōfederés d'yser de quelq̄ grāde rigueur enuers le Roy, par laquelle il appa-

*Le Roy de
Nauarre
aduerti de
tout ce que
faisoit celui
de Castille.*

rust qu'ils le tenoyēt en seruitude indigne, dont le Roy, & son fils le Prince des Asturies, & autres qu'il vouloit rendre amis du Connestable, eussent cause de se ressentir, comme il aduint; car cest Euesque, fort habile homme, fit tant par moyens & inuentions, qu'il gaigna Iean de Pacheco, lequel estoit le cœur du Prince D. Henry, & par luy fit remontrer, combien estoit chose indigne a luy, de se maintenir avec ceux qui traittoient tant indignement le Roy son pere. Par semblables persuasions fut induit le Prince D. Henry a se separer de la ligue; ce qu'il fit finement, selon qu'il fut conseillé par l'Euesque, le rendant ami du Connestable, qui estoit presque desesperé, se voyant tant poursuui. Desia commençoit d'aparoistre l'effect de ce que brasloit l'Euesque, en ce que le Côte Haro s'estoit plaint de la subiectiō où on tenoit le Roy, & qu'il y remedieroit: & de faict, s'estoit acheminé vers le Comte de Plaisance D. Piero de Velasco; parquoy le Roy de Nauarre le fit suiure pour le prendre, ce qui ne peut estre, tellement qu'en peu de iours il amassa mille cheuaux, contre lesquels le Roy de Nauarre enuoya mil & cinq cens

ances, conduite par l'Amiral, & le Comte de Beneuent, lesquels menerent avec eux le Prince D. Henry qui ne se descouuroit encores, & seruit de tant, qu'il empescha la rencontre de ces deux parties, les rendant aucunement amis. Pendant qu'ils estoient en ce voyage, ayāt laissé les Roys en Tordefillas, Pero Aluares Oforio, de la faction de l'Euesque d'Auila, se vint presenter deuant la ville accompagné de force gendarmerie. Ces choses donnerent grand soupçon au Roy de Nauarre, & à ceux de la ligue, qu'il y auoit quelque coniure contre luy, & ne sçachant bien encor descouurir qui, & qu'els estoient les coniurés, pour s'en mieux certifier, il enuoya prier le Prince D. Henry de venir a Tordefillas, à fin de conferer ensemble pour acheuer d'acabler du tout le Connestable, selon qu'ils auoyent conuenu ensemble. Le Prince ayant eu sur ce l'aduis de l'Euesque, qui ne demandoit pas mieux, s'y en vint, avec dessein de manifester au Roy son pere la ligue qu'il auoit nouuellement faicte. Arriuant a Tordefillas avec l'Euesque d'Auila, & Iean de Pacheco, ils furent receus par le Roy de Nauarre, avec grande demonstration de ioye. Pour lors il n'y eut

moyen de conferer ensemble, ny parler d'affaires, car on estoit sur le point de celebrer les nopces d'entre le Roy de Nauarre, & la fille de l'Amiral D. Federic Henriques, qui se preparoyent amples, & magnifiques a la Tour de Lobaton, où tous s'acheminèrent.

Ce mariage fut accompli au grand regret du Prince de Viane Don Charles, au preiudice duquel le Roy D. Iean retenoit, & ne se vouloit deffaisir du Royaume de Nauarre, lequel estoit son propre heritage maternel, dont suiuirent plusieurs troubles. Ceste Princesse nommée D. Ieanne, estoit du sang Royal de Castille, d'autant que l'Amiral D. Federic son pere estoit fils de D. Alphonse Henriques, & petit fils de D. Federic maistre de sainct Iacques, lequel, par le commandement du Roy D. Pedro le cruel son frere, fut tué à Seuille. En mesme temps D. Fernand d'Aualos, chambellan de l'Infant Don Henry d'Arragon, fut enuoyé pour amener a Cordoue D. Beatrix sœur du Comte de Beneuent D. Alphonse Pimentel, promise à l'Infant son maistre: en laquelle cité se celebrerent ces autres nopces: & de ce mariage de D. Hérry frere au Roy de Nauarre & de D. Bea-

trix, fut procrée D. Henry d'Arragon, appelé l'Infant de la fortune, ou fortuné, lequel vint a estre Duc de Segorbe.

La Cour de Castille retournée de la Tour de Lobaton a Tordefillas, on comença à traiter des affaires du Cōnestable, sur quoy le Prince D. Henry remōstra au Roy de Nauarre, qu'il seroit bon : pour determiner sur choses tāt importātes, que tous ceux de la ligue se trouuassent ensemble, ce qui pleut au Roy de Nauarre. Et pource q̄ le lieu de Tordeffillas estoit trop petit, fut assigné le lieu de Arcualo. Or desiroit grandement l'Euesque d'Auila : que le Roy, & le Prince, pere, & fils peussent librement conferer ensemble, ce qui estoit tres-dificille: car au tour de la personne du Roy de Castille, en sa chābre, & par tout y auoit espies mises par le Roy de Nauarre, qui prenoient garde a ce qu'il disoit, & faisoit, toutesfois l'Euesque trouua moyē de luy faire entendre, qu'il contrefit vn peu le malade, & que son fils, sous ombre de le visiter, luy pourroit dire plusieurs choses qui luy plairoient. Le Roy tint le lit quelque temps, & par tel moyen le Prince eut opportunité de luy descouurir la nouuelle ligue, & l'asseurer que le Connestable

qu'il auoit chassé le deliureroit encor de la captiuité, en laquelle on le tenoit: dequoy se resiouit tellemēt le Roy, qu'il ne se peut tenir de donner signe exterieurement d'auoir conceu quelque extraordinaire esperance, ce qui donna soupçon aux gardes, que le pere & le fils auoyent eu propos de grande consequence ensemble: pource en aduertirent le Roy de Nauarre, lequel se doubtoit fort de l'Euesque. On fit demander au Roy, par l'Admiral, quelles bonnes raisons luy auoit dites le Prince son fils, dequoy il s'estoit tāt resiouy: Le Roy courrant sagement ce qu'il scauoit, respondit, que c'estoyent comptes de folies, & bayes de ieunesse, l'assemblée d'Arcualo ne se peut tenir par les menées de l'Euesque, puis peu apres le Prince se descouurit ennemi de son beau-pere le Roy de Nauarre. Voyant doncques le Roy de Nauarre quels estoient les desseins du Prince, & qu'il falloit venir a la force, ils assemblerēt gens de toutes parts, comme le Prince faisoit de son costé, le Roy de Nauarre ayant assemblé plus de deux mille cheuaux, emmena le Roy de Castille a Portillo, & l'ayāt illec laissé en la garde du Comte de Castro, tira le chemin de Burgos, delibéré de

combattre le Prince, toutesfois il n'y eut que simple escarmouche, pendant qu'on perdoit temps pour pacifier le tout, le Roy de Navarre se voyant le plus foible, deslogea sans trompette la nuit, & se retira en Palencuela. Le Roy de Castille mal gardé en Portillo, sous semblât d'aller a la chasse, eschapa au Comte de Castro, & vint a Vailladolid, où l'Euesque d'Auila le vint trouver incontinent. Le Roy D. Iean de Navarre, l'Amiral, & le Comte de Benevent se virent lors reduits bien bas, prirent resolution de s'en retirer chacun a leurs terres, & illec attendre l'euencement des choses : parquoy le Roy de Navarre, qui depuis quelques années n'auoit veu le Royaume de Navarre, s'y en alla, avec intention de se pourvoir là d'hommes, & de tous moyens, pour faire en bref vne puissante armée, pour entrer en Castille contre ses aduersaires.

Estant arriué en son Royaume, il garnit auant toutes choses, ses places frontieres, de ce qui estoit necessaire, pour resister aux entreprises du Roy de Castille, lequel toutesfois ne se soucioit gueres de le poursuivre en Navarre, ains tendoit seulement a le despouiller luy & les siens, de ce qu'ils

1445.

possedoyent en Castille, & tout premierement mit en sa main Medina del Campo, & Oliuedo : puis la ville de Pignafiel fut prise par force, & mise à sac : Roa, & Arcuda de Dierro ouuřirent les portes au Prince, lequel, & le Connestable, n'ayans plus qui leur fist teste en Castille la vielle, passerent en Andalouſie, contre l'Infant Don Henry, le contraignant de s'enfuir au pays de Marcia, où il s'enferma dans Lorea, & là se fit fort, iusques à ce que le Prince se fut retiré en Castille, & lors il passa en Arragon se ioignant au Roy de Nauarre son frere, lequel ramassoit gēs pour retourner en Castille. L'an 1445, moururent les Roy-
nes Leonor de Portugal, & Marie de Castille, sœurs du Roy de Nauarre, non sans soupçon de poison : celle de Portugal fut portée de Tolède, où elle deceda, au monastere de S. Marie de la bataille : la Roynne D. Marie, morte en Villacastin, bourgade de Segobia, fut enterree au monastere de Guadalupe. Presque en mesme tēps mourut Lopez de Mādoça Archeuesque de S. Jacques. Sur le printemps retourna en Castille le Roy de Nauarre, par l'endroit d'Atienca accōpagné de quatre cēs hommes de cheual, & six cens pietons, & d'ar-

uée print Torriia, Alcalá de Henares, Alcalá la vieille, & saint Torquat, là où arriva l'Infant D. Henry son frere, avec cinq cens hommes d'armes. Ces nouuelles firent passer le Roy de Castille de Medina au Royaume de Toledo, où ayant assemblé le plus de gens qu'il peut, il se dressa la part où il pensoit trouuer le Roy de Nauarre : approchant d'Alcalá de Henares, la ville luy fut rendue, & là se presenta le Roy de Nauarre, pour combattre, mais celuy de Castille ne voulut accepter la bataille : parquoy le Roy de Nauarre, & D. Henry passerent le port, où mont de la Tablada, & menerent leur armée à Oliuiedo, où leur estant les portes fermées, & fait resistance, ils entrerent par force, puis ayant fait informer contre les coupables, le Docteur Fuente, & deux autres gentilshommes furent condamnés à mort, & publiquement executés. Le Roy de Castille s'estant mis à la trace de celuy de Nauarre, vint camper aux molins des Abbés, à vne petite lieüe d'Olmedo, ayant en son armée le Prince son fils, le Cōestable, le Comte d'Albe, D. Inigo Lopez de Mádoça, puis se vint joindre le Côte de Haro. D'autre part l'amiral, les Côtes de Beneuēt, & de Castro.

D. Pedro de Quignones, D. Iean de Tobar, mandés par le Roy de Nauarre, entre-
rent en Oliuedo, avec mille cheuaux, les-
quels adioints à ceux que le Roy de Na-
uarre, & l'Infant auoyent amenés, & re-
cuillis, faisoient nombre d'environ deux
mille cinq cens cheuaux. Estant les choses
en termes d'estre decidées par vne inéui-
table bataille, le Roy de Nauarre n'ayant
eue de se mettre en hazard, fit demander
parlement au Roy de Castille, de quelques
cheualiers d'une part & d'autre: ce qu'estât
accordé l'Amiral & le Comte de Bencuet
d'une part, & Euesque de Cuenca, & le
Connestable d'autre, conferant ensemble
plusieurs fois, & a diuers iours, ne deman-
dant, quasi, le Roy de Nauarre plus autre
chose, sinon, qu'on luy restituast ses terres,
& estats, comme aussi a l'Infant D. Henry,
au Comte de Castro, & autres de sa ligue:
mais quant au gouuernemēt du Royaume
& querelles du Connestable, il ne s'en fai-
soit aucune mention. L'Euesque Lopez
de Bariento vsant de ses ruses accoustu-
mées, dilayoit, & prolongeoit le pourpar-
ler tant qu'il pouuoit, sçachant qu'en peu
de iours deuoit arriuer au cāp D. Guittiere
de Sotomajor maistre d'Alcantara, avec
fix

six cens hommes de cheual, par lequel re-
fort le Roy de Castille se trouuant supe-
rieur en toutes sortes, il esperoit de voir
ses ennemis de tout point defaits, & con-
traincts de se rendre a la merci d'iceluy, &
de son Connestable. La conference finie,
sans aucune conclusion, le Roy de Nauar-
re, & ses confederés, enuoyerent au camp
messire Lopez d'Angula, & le licēcie Cuel-
lar son chancelier, remonstrer au Roy de
Castille les maux, & pertes qui s'ensui-
uroient d'une bataille, a laquelle le Con-
nestable, ne se souciant que de son interest
particulier, aspirait tyranniquement, pour
le fruit qu'il esperoit de la mort des meil-
leurs cheualiers de Castille : partant qu'il
feroit chose digne de luy, de chasser cest
homme arrogant de l'autorité qu'il te-
noit indignement, & ordonner qu'ils fus-
sent ouys en iustice, en quelque cité, ou au-
tre lieu de son Royaume, là où ils se trou-
ueroient en equipage de paix, ne menans
chacun que dix hommes sur mules: Autre-
ment, protestoyent de faire leurs plaintes
au Pape, & que les malheurs qui auien-
droient de là en auant, seroyent par sa
faute. Le Roy respondit, qu'il y pouruoye-
roit, & voulut que ceste demande fut bail-

Le Prince
D. Henry
mis en
suite.

lée par escrit. Deux iours apres, estant allé le Prince D. Henry recongnoistre la place d'Oluiedo, avec quelque nombre de chevaux legers, fut chargé d'autant d'ennemis sortis de la ville, qui luy firent honteusement reprendre la route du camp a bride auallée, ce qui despleut si fort au Roy son pere, qu'à l'instant, sans vouloir plus ouyr parler d'accord, il fit desployer son estandart, & mettre ses gens en esquadrons, & ordonnance de bataille, tenant l'auangarde le Connestable, avec huit cés hommes d'armes, & luy l'arriere garde, où estoient six cens hommes d'armes, sans les gens, qui, en grand nombre, estoient disposés chacun en son ordre, lesquelles il fit tenir fermes l'espace de plus d'une heure, a la veüe de la ville d'Oluiedo, attendant que le Roy de Nauarre sortist contre luy : lequel indigné de ceste brauade, encor qu'il n'eust forces esgales à celles de son aduersaire, toutesfois, cōme Prince courageux, voulut sortir, contre l'aduis de plusieurs, au combat, estāt desia assés tard, opposant l'esquadron, que luy, & le Comte de Castro conduisoient au Prince D. Henry de Castille : & l'Infant d'Arragon frere du Roy de Nauarre, l'Amiral, le Comte Be-

nauent, Pedro de Guignones, & Ferdinãd Lopez de Saldaigne avec le reste de leurs forces contre le Connestable de Castille. Lors commença la bataille enuiron deux heures auant soleil couché, où le Roy de Nauarre & ceux de sa suite, quelque bon deuoir qu'ils fissent, demurerent vaincus: & bien print que la nuit se trouua prochaine, qui separa la meslée, & empescha les victorieux de poursuiure plus outre leurs ennemis: de maniere, qu'encor qu'il y fust combatu avec grande obstination, si ne mourut-il sur le champ, que fort peu de gens, & enuiron deux cens de ceux qui auoyent esté blecés à la bataille. Le Roy de Nauarre, & son frere D. Henry, qui fut griefuement blessé a la main gauche, se retirerent à Oluiedo: le Comte de Benauent fuit iusqu'à Pedraza: l'Amiral fut prins par vn Escuyer nommé Pierre de Carrera, lequel neantmoins le rendit luy-mesme en la maison de la Tour de Lobatõ. Plusieurs grands Seigneurs, & autres furent prins au nombre de plus de deux cens, entre lesquels les principaux furent le Comte de Castro, & vn sien fils nommé D. Pedro de Sandoval, messire Alphonse d'Alarçon, Don Henry Henriques frere de l'Amiral,

*Gutierrez
d'Aluara-
do decapité.*

*Mort de
l'Infant D.
Henry d'Ar-
ragon.*

Ferdinand de Quignones, Diego de Londo-
gno fils de Sancho Rodrigo d'Aualos,
nepueu de D. Ruy Lopez d'Aualos, iadis
Connestable de Castille, & D. Pedro de
Quignones: mais cestuy cy trouua moyen
de se sauuer. Le reste de l'armée des Colli-
gues se sauua en diuers endroits, sans estre
poursuiui, a la faueur de la nuit. Le Roy
de Castille fort ioyeux de ceste victoire,
despecha par tout son Royaume lettres,
commandant qu'on en fit signes de ioye,
& fit edifier vne chapelle au lieu de la ba-
taille, qu'il nomma du saint Esprit de la
bataille : & ayant le iour apres, enuoyé a
Vailledolit Gutierrez Sanches d'Aluara-
do, prisonnier, la nuit mesme du combat,
luy fit illec trancher la teste. Auant minuit,
le Roy de Nauarre, & l'Infant son frere
fortans d'Oluiedo, avec tout ce qu'ils peu-
rent emmener, prindrent le chemin de
Portillo, & par Fuente Duegna paruin-
drét à Daroca, & de la à Calataiub, où l'Infant
D. Henry mourut de sa blessure qu'il auoit
receue en la main, laquelle s'estoit enflam-
mée: son corps fut pour lors mis en la cha-
pelle de D. Jean de Lune de celle cité, &
despuis trāsporté à Poblete, où gist le Roy
D. Ferdinand. Il laissa sa femme D. Beatrix

enceinte, laquelle despuis acoucha d'un
fils qui fut nommé D. Henry d'Arragon,
& par surnom l'Infant Fortuné : la mort
d'iceluy fut d'autant plus griefue au Roy
de Nauarre, qu'elle aduenoit en temps fort
importün, apres la perte d'une bataille: ioint
que se voir priué d'un tel frere, estoit vn
accessoire a la douleur qu'il portoit de la
mort recente de ses deux sœurs Roynes
de Castille & de Portugal, ne restans plus,
de tant d'enfans, qu'auoit laissés le feu Roy
D. Ferdinand, que luy, & son frere D. Al-
phonse Roy d'Arragon, lequel estoit resi-
dät, presque tousiours, à Naples, & n'auoit
aucuns legitimes enfans. Par ceste descon-
uenue fut le Roy de Nauarre totalement
abandonné des Seigneurs de Castille, de
sa ligue, lesquels se retirerēt chacun en son
quartier, pour dōner quelque ordre a leurs
affaires: mais le Roy de Castille victorieux
les poursuiuit a toute rigueur de iustice, les
faisant declarer rebelles, aplicquant leur
bien a sa couronne, sans espargner aucun:
le Prince D. Henry neantmoins fit tant,
que l'Amiral Don Federic fut mis hors du
roole des condamnés, mais non sans gran-
des difficultés. Dans le chasteau de Medina
de Rioseco estoit D. Theresa de Quigno-

*Le Conue-
stable en
plus grand
honneur que
paravant.*

nes, avec la Royne D. Ieanne espouse du Roy de Nauarre. Le Roy estant là venu, receut la place, avec fauorables partis a ces dames, par l'intercession du Prince, lequel conserua les biens, estats, & famille de l'Amiral, a la charge, qu'il retourneroit au seruice du Roy, dans quatre mois: neâtmoins la Royne D. Ieâne demeura en la puissance du Roy de Castille: par ce moyen fut tellement dissipée la ligue contre le Connestable, qu'il n'y eut ville, ny chasteau des coniués, qui ne fut rendue en la puissance du Roy, ny aucū personnage de nom, qui osast comparoistre, ny s'y opposer, ains se retirerent les vns en Nauarre, les autres es lieux les plus eslongnés, & moins frequētés par la cour, l'Amiral, le Comte de Benauent, D. Diego Māriquez gouuerneur de Leon, D. Pierro de Quignones, & Iean Tobar, furent de ceux qui prindrēt la route de Nauarre: à raison dequoy le Roy craignant quelque entreprise de ce costé là, vint à Burgos. Ainsi le Connestable Don Aluaro de Luna deliuré de si grands ennemis, reuint en plus grand credit qu'auparavant, & d'administrateur de S. Iacques qu'il auoit esté, fut fait maistre de cest ordre, lesquels honneurs ne furent qu'apast

de malheur qui le poursuivoit, pour le precipiter en extreme misere. Il entretenoit l'amitié des Princes de Portugal, comme pour vn dernier refuge: & au temps de ceste guerre, auoit impetré au Roy de Castille, secours de mille & six cens cheuaux, & deux mille hommes de pied, lesquels D. Pedro troisieme Connestable de Portugal, fils de l'Infant Don Pedro regent du Royaume, ieune Prince de dix sept ans, amena à Majorca apres la bataille, qui furent receus, & festoyés gracieusement: mais pource que le besoin de s'en seruir cessoit, on les renuoya payés & bien contents. En ce voyage le Connestable traitta, avec les Portugais, de faire espouser au Roy son maistre, veuf depuis cinq mois, D. Isabel fille de l'Infant D. Iean, defunt maistre de saint Iacques de Portugal, sans en rien communiquer au Roy mesme, tant presumoit il auoir de puissance sur luy. Ce mariage, avec autres choses, furent depuis cause que le Roy le print en haine mortelle.

Secours de Portugal pour le Roy de Castille.

Commencement de la haine du Roy de Castille contre son Connestable.

Le Prince D. Henry, & plusieurs autres cheualiers considerans la grande perte qui seroit, si tant de grands Seigneurs, & excellens cheualiers demeuroient estranges

de Castille, firent en sorte vers le Roy, qui de soy mesme estoit assés patient, & traitable, qu'ils obtindrent vn pardon general, pour tous ceux qu'ils auoyent portés les armes avec le Roy de Nauarre, auquel notamment restoyent les articles suiuañts, concernans l'Amiral & Comte de Benauent, assauior.

Rapel &
pardon aux
Seigneurs
refugiés en
Nauarre
& ailleurs.

Que pardon estoit octroyé a l'Amiral, lequel reuiendrait en Castille, quand il auroit congé du Roy, & se retireroit en sa maison de la Tour de Lobaton, en laquelle, & aux confins, & limites d'icelle, il seroit confiné pour deux ans.

Le Comte de Benauent auroit pareil arrest en sa maison de Benauent, pour autres deux ans, & qu'il retireroit en sa garde, & charge la Royne de Nauarre D. Ieanne, sans la laisser partir, mesme apres les deux ans expirés, sans mandement du Roy, & consentement du Prince Don Henry, & apres que le Comte mesme, & l'Amiral auoyent presté le serment de fidelité a l'auenir au Roy, & promis le seruir contre toutes personnes du monde, selon que requierent les loix de Castille.

Ces choses passées en ceste maniere, le Roy estant à Burgos, donna a D. Iean Pa-

checo, en faueur du Prince D. Henry son fils, le Marquisat de Villena.

Allors non seulement le Roy de Navarre, mais son fils le Prince D. Charles, & mesme D. Alphonse d'Arragon maistre de Calatraua, perdirēt a ce coup tout ce qu'ils auoyent en Castille.

De la maistrise de Calatraua le Roy de Castille en pourueut a Auila, Don Pedro Giron frere de D. Iean de Pacheco, & D. Alphonse, qui s'estoit retiré en Navarre avec son pere, déclaré descheu, & priué d'icelle : neantmoins Don Iean Ramires de Guzman grand commandeur de l'ordre, se fit intituler maistre, contre Don Pedro Giron : lequel desbat s'apointa puis apres, par l'entremise, & autorité du Prince, & autres grands Seigneurs de Castille. Estāt le Roy de Castille à Toledē, il osta le gouuernemēt de la cité a Pere Lopez d'Ayola, d'autant qu'il estoit partisan du Roy de Navarre, & la donna a Pedro Sarmiento.

Cependant le Roy de Navarre (qui aussi estoit comme regent en Arragon, en l'absence du Roy Don Alphonse son frere) se pouruoyoit de deniers, & tous autres moyēs, pour renoueller la guerre en Castille, où il tenoit encor deux places for-

res: assauior, Atienca, & Torrijo : & par le moyen du Comte de Foix son gēdre Gaston, qui auoit espousé la seconde fille D. Leonor a qui puis apres escheut la succession du Royaume de Nauarre pretendoit de tirer quelque notable secours. En Atiença estoit capitaine messire Rodrigo de Robelledo, avec deux cens hommes de cheual, & quatre cens pietons: lesquels par continuelles courses, tenoyent le pays au long, & au large, a plusieurs lieux a l'étour, en alarme, tuans, bruslans, & emmenans tout ce qu'ils rencōtroient, dont les plaintes ordinaires estoient faictes souuent au Roy de Castille: parquoy furent ordōnées quelques compagnies de caualerie en ceste part, pour reprimer ces coureurs, iusques a tant qu'on eut mis vne iuste armée ensemble, pour assieger la place. Pour mieux donner ordre, & vaquer a ceste guerre: le Roy accorda quelques petites querelles, que le Prince son fils mouuoit, & octroya liberté a l'Amiral, & Comte de Benauent de leurs personnes, les restituant librement en leurs terres, & estats: & en outre permit que la Royne D. Ieanne, épouse du Roy de Nauarre, seroit mise es mains de son pere, & par luy gardée, ius-

ques a ce qu'il seroit ordonné, par le Roy de Castille, de la rendre au Roy son mary: fut aussi fait pardon a D. Diego Gomes de Sandoual, retenant toutesfois le Roy, les forteresses d'iceluy pour deux ans: mesme pardon octroyé a ses fils, ces choses ainsi ordonnées, le Roy de Castille vint au siege de Atienca laquelle fut batue, & assail-
lie furieusement, avec engins, & machines à l'antique, & aussi bombardes de fer, n'estant la bronce, ou la fonte encor en vſage en Espagne: tellement que Rodrigo de Reboledo, capitaine de la garnison, se voyant pressé, fit entendre au Roy de Navarre, que s'il n'estoit secouru, il ne pouvoit tenir long temps. Sur quoy le Roy de Navarre, qui n'estoit en equipage de pouvoir faire lever le siege, enuoya proposer quelques moyens de trefues a celui de Castille, lesquelles furent accordées à condition, que les deux villes d'Atienca, & Torrijo, seroyent mises es mains de la Royne Marie d'Arragon, pour quelque espace de temps limité: durant lequel seroit aduisé aux moyens d'une bonne paix entre les deux Roys: & où leurs differēts ne se pourroyent accorder que la Royne remettroit les deux places entre les mains de son

*Siege de
Atienca.*

*Celere du
Roy de Ca
stille.*

1446.

beau-frere le Roy de Nauarre. Par-ce
moyen cessans les armes, le Roy de Ca-
stille entra en la ville d'Atienca, là où me-
par on ne sçait quelle occasion, sans auoir
esgard a ce qui auoit esté capitulé, il fit sac-
cager, & ruiner quelques maisons, & met-
tre le feu en autres, dont bonne partie de
la ville demeura brulée: dequoy le Roy
de Nauarre fut fort offencé, & ne voulut
plus demeurer a l'accord, ny bailler les
chasteaux, & places a la Roynne Marie d'A-
ragon, reprochât au Roy de Castille, qu'il
auoit fauslé sa promesse: & manda à ses
gés, qu'ils exerçassent toute la rigueur des
armes, faisant du pis qu'ils pourroyent en
Castille, ce qu'ils firent, & avec tels excés,
que le Roy de Castille renuoya, l'an 1446.
Don Charles d'Arcillan, Seigneur de Los
Cameros, grand & renommé capitaine,
pour s'opposer aux pilleries, & courses des
Nauarrois d'Atienca: avec trois cens lan-
ces, & contre ceux de Torijo D. Alphonse
Carillo d'Acugna nouuellement pourueu
de l'Archeuesché de Toledé, mais ceux de
Torijo ne faisoient pas grand comte du-
dict Archeuesque, ne laissant de courir le
pays, & emmener en leur fort grãde quan-
tité de butin: ce que sçachant le Roy de

Castille commenda a D. Inigo Lopez de Mandoca, que prenant les forces de l'Archeuesque avec autres nouuelles qui luy furent ordonnés, il continua d'assiéger la ville de Torrijo, estant ja assés auant en l'année 1447. le siege fut long encor qu'il le fut furieusement batue: car messire Jean de Puellas qui la deffendoit, estoit vaillât, & experimenté capitaine, toutesfois la continue le mina tellement, que se voyant de iour à autre defaillir les hommes, les viures, & autres munitiōs necessaires pour soustenir vn siege, & n'ayant esperance du secours du Roy de Nauarre, il se resolut de rendre la place, à conditions fort honnourables, se retirant avec les siens, & ses hardes sauues en Arragon: demeurant tousiours la ville & chasteau d'Atiença en la puissance des Nauarrois, lesquels, malgré D. Charles d'Arcellan, fortoient, & couroyent le pays: & d'auantage prindrent la Peigna d'Alcaçar, forteresse au territoire de Soria, d'où ils fourageoyent faisant grand butin de bestial, & autres choses à foison, qu'ils enuoyent vendre en Arragō, où ils auoyent leur retraite, & aport assuré, comme en pays appartenant au frere de leur Prince, qui lors estoit à Naples biē

1447.

Siege de
Torrijo.

aduerti, a son grand regret de tous les troubles de Castille & Nauarre: auquel il s'employoit en tout ce qu'il pouuoit, pour les appaiser, par lettres, & Ambassades, fauorifant neantmoins, plus son frere D. Iean Roy de Nauarre. Le Roy de Nauarre estât venu aux Estats du Royaume d'Arragon, qui se tenoyent en Sarragosse, pour presider comme gouuerneur general en l'absence du Roy son frere, fut sommé par le docteur Surban, & vn Alcaide de cour Ambassadeurs enuoyés par le Roy de Castille, de deliurer la place d'Atienca, suiuant ce qui auoit esté accordé: lesquels Ambassadeurs se plainderēt aux Estats, de ce que les pillars qui endommageoyent le pays de Castille, auoyent refuge & retraicte en Arragon: a quoy fut respōdu, que par Ambassadeurs expres ils feroient responce au Roy de Castille: & tost apres furent despechez l'Euesque de Tarassonne Don Iaqués de Luna, & D. Iean de Ixar, lesquels trouuerent le Roy a Soria, avec charge de traiter la paix. Le Roy de Castille leur fit entendre qu'ils le suiussent a Vailledolit, où il estoit pressé d'aller: ce qu'ils ne voulurent faire, pour-ce s'en retournerent a ago e. sans rien faire.

Sur le commencement de l'année 1448. 1448.
les Ambassadeurs vindrent derechef trou-
uer le Roy de Castille à Vailledolit les-
quels ayant traité de plusieurs choses, cō-
clurent en fin vne trefue de sept mois en-
tre Castille & Navarre : dequoy les garni-
sons Nauaroises n'ayans eu aduis assés tost,
surprindrent la ville de sainte Croix de
Campero, appartenant a Lopez de Royas,
lequel ils emmenerent, sa femme, & plu-
sieurs autres personnes. Le Roy de Castil-
le enuoya en Navarre sommer le Prince
Charles en consequence de la trefue pour
restituer S. Croix, ce qui fut fait.

En ce temps deux Castillans se retire-
rent en Navarre assaouir l'Amiral de Ca-
stille & le Comte de Castro, lesquels fu-
rent les tres-bien receuz, & cheries par le
Roy de Navarre, qui les emmena en Sa-
ragosse, avec luy, où il fut aduisé que l'A-
miral passeroit à Naples vers le Roy d'Ar-
ragon, pour luy faire entendre tout l'e-
stat du gouvernement de Castille, & le so-
liciter de venir en Espagne, pour leur ay-
der a recouurer leurs rangs, terres & di-
gnités, ou bien qu'il permist qu'ils se peus-
sent seruir des forces & moyēs d'Arragon.

suivant ce conseil l'Amiral s'embarqua à Barcelone, & passa à Naples, où ils furent bien recueilli par le Roy D. Alphonse, & escouté en sa requeste, que ne pouvant luy mesme venir en Espagne ainsi qu'il desiroit, il despecha lettres, & mandemens aux Estats d'Arragon, de fournir au Roy de Nauarre son frere, gens armes, viures, deniers de ses rentes, & tout autre chose en telle quantité qu'il auroit besoing pour faire la guerre au Roy de Castille. Avec telle prouision s'embarquerent l'Amiral & les siens pour retourner en Espagne, ayant receu dons & presents, & tout autre bon traitement arriua vers le Roy de Nauarre, lequel fort content de si fauorable despesche, conuoqua les principaux hommes d'Arragon à Sarragosse, & leur notifia le mandement de leur Roy: sur quoy les Arragonnois ayant eu conseil, supplierent le Roy de Nauarre de ne les mettre point en querelle cōtre Castille, avec lequel royaume ils desiroient conseruer la paix, tant qu'il leur seroit possible. Plusieurs remonstrances, prieres, & protestations leur fit là dessus le Roy de Nauarre, pour les persuader: mais il ne peut gagner sur eux qu'ils allassent à la guerre avec luy: il en tira néanmoins

moins les sommes de deniers qu'il voulut, & puis qu'il ne pouuoit les induire en general, practiqua plusieurs cheualiers particuliers, desquels il en tira seruice: & pour se faire voye plus ample, & aisée a ce qu'il pretendoit, estant assés aduerti des insolences, & folies du Connestable de Castille, au grand desdain de la noblesse Castillane & dont nous parlerons peu apres pour vous dire que l'an 1449. le temps des trefues entre Castille, & Nauarre estant fini, les garnisons d'Atienca, & de la Pegna d'Alcacar commencerent a courir la campagne, faisant la plus cruelle guerre qu'on scauroit imaginer. Le Roy de Nauarre fort ioyeux, de ce que le Comte de Benauent s'estoit sauué en Portugal pour la crainte qu'il auoit du Connestable de Castille & dont celuy de Nauarre esperoit tirer secours, assembla toutes ses forces sous la conduite de D. Pedro Virea, Don Iean Fernandes de Heredia, messire Rodrigo de Rebolêdo, D. Fernand, & D. Diego enfans du Côte de Castro, & du Iustice d'Arragon, contre la ville de Cuenca. Ordonnant pour chef general son fils bastard D. Alphonse d'Arragon n'agueres maistre de Calatraua. L'armée pouuoit estre de six

mille hommes, tant de pied que de cheval
 lesquels apres auoir seiourné quelque es-
 pace de temps au siege ne la peurēt forcer,
 aussi qu'ils entendirent que le Connesta-
 ble de Castille venoit pour secourir la vil-
 le, laquelle estoit defendue par l'Euesque
 D. Frere Lopez de Bariento meilleur hō-
 me de guerre, que theologien. Au costé de
 Requeua, & Vtiel enuoya le Roy de Na-
 uarre D. Baltasart fils du Comte d'Huelua
 avec deux cens cheuaux, & cinq cens hō-
 mes de pied, lesquels courant la riuiera de
 Xorquera, fit butin d'environ dix mille
 chefs de menu bestail: a la recousse des-
 quels estant sortis les habitans de Reque-
 ua, & Vtiel, ils furent combatus & defaits,
 demeurāts trēte de leurs cheualiers morts
 sur la place, & septante qui furent emme-
 nés prisonniers par les Nauarrois, avec
 grand dissipation du surplus.

*Defaict
 des Castil-
 lans par les
 Nauarrois
 & Arra-
 gonnois.*

Puis essaya par tous moyens d'atirer le
 plus qu'il pouroit des Seigneurs de Castil-
 le, leur faisant remonstrier que s'ils endu-
 roient plus long temps le ioug du Con-
 nestable qui estoit forcené de gouverner,
 ils s'en repentiroient tard, & lors qu'ils ne
 pouroyent plus cuitter leur malheur, & la
 ruine de leurs maisons, qu'iceluy brassoit,

n'ayant autre but, que d'exterminer les grandes & puissantes familles de Castille, pour y establir ses familiers, & gens de sa façon. Sur tout desiroit le Roy de Nauarre d'amener a son parti le Comte de Haro D. Pedro de Velasco, bon cheualier ayant iustice, riche & puissant de biens, & d'amis, & auquel desplaifoit la desreglée ambition du Connestable, & l'inique prison de tant de gens de bien. Or pour l'auoir de son costé, il luy donna l'esperance de marier son fils le Prince Charles a la fille d'iceluy : tellement que la splendeur de l'estat Royal où D. Pedro verroit sa fille, si le mariage s'accomplissoit, l'esbloyt & luy fit dresser les oreilles. Cela aucunement accordé, ils enuoyerent gens prudents, & auisés vers le Prince D. Henry, & son grand amy le Marquis de Vileña D. Iean de Pacheco, & son frere D. Pedro Giron maistre de Calatraua vers D. Inigo Lopez de Mendoza Marquis de Santillana, D. Pedro d'Estuniga Comte de Plaisance, & vers D. Rodrigo Manriques grand commandeur, & qui se faisoit appeller maistre de saint Iacques, à fin de les faire ioindre a ceste nouvelle ligue contre le Connestable, a quoy ils monstrent d'entendre, &

Offre du
Roy de
Grenade.

y auoit grande apparence, qu'à ceste fois le Connestable seroit de tout point exterminé: mais tous beaux commencemens n'ont pas la suite de mesme. Le Roy de Grenade aduerti de toutes ces menées, enuoya offrir d'estre de la partie, promettant qu'il entreroit par l'Andalousie, avec toute la force de Grenade pour la fauoriser.

Le Prince Héry de Castille laissant Toledo retourna a Segobia, & ayant assigné iournée aux Seigneurs pratiqués par le Roy de Nauarre, & Comte de Haro a la Crugna, maison de Pero Lopez de Padilla, arrestèrent là de mettre leurs gens en ordre, pour se trouuer tous ensemble en tēps déterminé, à fin de commencer la guerre contre le Connestable: le Prince Castillan fut pres, & ne tarderent gueres à se joindre a luy le Comte de Haro, & le Marquis de Santillana, mais les autres ne comparurent point, mesme le Roy de Nauarre ne se trouua en equipage pour marcher si tost: parquoy l'entreprise fut rompue, & s'en estant retournés chacun en son quartier, le Prince D. Henry s'acorda avec le Roy son pere comme aussi fit le Comte de Haro, & Marquis de Santillana: & fut par

mesme moyen rompu le traité de mariage du Prince D. Charles de Nauarre avec la fille du Comte de Haro. L'Amiral, & Cōte de Castro firent aussi leur apointement, lequel ne dura gueres, car le Prince Don Henry auoit ses oppinions a part, lequel soustenant le maistre de Calatraua D. Pedro Giron, contre D. Alphonse d'Arragon, rendit les efforts qu'il fit, pour entrer en la maistrise, inutiles & vains. L'Amiral de Castille, & Comte de Castro, ne pou-^{1451.} uant demeurer en seurté de leurs personnes en Castille, retournerent en Nauarre, & aussi pour-ce qu'on leur tenoit peu, de beaucoup de choses qu'on leur auoit promises : le Roy de Castille, estant comme sembloit de bõ accord avec le Prince son fils, pour faire la guerre au Roy de Nauarre, baille au Cōnestable de Castille le gouuernement de la ville de Toledo, cependant le Prince s'acheminoit vers la frontiere de Nauarre avec son armée Castillane, laquelle entra par l'endroit de Viane, qu'elle ne peut forcer, ayant le Roy de Nauarre bien pourueu & muni toutes les places de la frontiere, partant passa à Torralba, la garnison duquel lieu faisant vne rude saillie sur les Castillans, les mit presque

*Deuise du
Prince D.
Charles de
Navarre.*

en desordre, estant capitaine dans Torralba D. Iean de Beaumont prieur de saint Iean du Royaume de Nauarre. Somme il fit si bien qu'ils desemparèrent, & allerent par le quartier de Berrueça, mirent le siege deuant la cité d'Estella, dás laquelle estoit capitaine, & gouuerneur pour le Roy de Nauarre Lopez de Baquedam, là vint le Roy de Castille se ioindre avec le Prince son fils, amenant grande puissance quant & luy. Il est croyable que ce fut en ce voyage, que le chasteau de Buradon fut prins, & rasé: dequoy le Prince D. Charles, qui avec le conseil Royal gouuernoit le Royaume en l'absence du Roy son pere, fut si marri, a cause que c'estoit la meilleure forteresse de Nauarre, qu'il estima que c'estoit fait du reste du Royaume: & dit on que cōme hors d'esperāce, il print vne deuise de deux leuriers rongeans vn os, signifiens pour l'os, le Royaume de Nauarre.

La cité d'Estella estant furieusement battue, le Prince D. Charles fut d'auis de venir parler au Roy en son camp: ayant dōcques obtenu d'iceux saufconduit, il fut par eux reccu humainement, & ses bonnes, & bien dites raisons si fauorablement escoutées, qu'ils furent comme contraints, par

son honnesté, & bonnes façons, de leuer le siege, à quoy vne bien grande armée, à peine les eut peu côtraindre: tant a de force la vertu, qui se forme par bonne nourriture en vn naturel magnanime: & à la verité, on n'eut sceu, selon le rapport des auteurs, trouuer en cest aage Prince plus genereux, ny mieux appris, que D. Charles de Nauarre: car outre les dons naturels de beauté, douceur, affabilité enuers tous, & hauteſſe de courage au beſoing, il estoit orné de ſaincte doctrine, qui regissoit ſes gentilles mœurs, & de plusieurs belles, & louables ſciences, par lesquelles il estoit admiré en ſon tēps, le rendit fameux apres ſa mort, il aymoît la poëſie, estoit verſé aux hïſtoires, aſſés ſubtil Philoſophie: tellement qu'il translata en langue Caſtillane les Ethiques d'Ariſtote, faiçtes latines par Leonard Aretin, qui florissoit de ce tēps: en quoy il monſtra grande dexterité, & iugement, traictant celle matiere avec termes, & vocables ſi propres qu'il ne ce pouoit mieux faire: ce liure fut par luy dedié au Roy D. Alphonſe d'Arragon ſon oncle. Il eſcriuit outre-ce vne brefue chronique des Roys de Nauarre ſes progeniteurs, commençant des plus anciens temps, iuf-

La vertu plus forte que les armes.

Eſcrits du Prince D. Charles.

ques au Roy D. Inigo Arista, & de là continuer l'histoire iusques au regne du Roy Charles son ayeul, laquelle chronique se trouue encor auiourd'huy escrete a la main pleine de fautes commises par les compistes: car elle n'a oncques esté imprimée. Il escriuit aussi quelques vers, employât ainsi en ses honnestes exercices le temps qui luy aduençoit, en ses occupations, au gouvernement du Royaume, si que ce Prince fut cheri, aymé, & benit d'un chacun, exemple de son propre pere, auquel il s'ingera de demander le Royaume de Nauarre, son propre heritage paternel, qui luy causa grands troubles, & extremes aduersités, esquelles il fit preuue de sa magnanimité, & singuliere patience, qui fut mieux connue, & regretée apres sa mort. Estant d'oc leué le siege de deuant Estella, le Roy de Castille & le Prince son fils sortirent de Nauarre, sans plus y faire aucun dommage, & retournerent à Burgos. L'Amiral de Castille venant en Nauarre amena avec luy sa fille, & la liura au Roy son mary. Estant doncques ensemble ces mariés, il ne se passa gueres de temps, que la Royne se sentit grosse, residant a vn lieu d'Arragon appellé Fresne; parquoy le Roy Iean

fort ioyeux de ceste nouuelle, la fit aller en Nauarre, pour y faire ses couches: elle fit sa demeure en la ville de Sanguesse le reste de l'année 1453. & là entendit avec le Prince D. Charles, & le conseil du Royaume, aux affaires, & gouuernement d'iceluy, a ce consentant le Roy son mary, mais non gueres au gré de plusieurs cheualiers Nauarrois, seruiteurs affectiōnés du Prince Charles, mesmes de ceux de la famille, & faction de Beaumont: estimant que l'autorité d'une marastre ne pouuoit apporter au Prince, ny au Royaume bien, ny repos aucun.

1453.

*Premiere
inimitié
entre la
marastre
& le beau-
fils.*

Et pour autant que nous auons cy deuant promis de raconter en bref la vie du Cōestable de Castille D. Aluar de Lune, qui de fort petit lieu par les faueurs du Roy deuint l'un des plus puissants du Royaume, laisserons vn peu a parler des affaires de Nauarre pour parler d'iceluy Cōestable, car ja approchoit le temps de sa punition, estant paruenue au comble de ses iniquités, desquelles luy mesme pourchassa la iustice par son audace, & effrené appetit de vangeāce. Il haïssoit mortellement le Comte de Plaisance D. Pedro d'Estuniga, & estoit pareillement de

Entreprise
contre le
Connestable.
Etc.

luy hay. Contre ce Comte le Connestable dressa vne ambuche, pour le constituer prisonnier. Le Comte estant aduerti de ce qu'on luy brassoit, communiqua ses desseins avec le Prince, le Marquis de Santillana, le Comte de Benauent, celui de Haro, & autres qui estoient de perdre la vie, ou la faire perdre au Connestable, pour-ce firent ensemble vn complot, que le Comte de Plaisance, & le Marquis de Santillana enuoyeroient leurs aînés, avec cinq cens lances, sous pretexte d'une querelle qui estoit entre le Comte de Benauent, & D. Pedro Aluarez Osorio : & que passant prez de Vailledolit, où le Roy & le Connestable estoient, ils trouueroient moyé de se saisir d'une porte, & mettans leurs gens en la ville, prendroient, ou tireroient le Connestable, publians que cela se faisoit par le commandement du Prince D. Henry. Tout cela vint a rien, car le Connestable en fut aduerti : toutesfois la Royne Isabel peu amie du Connestable sollicita les conjurés de se haster, ce-pendant qu'elle desiroit y tenir la main, leur despechant la Comtesse de Ribadeo sous pretexte de venir visiter le Comte de Plaisance son oncle. Ceste Ambassade faicte

au Comte, le refiout grandemēt: & pour-
 ce qu'il estoit empesché de sa personne
 despecha promptement son fils aîné D.
 Alvaro d'Estuniga avec septante lances,
 avec lesquelles il vint à Burgos par vne
 nuit d'un Lundy premier May 1453. Le
 Roy sçachant toutes ces choses, entra en
 opinion que cest emprisonnement ne se
 pouuoit faire sans grand scandale, & par-
 tant enuoya dire a D. Alvaro qu'il s'en re-
 tournast a Curiel, car il ne pouuoit execu-
 ter ce pourquoy il estoit venu: Mais Don
 Alvaro cheualier courageux & hardi, luy
 respondit, que sur sa vie il faisiroit le Con-
 nestable, & le luy rendroit pris: & que seu-
 lement il luy pleut bailler vne ordonnan-
 ce, & decret de prinse de corps, ce que le
 Roy luy fit expedier en telle teneur. Don
 Alvaro d'Estuniga mon Alquazil majeur,
 ie vous commande que vous preniés au
 corps D. Alvaro de Luna maistre de saint
 Jacques: & s'il se met en defense, que vous
 le tuez. D. Alvaro d'Estuniga venant à
 la maison du Connestable pour le pren-
 dre, ne le peut auoir, ains tirerent les vns
 sur les autres: en fin Don Alphonse de
 Carthagenas Euesque dudit lieu, & Ruis
 Dias de Mandoça, ausquels le Conne-
 stable monté a cheual se rendit, le Roy

*Decret cō-
 tre le Con-
 nestable.*

le fit conduire a Portillo , où le Roy alla peu apres & là faist grande quantité de monnoye appartenant au Connestable qu'il fit mener a Vailladolid, puis commanda que son proces luy fut fait , ce que fit son procureur Fiscal avec douze iuriscultes delegués , & comme conuaincu d'auoir attenté sur la couronne de Castille, & auoir commis plusieurs actes tyrāniques, fut condamné d'auoir la teste tranchée, laquelle fichée sur le bout d'un poteau demurerait par l'espace de neuf iours en spectacle, ce qui fut fait. Tous ses biens furent confisqués qui estoient tres-grands, car il possedoit cinq Comtés , & septante tant chasteaux qu'autres places , pouuoit cōter sur ses terres plus de vingt mille vassaux sans les dependans de sa maistrise & ordre de saint Iacques, & auoit de reuenue par an plus de cent mille doubles ducats, sans ses estats & offices : toutes lesquelles choses luy estoient aduenues par la liberalité du Roy. Il estoit homme caut, & dissimulé, soupçonneux, enuieux, ennemi, & persecuteur des grands : ce qui luy cousta la vie: vanteur & ostentateur de sa race, & progeniteurs , ne se souuenant point du train de sa mere, qui luy rendoit son origi-

*Mœurs &
qualité de
Connesta-
ble.*

ne fort douteuse. Au reste il estoit bon homme d'armes, & adroit cheualier, fort & robuste de corps, encor qu'il fust de petite stature, mais bien composé : hardi à la guerre, aduisé, fort, & afable & conuersable en cour, gracieux enuers les amis, discret en ses propos, & assés eloquent, & pourueu de bonnes raisons. Or d'autant que le Roy auoit tout pris son bien, on mit vn bassin d'argent a l'endroit où estoit sa teste, à fin que ceux qui vouloyent dōner quelque chose pour l'enterrer, le ietassent dedans : dequoy on recueillit beaucoup d'argent. C'est chose notable qu'ayant vn iour, enquis certains mathematiciens, de ses aduentures aduenir, comme il luy fut respondu qu'il mouroit sur eschafaud, que les Espagnols appellent Cadahalso, il s'en alla souuenir, qu'il auoit vne place qui s'appelloit Cadalso, dans laquelle il ne voult oncques mettre les pieds : mais il monta sur vn autre Cadahalso, dont il ne s'estoit douté. Le Roy D. Iean doncques le fit mourir, comme rebelle & criminel de leze Majesté, encor qu'il n'eut oncques rōpulations, ny porté les armes contre l'estandart Royal, celuy qu'il auoit tāt aimé, plus à la petit d'autrui, que pour le deuoir

*Deuins
trompent le
Connestable.*

1454.

qu'il auoit à iustice, & plus par lascheté de cœur, que poussé de bon iugement, & de vertu. Or ne suruescut-il gueres à son Cō- nestable, & mourut de violence, d'une fi- ure quarre a Vailledolit l'an 1454. peu auāt sa mort il auoit fait accord avec le Roy de Nauarre, lequel son fils Henry dit l'impuis- sant ratifia encor mieux, donnant pension annuelle au Roy de Nauarre, pour les pre- tensions qu'il demandoit sur la Castille.

Ce fut en ce temps auquel eurent com- mencement les maux & calamités de Na- uarre, pour les partialités qui s'esmeurent en iceluy pour telle occasion. Le Prince de Viana D. Charles estant doué de gran- des vertus, & en aage florissant, auoit en l'absence du Roy D. Iéan son pere, gou- uerné le Royaume de Nauarre sainctemēt, & en grād iustice, au cōtētement de tous avec le bon conseil des Seigneurs du pays, notāment de Louys de Beaumont. Quand son pere s'estant ioint, en secondes nopces a D. Ieanne Henriques fille de l'Amiral de Castille, voulut quelle participast au gou- uernement, ce qui fut trouué mauuais par plusieurs, lesquels inciterent le Prince, qui estoit heritier legitime du Royaume, de ne permettre que ceste marastre s'ingeraſt

D. Char-
les ne peut
souffrir v-
ne femme
gouverner
son Royau-
me.

de commander en sa possession. Le desir de regner, qui chatouille toutes grandes, & magnanimes natures, poussa si auant le Prince D. Charles, obeissant iusques alors au Roy son pere, qu'il luy declara l'intention qu'il auoit de iouyr seul de son droict en son heritage maternel, auquel sa belle mere n'auoit aucune part: & de faict se pre-
paroit de la mettre hors du pays, & de resister au Roy son pere, s'il se vouloit opposer a sa volonte: & en somme essayer d'auoir ce qu'il pretendoit par la voye des armes. De ceste querelle pernicieuse, & qui succeda mal au fils contre son pere, sourdirent les deux factions qui infesterent le Royaume de Nauarre par longues années des Beaumontois, & Grammōtois, noms prins de deux puissantes familles, assauoir, celle de Beaumont delà les Pyrenées, & celle de Grammont au deça du costé de France, combien que celle de Beaumont eust eu son origine de Normandie, & se nommast premierement Lusé: neant-
moins toutes deux d'ancienneté issues du sang Royal de Nauarre, ce que tesmoignent les armoiries de ces deux maisons, & mesmes le chef de la porte Grammontoise, qui sont les Marechaux

*Factions de
Beaumont
& Gram-
mont en
Nauarre.*

*Maison de
Lusé.*

du Royaume, Maquis de Cortes, ne s'intitulent de Grammont, mais de Nauarre. Or estant lors messire Louys de Beaumont Connestable de Nauarre, chef de sa famille, luy & les siens prindrēt le parti du Prince. La maison de Grammont & ses adherans au contraire, soustenans la querelle du Roy contre son fils, & d'icelle estoient chefs messire Pierre de Peralta, qui à l'occasion de ces tumultes, fut fait Connestable. Les raisons du fils estoient, qu'estant fils, & legitime heritier de D. Blāche Roynne proprietaire de Nauarre, il luy appartenoit de regner, mesme attendu que le Roy son pere estoit conuolé en secondes nopces, ce qui le deboutoit de tout droit, & action qu'il y pouuoit auoir & pretendre. Le Roy au cōtraire, disoit, que par accord, en mariage faisant, auoit esté dict, que fust qu'il eut enfans, ou nō, de luy & de la Roynne D. Blanche, il regneroit sa vie durant: lequel article auoit esté iuré par les Estats du Royaume, & partant deuoit auoir lieu. Ce point debatoit le Prince comme chose faicte a son preiudice, illicite en droit, & pource non valable: car comme par les loix du Royaume, de deux mariés, le suruiuant iouyt des biens de la partie defuncte,
par

n'y fust, tant qu'il demeure en vidui-
 , aussi pert-il droit, s'il se remarie. Or e-
 oit la question, si la condition appofée
 contract de mariage, en faueur du Roy
 Jean, faicte contre lestoix de Navarre,
 au preiudice du Prince son fils, faisoit
 cause bonne, mais quel que fust ce droit,
 n vint aux armes. La Royne D. Ieanne,
 esidente en Estella aduertie de ce que cō-
 iroit D. Charles, le fit sçauoir inconti-
 ent au Roy son mary, lequel vint d'Arra-
 gon en Navarre, avec bon nombre de gēs
 le guerre, auxquels se ioignirent les Gram-
 montois: Premièrement, il essaya, par Am-
 bassades, & pourparlers, de diuertir le
 Prince son fils de ceste poursuite peu hon-
 orable, par laquelle, disoit-il, il souilloit le
 lustre des races de Navarre, Castille, Ar-
 agon, & France, dont il estoit descendu:
 & estoit l'affaire reduitte en assēs mauuais
 termes entre pere & fils, par les bonnes rai-
 sons des Ambassadeurs, du Roy D. Iean, *Chefs de*
 ans le conseil des chefs de la part, de la fa- *part &*
 tion Beaumontoise, qui retindrent le *mauuais*
 Prince en son premier propos, de vouloir *conseil em-*
 ouyr absolument de son Royaume, & les *peschent la*
 Grammontois, lesquels irritoyent le Roy *paix entre*
 contre son fils, estimans, comme il est *pere & fils.*

1456.

*Le Prince
Charles se
fait appel-
ler Roy de
Navarre.*

croyable, l'une part & l'autre, par ces troubles, adiouster quelque chose à leurs estats, biens & honneurs, plus que si le Royaume estoit tranquille. Toutes negotiations, & traité de paix cessans, le Prince fit assemblée de gensdarmes, tant chevaliers, que du peuple de son parti, & se porta pour Roy l'an 1456. donnant priuileges, franchises, & graces, & faisant autres actes Royaux, dont les lettres se trouuent encor de ce temps en la ville de Toralba, & autres endroits du pays. Conuoqua aussi de Castille aucuns siens amis, dont quelques troupes entrans par l'endroit de Logroño en Nauarre, furent desfaites pres de Viane, par le Roy D. Iean, lequel comme sage capitaine, leur alla au deuant, ne voulant attendre que toutes les forces de son fils fussent assemblées auant que le combattre: Apres lequel exploit y eut diuerses rencontres entr'eux, avec victoire ambiguë, és enuiron, d'Estella, Pampelone, Olite & Lombier, tant que la derniere bataille de ceste premiere guerre ciuille se donna pres de la ville d'Ayuar, en laquelle, par la vertu, & vaillance de messire Pierre de Perault, & Lopez de Castillo, & autres de la faction Grammontoise, les

Beaumontois furent vaincus, & le Prince Charles fait prisonnier, lequel fut mené à Tafalla par le commandement du Roy, qui s'y trouua aussi tost apres, & essaya de l'amener à quelque moyen de paix : ce que le fils, mal conseillé, mesprisa : & qui fut pis, essayant d'inciter les Roys voisins à prendre la defense de sa cause, fut surprins vn paquet, qu'il enuoyoit au Roy Don Alphonse de Portugal, par lequel furent sceus plusieurs traictés : à raison dequoy il fut reserré au chasteau de Montroy. Les factions sur celà s'aigrirent de sorte, que par toutes les villes du Royaume, entre mesmes citoyens, & voisins, les maisons & familles se bāderent l'vn contre l'autre, dont sortirent infinies cruautés, meurtres, bruslemens, & autres diaboliques effects, & impietés des guerres ciuilles. La prison du Prince estoit si ennuyeuse a Don Louys de Beaumont Comte de Lerin, qu'il ne cessa, par diuers moyens & assurances qu'il donna, qu'il n'eut obtenu du Roy la deliurance d'iceluy : pour lequel mesme (tant luy estoit-il affectiōné) il bailla sa personne propre en ostage, demeurāt prisonnier l'espace de 7. ans. Mais quand le Prince fut en liberté, il

*Des faite
du Prince
D. Charles.*

*Sedition
par tous les
endroits du
Royaume
de Navarre.*

*Grande a-
mour du
Comte Le-
rin mesire
Louys de
Beaumont.*

*Seconde de-
faicte du
Prince D.
Charles.*

n'eut fautes de conseillers, qui l'animèrent de venir derechef a la guerre : car l'appetit de dominer n'a point de frein, specialemēt aux enfans des Roys. Laisant doncques le Comte de Lerin tenir ostage, il reprit les armes, & se remit aux champs pour la seconde fois, & lors retournerent les factions de Beaumont, & de Grammont a suiure chacū son parti, & faire plus estrange, & barbare guerre qu'auparavant, dont le Royaume, en general, se sentit plusieurs années apres. La fin fut, que le Prince fut desfait derechef prez d'Estella, & ses gens dissipez, mais il se sauua a course de cheual, ayant resolu de ne pour suiure plus ceste guerre, si peu heureuse a luy, s'achemināt a Naples vers le Roy Don Alphonse son oncle, laissant les gens de son parti en grand trauail, & dāger en Nauarre, où les semences de discorde entre les deux factions cōtinuerent despuis assēs souuent.

Le Prince D. Charles trauersant la France, & Italie, y fut par tout reccu avec grand honneur, mesme a Rome par le Pape Calixte Espagnol, mais singulierement le festoya, & honnora son oncle, admirant sa sagesse, les graues & Royalles façons d'iceluy, respondantes fort bien a ce qu'il en

auoit entendu par renommée : & desirieux de le voir en bon mesnage avec le Roy D. Jean son pere , s'employa fort a les pacifier ensemble, faisant en cela tous offices de bon parent, & de Prince Chrestien : car il luy remonstroit ordinairement le deuoir que les enfans ont enuers leurs peres , auquel les Princes se doiuent plus estroictement submettre que les autres, comme ceux aux mœurs desquels tous les subiets ont accoustumé de se façonner : escriuant d'ailleurs au Roy D. Jean ce que il pensoit pouuoit seruir a luy faire aymer, & desirer la presence de son fils , mais ce bon & vertueux Roy n'eut le moyē d'accomplir vne si sainte & loüable entreprise , empesché par sa mort , qui suruint au chasteau neuf de Naples, l'ā 1458. en l'an lxxv. de son aage : On ne scauroit penser avec cōbien d'honneur, & de faueur il cherissoit les gents de lettres , ayant coustume de dire souuent, que le Roy sans lettres, est vn asne couronné : laquelle sentence il auoit leuē en vn proësme, deuant la traduction Espagnole, du liure de la cité de Dieu : & pource il employa partie de son temps à l'estude des lettres , mesme il translata heureusement les Epistres de Senecque, disoit souuent

Bon office
du Roy D.
Alphonse
d'Arragon.

1458.

auoir leu quatorze fois le viel & nouueau testament, lisoit souuent Tite Liue, & les commentaires de Cesar.

Or estant D. Alphonse Roy d'Arragon mort, plusieurs villes, & aucuns des grâds Seigneurs, mesme du Royaume de Naples, inciterent le Prince Don Charles de Nauarre de s'ingeret en celle couronne Napolitaine, laquelle ils luy offroyēt: mais il leur fit responce telle, qu'ils cognurent qu'il auoit aprins a estre modeste, & a suivre l'equité & iustice, ne se voulant ietter temérairement en la possession d'autrui, & pour ne donner aucune mauuaise opinion de luy, il passa en Sicile, Royaume escheu, par la mort de D. Alphonse, au Roy son pere, avec ceux d'Arragon & Sardaigne, Maiorque, Valence, & principauté de Cattelogne, en laquelle, par droit des fils aînés des Roys d'Arragon, il venoit a acquerir la principauté de Gironne, des-lors, & le droit de successiō en tous les Royaumes à l'aduenir. Il fit en Sicile quelque sejour, aymé & honoré des Siciliens, pendant lequel il eut priuauté amoureuse avec vne damoiselle tref-belle, mais de basse estoffe, nommée Capa, de laquelle il engendra deux enfans, l'un nommé D. Phi-

l'ipe de Nauarre & d'Arragon, qui fut maître de l'ordre de Montesa, qui mourut en la guerre de Grenade, au seruice du Roy Ferdinand son oncle: l'autre s'appella D. Ieá, lequel fut Euesque d'Huesca: il eut aussi vne fille nommée D. Anne de Nauarre & Arragõ, qui fut Duchesse de Medina Celi, femme de D. Loys de la Cerde: mais il est incertain si elle estoit née de ceste mere.

*Genealogie
de Nauarre
& Arragõ.*

Durant ce temps, le Roy D. Iean de Nauarre prenoit possession paisiblement du Royaume d'Arragon, a luy escheu par la mort de son frere. Vers iceluy arriuerent Ambassadeurs de la part du Prince Don Charles son fils, pour le suplier, que les fautes passées oubliées, il le receut en grace: à quoy le pere ne repugna pas beaucoup, car il estoit pour lors assés tendre enuers les siens, notamment enuers le Prince Don Charles, lequel estant continuellement sollicité par ceux de la faction de Beaumont, qui se maintenoient en Nauarre dans quelques forts, & continuoient la guerre, ne pouuans sans luy accommoder leurs affaires, desiroit de retourner en Espagne pour leur ayder ou a obtenir paix, ou a se garantir par les armes. Ayât eu dōcques responce à son gré du Roy son pere.

1459. il partit ceste année 1459. de Sicile, menant en sa compagnie grand nombre de Seigneurs & gentilshommes Siciliens, & autres, & vint surgir a Barcelonne, où estant le bien venu, & receu par les Barcelonois, avec grand honneur & pompe, il fit si bié, que le Roy pardonna, en sa faueur, à tous les Beaumontois, & declara qu'il vouloit que tout ce qui estoit passé fut enseuely, & couuert a perpetuel oubly : estans de l'obeissance, & fidelité du Prince enuers le Roy, & de la sincere volonté du Roy enuers son fils, furēt caution les Cattelās. La recōciliation d'entre le pere & le fils, faicte au grand contentement de tout le Royaume, le Roy D. Iean se voyant Prince puissant, pensa aux moyens de recouurer les terres qui luy auoyent esté confisquées en Castille, & pour y paruenir, traieta ligue avec le Roy de Portugal D. Alphonse, & accorda le mariage d'entre le Prince son fils, & D. Catherine de Portugal, sœur du Roy D. Alphonse, & de D. Ieanne Royne de Castille: en laquelle ligue entrerēt l'Archeuesque de Toledē D. Alphonse Carillo d'Acugna l'Amiral D. Federic beau pere du Roy D. Iean, D. Pedro Giron maître de la Calatraua, & tous les Manriques

*Nouveau
desseing de
troubler
Castille.*

de Castille, & autres: dequoy ayant le Roy D. Henry de Castille senti quelque vent, par l'Archeuesque de Seuille D. Alphonse de Fonseca, il fut aduisé par le conseil, que on enuoyeroit l'Euesque de Lite Rodorigo & Diego de Ribera, Ambassadeurs en Arragon, sous couleur de se coniouyr en son nō de la bien venue du Prince Charles, & de sa reconciliation avec son pere: & cependant avec charge d'offrir au Prince toute amitié, & traicter avec luy secretement le mariage de D. Isabel de Castille sœur du Roy. Les Ambassadeurs ayant executé leur commission fort dextrement mirent au cœur du Prince Charles nouveaux pensemens, qui le firent entrer en esperance de pouuoir, par le moyen du mariage de Castille, & la faueur qu'il auroit en consequence d'iceluy, obtenir son Royaume de Nauarre: parquoy il laissa l'Infante de Portugal, laquelle a ceste cause se retira au monastere de sainte Clere de Lisbonne, où elle passa ses iours en virginité, mourant quelque temps apres, ainsi qu'elle estoit acordée avec le Roy Edouart d'Angleterre, quatriesme de ce nom. Aussi peu s'effectua cest autre mariage, pour la briefueté des iours du Prince D. Charles,

*Appetit de
regner su-
reur indom-
prable.*

*Bessarion
Cardinal.*

ayant Dieu ordonné que ceste Princeſſe fut eſpouſe du frere puisnay d'iceluy. Sur l'eſperance du ſupport de Caſtille recommença le Prince D. Charles à encourager ceux de la partialité de Beaumont, & a ſoliciter pluſieurs Cattelās pour remuer les choſes en Nauarre, & Arragon: car l'eſprit vne fois enſorcelé de l'appetit de regner, ne peut ſe contenir. C'eſtoit au temps que le Cardinal Beſſarion, homme docte, de nation Grec, eſtoit adminiſtrateur perſetuel de l'Egliſe de Pampelone, par le decès de l'Eueſque D. Martin de Peralta.

Le Roy D. Henry de Caſtille ayant, par ſon prudent conſeil, rōpu ceste ligue d'entre Nauarre, Arragon & Portugal que luy tramoit D. Iean Roy de Nauarre, ſe mit a perſecuter ceux de ſon Royaume qui ſ'y eſtoient ioints. Et pour ce qu'il eſtoit certain que le maĩſtre de Calatraua y eſtoit entré, il monſtra fort māuuais viſage au Marquis de Villena ſon frere, mais il fut ſi adroit, & aduiſé, qu'il ſe iuſtifie enuers le Roy, & luy oſta tout le ſoupçon qu'il en eut. De là aduint que les deux freres, conceurent vne haine mortelle contre l'Archeueſque de Seuille.

1460.

L'année 1460. le Roy D. Iean de Nauar-

e & d'Arragon, fit conuoquer les Estats
 de la principauté de Cattelogne a Lerida,
 & assigna ceux d'Arragon a Fraga. A l'as-
 semblée de Lerida comparut le Prince D.
 Charles: où pendant qu'on confere des
 affaires, vn gentilhomme nommé Iean
 Carillo presenta au Roy lettres de creâce
 de l'Amiral de Castille Don Federic son
 beau-pere, & par luy fut aduerti de tout ce
 qui estoit passé entre le Prince son fils, &
 le Roy D. Henry: adioustant, que ceux de *Le Roy de*
 la faction Beaumontoise, incités par le *Navarre*
 Prince Don Charles, se preparoyent a la *aduerti de*
 guerre, auxquels se ioindroyent les Cat- *toutes les*
 relans: ce qui troubla grandement le Roy: *entreprises*
du Prince
Charles.
 parquoy ayant eu sur-ce l'aduis de ses
 plus priués, & fidelles conseillers, il fit ap-
 peller le Prince en vne chambre à part, &
 là luy ayant déclaré ce qu'il sçauoit de ses
 menées, & pratiques: le reprint aigremēt,
 disant, qu'il estimoit auoir engendré vne
 furie, qui incessamment le tourmentoit, &
 troubloit ses Royaumes, retóbant tant de
 fois en rebelliō, & abusant de sa douceur,
 & indulgence paternelle: mais que le tēps
 estoit venu qu'il falloit vser des remedes
 opportuns à sa forcenerie, & le reprimer,

Prison du
Prince D.
Charles.

Cattelans
intercedent
en vain
pour le
Prince.

& chastier de sorte, que le malheureux exemple de le voir pere & fils viure en continuel soupçon des aguets de son fils cesseroit en sa maison: A quoy voulant respondre le Prince, il ne fut escouté, ains, par ordonnance du Roy son pere, estant arresté, fut condamné de tenir estroitte prison au chasteau de Mirauet: toutesfois à la supplication de plusieurs grands Seigneurs, auxquels cela sembloit trop rigoureux, il fut mené en plus douce prison sous bonne & seure garde en la Aliaferie de la cité de Sarragosse, au grand desplaisir des Royaumes de Nauarre & d'Arragon, & pareillement du Roy de Castille, lequel estant en la ville de Madril, fut aduerti tost apres de ceste detention du Prince Charles. Avec iceluy fut aussi emprisonné Don Iean de Beaumont frere du Cōnestable D. Louys. Les Cattelans qui estoient respondants de la reconciliation faicte entre le pere, & fils a Barcelonne, entendants ces nouuelles, enuoyerent promptement vne Ambassade; vers le Roy de quinze personnaiges de grande autorité, pour sçauoir de luy la cause de la captiuité du Prince, d'autant qu'il leur sembloit, que le Roy, en ce, auoit cōtreuenu a l'assurance qu'ils auoyent

aide pour luy, de le bien traiter & aymer paternellement. Ayans entendu du Roy que c'estoit pour conspiration, & intelligences qu'il auoit avec ses ennemis, contre les Estats, & sa personne, estât ceste la troisieme fois qu'il estoit tombé en ce crime de rebellion, ils vserent de plusieurs prieres & requestes, en faueur, & pour la deliurance du Prince : mais voyans qu'ils ne profitoyent en rien, ils s'en retournerent, & rapporterent la responce du Roy à ceux qu'ils auoyent enuoyés. Alors les Cattelans forts indignés, adiouterēt a ces quinze encores soixante autres Ambassadeurs, qu'ils renuoyerent de rechef à Lerida, vers le Roy, auquel l'Abbé d'Ager, chef de ceste Ambassade, ayant remonstré avec grande liberté, le resentiment que les Cattelans auoyent de la prison du Prince de Viana, & de Girōne, son fils, lequel s'estoit asscuré d'estre cheri, & amiablement traicté par luy, sur les promesses & cautions qu'ils en auoyent faictes, estimants d'estre par icelles suffisamment muni, contre les calomnies, & aguets de ses aduersaires, principalement de l'Amiral D.Federic, qui machinoit euidentmēt, & par tous moyens d'exterminer l'aîné & legitime heritier des

Bonne &
grande af-
fection des
Cattelans
enuers le
Prince D.
Charles.

Royaumes de Nauarre, d'Arragon, & des autres Estats annexés à celle couronne, à fin desfleuer, & amener en iceux les enfans de sa fille, contre tout droit & pieté, protesta, que tous les Estats de la principauté de Cattelogne employeroient vies, biens, amis & tous autres moyens qu'il scauoir estre amples, & grands en celle Prouince, pour guarentir le Prince Don Charles de toute iniure, & le deliurer d'une si inique detention: Partant le supplia d'aduiser, avec affection paternelle, à la requeste qu'ils luy faisoient de mettre iceluy en pleine liberté, & l'oüir en ses iustificatiōs, ne precipitant point les iugemēs en cause si graue & importāte, pour complaire à la Royne sa femme, ny au pere d'icelle: euitāt par bon, & prudent conseil, les grands troubles, & miseres, qui s'en pouroyent ensuiure, si autrement il en vsoit. A ces rudes propos, & pleins de menaces respondit le Roy, avec grande moderation, & grauité, concludant, qu'il scauoir faire iustice, & n'estoit deliberé de laisser son propos de chastier son fils, tāt de fois rebelle, & abusāt de sa clemēce, par aucune passiō, ny importune sollicitation de ses subiets. Les Ambassadeurs ayans escrit, & en-

uoyé ceste responce, soudain s'ensuiuit
vne manifeste reuolte des Cattelans, les-
quels ayans assemblé grand nombre de
gens de guerre, & obtenu, par leurs Am-
bassadeurs enuoyés a Segobia, secours du
Roy D. Henry de Castille, de mille cinq
cens cheuaux, sous la conduite du com-
mandeur Gonçalo de Sehauedra, auance-
rent ces forces vers Lerida, en intention
de se saisir de la personne du Roy, & met-
tre à mort tous ceux de son conseil, & par-
ti: Et pour plus aisement executer leur en-
treprise, eurent secrette intelligence avec
plusieurs courtisans, dont les principaux
estoyent François d'Espla, Gerard Cer-
uillon, & Jean Agullon: mais Dieu gua-
rentit le Roy, & les siens d'une si furieuse
coniuratiõ, descouuerte sur le point qu'on
la deuoit executer: neantmoins si à temps,
que le Roy eut loisir d'euader par la porte
des freres prescheurs, nonobstant que
Don Pedro d'Vrrea Archeuesque de Ta-
ragonne, l'un des Ambassadeurs de Cat-
telogne, le conseillaist de n'abandonner la
ville de Lerida, ains faire teste en icelle
à ses aduersaires, l'aduis duquel estoit
approuué par tous les autres Seigneurs
qui se trouuoient là assemblés.

*Entreprise
cõtre le Roy
D. Jean.*

*Les conjurés
faillent.*

Le Roy ne fut pas plus-tost sorti, que les conjurés entrèrent au palais, pensans d'y faire le massacre ordonné : mais ils le trouverent vuide, dont ils furent tres-mal contents. Le Roy se retira à Fraga, où les Ambassadeurs auoyent delibéré de le suivre, & essayer encor de l'induire à misericorde envers son fils, estimãs que l'essay & commencement des troubles qu'il auoit voulu fleschiroit, & ameneroit à quelque douceur : mais ils changerent d'aduis, & sans luy faire autre instance, s'en retournerent en Cattelogne. Les forces des conjurés furent dressées cõtre Fraga, où le Roy estoit, lequel a ceste cause, se retira a Sarragosse, leur laissant la ville en proye. Cependant les Barcelonnois prindrent prisonnier D. Louys de Requesens leur gouverneur, ceux de Valance, d'Arragon, Sicile & Majorque, concourans, & se joignans avec les conjurés, pour la deliurãce du Prince. Sur tous, la faction de Beaumont en Nauarre se monstra aspre, & prompte à poursuiure ses aduersaires de Grammont qui tenoyët le parti du Roy, avec telles ruines, & calamités du Royaume, qu'il n'est possible de les exprimer, estants les courages du commun enragés à soustenir chacũ la faction, presque

presque sans sçavoir qui les mouuoit, ny pour quelle occasion ils venoyent aux armes: car qui eust demandé aux Beaumonts, ou à ceux de Grammont, pourquoy ils estoient si adonnés chacun à son parti, ils n'eussent sceu respondre autre chose, sinon pour ce que leurs parents, ou leurs voisins estoient ainsi affectionnés. Les excès, & desolations croissans de tous costés, le Roy D. Jean se sentit poinct en son cœur, quasi comme si tels malheurs prouinssent d'un iugement de Dieu, qui vouloit qu'il veit & sentist en ses Royaumes, ce qu'il auoit fait souffrir és precedentes années à celuy de Castille: partāt il presta l'oreille, & ne desdaigna point les admonitions, qui luy furent de nouveau faictes par plusieurs sages, mesmemēt par vn certain religieux Chartreux du monastere de la Scala Dei en Cattelogne, tenu lors pour

Estat miserable des Navarrois.

Le Roy D. Jean adoucy.

Prophete, le nom duquel est suprimé, ou oublié par les auteurs: & se resolut, à leur persuasion, de mettre le Prince en liberté, & le bailler aux Cattelans, qui en faisoient si grande instance. Il fut doncques tiré de la Aliaferie de Sarragosse, par la belle mere la Royne D. Ieanne, laquelle par le commandement du Roy, s'achemina avec luy.

*D. Charles
deliuré de
prison, mais
empoisonné
par sa belle
mere.*

*La Royne
D. Ieanne
punie de la
main de
Dieu.*

en Cattelogne, & le deliura aux Cattelás, au lieu de Ville-franche. La commune, & constante renommée est, que despuis que le Prince sortit de celle prison, il n'eut vn seul iour de santé, & alla sa vie en decadence, & consommation euidente de iour en iour, tant qu'en bref il fut estaint, & don-
nant ce blasme plusieurs à la Royne Don Ieanne de l'auoir empoisonné, à fin d'a-
uancer au droit de primogeniture, & suc-
cession au Royaume d'Arragon, & de-
pendances d'iceluy, son fils D. Ferdinand, lors Duc de Momblanc: estant ministre de
telle mechâceté vn certain medecin estrá-
ger : Tost apres fut faisie la Royne, d'vn
cancer, Dieu la punissant d'vn si execrable
forfait. Autres reiettent ceste accusation,
comme fausse, & controuuée par ceux de
la faction de Beaumont: laquelle, nonob-
stant la deliurance du Prince, continuoit à
faire la guerre contre les Grammontois,
mesme en la ville de Lombier, d'où estoit
faisi, au nom du Prince D. Charles, Char-
les d'Artieda : cōtre lequel le Roy enuoya
son fils D. Alphonse d'Arragon Duc de
Villa Harmosa, avec bon nombre de gens
de guerre, qui assiegea la ville, & peu apres
y vint le Roy en personne, avec ceux de

Sanguessa, & autres villes de la faction de Grāmōt: Desquels se sentant pressé Charles d'Artieda, demāda secours aux Castillans, qui s'acheminèrent celle part: assaüoir, les troupes du commandeur Gonçalo de Sahaedra, & celles de Rodrigo de Marchena, qui firent leuer le siege. Le Roy D. Jean ayant mis garnisons à Pampelone, & à Lerin, & autres places Beaumontoises, dont il se desfioit, vint a Calataiub aux Estats, laissant le gouuernemāt de Navarre a ses enfans D. Ieā, & D. Alphōse d'Arragō, pour la guerre qu'il craignoit, & preuoyoit contre Castille, laquelle arriua aussi tost.

Car a Arauda arriua D. Pedro Girō maître de Calatraua, avec deux mille cinq cēs hōmes de cheval, lesquelles forces iointes avec la grosse garde ordinaire, que menoit le Roy D. Hēry, faisoit le fonds d'une puissante armée, avec laquelle le Roys'achemina vers Logroño, où il cōuoqua tous les hommes propres à la guerre des Provinces d'Alaua, Biscaye, & Guispucoa, depuis l'age de vint ans, à soixante, exprimāt *Grande armée de Castillans.* par ses mandemens, & ordonnances, qu'il s'estoit transporté en personne en ceste guerre, entreprinse en faueur de son bien aymé cousin le prince de Viana D. Charles

heritier propriétaire de Nauarre. Le nombre des gens de guerre fut si grand, que les Nauarrois, qui tenoyent le parti du Roy D. Iean, espouuantés d'une si puissante armée, rendirent plusieurs places, sans attendre d'estre assaillis, spécialement la Garde, Arcas, & saint Vincent. Quant à Viana, elle fut battue furieusement, & assés vertueusement deffendue : mais en fin messire Pierre de Peraut, Connestable lors de Nauarre, fut contrainct de la rendre à D. Gonçalo de Sahaedra, capitaine general de l'armée Royale en ce siege, Seigneur fort expert en l'art, & discipline militaire. Le Connestable sortit par vne porte, habillé en dueil, & par autre entrerent les Castillans : dans laquelle place ordonna le Roy gouverneur Don Iean Hurtado de Mandoça. Le Prince Dom Charles estoit lors en Barcelonne, bien aymé, & reueré par les Cattelans, lequel entendant le succès de ceste guerre de Nauarre, enuoya par deuers le Roy D. Henry vn gentilhomme Cattelan nommé Iean Treillas, avec charge d'accorder, & conclure les articles de mariage d'entre luy & l'Infante D. Isabel sa sœur : ce qu'ayant fait ce cheualier, accôpagné de l'Euesque d'Astorga, passa

par permissiõ du Roy, à Arcualo, où estoit l'Infante, avec la Royne D. Isabel sa mere, laquelle il visita au nom du Prince, & puis sen retourna: mais il ne tarda gueres, que le Prince Dom Charles, toujours languissant depuis sa derniere prison, ne passat de ceste vie, en l'autre meilleure, non sans grande opinion d'auoir esté empoisonné, ainsi que nous auõs dit, par les pratiques de D. Ieanne sa maratre.

Mort du
Prince D.
Charles.

Les Barcelonnois voyans que la fin de ce Prince approchoit, & estoit prochaine, le prierent, qu'il espousast la Cappa sa concubine, de laquelle il auoit eu deux enfans D. Philippe & D. Iean, afin que par le mariage subsequnt ils demeurassent legitimes, & consequemment heritiers de ses droits: mais cela ne se fit point. Il n'y eut sorte aucune de remedes, vœus, ny prieres oubliées, pour la conualescence de Dom Charles: ce nonobstant il fallut qu'il passat le pas, au grand regret de tous les Catalans. On dit qu'il confessa d'auoir grandement failli, en ce bandant contre son pere, auquel il deuoit, & ses biens, & ses estats, & sa propre vie, luy en demandant pardon deuant tesmoins: Pardonnant aussi à tous ceux qui l'auoyent offencé, &

Repentance
du Prince
D. Charles.

poursuiui en quelque façon que ce fut, il mourut aagé de quarante ans, son corps fut enterré au monastere de Poblet, où les anciens Roys d'Arragon souloyent estre enseuelis. Peu auant son decez, par accord fait entre le Roy son pere & luy, traicté par la Royne Ieanne sa belle mere, il auoit obtenu le gouuernement de Cattelogne, iurisdiction, & reuenue de celle Principauté, reseruant au Roy seulement le tiltre de souuerain : & par mesme traicté auoyent esté deliurés de prison D. Iean de Beaumont d'une part, & D. Louys de Requesens d'autre, par eschange. Par le defect de Dom Charles, la Principauté de Viana, & droict successif de Nauarre, reuindrét a D. Blanche sa sœur Royne, qui auoit esté de Castille, separée d'auec le Roy D. Henry lors regnant : & monta l'Infant D. Ferdinand Duc de Momblanc son frere, fils du Roy Iean, & de sa seconde femme D. Iéane, a la succession de la couronne d'Arragó.

Le Roy D. Henry de Castille aduertí de la mort du Prince, fit estat de retenir la ville de Viana, mesme de cōtinuer la guerre, & pour cest effect alla au siege de Lerin : laquelle place, a cause de son inexpugnable affiete, il ne peut prendre : parquoy il ramena sō armée à Logroño, apres auoir

perdu quelques troupes des siens, courās,
& fourageans le pays, rencontrés, & cōba-
tues durement par D. Alphonse d'Arragō,
& autres capitaines commis à la garde de
Pampelone & sa cōtrée, pres d'Abarçuça.
De Logroño le Roy Castillan passa à A-
rauda de Duero, où estoit la Royne : là il
receut lettres du Marquis de Vileña D. Ieā
de Pacheco, l'aduisant qu'il auoit si biē tra-
uailé, q̄ l'Archeuesque de Toledē, & l'A-
miral s'estoyent rengés à son seruice, à rai-
son de quoy il vint a Madril, & de là a Oca-
gie, où l'Archeuesque premier luy vint bai-
ser la main, menant avec luy les Hériques
parents de l'Amiral, qui peu de iours apres
fit le mesme, puis l'Archeuesque & Amiral
D. Federic commencerēt d'essayer a met-
tre la paix entre les deux Roys de Castille
& d'Arragon. Pour ceste cause le Roy D.
Ieā vint à Tudelle, vers lequel fut enuoyé
le Marquis de Villena, ayant premieremēt
le Roy de Castille receu pour ostage D.
Iean d'Arragon. En Tudella fut debatū
assés des moyens de paix, a quoy ne pou-
uant prendre conclusion aucune, il fut ar-
resté que le Marquis passeroit à Sarragos-
se avec le Roy Dom Iean, & la Roy-
ne sa femme, pour traicter des affaires plus

amment. Le Marquis fit quelque sejour à Sarragoſſe, car le Roy D. Jean eut occasion d'aller en diligence en Cattelogne : ce- pendant la Roynne le traitta magnifiquement, & avec grande faueur: entre autres le fit manger à ſa table, qui eſtoit ſeruite de dames & damoiſelles, ſans aucun homme. Le Roy D. Jean eſtant retourné à Sarragoſſe, la paix ſe conclud, moyennât oſtages, & places en depoſt baillées d'une part & d'autre : aſſauoir la Garde, ſainct Vincēt, Arcos & Larraga, par le Roy d'Arragon : & de la part de Caſtille, Lorca au Royaume de Murcia, & Cōmago en terre de Sorie. Les Nauarrois ne furent point contents que le Roy D. Jean baillaſt les places du Royaume de Nauarre, pluſtoſt que celles d'Arragon, en depoſt, mais il fallut qu'ils euſſent patiēce. Les Cattelans pacifierent auſſi avec leur Roy, & iurerent & recogneurent l'Infant Don Ferdinand, aagé pour lors de neuf ans, pour heritier, & legitime ſucceſſeur en la courōne d'Arragon, qui fut dès lors intitulé Prince de Girone. Ceſte paix d'entre le Roy D. Jean & ſes ſubicts dura peu, fuſt pour ſ'eſtre certiſiées les Cattelans de l'inique mort pourchaffée au Prince D. Charles qu'ils

auoyent tant aymé, & qu'ils desirassent le vanger, fut pour autres occasions : tant y a qu'en la Comté de Rossillõ, Ampurdam, & autres endroits de Cattelogne se firent tost apres grandes esmotions & tumultes, estant chef principal des seditieux le Cõte de Pillars, & faisoit-on courir le bruit, que l'ame du Prince Don Charles se plaignoit de nuit par les ruës de Barcelonne, demandant vangeance de la Roync Don Ieanne sa marastre, qui l'auoit, par poison, contraint de se separer de son corps : pour obuier ausquels desordres, la Roync vint à Gironne, là où elle fut incontinent environnée, & assiegée par le Comte de Pillars, & contraincte de se fortifier avec le Prince D. Ferdinand son fils dans la tour de l'Eglise Cathedrale de celle Cité, au grand danger de leurs vies, cependant les Barcelonnois chasserēt de leur ville tous les officiers du Roy, & quiconque ils scauoient luy estre affectionnés, resolus de ne luy obeir plus, ains se donner au Roy de Castille. La Roync assiegée, & pressée dans Gironne, auoit les habitans fauorables, lesquels sous la conduite de messire Puy maistre de l'ordre de Montesa, faisoit grande resistance: mais ils ne sceurent en-

garder que le Comte de Pillars n'entraist dans la cité, lequel assiégea, & batit furieusement la tour, qui estoit forte, desirieux de prendre la Royne, & le Prince son fils. Or tel deuoir firent ceux de son parti que le Comte fut repoussé de la ville, avec grande perte de ses gens. Le Roy se trouuant bien empesché, a cause de la contumace, & rebellion quil trouuoit non seulement en Cattelogne, mais és autres endroits de ses Royaumes, enuoya en France, prier le Roy Louys onzième, de luy estre aydant de gens & d'argēt, auquel il engagea, pour la somme de trois cens mille escus d'or pour soudoyer les gens de guerre, les Côtes de Rossillon & de Cerdagne. Il obtint de luy deux mille cinq cens hommes de cheual, où estoient sept cens lances fournies: & estoit general sur toute ceste force estrangere Gaston Comte de Foix, & Seigneur de Bearn, gendre du Roy D. Iean.

En ceste guerre, qui fut longue & difficile: firent seruice au Roy plusieurs cheualiers de la faction de Grammont, dont les plus renommés estoient messire Pierre de Perault Connestable de Nauarre, Sanches de Londogno fils du Marechal de Nauarre, Ferdinand d'Angulo, Estienne

de Garo, Roderigo de Puellas, le Viscom-
te Bertrand d'Armendaris, Jean Henriques
de Laccara, & Gil d'Aualos, Jaime Dias
d'Armendaris Seigneur de Cadreite, Pe-
dro d'Ansa, Jean d'Aguerri, & Sâcho Der-
biti, surnommé l'opiniaistre, qui portoit
pour mot, & devise, *QVE SI QVE NON*:
se glorifiant de ce qu'il estoit contentieux:
à raison dequoy ce chevalier eut en son
temps plusieurs débats & querelles à sou-
tenir. La venue des François fit leuer le
Comte de Pillars, & ses gens de deuant
Girone. Ainsi estant deliurée la Royne, &
jointe à l'armée du Comte de Foix, elle fit
courir sus aux rebelles, en diuers endroits,
contraignant aucuns à demander pardon.
Le Roy ayant fait amas de gensdarmes,
les enuoya sous la charge de D. Alphonse
d'Arragon son fils ioindre avec ceste ar-
mée du Comte de Foix: luy suiuant apres,
fut detenu en la ville de Balaguer, pour
appaïser les habitans esmeus, en laquelle il
entra en armes, & illec eut nouuelles de la
reddition de Tarraga, où il se transporta:
mais tost apres luy fallut desloger, estant
aduerti que D. Jean d'Agulon venoit avec
grand nombre de gens de guerre, pour le
prendre. Parquoy il retourna à Balaguer.

*Le Roy D.
Jean decla-
ré ennemy
du Pays de
Cattelogne
& descheu
de tout droit
en icelle
principauté.*

Les Barcelõnois pouffés par extreme des-
pit contre leur Roy, le declarerent enne-
mi du pays, par publique, & iuridique pro-
clamation, difans qu'ils se retiroyent à bõ
droit de l'obeissance de celuy qui auoit
esté meurtrier de son propre fils, opresseur
de ses subiets, infracteur de sa foy, & pro-
messes, & violateur de leurs droits, priui-
leges, & anciennes libertés: & enuoyerent
les actes, & procedures sur-ce faictes en
forme à Rome, au Pape lors regnant qui
estoit Pie ij. Sienois, de la famille de Pico-
lomini. Et par decret & ordonnance des
trois Estats du pays despecherēt vne Am-
bassade au Roy de Castille, afin d'estre par
luy receus, defendus, & guarentis contre
les efforts du Roy D. Jean.

L'Ambassadeur fut vn gentilhomme af-
fés versé aux lettres, nommé Copus, le-
quel passa en habit desguisé en Castille, &
trouua le Roy D. Henry à Atienca, qui s'e-
stoit venu là resiouyr apres les nopces par
luy faictes de la fille puisnée du Marquis
de Santillana, avec Bertrand de la Cueva
son mignon Comte de Ledesma, & son
conseiller d'Estat. L'Ambassadeur parla au
Roy, luy declarant l'occasion de sa venue,
& sa charge, qui estoit de luy remontrer

le droit, qu'il auoit en la principauté de Cattelogne, & au surplus de la couronne d'Arragon, meilleur que le Roy D. Iean, d'autant qu'il estoit sorti du fils aîné de D. Leonor d'Arragon Royne de Castille, estant le Roy D. Iean, & son frere le Roy D. Alphonse issus seulement du puisnay: & qu'il auoit accasion propre pour le recouurer, par le moyen des Cattelans iustement indignes, à cause des impietés, & tyrannies du Roy D. Iean. Le Roy ayant ouy ces choses, accōpagnées de plusieurs querelles, remit l'Ambassadeur a son conseil, a Segobia, où il reuint: & ayant là proposé en pleine assemblée des grans Seigneurs, & conseillers d'estat ce que l'Ambassadeur de Cattelogne luy auoit déclaré, les oppinions furent diuerfes. En fin l'Ambassadeur estant appelé, & enquis de ce qu'il demandoit, il exposa qu'il auoit esté enuoyé pour obtenir deux choses, assauoir, que le Roy de Castille receut les Cattelans pour ses vassaux, & qu'il leur aidast de quelque nombre de gens de guerre, pour se deffendre de leurs ennemis, montrant la charge, & mandement qu'il auoit des trois Estats de luy prester obeissance. Le conseil du Roy voyant qu'iceluy

auoit ses offres tres-agreables, consentit, & accorda a tout: & furent ordōnés deux mille cinq cens cheuaux au secours des Cattelans, dont seroyent capitaines Don Jean de Beaumont prieur de saint Jean de Nauarre, & Jean de Torres cheualier natif de Sorca. Ces gēs despechés, le Roy D. Henry, pour fauoriser ceste guerre, vint à Agreda.

*Traicté
double en
Tudelle.*

En ce lieu vint vn Escuyer de Nauarre habitant a Tudelle, lequel declara a Dom Bertrand de la Cueva Comte de Ledesma, que si le Roy Dom Henry luy vouloit bailler quelque bonne recompense, il luy liureroit la cité de Tudelle: On promit a cest Escuyer certaines rentes assises sur Agreda: & suiuant le complot, & accord fait avec luy, fut enuoyé a heure assignée, Pedro de Gusman, avec vint braues soldats, pour s'emparer d'vne porte, & par icelle introduire le secours du grand nombre de gens de guerre qui le suiuroit. Pedro de Gusman, & les siens estants entrés dans la cité, furent tous prins, parquoy le Roy D. Henry merueilleusemēt indigné, enuoya ses troupes fourager le pays autour de Tudelle, avec commandemēt de mettre tout a feu & a sang: mais ce degast cessa par la

restitution que firent ceux de Tudelle, des prisonniers. Le Roy D. Iean aduerti de toutes ces choses, se fortifioit de son costé, & ja auoit armée suffisante pour assaillir les rebelles, & leurs alliés & protecteurs, s'estants ioints a luy l'Archeuesque de Taragone D. Iean, le Comte de Prades, D. Mathieu de Moncados, D. Anthoine de Cardoue, D. Guillen Arnau Certillon, & plusieurs autres cheualiers Cattelans. Partant vint mettre le siege deuant Lerida: au secours de laquelle place s'essayans de venir ceux de Taraga, ils furent deffaits par D. Iean d'Arragon, que le Roy son pere enuoya au deuant, lequel emmena plusieurs prisonniers au camp. Neantmoins le Roy leua le siege de deuant Lerida, aduerti qu'un capitaine nommé Marinon venoit au secours avec dix mille combattans: & d'ailleurs que Iean d'Agullō estoit en campagne pour mesme effet, & que D. Hugo de Cardoue tenoit assiegée la ville de Miralcamp, place forte, & grandement importante aux affaires d'Arragon. Parquoy il s'adressa premier celle part, mais D. Hugo n'auoit peu continuer le siege à cause des grands chaleurs, & s'estoit retiré. Partāt le Roy se vint ioindre aux trou-

pes de D. Alphonse son fils, qui tenoit assié-
gé Jean d'Aquillon dans Casteldas: là se
rendit aussi le Comte de Foix avec la gen-
darmerie Françoisse. Par ces forces fut tel-
lement battue, & combatue la ville & cha-
teau de Casteldas, que Jean d'Aquillon
fut contraint, quoy qu'il proposast diuer-
ses conditions, de se rendre à la merci du
Roy, lequel le fit executer à mort par ju-
stice, avec autres capitaines, à Balaguer
laissant la ville à la garde de Messire Jean
de Londogno.

Le Comte Gaston de Foix auoit espou-
sé D. Leonor deuxiesme fille du Roy D.
Jean, eüe de la Royne D. Blanche de Na-
uarre sa premiere femme: & pour ce qu'a
la sœur aînée d'icelle Dom Blanche, qui
auoit esté mariée au Roy Don Henry de
Castille: & par luy repudiée, sans en auoir
enfans, appartenoit la succession du Royau-
me de Nauarre, au defaut du Prince Char-
les decedé, il fut comploté, entre le beau-
pere, & le gendre, d'empescher ceste Roy-
ne delaissee de Castille, de se remarier, à
fin qu'elle n'eut enfans, & que le Royau-
me de Nauarre paruint à D. Leonor, & en
la maison de Foix: partāt elle fut liurée en-
tre les mains du Comte Gaston son beau-
frere,

*Complot en-
tre le Roy
D. Jean &
son gendre
le Comte de
Foix.*

frere, qui l'enuoya en France, au lieu de l'Esclat, en la puissance de la Cōtesse Leonor la sœur.

Entre les capitaines qui seruoient le Roy D. Jean, estoit vn Castillan, nommé Jean de Sarauia, qui traualloit fort les ennemis, lesquels espierēt l'occasiō de le surprendre, tant qu'un iour ayant couru, & pillé le pays autour de Ceruera, il fut chargé par Hugues de Cardona, qui auoit plus de quatre mille combatans, tant de pied, que de cheual, si que force luy fut de quitter sa proye, & se sauuer dans le chasteau de Rubinate, où il fut assiégé, & rudement combattu avec force artillerie, & engins. Luy craignant d'estre forcé, eut moyen d'aduertir le Roy de sa necessité, lequel y accourut avec ses forces: à raison dequoy D. Hugues, ayant laissé au siege de ceux qui tenoyent le chasteau, cinq cens de ses hommes, se retira en lieu fort, d'où chacū iour il presentoit la bataille au Roy: Venus aux mains, la victoire fut douteuse quelque temps, mais en fin elle demeura par deuers les gens du Roy. Il mourut, tāt en ceste rencontre, qu'aux escarmouches du siege, plus de mille cinq cens hommes des ennemis, mais aussi presque autant des

*Siege du
chasteau de
Rubinate.*

*Sanglant
cōbat entre
l'armée du
Roy, & cel-
le de Hugues
de Cardone.*

gens du parti du Roy : de sorte qu'il n'eut occasion de la mettre au rang des heureuses. De là l'armée Royale fut menée au secours de l'Archeuesque de Taragone, que ceux de Lerida, & de Ceruera tenoyent environné, & assiégé, en pays desauantageux, lesquels desemparèrent. D'ailleurs D. Alphonse d'Arragon obtint vne victoire prez de la ville de sainte Colombe, auquel s'estant iointe l'armée du Roy, ceste place se rendit: & outre ce fut prise de force Cerial, & toute ceste contrée, pendant que la Roynne, & le Comte de Foix, en autre endroit, forçoient la ville de Moncade, & receuoient plusieurs autres places, qui par crainte se rendoyent à leur mercy.

Peu apres le Roy D. Jean ayant ioint en Mōcade son armée, avec celle de la Roynne sa femme, & de son gendre le Comte de Foix, le conseil fut d'aduis qu'on allast assieger Barcelone, & ainsi fut arresté, ores que le Roy fut de contraire opinion. Les Barcelonnois auoyent receu le secours de Castille susmentionné, & resolus de n'obeir plus au Roy d'Arragon, auoyent haussé les bannieres de Castille : la cité estoit riche & opulente, pleine d'hommes, & d'ar-

mes, forte de murailles & tours, & bien pourueue des choses de marine: partant faisoient souuent de furieuses faillies, & escarmouches contre l'armée Royale, au grand desauantage d'icelle, tant par mer, que par terre, meismes donnerent la chasse au capitaine Village, qui leur tenoit la mer empeschée, avec huit galeres Arragonnoises: tellement que le Roy esleut, pour le meilleur parti, de leuer le siege, vingt iours apres qu'il y estoit venu, ayant par son fils D. Alphonse d'Arragon, donné le gast au pays, d'autour d'icelle cité. De là, l'armée fut menée a Villefranche, laquelle place fut forcée, & y fit le Roy executer, par iustice, quatre cens des habitans, irrité de ce, qu'à l'entrée de la ville auoyent esté occis deux capitaines François: ce qui donna telle frayeur aux autres, que plusieurs se rendirent; sans attendre la force. A ceste faueur fut assiegée la cité de Tarragone, laquelle au commencement, fit grande resistance aux assauts qui luy furent liurés, sans toutesfois faire sortie aucune: mais apres voyās leurs chāps gastés, & bruslés, & la batterie, assauts continuels & obstinés, cōmencerent les defenseurs a lacher leurs

*Siege de
Barcelone.*

*Seueré exé-
cution a la
prise de
Villefranche.*

Taragone
se rend.

courages, mesme apres que le secours qui leur estoit venu de Barcelone, mis en terre, eut esté combatu, & contraint de regagner les galeres. Parquoy ils se rendirent aux plus tolerables conditions qu'ils peurent au Roy, lequel y laissa pour gouverneur messire Roderigo de Rebolledo, & s'en retourna à Balaguer. Les Cattelans ainsi pressés, renuoyerent en Castille nouveaux Ambassadeurs, dont l'un estoit Archediacre de Girone, lesquels joints avec l'Ambassadeur Cattelan, residant prez du Roy D. Henry firent nouvelles offres de submission, & entiere obeissance à iceluy, le suplians de s'intituler Roy d'Arragon, & Comte de Barcelone, puis qu'il estoit certifié que ces Estats, de droit diuin, & humain, luy appartenoyēt, & que la propre volonté des peuples luy inuitoit, demandans au surplus secours de gens de guerre. Le Roy de Castille, outre ceste publique Ambassade, estoit sollicité de mesmes choses, par plusieurs Seigneurs & communautés de Valence & d'Arragon, & de fait, inclinait fort aux demandes des Ambassadeurs: mais l'Archeuesque de Toledé, & le Marquis de Viléna, principaux conseillers du Roy, & a l'appetit desquels se manioyēt

lors tous les affaires du Royaume, n'estoyent pas de cest aduis, fut qu'ils s'entendissent avec le Roy D. Jean d'Arragon, ou autrement: parquoy l'affaire debatue au cōseil, il fut respōdu aux Ambassadeurs, que s'ils vouloyent auoir des hommes pour les secourir, quil falloit qu'ils aportassent deniers: & que quant a prendre le tiltre de Roy d'Arragon, & Comte de Barcelone, il estoit besoing au Roy D. Henry de Castille de plus meurement y penser, pour s'en resoudre. Les Ambassadeurs repliquerent, que s'il plaisoit au Roy se declarer franchement, & prendre leur cause, & defense en main, comme de ses vassaux, ils exposeroient leurs vies en depost, si dedans soixāte iours apres telle declaration, ils ne mettoient en ses coffres la somme de sept cens mille florins d'or, cela sembla vn songe a l'Archeuesque, & au Marquis: car pour le temps d'alors, la somme estoit excessiuelement grande, & ioint aussi, qu'ils auoyent autre but, ils firent tant, que contre l'opinion de plusieurs autres du cōseil, le Roy D. Henry non seulement refusa ce que luy estoit propose, mais se retira du tout de ceste guerre d'Arragon, donnant a entendre qu'il vouloit plus-tost moyen-

*Ofre des
Castellans
au Roy de
Castille.*

ner vne bonne paix, par le moyen du Roy de France.

*Le Roy de
Castille es-
saye de trō-
per les Cat-
telans.*

Or auoyent intention, & esperāce l'Archeuesque, & le Marquis de faire en sorte, que le Royaume de Nauarre, ou bonne partie d'iceluy tomberoit en la couronne de Castille, par le traicté de ceste paix, pour donner forme a laquelle, ils mandierent au Roy d'Ican, & au Comte de Foix, qu'ils enuoyassent quelques capitaines François, de ceux qui estoient en Cattelogne, pour conferer des moyens d'accord avec le Roy de Castille, & firent autres menées, pour desgouter les François de ceste guerre, espians leur profit, sous couleur de remettre le Roy d'Arragon, & ses subiets en bon mesnage. Cependant les courses, saccagemens, & ruines continuoyent en Cattelogne. Le Comte de Pillars, & le Seigneur de Cruillas, avec grand nombre de gensdarmes; ayans assiegé derechef Gironc, furent mis en fuite, par Pierre de Roquabertin gouverneur de la cité, où ils perdirent grand nombre de leurs gens & bagage.

Les François tirans vers Morella, reduisirent plusieurs places, du costé d'Vrget, a l'obeissance du Roy: mais s'estans rencontrés prez d'Ixar, avec les Castillans, en bō-

ne occasion de les charger, on dit qu'ils leur firent entendre, que sçachans la bonne amitié, & perpetuelle confederatiõ qui estoit entre les Roys de Frãce, & celuy de Castille, ils ne vouloyent coucher la lance contre l'estandart de Castille, & de ce s'excuserent enuers le Roy d'Arragon, disans qu'il leur estoit ainsi commandé, & partāt le prierent de prendre en bonne part, s'ils se mesloyent d'appaiser les differents qui estoient entr'eux. Le Roy d'Arragon s'accommodant a ces conseils, auec esperance de quelque bon iugement du Roy de Frãce là dessus, consentit qu'un des capitaines François se transportast en Castille, en la ville de Montagu, où se deuoit trouuer le Roy D. Henry, & là conferaist avec iceluy des moyens expedients, pour appointer toutes choses; l'Archeuesque de Toledé, & le Marquis de Villena y menerent le Roy, sous couleur de la chaffe: & fut accordé, que le Roy de France seroit prié d'envoyer un Ambassadeur en Castille, pour faire cesser ceste guerre. Le capitaine estāt de retour, ayant fait le rapport au Roy d'Arragon, & au Cõte de Foix son gēdre, de ce qu'il auoit arresté avec le Roy de Castille, il aduint qu'à leur sollicitatiõ, le Roy

Le Roy
Louys XI.
arbitre de
ceste guerre.

de France Louys xj. enuoya vn Ambassadeur en Castille, lequel trouua la cour à Almacan: où ayant esté ouy, fut prins jour d'une entreueüe des trois Roys, assauoit de France, Castille & Arragon, en la frontiere, entre Fontarabie, & saint Iean de Lus: ce-pendant furent suspendues les armes de toutes parts, les Cattelans exclus de ce conseil, demeurants incertains entre l'esperance & la crainte, attendans ce qui leur reuiendrait de l'issue de l'entreueüe.

Le Roy D. Iean approuuant toutes ces choses, vint a Sarragosse, en intention de se trouuer au lieu destiné: pour la veüe des Roys, le Côte de Foix, heritier presomptif de la couronne de Nauarre, a cause de sa femme, passa en Nauarre, où il fut bien receu, mesme de la faction Beaumontoise. Or le temps venu de l'entreueüe, le Roy d'Arragon, pour aucunes causes, ne s'y peut, ou voulut trouuer, se fiant qu'enuers le Roy de Castille, l'Archeuesque de Tolède, & le Marquis de Villena, & enuers celuy de Frâce son gendre, le Comte Gaston de Foix, feroient ses affaires, & auroient esgard à son honneur, & profit. Le Roy D. Henry arriua à saint Sebastien en la Prouince de Guipuscoa, sur la fin de

Mars l'an 1463. & le Roy Louys vint en 1463.
 meſme temps a Bayonne, vers lequel ce-
 luy de Caſtille enuoya l'Archeueſque de
 Toledé & le Marquis de Villena, avec Al-
 uar Gomes de cité Real ſon ſecretaire,
 Ambaſſadeurs, eux le luy cōſeillans ainſi,
 affin de traiter avec luy de l'accord, & pa-
 cification des troubles d'entre les Roys de
 Caſtille & Arragon, & les Cattelans ſes
 ſubiets.

*Conferance
pour la
paix.*

Or on dit que le Marquis de Villena fut
 lors appointé par le Roy de France, avec
 penſion de mille eſcus par mois, qui ſont
 douze mille eſcus par an. Eſtans doncques
 les affaires ainſi, & par ceux cy maniées, le
 Roy de France fit coucher ſa ſentence
 comme iuge & arbitre, entre les parties en
 telle forme.

*Marquis de
Vilena
prend pen-
ſion du Roy
de France.*

Que le Roy D. Henry de Caſtille ſ'ab-
 ſtiendroit entierement des affaires des
 Cattelans, r'appelleroit, & feroit vuider
 ſes gens-d'armes hors du pays de Cattelo-
 gne, dedās vint iours, & que pour les frais
 qu'il auoit faits en ceſte guerre, le Roy de
 Arragon luy quiteroit la ville d'Eſtella,
 avec tout le reſſort, ou departement d'i-
 celle, qui eſt vn des cinq membres du
 Royaume de Nauarre, avec certain quā-

*Sentence de
Roy de Frañ-
ce.*

tité de doubles d'or, ce qu'il seroit tenu d'exécuter dedans six mois, pendant lesquels la Royne d'Arragon D. Ieâne tiendroit ostage en la ville de Larraga, en la puissance de l'Archeuesque de Tolède. Que les Cattelans retourneroyent en la puissance de leur Roy, auxquels pardõ general seroit fait de tout le passé : pour assurance dequoy le Roy D. Iean leur bailloeroit ostages suffisants. Ceste sentence manifestement au dommage du Royaume de Nauarre, odieuse aux Cattelans, & peu honorable pour le Roy de Castille, fut accordée, & rendue par les trois Ambassadeurs susmentionnés, lesquels escriuirent au Roy D. Henry, qu'il s'auançast avec sa cour & suite, iusques a Fontarabie, & à l'instant vint le Marquis de Villena, amenant le Comte de Cominges Admiral de France avec luy, qui venoit se mondre, & prier le Roy de Castille, de la part du Roy son maistre, qu'ils se vissent es terres de Frâce : ce qu'ils auoyent comploté, & accordé à Bayonne.

Le Roy Louys estant venu a S. Iean de Lus s'auancerēt les deux Roys iusques a la riuere de Vidaso, limite des deux Royaumes, celle part : laquelle riuere, selõ les Es-

pagnols, appartient a l'Espagne, & tout ce
 que le flot de la mer, en montant, couure.
 Le Roy Dom Henry passa, avec plusieurs
 grans Seigneurs & cheualiers, en diuerfes
 barques, entre lesquels on nôme D. Pero
 Gonçales de Mádoca Euesque de Calaor-
 ra, D. Ieã de Pacheco Marquis de Villena,
 D. Gomes de Careres maistre d'Alcantara
 D. Iean de Valencuela prieur de S. Iean,
 D. Louys d'Acugna Euesque de Burgos,
 D. Bertrãd de la Cueva Comte de Ledes-
 ma & autres, tous fort richement, & pom-
 peusement habillés: ce que n'estoit le Roy
 de France, ny ses courtisans, tellement que
 les Espagnols se mocquoyent d'eux. S'e-
 stans amiablemēt salués, & embrassés ces
 deux grans Princes, sur la riue, & vſé en-
 tr'eux de plusieurs ceremonies, & parol-
 les gracieuses en tel cas accoustumés, le
 Roy D. Henry parlant le premier, ils alle-
 rent au village d'Andaya, appartenant au
 Roy de France, où la sentence arbitraire
 fut leuë deuant les deux Roys, par le se-
 cretaire Aluar Gomes, presens les Ambaf-
 sadeurs: & apres quelques autres patolles
 d'amitié, se partirent contents l'un de
 l'autre, retournant chacun en ses terres.
 Estant le Roy Dom Henry de retour à

Entreueue

des Roys

Louys XI.

& Henry

III. de Ca-

stille a An-

daya.

Fōtarabie, il fit appeller les Ambassadeurs de Cattelogne, qui l'auoyent fuiui en ce voyage, & leur declara le contenu en la sentence, & ce qu'eux estoient tenus de faire par icelle, dont ils furent fort esbais & desplaisans : si que vaincus d'impatience, à cause de l'indignité qu'il leur sembloit souffrir, dirent plusieurs parolles hautes de colere, voire de mauuais presage des miseres, qui deuoient aduenir au Royaume de Castille, accusans le Roy de lascheté, de consentir a telle sentence, & ses conseillers & Ambassadeurs de trahison. En execution de la sentence, le Roy D. Henry retira ses gens de Cattelogne, & abandonna du tout ceste guerre, puis passa a Segobia, & l'Archeuesque de Toleda vint a Larraga, ville du Royaume de Nauarre, pour y recepuoir la Roynie D. Ieanne de Nauarre, laquelle deuoit, suiuant la sentence du Roy Louys, demeurer en sa puissance, iusques à l'execution entiere de ce que par icelle le Roy d'Arragō son mary estoit tenu de faire.

Les Estats de Nauarre furent du tout mal contens, de l'alienation qui se faisoit de la ville, & ressort d'Estella, portion du Royaume, mais ils ne sçauoyent pas le

secret, car il n'y eut aucunes des parties, qui fit mieux son profit de la sentēce, que le Roy d'Arragon, lequel se sentoit fort assēuré du costé du Roy de Castille, par les bons offices que faisoient pour luy l'Archeuesque de Toledē, & le Marquis de Villena, gens pratiques & du tout a son commandement: de sorte qu'il ne se donnoit pas grande peine, que la Royne sa femme demeurast entre leurs mains. Quant à Estella, il n'eut oncques volonté de la bailler au Roy de Castille: & pour palier, & couvrir son intention, il tint moyen, que les Estats, en corps, protestèrent contre ceste sentence, comme donnée par iuge incompetent, sans ouyr parties, & en manifeste detrimēt du patrimoine de la couronne de Navarre: & d'abondant messire Pierre de Perault Connestable de Navarre, se ietta dedans Estella, s'emparant de la ville, & chasteau comme s'il se fust rebellé contre son Roy: de sorte que le Roy de Castille commença à se fascher contre ses conseillers, & à connoistre aucunement leurs menées, se repentant grandement d'auoir abandonné les Cattelans. L'Archeuesque de Toledē, & le Marquis de Villena cōgnoissant son

*D. Pedro
de Portugal
esleu pour
Roy d'Ar-
ragon par
les rebelles.*

indignation, penserent a y remedier, don-
nans a entendre, & au Roy, & a l'Arche-
diacre de Gironne, vn des Ambassadeurs
de Cattelogne, qu'il n'y auoit rien de gaste
encor, & qu'ils estoient a temps de mieux
faire que iamais : parquoy cest Archedia-
cre fut despeché, pour porter ceste nou-
uelle aux Cattelans, & les encourager a té-
nir bon, les asscurans, au nom du Roy de
Castille, qu'ils attroyent en bref plus grand
secours de luy qu'auparauant, mais l'Arche-
diacre arriua tard : car les Estats de Cattel-
ogne, fort offencés d'auoir esté ainsi de-
ceus par le Roy D. Henry, auoyent quitté
Castille, & toute l'esperance qu'ils pou-
uoient auoir de ce costé là, & s'estoyent a-
dressés a la maison de Portugal, eslisans
pour leur Roy D. Pedro Cōestable de ce
Royaume là, petit fils du Roy D. Jean pre-
mier, & fils de l'Infant D. Pedro Duc de
Coimbra lequel estoit deffendu, par ligne
maternelle, des Roys d'Arragon, d'autant
que sa mere estoit fille du Comte Jaques
d'Urgel, & de D. Leonor d'Arragon fille
du Roy Pierre d'Arragon iiij. du nom.

D'autre part, le Marquis de Vilenavint
remonstrer au Roy D. Henry les reuoltes
de ceux d'Estella, & les difficultés qui en-

peschoyent que la sentence n'estoit accomplie, proposant de recepuoir en recompense quelque autre chose, plus-tost que de s'opiniastrer sur cela: ce que le Roy ne goustâ pas beaucoup, toutesfois, pour iouer a moins de perte. Il enuoya en Navarre D. Bertrand de la Cueva Comte de Ledesma, & D. Pierre Gonçales de Mandoça Euesque de Calahorra, qui despuis fut Cardinal & Archeuesque de Tolède, pour traiter de ces choses avec le Roy D. Jean, & la Royne sa femme, lesquels s'excusoient sur la rebellion de leurs subiects, qui empeschoit qu'ils ne pouvoient accomplir ce qu'ils desiroient (à ce qu'ils disoient) en cest endroit. Eux cognoissans assés les feintes, en aduertirent le Roy D. Henry, lequel leur ordonna, qu'ils cheussent du mieux qu'ils pourroient: parquoy apres plusieurs conferâces, ils s'en retournerent sans rien faire, & disposerēt le Roy de Castille de faire trefue, ce qui fut effectué peu apres. L'an 1464. encor qu'il fut 1464. frustré de ce qui luy auoit esté adiugé par la sentence du Roy de France Louys. xj. Ces trefues auoyent esté iurées de part & d'autre notamment par le Comte Gaston de Foix, au nom du Roy Jean son beau-pere, & par Don Leonor sa femme

heritiere du Royaume de Nauarre, femme qui appetoit fort à dominer.

Peu apres le Roy Dom Iean alla faire la guerre aux Cartelans qui s'estoyent reuoltés de luy, ayant couronné pour leur Roy D. Pedro de Portugal, & laissa en Nauarre le Comte Gaston de Foix, avec sa femme D. Leonor, intitulée Princesse de Viana, par l'aduis de ceux qui estoyent de son conseil & parti, delibera de faire quelque entreprise sur Castille, pour se contreuanger des places de la Garde, de saint Vincent & Arcos, que les Castillans auoyent retenues depuis la derniere guerre. Ayant donc en grand diligence, & silence assemblé bon nombre de gens de guerre, il contrainit aisément, & sans perte des siens, la Cité de Calatorra à se rendre, en quoy il fit chose agreable aux cheualiers Castillans coniurés cōtre leur Roy D. Henry. Apres ce fait, le Comte de Foix fut cōseillé d'enuoyer vers le Roy de Castille, luy faire entendre, que ce qu'il auoit fait, n'estoit pour rompre la paix d'entre Castille & Nauarre, mais seulement pour reprendre à la valeur autant comme les trois villes cy dessus mentionnées, qu'il detenoit a la couronne de Nauarre où il auoit droit: que s'il luy

luy plaisoit d'enuoyer quelqu'un par de-
uers luy, pour aduiser de cōposer par quel-
que bon expediēt, leur differēt, il se soub-
mettoit à la raison & equité. Le Roy D.
Henry y enuoya incontinent le licentié
Diego Henriques, qui parla fort braue-
ment, & audacieusement au Comte, & à
la Princesse sa femme sur ceste prise de
Calaorra, leur cōseil estoit principalemēt
D. Nicolas d'Echauarri Euesque de Pam-
pelone, & par son aduis fut renuoyé, avec
le licentié Diego Henriques, vn autre de
mesme robe, pour supplier le Roy D. Hé-
ry, de rendre les trois places de la Garde,
sainct Vincent & Arcos, & que Calaorra
seroit incontinent restituée: & outre-ce,
que le Côte & la Princesse luy aideroyent
des forces de Nauarre contre ses rebelles,
& ne dōneroyent ayde, ny faueur à iceux
en chose quelconque. Ceste Ambassade
proposée deuant le Roy de Castille, a Se-
gobia, le contenta fort, & renuoya le li-
centié Diego, avec l'Ambassadeur de Na-
uarre, pour accomplir ces restitutions,
moyennant que pour asseurāce de ce que
le Comte, & la Princesse sa femme pro-
mettoient, il baillast en ostage D. Iean, &
D. Marie leurs enfans. Les deux Ambassa-

deurs s'estans acheminés, celuy de Castille demeura à Logroño, & celuy de Navarre paruint vers le Comte, auquel il donna raison de sa charge: & suiuant ce qui auoit esté proposé, le Comte, & le licentié Diego Henriques se veirēt depuis en certain lieu, toutesfois ils ne s'accorderent point, estant le Comte Gaston importuné par la ligue de Castille.

Preuoyant donc l'Ambassadeur de Castille, que le Comte auoit enuie d'assiéger Alfaro, il donna ordre que promptement cent hommes de cheual entrèrent dedans, & y fit mettre forces viures. Quelques iours apres estant le Comte Gaston à Tudelle, il remanda l'Ambassadeur de Castille, à fin de traiter derechef d'accord, & luy mit en teste l'Euesque D. Nicolas, & messire Martin de Perault: mais ils firent moins à ceste veuë qu'aux autres, car l'Euesque se deborda en parolles iniurieuses cōtre le Roy D. Henry, de sorte que chacun en auoit honte: sur quoy l'Ambassadeur de Castille se porta si modestement, & rabatit les propos de l'Euesque avec si bonnes raisons, qu'en fin il luy fit reconnoistre sa faute, & s'en excusa. Somme la fin de leurs disputes fut, que le Comte ne

bailleroit point ses enfans en ostage : & que si le Roy de Castille ne vouloit r  dre les places qu'il detenoit de Navarre, il iroit mettre le siege deuant Alfaro. L'Ambassadeur partit avec ceste resolution, & en quatre iours qu'il demeura    Alfaro, la fit remparer, & munir du mieux qu'il peut, puis alla aux terres de Soria mettre gens ensemble, pour la secourir. Alfaro assieg  e & furieusement batue par le Comte Gaston, tint bon, nonobstant qu'elle soit situ  e entre Calorra & Tudelle, o   estoy  t grosses garnisons Fran  oises & Navarroises : tant que dans la terme de douze iours le secours de Castille comparut, qui estoit d'environ mille trois c  s cheuaux, & cinq mille pietons conduits par D. Alphonse d'Arcillan Seigneur de Los Cameros :    raison dequoy le Comte leua le siege, ramenant ses gens    Tudelle, & tost apres eut nouvelles que les habitans de Calorra s'estoyent ru  s sur la garnison Fran  oise qui estoit dedans, & en ayant fait carnage, s'estoyent remis en l'obeissance de leur Prince Henry.

Ces desordres depleurent grandement au Comte, & au Connestable D. Pierre de Peralta, & autres Navarrois, qui en don-

Alfaro assieg  e.

noyent entièrement la coulpe à l'Euesque de Pampelone D. Nicolas d'Echaurri, lequel causa ce mal, que les places de la Garde, de S. Vincent & Arcos, lesquelles d'ancienneté estoient de Nauarre, sont tousiours depuis demeurées en la iurisdiction de Castille.

Le Roy D. Iean, apres la victoire que son fils D. Alphonse auoit obtenue à Pottelin, receut plusieurs peuples d'Ampurdan qui se rendirent a luy, les vns volontairement, les autres de crainte. Et voulant presser le siege de Cernera, place forte par nature, manda les troupes de D. Alphonse, & celles que la Royne auoit deuant Valdecona, ville située à vne lieue prez de Tortoze: mais D. Alphonse, auant que de s'acheminer au camp, ayant sceu, que les habitans d'Iqualada estoient en discord entr'eux, les vns voulans recongnoistre le nouveau Roy D. Pedro, les autres obeyr à D. Iean, s'aprocha pres, & eut moyen de les surprendre, pendant qu'ils estoient en contention. Estant dedans il traicta bien ceux qui tenoyent le parti du Roy Dom Ieã, & punit les autres: puis poursuivit son chemin à Cernera, laquelle fut si diligemment batue, & assaillie, qu'en fin elle se ré-

dit à composition qui leur fut accordée d'auoir la vie, biens & priuileges saufs, & entiers. Le gouuernement de ceste place fut baillé à Iean de Carraxona, & puis on alla à Pratas, où le nouueau Roy D. Pedro auoit laissé garnison s'estant retiré à Barcelone: Pratas fut rendue, & Rodone aussi, en fin le Roy D. Iean fit en sorte qu'il recouura toute la Cattelogne, le Roy Dom Pedro estant mort en la ville de Granol, distante de cinq lieuës de Barcelone, de poison, comme on croit, non toutesfois sans grande peine. Grandes furent les altercations qu'il y auoit entre les Cattelans apres la mort de D. Pedro Portugais, les vns estans d'auis de reduire leur estat en forme de republique, ainsi que Genes & Venise, autres de retourner en l'obeissance du Roy D. Iean: l'un & l'autre estant reiecté ils esleurent pour leur Roy René d'Anjou, Prince du sang Royal de France, lequel, ja viel & cassé, neantmoins desireux de tiltre Royal accepta l'offre, & avec le congé du Roy Louys xj. fit leuée de gens par la France, qui en fin firent peu, voila comme D. Iean se comporta.

Du costé de Nauarre l'Estat n'estoit pas en plus grãd repos, car regnans les factiõs

de Grammont, & de Beaumont au pays, le Comte Gaston de Foix, mary de D. Leonor heritiere du Royaume, qui le gouvernoit, se donnoit à entendre que c'estoit à luy de iouyr des lors du tiltre Royal, droits & préeminences d'iceluy: parquoy se fortifiant de ceux de la faction Beaumontoise, lors qu'il veit son beau-pere le Roy D. Iean fort empesché és guerres de Cattelogne, ils'empara de plusieurs villes, & forteresses de Nauarre, & fraischement auoit assiegé Tudelle, cité de la faction de Grammont: dequoy le Roy D. Iean aduerti, sur l'heur de ses affaires de Cattelogne, mena celle part son armée fort exercée aux guerres passées, pour donner secours a ceux qui soutenoient son parti: mais auant qu'il fut là, D. Louys de Beaumont Comte de Lerin, se saisit de la ville de Pampelone, les habitans de laquelle estoient presque tous sectateurs de ceux de Beaumont. Plusieurs memoires de peu d'autorité font mention que ce Comte de Lerin fit dure guerre non seulement aux Nauarrois de l'autre faction, mais aussi aux Arragonnois, courans iusques à Iaca, & Exea des cheualiers, ayant pour compagnon en ses cōseils, & entreprises Char-

les d'Artieda, osta au Connestable messire Pierre de Peralta, la ville d'Andosilla, & a D. Inigo d'Estuniga, Comte de Nieua, celle de Mendauia: puis print Artaxona & Olite, & plusieurs autres places, faisant autres grands exploicts, d'autant qu'il tenoit la ville de Pampelone, & qu'il en dispoisoit comme s'il en eust esté Seigneur & maître.

En ce tēps est fait mention d'un fameux brigand, nommé Sancho Rota, qui auoit la retraicte en vne montagne prez de la ville de Tudelle, dicte *Las Verdenas del Rey*, & avec trante cheuaux qu'il auoit couroit es terres d'Arragon, & y faisoit grand butin, traictant bien neantmoins ceux qu'il prenoit prisonniers: Pour empescher lesquels dommages, tant de cestui-cy, que du Comte de Lerin, les peuples de Iaca, & la noblesse des enuiron s'estans assembles, firent monstre de vouloir entrer en Navarre: mais le Comte de Lerin leur enuoya au deuant bon nombre de gens de guerre, conduits par Charles d'Artieda, Machin de Gongorra Seigneur de Gordia; Iean d'Ayanc, & Ferdinand d'Ayanc, lesquels ayans rencontré les Arragonnois prez de Sanguesa, à un certain pont, qui

Sancho Rota fameux brigand.

est sur le fleuve d'Arragon, mirent pied à terre, laissant leurs cheuaux, estimans de combattre plus à leur aduantage à pied: & venus aux mains, empescherent le pas aux Arragonnois, les contraignans de retourner en leurs terres.

Or la venue du Roy D.Iean avec son armée sceue en Nauarre, haussa le courage à ceux de Grammont, & estonna fort les Beaumontois, qui connoisloyent assés qu'ils ne seroyent suffisans pour resister à si grande force, que celle qui leur venoit sus: Parquoy ayans eu conseil, sur les affaires qui se presentoyent, avec le Comte Gaston de Foix, ils l'admonesterent de s'accorder avec le Roy son beau-pere, lequel ayant ja resolu de laisser le Royaume à sa fille D.Leonor apres sa mort, en pouoit iouyr peu de temps, a cause de sa grande vieillesse. Partant leur sembloit bon de se contenter d'auoir patience, ce peu qui restoit de vie au Roy, & le laisser iouyr du tiltre du Roy de Nauarre: ce que le Comte trouua bon, car il ne voyoit aucune esperance de victoire, s'il se fut opiniastré à poursuiure ses entreprises par les armes. Ainsi furēt mises les capitulations en auāt, en la maniere que nous dirons cy apres:

Auant la dernière couclufion defquelles, le Roy D. Iean eftant defia de retour à Taragone, pour entēdre de toutes les forces, & moyens à la guerre de Barcelone, la Royne Ieanne fa femme eftant de long temps affligée d'un cancer, qui la confumoit, vint à fa fin. On dit que fe voyant à la mort certaine, & fe fouuenant du Prince D. Ferdinand fon fils, elle dit par plusieurs fois, avec grands fouspirs, O mon fils, que tu me coustes cher & renommée, est qu'elle confessa auoir pourchassé, & moyenné la mort au Prince D. Charles: dequoy le Roy fut tellemēt indigné, qu'il se retira fans la vouloir plus voir: elle eut cependant le contentement que son ambition pouuoit prendre, de ce que son fils D. Ferdinand eut tiltre du Roy de Sicille, auant sa mort: son corps fut enseuely au monastere de Poblette, fuiuant son testament. Auint aussi enuiron ce temps, qui estoit l'an 1469. la pitoyable mort du ieune Gaston de Foix, fils aîné du Comte Gaston, & de la Princesse Leonor, lequel deuoit succeder apres eux à la Couronne de Navarre. Estant grande assemblée de Princes & Cheualiers au lieu de Liborne pres de Bordeaux, pour honnorer & ac-

*Mort de la
Royne D.
Ieāne d'A-
ragon.*

*Confession
derniere de
la Royne
D. Ieanne
d'Arragon.*

1469.

Mort du
jeune Gaston
de Foix.

compagner Charles de France frere du Roy Louys xj. nouvellement reconcilié avec iceluy, & pourueu de la Duché de Guyenne apres la guerre ciuille, qu'on appella du bien public, ce ieune Gaston fut atteint d'un esclat de lance, courant aux tournois & ioustes, qui se faisoient là en grande magnificence, & somptuosité, d'où il mourut, au grand desplaisir de tous ceux qui le congnoissoient, mesme du Duc Charles, la sœur duquel, & du Roy Loys, il auoit espousée, nommée Magdelaine, de laquelle il laissa deux enfans : assauoir, François Phebus, qui fut Roy de Nauarre, & Côte de Foix, & Catherine sa sœur, laquelle succeda a son frere, qui mourut sans hoirs. Possible ne sera-il hors de raison d'exposer icy la succession de la maison de Foix, qui a herité du Royaume de Nauarre, la recherchant au plus haut, dont les histoires font mention, en laquelle, comme nous auons dit en cest histoire, s'estoit vnüe la seigneurie de Bearn, des enuiron l'an 1286.

Succession
de la maison
de Foix qui
a herité du
Royaume
de Nauarre.

On trouue que le pays de Foix fut erigé en Comté, enuiron l'an 1062. par Raymond deuxiesme de ce nom Comte de Toulouse, lequel en inuestit Bernard fils

puisé de Roger Comte de Carcassone, & d'Aladaïs sa femme. De ce Bernard, & de Beatrix fille du Comte de Besiers, naquit Roger, qui fut deuxiesme Comte de Foix, lequel engendra en Arcendie vn autre Roger son successeur en la Comté de Foix, deuxiesme du nom, pere de Roger troisieme, qu'il eut d'Eximene sa deuxiesme femme, ayant espousé en premieres nopces vne dame de Prouence nommée Estiennette. De Roger troisieme & de Cecile fille du Comte Raymond de Barcelone, naquit Raymond Roger, lequel espousa vne dame nommée Philippe, dōt il eut vn fils appelé Roger Bernard, qui luy succeda en la Comté de Foix, & vne fille dictē Esclermunde, mariée au Roy de Majorque. Raymond Roger fit endurer plusieurs indignités à sa femme legitime, à l'appetit d'vne concubine, qui estoit de la religion Albigeoise. Roger Bernard fut doncques Comte de Foix, apres son pere sixiesme en nombre, enuiron l'an mil deux cens vint & trois, & fut surnōmé le grand. Il espousa Brunixende fille du Comte de Castelbon, de laquelle il eut Roger dit Rotfer Comte de Foix apres luy, Esclermunde femme du Viscomte de Cardon-

ne, & Cecile femme du Comte d'Urgel. Roger Rotfer septiesme Comte de Foix, & cinquiesme du nom, espousa Brunixende fille du Viscomte de Cardone, de laquelle il engendra Roger Bernard sixiesme de ce nom, & huictiesme Comte de Foix: De luy, & de Manigarde de Narbonne nasquirent vn autre Roger Bernard qui succeda au Comte, Agnes qui fut femme d'Esquibat Comte de Bigorre, & Philippe mariée a Arnaud d'Espagne Viscôte de Conserans. Roger Bernard septiesme du nom, & neuf-viesme Comte de Foix, paruint au Comte de Foix apres la mort de son pere, enuiron l'an 1262. lequel espousa Marguerite fille de Gastõ de Moncade Seigneur de Bearn, & de Marthe de Foix, par le moyẽ de laquelle il vint à vñir la Seigneurie de Bearn au Côte de Foix, par l'aduis des Estats de Bearn, au preiudice du Côte d'Armignac, qui auoit espouse la sœur aisnée de Marguerite, laquelle Gaston desherita, en haine de ce qu'en certaine guerre qu'il auoit eue, il n'auoit esté aucunement aidé par le Comte d'Armignac, ainsi que de son autre gendre le Comte de Foix.

Oreut Roger Bernard de Marguerite

de Bearn sa femme quatre enfans : assavoir, Gaston l'aîné, lequel fut Comte de Foix, apres son pere, dixiesme en nombre, & le premier de ceste maison qui iouit de la seigneurie de Bearn Brunixède femme d'Helie de Perigort, Constance mariée au Seigneur de Mirepoix Anthoine de Leui, & Ieanne, qui espousa Pierre fils du Roy D. Jacques d'Arragon.

Gaston doncques premier de ce nom Comte de Foix & Seigneur de Bearn, espousa Ieanne fille de Louys de France Comte d'Eureux, & de Marguerite d'Artois, dont issirent Gaston heritier du Comté, Roger Bernard Viscomte de Castelbõ pere de Mathieu, & d'Isabel de Castelbon, qui succederent l'un apres l'autre en la Comté de Foix, & Robert Euesque de la Vaur. Il eut aussi vn fils bastard nommé le Loup, Seigneur d'Arauath, qui engendra Blanche femme de Jean de Gaulli, ou Grailli Cap de Buch. Gaston deuxiesme, onziesme Comte de Foix & deuxiesme Seigneur de Bearn, de ceste famille, eut de sa femme Alienor, fille du Comte de Cominge, Gaston Phebus, lequel succeda a son pere, l'an 1334. troisieme du nom, ayant espousé Agnes fille du Roy

Philippes de Nauarre, en eut vn seul fils, duquel il fut le meurtrier, l'ayant trouué faisi d'une boete de poison, que le Roy Charles de Nauarre son oncle luy auoit baillée, pour faire mourir le Comte son pere, a qui il vouloit mal, sans que toutes-fois l'enfant en eut aucune coulpe, car il ne sçauoit quelle drogue c'estoit: parquoy ne luy resta apres sa mort autres enfans legitimes, mais plusieurs bastards, comme Iobbain, qui fut l'un des quatre de ceux qui furent bruslés a la mommerie du Roy Charles sixiesme au banquet de S. Marceau, où comme dit Froissart à l'hostel de S. Paul a Paris, s'estans abillés de toille sur laquelle avec poix auoit esté attaché force lin delié pour se faire paroistre estre sauvages, Gratiā, & possible Bernard de Foix, qui fut marié en Espagne a D. Isabel de la Cerde Princesse du sang de Castille, souche de la maison des Ducs de Medina Celi, s'il n'estoit fils de Gastō deuxiesme predecesseur de cestui-cy.

La succession du Comte de Foix, & Seigneurie de Bearn escheurent lors a Mathieu de Castelbō susnommé, lequel n'eut aucuns enfans de sa femme Ieanne fille du Roy D. Iean d'Arragon: & partant herita

des seigneuries, & estats Isabel sa sœur, femme d'Archambaud de Grailli Cap de Buch, duquel mariage issirent Jean l'aîné quinzième Comte de Foix, Gaston Cap de Buch, d'où descendent les Seigneurs de Capdolat, & Candale, Archambaud Seigneur de Nouailles, Pierre Cordelier à Morlas, puis Evesque de l'Escar, finalement Cardinal fondateur du college de Foix à Toulouse, & Mathieu Comte de Cominges, Jean quinzième Comte de Foix, cōmenous auons dit, & premier de ce nom eut à femme en premieres nopces Marie de Navarre, laquelle, decedée sans enfans, il espousa Jeanne d'Albret, dont nâquit Gaston son successeur és Comtés de Foix, & Seigneur de Bearn. La maison de Foix a esté grandemēt illustre és faits de cestuy cy: car durant les guerres d'entre les François & Anglois, au temps du Roy Charles septiesme, ce Comte Gaston fut celuy qui fit plus de preuve de valeur contre les armées Angloises tenans la Guienne, où il print par deux fois sainct Seuer Cap de Gascongne, & gaigna Dax a force d'armes, avec grand carnage des Anglois, desenseurs obstinés de ces places: secourut Tartax, assiegée par l'espace de sept mois,

Jeane d'Albret femme de Jean xv.

Comte de Foix, Seigneur de Bearn.

Faictz generaux de Gaston Comte 16. de Foix.

par le gouverneur de Bourdeaux. Il restitua en la Viscomté de Cominges son oncle Mathieu, depossédé par le Roy de France, lequel y auoit installé vn Espagnol nommé D. Rodorigo de Villandrigo Comte de Ribadeo, où il fit demolir le chasteau de Rochefort: moyenna la liberté, & restitution en ses biens au Comte d'Armignac detenu prisonnier, pour intelligences avec les Anglois. Estât despuis fait gouverneur de Guienne, par le Roy Charles, fit si aspre guerre aux Anglois, que en peu de temps il les deposseda presque de tous leurs forts en celle Prouince: tellement que Bourdeaux, cité principale, & siege de guerre, fut contraincte de se rendre au Roy de France, l'an mil quatre cens cinquante vn, & peu apres la ville de Bayonne, tellement que les Anglois se trouuerent exclus entièrement de toute la Guienne.

Comte de
Clermont
Jean de
Bourbon.

Despuis s'estant la cité de Bourdeaux rebellée contre le Comte de Clermont Jean de Bourbon, les Anglois par eux appellés, encor qu'ils se fussent emparés de plusieurs places, furent par la vertu & bonne conduicte, principalement du Comte Gaston de Foix, repouffés, estant Cadillac la derniere place qu'il leur osta: En toutes
lesquel

desquelles guerres il fut fidèlement, & diligemment accompagné, & secouru par son frere Pierre de Foix Viscôte de l'Autrec, Tronc de la renommée maison de l'Autrec, pere de Jean de l'Autrec Posthume, duquel sortirent Odot de Foix, capitaine assés fameux aux guerres de Lōbar-die & de Naples. André fleur de l'Espare, & Thomas dict l'Escuin; de Odet fut fils Henry de l'Autrec.

Pierre de
Foix, Tronc
de la mai-
son de l'Aut-
rec.

Tant fut le Comte Gaston de Foix fa-
vorisé du Roy Charles septiesme, qu'il
bailla en mariage a son fils aîné, nommé
Gaston, comme luy, Magdelaine sa fille.
Au Jugement fait a Vandoisme par le Roy
Louys xj. du Duc d'Alençon il tint le lieu
du Comté de Toulouse au rang des Pairs
de France, laquelle préeminence dura en
toutes telles occasions en la maison de
Foix, les Seigneuries de laquelle furent par
luy accreues du Viscomté de Narbone, &
des terres de Capdolat, & autres acquets,
& finalement de la couronne de Navar-
re, par son mariage avec D. Leonor d'Ar-
ragon, fille du Roy Ican, d'Arragon
& de Navarre par sa femme, duquel nous
traitons a present. Or de ce mariage sortit
la posterité qui sensuit: Gaston, qui luy de-

Préeminence
de Pair de
France en
la maison
de Foix.

Coronne de
Navarre en
la maison
de Foix.

*Posterité de
Gaston de
Foix, & de
D. Leonor
d'Arragon,
fille du Roy
Jean d'Ar-
ragon Et de
Navarre.*

uoit succeder, & lequel nous auons dit
estre mort à Liborne, aux iouistes, & fe-
stes qui se celebroyent à l'aduenement du
Duc de Guienne. Charles frere du Roy
Louys xj. laissant hoirs apres luy François
Phebus, & Catherine ses enfans: Plus Jean
Seigneur de Narboné, & puis Duc de Ne-
mours, qui gaigna la journée de Rauene,
où neantmoins il mourut, & Germaine
deuxiesme femme de D. Ferdinand Roy
d'Espagne: De Gastō & Alienor nasquit le
troisieme fils nommé Pierre, qui fut Car-
dinal, & le quatrieme Jacques, cheualier
preux, qui mourut au seruice du Roy
Louys xj. Plus cinq filles, Marie femme
de Guillaume Marquis de Montferat Ieā-
ne femme du Comte d'Armignac, Mar-
guerite femme du Duc François de Bre-
tagne, mere de la Royne Anne de Fran-
ce, Catherine mariée au Comte de Can-
dale, dont sont issus trois enfans, l'aisné
desquels fut Comte de Candale, puis vn
Archeuesque de Bordeaux, & vne fille
mariée au Roy de Hongrie, nommée An-
ne, la cinquiesme fille de Gaston, & d'Ali-
enor, fut aussi nommée Alienor, qui mou-
rut sans estre mariée.

Or reuenans aux querelles d'entre le

Comte Gaston de Foix, pere de ceux-cy, avec le Roy D. Iean son beau-pere, iceluy obtemperant au bon conseil de ses amis, & seruiteurs, & ayāt faiēt sçauoir par Ambassadeurs, au Roy son intention, se trouuerent a la iournée assignée a Olite le Roy & D. Leonor sa fille, là où ils conuindrent en ces articles, estant le Comte Gaston de Foix absent en France premierement.

1 Que tous les peuples, villes, communautés, & nobles, & autres de quelque estat, & condition qu'ils fussent de Nauarre, reconnoistroyent pour Roy, & obeiroient sans contredict, au Roy D. Iean, tout le temps de sa vie.

2 Que le Comte Gaston, & la Princesse sa femme promettoient de maintenir les priuileges, droits, & libertés du Royaume, ainsi qu'ils auoyent esté gardés, & maintenus par le passé.

3 Que les trois Estats feroient le sermēt de fidelité, & hommage aux Princes, mary & femme, pour les reconnoistre pour leurs Roys naturels, apres le decez du Roy D. Iean, annullée toute protestation de foy, & hommage qui pouuoit auoir esté faiēt autrement.

4 Que les Princes mariés feroient gou-

uerneurs perpetuels du Royaume, durant la vie du Roy, sans pouuoir estre reuocqués, excepté que lors seulement que la personne du Roy se trouueroit dedans le Royaume, leur gouvernement cesseroit.

5 Que le Roy, ny aussi les Princes mariés ne pouroyent engager le Royaume en tout, ny en partie.

6 Que les trois Estats promettroyent de tenir la main, a ce que le Roy, & les Princes accomplissent, & gardassent tout ce que dessus est dict, & de s'opposer a celles des parties qui contreuiendroient.

7 Que mesme promesse seroit faicte & iurée par le Roy, & les Princes, & que pour la pacification du Royaume, toutes les offences seroyent pardonnées generallyment a tous, & tous crimes, pour enormes qu'ils fussent, abolis, iusques a ceste presente venue du Roy D. Iean au pays, re-stablissant, de pleine puissance, & autorité Royale, chacun en ses honneurs, bonne renommée, & biens, reuocquant, & annullant toutes sentences, & procedures faites au contraire.

8 Que toutes places, villes, tours & chasteaux qui auoyent esté occupés des vns sur les autres, & tous offices, tant Ecclesia-

stiques que seculiers , vsurpés despuis la prise du chasteau de Morillo, fussent rendus a leurs premiers legitimes possesseurs, dedans le terme de sept mois , sauf , & excepté les meubles, & fruiets consumés , & qui n'estoyent en estat , mettant au neant toutes donations, & engagements, que le Roy, ou les Princes , ou autres en eussent peu faire. En ce non toutesfois compris les differens d'entre le Comte de Lerin, & D. Iean de Beaumont, & Charles d'Artieda, contre le Connestable de Nauarre messire Pierre de Peralta , & le Marechal D. Pedro de Nauarre , auxquels estoit enjoint de se soubmettre en l'obeissance du Roy dedans douze iours apres la publication des presentes, à fin de terminer iceux differents par voye de Iustice , sur peine, faisant au cōtraire, d'estre tenus pour contumax & rebelles , & pour tels estre poursuiuis, & punis , comme perturbateurs du repos public.

9 Que tous ceux qui auoyent esté indeument prins prisonniers, despuis la surseâce faicte par l'Archeuesque de Sarragosse, fils du Roy, au nom d'iceluy, & les Princes seroyent relaschés, & mis en pleine liberté, en payant leurs despeses.

10 Que les trefues accordées par eux, ou leurs capitaines, fussent obseruées, tant à l'endroit des naturels, qu'estrangers, en leurs personnes, & biens.

11 Que ce qui auroit esté prins, & repris au preiudice d'icelles trefues, seroit réduit & deliuré sans rençon, autre q̃ de la despée.

12 Que les promesses & obligations, fust par escrit, ou de parolles faictes entre les naturels, pour raison de telles prises faictes depuis la surseance, demeureroient nulles, & sans effect, & seroyent admonestés les ordinaires Ecclesiastiques de les absoudre de tous serments faicts pour ce regard, enioignant a tous de deliurer les prisonniers dans quinze iours, & ne contreuenir a ce present traicté, sur peine de deux mille royaux d'or, pour les coffres du Roy.

13 Que quant au chasteau de Lequin, appartenant au prieur de Roncevaux, qui auoit esté prins par cy deuant, avec grãde quantité de biens, tant du prieur que du monastere, il estoit enioint a ceux qui auoyent prins lesdits biens, de les restituer, ou la valeur, attendu que le prieur auoit esté tousiours bõ seruiteur du Roy, & des Princes.

Que le Roy, & les Princes iureroient

solennellement de faire executer tous les chefs, & articles susdits, en sorte qu'ils eussent leur plein & entier effect.

Ces choses accordées furent publiées au chasteau, ou palais d'Olite, le ieudi trentiesme de May, 1471. & furent receues par ^{Olite.} 1471. le secretaire Iean de saint Iordi, & iurées es mains de l'Euesque d'Oloron, avec promesse faicte depuis par la Princesse Dom Leonor, de faire approuver par le Comte son mary lesdits articles, dõt elle enuoyeroit copie authentique, scellée du seel dudit Comte, au Roy son pere : Ausquelles choses se trouuerent presents D. Garcia Euesque d'Oloron, D. Pedro Seigneur de Ros, Ambassadeur du Comte, & D. Frere Bernard Hugues de Rocabertin, chastelain d'Amposta, messire Rodrigo de Reboledo, D. Gomes Suares de Figueroa, & messire Iean Paies vicechancelier du Roy. Apres ce, la Princesse garnie de procuration de son mari, données aux Bains de Caudes Aigues au val de Dofan, iura en Olite, au nõ d'iceluy, es mains dudit Euesque d'Oloron, l'observation des choses susdictes, presents lesdits chastelain d'Amposta, & messire Iean Paies, & D. Ferdinãd de Baquedau vicaire general de l'Eglise de

Pampelone. Toutes ces capitulations ne furent de tel efficace, que les troubles du Royaume de Nauarre en cessassent, lesquels durerent encor assés long temps.

*Clemence
du Roy D.
Jean d'Ar-
ragon.*

Dom Jean Roy d'Arragon, & Nauarre apres auoir cheui des differents qu'il auoit avec son gendre Gaston Comte de Foix, & sa fille D. Leonor, pour raison comme dessus du Royaume de Nauarre, enuoya D. Alphonse d'Arragon son fils, avec les Comtes de Prades, és enuiron de Barcelone pour procurer a quelque pris que ce fust de l'auoir: ce qu'il eut. Les habitans ayans demandé misericorde, le Roy D. Jean par singuliere benignité leur pardonna à eux, & à leurs confederés, tout ce qu'ils auoyent perpetré contre luy, mais en outre les conserua, & confirma en leurs biens, libertés, priuileges, exemptions, & droits anciens.

*Sedition en
Nauarre.*

Durant ce temps le Roy eut nouuelles d'un nouveau tumulte, qui s'estoit esmeu en Nauarre, auquel la Princesse sa fille courut vn grand danger, & plusieurs de ses seruiteurs y estoient demeurés: le fait fut tel, Jean d'Athondo auditeur Royal des Comptes, citoyen de Pampelone, & Mi-

chel d'Ollacarizqueta, & autres de la mesme cité, seruiteurs du Roy, & de la Princesse, & de la faction de Grammont, entreprendrent en haine, & diminution de la partialité Beaumontoise contraire, qui possedoit la cité de Pampelone, d'y introduire la Princesse Leonor, avec troupes de gens de guerre, & l'en rendre maistresse paisible, & absolue, ayans doncques communiqué ensemble leurs conseils, la Princesse se deuoit trouver, deuant iour, à la porte de la Iuifuerie, ou Sauaterie, autrement la tour de la porte Royale, & le Marechal D. Pedro de Navarre pour s'emparer de deux tours prochaines.

Le temps assigné venu, la Princesse avec ses gens, trouua la porte ouuerte, par les Grammontois, par où estant introduicte, le Marechal se mit dedans ces deux tours, avec septante gentils-hommes, & soudain se prindrent à crier ceux de Grammont, viue, viue, la Princesse : a ce bruit les Beaumontois, encor que troublés, comme en chose inopinée, & de nuit, coururent aux armes, & firent en sorte, que non seulement ils empescherent leurs aduersaires de passer plus auant en la cité, mais contrainrent la Princesse, & ses gens de sortir

*Temerité de
D. Leonor.*

*Le Maref-
chal aflié.*

à grande hafte : car bonne partie des foldats, qui la deuoyent fuiure, n'eftoyent encor arriués. Ayans recouuré la porte, ils afiegerent le Marefchal D. Pietro, & fes foldats, dans ces deux tours, lesquels ne fe voulans rendre au commencement, en fin le firent, quand ils virent mener le canon pour les battre.

*Foy rompue
& meurtre
du Maref-
chal de Na-
uarre &
autres.*

La Princeffe craignant qu'il ne mefauint au Marefchal, & aux autres qui eftoyét affiegés, enuoya dire, que ce qu'ils en auoyent fait, eftoit par fon commandemēt, & partant prioit, qu'on ne leur fit aucun desplairir: Bref, ils fe rendirēt, fur promeffes, qu'on les laifferoit fortir tous, avec leurs armes, fans leur mefaire, ny mefdire: nonobftant lesquelles, ils furent auffi toft faifis, & enfermés és prifons Royales: de la cité là où ils furent apres cruellemēt, & perfidement dagués, & tient-on que le Marefchal fut tué par la main de D. Philippes de Beaumont, frere du Comte de Lerin. Ce faict facha fort la Princeffe, laquelle a cause de ce, voulut que cefte porte fust apellée, de là en auant, la porte de la trahifon: & pour aucunement vanger cefte iniure, fit proceder contre le Comte de Lerin, contre Dom Iean de Beaumont

prieur de S. Iean, & chancelier du Royaume de Nauarre, & contre D. Philippes, & leurs freres, & D. Iean Comte de Luza, Charles d'Artieda & ses enfans, Arnaut d'Otza, les Alcaides, ou preuoists, & iurés de Pampelone, & autres leurs alliés, & cōplices, lesquels, par arrest & autorité du Roy, & de son conseil, furent condamnés, comme criminels de leze Majesté, a mort, priuation d'honneurs, & confiscation de biens.

Les memoires de ce temps chargent le Comte de Lerin, disans, qu'afin de mieux iouyr de la cité, il en auoit chassé les seruiteurs du Roy, & de la Princeesse, & y auoit établi officiers, & gens de guerre à sa deuotion, contre l'autorité d'iceux, la iurisdiction desquels il vsurpoit, vexoit, & tyrannoisoit le Royaume: qu'à la faueur, & aide du Comte, les Guipuscoans auoyent demoli les forts de Laraun, Lecunberry, Leyca & Goriti, & qu'estant iceluy plusieurs fois mādé, par la princeesse, aux Estats & assemblées du Royaume, il n'auoit oncques obey: Que luy ayant esté enuoyé par le Comte de Foix Iean, & Pierre de Foix ses enfans, & la Princeesse, pour le persuader de se réger à l'obeissance deuë, il auoit

reietté leurs remonstrances , & s'estoit mocqué des iussions du Pape Paul , pour ce regard : lesquelles choses pleines de contumace & mespris , auoyent induit la Princeſſe , à faire ceſte entrepriſe. Autres eſtiment qu'elle fut pouſſée d'extreme ambition, & deſirdedominer, plus que par les excès du Comte , encor qu'ils ne fuſſent legers. Or le Comte de Lerin , & ſa faction firent auſſi de leur coſté le procès aux autres , & quant à la mort du Mareſchal, il s'en excuſa , diſant , qu'il eſtoit venu chercher , & s'estoit mis en deuoir de prendre la cité , & de couper la gorge à tous les Beaumontois , qui eſtoient dedans : toutesfois cela ne l'excuſe point d'auoir failli à ſes promeſſes.

Le Roy Dom Jean donna deſpuis recompenſe a Jean d'Artondo de ſix vingts florins de rente perpetuelle , a luy & aux ſiens , du coing d'Arragon : & en outre, permit qu'il portaſt , en vn quartier de l'eſcu de ſes armoiries les armes Royales de Nauarre. A Michel d'Ollacarizqueta fut auſſi donné autre recompenſe. Ceſte ſedition auint en Pampelone,

sur la fin de l'année mille quatre cens
septante vn.

1471.

En Navarre, tost apres ceste entreprin-
se faillie, de surprendre Pampelone, par
la Princesse, le Comte Gaston de Foix
son mary, reuenant de France en Na-
uarre, estoit decedé a Roncevaux, de
maladie, l'an mil quatre cens septante
deux, laissant heritier de ses terres, &
estats de Bearn & Foix, son petit fils
François Phebus, aagé lors de cinq ans
seulement, lequel demeurant en la tutel-
le de Magdelaine de France sa mere, &
de la Princesse D. Leonor son ayeule,
fut aussi heritier du Royaume de Navar-
re, apres icelle, laquelle en ce temps gou-
vernoit la Navarre a cause de la grand
vieillesse où estoit Dom Jean son pere
Roy d'Arragon, les tiltres de D. Leonor
estoyent lors, Princesse heritiere de Na-
uarre, & Infante d'Arragon, & de Sicile,
Lieutenante generale pour le Roy son
Seigneur, & pere audit Royaume de Na-
uarre. Apres le decez du Comte Gaston,
cette Princesse faisant sa residence en la
ville de Tafala, y conuocqua les Estats, où
les grands Seigneurs se trouuerent, &

Mort du
Comte Gaston
de Foix.

1472.

Tiltres de
D. Leonor
de Navarre.

ſpecialement les chefs des factions de Gramont & Beaumont, lesquelles ſectes eſtoyēt toujours enuennimées d'ire, & deſir de ſ'entrenuire, ſans qu'il y apparut aucun bon remede. Auint, comme il eſt aiſé entre cœurs mal diſpoſés a concorde qu'entre le Comte de Lerin, & le Conneſtable meſſire Pierre de Perault, ſ'emeurēt grāds propos, & aſpres contentions aux Eſtats: dequoy ſe meſſant trop auant l'Eueſque de Pampelone D. Nicolas d'Echauri, le Conneſtable ſe ſentant par trop iniurié de luy, le menaſſa de luy faire perdre la vie. Or auoit ceſt Eueſque bruit d'eſtre vn peu plus priué de la Princeſſe D. Leonor, que l'honneſteté ne permettoit: ce qui le faiſoit auſſi auoir en horreur à pluſieurs, ialoux de l'honneur de leur Princeſſe, prenant plus en mauuaife part vn tel forfait, d'vn prelat qui deuoit donner bon exemple, que ſi c'euſt eſté quelque autre. D. Nicolas, apres ces menaces, craintif ſe retira en ſa maiſon, d'où il ne partoît aucunement. La Princeſſe, ou deſireuſe de pacifier ceſte querelle, ou bien qu'il luy tardaiſt de demeurer tant ſans le voir, luy manda pluſieurs meſſages, qu'il la vint trouuer au monaſtere de ſainct Sebaſtien, de l'ordre

de saint François, en Tafalla, où elle accomplissoit vne neufuaine, car elle estoit fort deuotieuse de ces peres, & leur faisoit beaucoup de bien : mais l'Euesque, qui auoit peur de malencontre, par chemin, s'excusoit. En fin elle luy enuoya vn de ses familiers, nommé messire Ferdinand de Baquedau, & vn autre cheualier dict messire Hugues, qui luy firent tant de promesses, qu'ils l'assurerent : partant il s'achemina, sur vne mule, vers Tafalla, en compagnie de ceux cy, & autres : dequoy le Connestable en estant aduerti, la colere le transporte : en maniere, qu'il ne se peut contenir, qu'il n'allast récontrer l'Euesque sur le chemin, où il le tua, pres des portes de la ville de Tafalla, sans auoir respect à la parole de la Princesse, ny à la dignité Episcopale, pour laquelle, ainsi violée, il demeura plusieurs mois excommunié.

*Euesque de
Pampelone
tué par le
Connestable.*

Ceste mort fut de grand scandale en Nauarre, & en la cour du Roy D. Iean : sur tous s'en resentit grandement la Princesse Leonor. Au lieu du defunt fut esleu Euesque de Pampelone, ou, cōme ce fut, pourueu de ceste dignité D. Alphonse Carillo Castillan, compté pour le quarentiesme Euesque de ce Siege. D'autre part, le Roy

*Querelles
entre les
François &
D. Iean Roy
d'Arragon.*

*Comte de
Rossillon.*

D. Iean aagé lors de septante ans, se trou-
uoit enucloppé en vne fascheuse querelle
auec les François, pour telle occasion: pie-
ça estoit engagé la Comté de Roussillon
au Roy Louys xj. pour la somme de trois
cens mille escus, lequel y tenoit des gou-
uerneurs, & officiers qui fouloyent le peu-
ple, & faisoient plusieurs extorsions in-
supportables, dont iournellement estoient
faictes plaintes par les habitans, requerrant
la protection de leur Roy: ce que les Fran-
çois trouuoient tres-mauuais: parquoy le
Roy Louys enuoya Ambassadeurs par de-
uers le Roy D. Iean, le sommer de le rem-
bourcer de ces trois cens mille escus, & re-
tirer sa Comté, ou bien qu'il la luy baillast
en pleine propriété, ou si l'un ou l'autre ne
luy plaisoit, qu'il luy donnast caution en
France de la somme, pour luy estre payée
dans certain temps. Cela mit le Roy Dom
Iean en pensement, neantmoins il respon-
dit avec grande modestie, qu'il prioit le
Roy Louys, de ne le presser point à temps
si mal à propos, & apres vne si longue, &
dommageable guerre qu'il auoit menée
contre ses subiets, de le rembourcer de ce
qu'il luy deuoit, car cela luy estoit impossi-
ble, moins de luy vèdre, & aliener du tout

ce qui estoit de la Couronne d'Arragon: Et quant à la caution qu'il luy demandoit, il n'estimoit pas que cela fust nécessaire à luy, qui auoit, graces a Dieu, de quoy payer avec le temps. De ceste responce ne furent point contents les Ambassadeurs, ioint que ceux de Parpignā impatients du ioug des François, commençoient à se rebeller ouuertement contre eux: parquoy le Roy Louys enuoya des gens de guerre en la Comté de Roussillō, pour chastier ceux de la ville de Parpignan, lesquels auoyent contraints les François habitans parmi eux, de se retirer dans le chasteau, d'où ils canonoyent la ville, & en icelle faisoient grand dommage.

Pour appaiser ce bruit, le Roy D. Jean y accourut, essayant par tous moyēs de persuader au peuple d'obeir aux François, promettant qu'en bref il les osteroit de ceste peine: mais eux respondirent franchement, qu'ils aimoyent mieux mourir, que plus retourner sous tels maistres. Estans en ces disputes, le Roy D. Jean se donna de garde qu'il fut assiegé dans la ville par l'armée François, que les auteurs Espagnols disent monter a plus de quarante mille combatans, laquelle l'ayant

environnée de tous costés, cōmençoient à la battre par dehors, & du costé du chasteau par dedans l'affaillir, en sorte que bō besoing fut aux assiegés d'auoir bon courage, & se bien defendre, à quoy leur seruit beaucoup la presence de leur Roy. Le siege continua quatre mois : finalement (au bruit de la venue du Prince D. Ferdinand, lequel à la nouuelle de l'arriuée des François, auoit fait amas de gens de guerre, tāt en Castille, qu'Arragon & Catelogne) ils desemparerent, se retirant sur les terres de France.

Maine maligne des Parpignois contre les François.

Le Roy D. Iean, & la ville deliurée de ce danger, on alla au deuant du Prince, s'entrebrassant le pere, & le fils avec grande ioye, puis vindrent de compagnie ensemble à Parpignan. Le Roy pria d'erechef les habitans, de vouloir obeir aux François, pour le peu de temps que la commodité de ses affaires requeroit, les asseurant, qu'il rembourceroit le Roy de France, & les retireroit à luy. Eux obstinés, refuserent, & le prierent de bailler au Roy Louys autres gages, ou bien de leur permettre de se retirer ailleurs, où ils pouroyent : car ils abandonneroyent volontiers leurs maisons, & biens, voire leurs

les propres, plustost que d'estre plus soumis au mauuais traictement des François. Le Roy D. Iean voyant qu'ils estoient ainsi resolus, leur laissa pour gouuerneur D. Louys de Requescés, puis s'en retourna avec le Prince son fils à Barcelonne: mais tost apres elle fut derechef assiegée par les François, mandant le Roy Louys xj. à ses capitaines, qui honteusement auoyent leué le siege sur les terres de Narbonne, qu'ils retournaissent, & n'en bougeassent, qu'ils ne l'eussent prinse, & y deussent ils tous mourir, sur peine d'estre declarés lasches, & traistres à leur Roy & patrie. Parquoy ils l'environnerent & donnerent tant de peines, l'espace de huit mois, qu'ils la mirent à sa derniere necessité: Car outre leurs grans trauaux, le defaut des vi- *Grande famine à Pampignan.* ures y fut tel, qu'ils mangerent chiens & chats, mesmes iusques aux hommes morts aux assauts, car ils n'esperoyent nulle misericorde des François qu'ils sentoient auoir grandement offencés, toutesfois ils leur pardonnerent, ne leur faisant aucun mal.

Peu de temps apres entra en Guipuscoa *Aman d'Albert: sa posterité a regné en Navarre.* vne armée de François, conduite par Aman d'Albert, dont la posterité a regné

*Alliances de
France &
Castille rom-
pues.*

en Nauarre, & ce pour fauoriser le Roy de Portugal D. Alphonse contre D. Ferdinand Roy d'Arragon & Castille: car le Roy de France à cause de ce qui estoit suruenue en Parpignan, hayssoit les Arraginois, & les alliances qui auoyent duré entre France & Castille iusques à lors, furent rompues. Les François ayans esté là quelque temps à courir le pays, ne peurent faire autre chose que de retourner.

1476.

Or le iour saint Denys huietiesme iour d'Auril 1476. ils assiegerent la ville de Fontarabie, où rien ne fut exploicté, sinon diuerses escarmouches legeres. Si est-ce que le Seigneur d'Albret ne voulut partir du pays, sans y laisser de bonnes marques: considerant que son armée estoit puissante, & que les Roys de Castille embarrassés avec le Roy de Portugal, & leurs propres subiets, n'estoyent pas pour y enuoyer vne armée pour le combattre, delibera de courir le pays, & le mettre a feu, & à sang. Estant dōcques entré en la vallée d'Ojarcun, a deux lieues de Fontarabie, il brulla l'Eglise parochiale, & environ cinquante hommes qui s'estoyent retirés au clocher: pareillement mit le feu dedans plusieurs maisons de ceste vallée, & nonobstant que

le Comte de Saluias se fut mis en deuoir de defendre la ville de la Reaterie, les François y entrerent, la bruslerent, & emmenèrent des prisonniers, puis mirent derechef le siege deuant Fontarabie, mais ce fut en vain.

Estants en ce temps les factions de Beaumont, & Grammont plus enragées que jamais à s'entrenuire au Royaume de Nauarre, & mesmes les inimitiés d'entre le Comte de Lerin D. Louys de Beaumont, & le Connestable messire Pierre Perault, poursuuiues en toute extremité de rigueur, le Comte commença a traicter avec le Roy D. Ferdinand Roy de Castille, de le faire Roy de Nauarre, & luy liurer la cité de Pampelone, & autres forteresses du Royaume, qui estoient en ses mains : partant enuoya en Victoria, par deuers luy, certains cheualiers Nauarrois, luy offrir son seruice, & tout ce qu'il tenoit : le Roy fit tres-bon racueil a ces cheualiers, & remercia le Comte de Lerin, & eux de leur bonne volonté & de leurs offres : mais quant au reste, dict, qu'il ne pretendoit rien au bien d'autruy : car le Royaume de Nauarre appartenoit, de droit, a sa sœur la Princeffe D. Leonor, & apres elle a son

D. Ferdi-
 and met
 trefue entre
 les deux fa-
 ctions.

petit fils François Phebus Comte de Foix
 & Seigneur de Bearn. Joint que le Roy
 D. Jean son pere estoit iouyssant & d'au-
 tre, & de l'autorité Royale en iceluy,
 durant sa vie : partant que d'entreprendre
 chose aucune contre le droict des person-
 nes a qui il deuoit tant d'honneur & d'a-
 mitié, ce feroit non seulement iniquité,
 mais impieté & sacrilege : & pourcc il n'y
 vouloit entendre en aucune façon, bien
 luy desplaisoit-il de voir les haines si en-
 uenimées, entre le Comte de Lerin, & le
 Connestable de Perault, que volontiers il
 s'employeroit à les apointer, estimant of-
 fice digne de luy, de pourchasser la paix, &
 repos de ce Royaume là, qui estoit ruiné
 par les miseres des guerres ciuilles : par-
 quoy les inuitoit tous deux de venir a Vi-
 ctoria, & remettre en luy leurs differents
 & débats. Avec ces saintes parolles il
 donna contentement, & admiration aux
 cheualiers Nauarrois, lesquels estants de
 retour en Nauarre, D. Louys de Beau-
 mont, & messire Pierre de Perault chefs
 de part, se transporterent à Victoria, où si
 le Roy D. Ferdinand ne les peut entiere-
 ment reconcilier, pour le moins il les mit

en trefues, leur ayant remonſtré, à l'un, & à l'autre, avec douceur & grauité meſlée, leurs fautes, & l'amendement d'icelles, au proffit du Royaume de Nauarre, & d'eux en particulier, & pour le ſeruice du Roy D. Iean leur maiftre.

Deſpuis le Roy D. Iean ſe voyant ſur le bord de ſa foſſe, deſirant de laiſſer quelque repos en ce miſerable Royaume, où les partialités auoyent mis telle confuſion, que ny la crainte de Dieu, ny le reſpect de Juſtice, ny l'amour d'honneſteté ne pouuoit retenir les hommes, qu'ils n'exerçaſſent toutes ſortes de meſchancetés, meurtres violemens, ſacrileges, voleries, bruſlemens, & deſolations horribles par tout le pays, dont s'enſuiuoient des iugemens de Dieu terribles, & eſpouuentables, peſtes, famines, & autres tels fleaux de ſon ire, tous non ſeulement accreus, mais procurés, & amenés par le ſecōd mariage du Roy, & les excés qui ſ'é eſtoient ſuiuis: par ces choſes, di-ie, meu le Roy D. Iean d'enuoyer au Comte de Lerin telles aſſeurāces, qu'il le fit venir à Sarragoſſe, où ſ'eſtant trāſporté, bien accōpagné, le Roy le receut bien amiablement & luy donna

Piteux E-
ſtat de Na-
uarre.

Second ma-
riage du
Roy D. Iea
ſuneſte &
malheureux
au Royau-
me de Na-
uarre.

*Le Comte
de Lerin es-
pouse une
fille bastar-
de d'Arrago
Et se rend
obeissant au
Roy Iean.*

paix: pardonna à tous, en general, les of-
fences passées, procedâtes de ces factions:
& pour plus grande confirmation de tout,
donna au Comte, vne sienne fille bastar-
de, en mariage, nommée D. Leonor d'Ar-
ragon. Par ces moyens D. Leonor veufue
de Foix, Royne future de Nauarre, recou-
ura, sans vser de force, ses places, & forte-
resses, & fut obeye, excepté la ville de Ca-
seda, qui se fit battre, à la prinse de laquelle
mourut ce vaillant Capitaine Sâcho d'Er-
uiti, qu'on furnommoit le Porfiado, ou
obstiné, au seruice de la Princesse D. Leo-
nor: enuiron lequel temps fut célébré vn
sinode à Estella, par l'Euesque de Pampe-
lone D. Alphonse Carillo, où il fut traité
des ceremonies, & autres telles choses. Or
se trouuant le Roy D. Iean, après ces cho-
ses, en paix, & grand repos, residât en Bar-
celone, nonobstant qu'il fust viel, & plein
de maladies, il deuint amoureux d'vne ieu-
ne pucelle nommée Francine Rose, par la
beauté, gétilleffe & bône grace de laquel-
le il se consoloit, par baisers, & fades em-
brassements, l'ennuy de sa vieillesse, la lais-
sant, au surplus, entiere à celuy qui l'espou-
sa par après. Puis desireux de conferer de
presence avec son fils le Roy D. Ferdinád,

*D. Iea Roy
de Nauarre
& Arrago
amoureux
en son extre-
me vieillesse.*

sur les affaires de Nauarre, Arragon & Sicile, & autres siens États, luy fit entendre qu'il le verroit volontiers, au lieu de Victoria, si la guerre qu'il menoit lors contre le Roy de Portugal, ne le detenoit par trop. Le Roy D. Ferdinand fort ioyeux de voir son pere, se trouua premier que luy à Victoria, où peu apres comparut le Roy d'Arragon, accompagné de grād nombre de Seigneurs, & gentilshommes choisis des plus anciens qui fussent en Nauarre, Arragon, & autres siens pays, tellement que la veuë d'une si venerable vieillesse fut merueilleusement notable & admirable: car le moins aagé qui y fut, passoit soixante ans, tous en habit decent, & conuenable a leur aage, & neātmōins differend. Le fils estant allé au deuant du pere, fut entre eux debatue assés long temps des ceremonies, & ne voulut oncques souffrir le Roy d'Arragon, que celuy de Castille luy baist la main, ny recepuoir le dessus au marcher, ains entrerent en Victoria estant le pere à la main gauche du fils: & comme ils fussent arriués deuant le logis preparé au Roy d'Arragon, & illec tous deux descendus à pied, dés que le pere s'aperceut que c'estoit son logis, il monstra d'en estre

marry, comme ayant commis vne faute: Vous, dit-il, mon fils, qui estes Seigneur, & chef de la maison Royale de Castille, dont nous sommes venus, deuez receuoir de nous tous l'honneur, reuerence, & seruice qui vous est deuë, estant l'obligation que nous vous auons en ce regard, comme à nostre Roy, & superieur, plus forte que celle du fils enuers le pere, partant remontés à cheual, & ie vous accompagneray à vostre logis: car la raison le veut ainsi. Et fallut, par la grande importunité du pere, que le Roy D. Ferdinand remonta, & qu'il fut accompagné par luy, tenant le rang dessusdit iusques à son hostel, où estant demeuré, le Roy d'Arragon s'en reuint au sien.

En l'espace de vingt iours, que les deux Roys demurerent à Victoria, le pere defera tousiours l'honneur, & la préeminence, en toutes choses, au fils, fut à se seoir, ou à se leuer, au parler, marcher, & s'accompagner, escrire, & en toutes occasiõs, où les grands Seigneurs ysent de courtoisies & ceremonies, pour s'entrefaire honneur: surquoy, entre les Seigneurs & cheualiers de la cour, furent meües questions & disputes, sçauoir mon, si c'estoit chose


conuenable à vn pere, de faire si grande
soubmissions à son fils, duquel, outre luy
estre pere, il estoit encor hôte, estant cho-
se ordinaire d'honorer tousiours, & don-
ner le dessus à celuy que nous receuons en
nostre maison, encor qu'il fut de moindre
qualité que nous, & si c'estoit bien fait au
fils de receuoir ces honneurs.

Il sembla aux Espagnols, par ie ne sçay
quel iugement, combien que le Roy d'Ar-
ragon ne tint rien qui releuast de la cou-
ronne de Castille, & qu'il fust pere de D.
Ferdinād, & logé chés la femme d'iceluy,
que chacū d'eux auoit fait ce qu'il deuoit
faire. Les propos & deuis de ces deux
Princes en ceste entreueuë, furent des af-
faires de Nauarre, touchant la future suc-
cession de D. Leonor, & de son petit fils
François Phebus Comte de Foix: & tient
on que lors furent retranchées du tout de
la courōne de Nauarre, eu esgard aux frais
que D. Ferdinād pouuoit auoir faicts à la
guerre de Parpignan, les villes & forteref-
fes de S. Vincent, Garde, Bernedo, Arcos,
Larraga, & Mirāda d'Arga, avec pact, q̄ les
vs & coustumes, droits & priuileges qu'ils
auoyent leur seroyēt maintenus à perpe-
tuité: mais estāt certain q̄ long temps auāt

cette assemblée S. Vincent, la Garde & Arcos, estoient possédées par les Roys de Castille, il est croyable que lors elles furent seulement confirmées au Roy D. Ferdinand. Ils traitterent pareillement des choses qui appartenoyent au Royaume d'Aragon & de Sicile, & puis se retirerēt chacun en ses terres, & ne veid plus le Roy de Castille son pere, lequel passa le peu de iours qui luy restèrent à viure, à Barcelonne, affligé de gouttes & autres maux, qui accompagnent coustumierement les vieillards chargez d'ans. Et se cognoissant bien approcher de sa fin, par vne fièvre mortelle qui le surprint, il se confessa, & communia, faisant tout ce qu'un Prince Catholique est obligé de faire, ordonna & fit son testament, & laissa pour son heritier vniuersel son fils D. Ferdinand Roy de Castille & Sicile, Prince de Gironne, aîné d'Arragon: & ordonna pour sa fille D. Leonor Princesse de Viane, propre heritiere de Nauarre, ce mesme Royaume qui luy appartenoit. Il ordonna plusieurs autres choses, comme il estoit conuenable à vn si grand Roy, & voulut que son corps fust enterré au Royal monastere de Poblete. Le cinquiesme iour de sa fièvre, co-

gnoissant qu'il luy falloit partir de ce monde, il escriuit au Roy son fils, qu'il estoit sur le poinct de passer en l'autre vie, & qu'il luy donnoit sa benediction paternelle, avec la Royne D. Isabel sa femme, l'aduer-
 tissant de plusieurs bons & profitables
 conseils, & sur tout l'aduisant bien d'auoir
 l'honneur de Dieu en grande recomman-
 dation. Il mourut fort repentant, apres a-
 uoir receu deuotement l'extreme onctiõ,
 comme on luy celebroit la Messe, & sur le
 point de la communion d'icelle, le Mardy ^{Mort des}
 dixneufiesme iour de Feurier, l'an 1479. ^{Roy D. Ieã}
 1479. ^{II.}
 aagé de quatre vingts vn an, sept mois,
 vingt iours, & fut enterré au Royal mo-
 nasterc de Poblette.

*D. Leonor Royne de Nauarre XXXIII. en
 l'ordre heritiere proprietare de ce Royaume,
 & la cinquiesme Princesse qui en
 ha herité.*

 On Leonor, premiere & seule de
 ce nom entre les Roynes pro-
 prietaires de Navarre, succeda au
 Roy D. Iean son pere, audict an 1479. neuf
 ans apres qu'elle fut veufue du Comte
 Gaston de Foix son mary, comme estant

*Genealogie
de Nauarre.*

fille de la Royne D. Blanche, propriétaire du Royaume de Nauarre, & niepce de l'excellēt D. Charles paisible Roy de Nauarre. Elle fut courōnée Royne, en la ville de Tudelle, vn leudy 28. iour de Feburier, neuuiesme iour de la mort du Roy son pere, où elle iura & promit, selon l'ancienne coustume de tous ses predecesseur, de garder & maintenir les droits, loix, priuileges, franchises & libertés du pays. Le fils aîné de cete Royne & de D. Gaston de Foix, fut Gaston, lequel portant le tiltre de Prince de Viane fut marié à Madame Magdelene de Frāce, & mourut à Libourne, d'vn éclat de lance en courant en vn tournoy. Ce Gaston eut deux enfans, François Phebus, & Catherine, lesquels successiuent l'vn à l'autre, furent Roys de Nauarre & Comtes de Foix. Leur second fils fut Iean, qui eut pour appanage la Vicomté de Narbonne, que le pere auoit achetée, & espousa Marie, fille de Louys Duc d'Orleans qui fut Roy de France xij. de ce nō. Paradin dit mieux, qu'elle estoit fille de Charles Duc d'Orleans: d'eux naquirent Gastō de Foix Duc de Nemours, qui mourut en la bataille de Rauenne, & Germaine, deuxiesme femme du Roy Ca-

holique D. Ferdinand, laquelle en secondes nopces, espousa D. Ferdinand d'Arragon Duc de Calabre, fils legitime de D. Federic Roy de Naples, lequel mourut, estant Viceroy de Valence. Ce Vicomte de Narbonne Iean, fut gouverneur de Dauphiné, & depuis de Guyenne, Prince hardy, vaillant & renommé es guerres Angloises & d'Italie, où il accompagna le Roy Charles huitiesme, avec grande autorité & credit, puis il mourut à Estampes, au temps du Roy Louys xij. où il fut enterré. Leur troisieme fils fut Pierre nay à Pau en Bearn l'an 1449. lequel s'addonna aux lettres, & esleut la vie Ecclesiastique, souz la conduite & discipline du Cardinal de Foix son grand oncle Euesque de Lescar, & Legat du Pape en Dauphiné & Prouence: apres le decez duquel, ayant profité es vniuersités de Tholouse, Paue & Ferrare, en l'un & l'autre droit, il fut fait aussi Cardinal, par le Pape Sixte quatriesme, du titre de S. Cosme, & Damiã, estant ja Euesque de Vannes, & pourueu de plusieurs riches benefices, par la faueur du Duc François de Bretagne son beau-frere, qui auoit espousé Madame Marguerite de Foix sa sœur, d'où nasquit la Royne Anne.

Le quatriefme fils du Comte Gaston & de D. Leonor, eut nom Jacques, seul de tous leurs enfans qui naquit en Navarre, fut fort estimé, & hōnoré par le Roy Loys xij. de l'ordre de S. Michel, & de la conduite de cent hommes d'armes, acquist le renom de sage & vaillant aux guerres de Lombardie & ailleurs: mais il mourut ieune ayant à peine atteint l'an trentiesme de son aage, sans auoir esté marié. Il laissa quelques enfans naturels, qui furent d'Eglise, & possederent amples benefices, iusques aux derniers iours du Roy François premier. Outre ces quatre fils nasquirent aux Comtes de Foix Gaston & D. Leonor, cinq filles, dont la premiere nommée Marie, fut femme de Guillaume Marquis de Montferrat, lequel fit eriger l'Eglise de Casal en siege Episcopal, par autorité du Pape: Cette Dame fut accompagnée vers son mary, l'an 1466. par son frere Pierre de Foix, par Bernard bastard de Foix, Godefroy Basileac Euesque de Riues, par l'Euesque de Conserans & Pierre de Sobreuille, & plusieurs autres Seigneurs & gentils-hommes. De ce mariage ne nasquirent aucuns enfans masles, ains seulement filles, desquelles l'aînée espousa
Louys

Louys fils de Thomas Marquis de Saluf-
es, & ne succederent au Marquisat de
Montferrat ces filles, au Marquis Guillau-
leur pere, ains vn sien frere. Ieanne se-
onde fille du Comte Gaston & de D.
conor fut mariée au Côte d'Armignac,
ls de celuy qui fut occis par le comman-
dement du Roy Louys xj. duquel maria-
ge le Roy irrité, fut tāt persecuté le Com-
te, qu'il fallust qu'il se sauast en Castille,
d'où se fiant aux promesses, serments &
belles paroles du Cardinal d'Albi, Am-
bassadeur du Roy audict Royaume, estant
revenu en France, il y fut dagué cruelle-
ment. Parquoy sa femme Ieanne de Foix
en retourna en Bearn, n'ayant eu de luy
aucuns enfans. La troisieme fille fut Mar-
guerite espouse de François, dernier Duc
de Bretagne: duquel mariage nasquirent
deux filles, Anne & Isabeau: Isabeau mou-
ut ieune, mais Anne fut mariée a deux
Roys de France successiuellement, Charles
vij. & Louys xij. De Louys elle enfanta
Claude & Renée, dont Claude promise,
premierement à Charles, qui fut depuis
Roy d'Espagne, & apres Empereur v. du
nom, espousa le Roy François de Valois r.
ors Duc d'Angoulême: Renée fut ma-

tiée à Hercules d'Est Duc de Ferrare. Le Comte Gaston & sa femme D. Leonor eurent aussi Catherine leur quatriesme fille, mariée au Comte de Candalle, mere de trois enfans, dont l'aisné fut Seigneur de Candalle : le deuxiesme, Archeuesque de Bordeaux, & la troisieme qui fut vne fille nommée Anne, Roynie d'Hongrie & Boëme, femme d'Vladislaus, fils de Casimir Roy de Polongne. Ce Vladislaus premierement Roy de Boëme, auoit espousé auparauant D. Beatrix d'Arragon, veufue du Roy Matthias de Hongrie, en faueur de laquelle, les Hongres l'esleurent pour leur Roy. mais il fit diuorce avec elle, pour sa lubricité, & espousa depuis cette Anne de Foix, laquelle fut menée à son mary par la Duché de Milan, lors possedée par les François, & par la ville de Venise, alliée & grandement amye de ce Roy, estant lors Duc en icelle Leonard Lauredan. De ce mariage nasquit Louys, successeur à son pere aux Royaumes de Boëme & d'Hongrie, mary de la Roynie Marie de Castille, sœur de l'Empereur Charles, & vne fille nommée Anne, qui espousa Ferdinand d'Autriche, depuis Empereur, frere de Charles, & à cause d'elle, Roy de Boëme.

& de Hongrie, apres la mort de son beau-
pere le Roy Louys, duquel mariage de
Ferdinand & Anne, nasquirent Maximi-
lian Empereur & plusieurs autres enfans.
La cinquiesme fille de Gaston de Foix &
de Leonor de Nauarre, mourut sans estre
mariee, estant seulement promise au Duc
de Medina Celi, issu de la mesme maison
de Foix, & s'appelloit D. Leonor, comme
la mere. Cette noble & illustre suite de
grands Princes & Princesses a produict la
maison de Foix & de Nauarre, donnant
en mesme temps, à la Chrestienté quatre
Roynes cousines germaines: à sçauoir Ca-
therine de Nauarre & Germaine, de Ca-
stille & Arragon, Anne de France, & An-
ne de Boëme & Hongrie: chose fort rare,
& peu souuent veüe en la Chrestienté, dõt
redonde au Royaume de Nauarre vne
grande gloire & honneur.

La Royne Leonor regna si peu de tēps,
que nous n'auons subiect d'escrire autre
chose d'elle: & croy que si elle eust regné
long temps, nous n'en eussions eu faute.
On tient qu'elle mourut de fascherie de la
mort infortunée de l'Euesque de Pampe-
lone D. Nicolas d'Echauarri, & n'y auoit
que 24. iours, qu'elle auoit succedé au

1479.

Royaume, & quinze qu'elle auoit esté couronnée à Tudelle, où elle mourut le douzième de Feburier, l'an 1479. & fut par sa volõté mesme, enterrée au Conuēt de S. Sebastian, de l'ordre de S. François, en Tafalla. Depuis ce Conuent fut demantelé, par le commandement du Cardinal François Ximenez, Archeuesque de Tolède, gouuerneur de Castille, pour-ce qu'il trouuoit le lieu trop fort, hors de la ville, pouuant estre cause de quelque grand mal à l'aduenir s'il n'estoit demoly.

*De Dom François Phebus trente-quatriesme
Roy de Nauarre.*

1479.

DOm François seul de ce nom surnommé Phebus succeda à la Royne Leonor son ayeule, l'an mil quatre cens septante neuf, en l'année douzième de son aage, estant nourry en la Comté de Foix & Seigneurie de Bearn, en la garde & tutelle de Madame Magdeleine de France sa mere, & du Cardinal son oncle. Il fut trois ans deuant qu'il passast en son Royaume, à cause des seditions qui se renouellerēt, aussi tost que la Royne Leonor fut morte, entre les Beaumonts

tois, desquels le Comte de Lerin estoit ^{Guerre ré-}
 chef, tenāt la ville de Pampelone, & ceux ^{nouucllée}
 de Grammōt qui suiuyoient messire Pier- ^{entre les}
 re de Perault Connestable de Nauarre, & ^{Beaumōtois}
 Philippe de Nauarre Marechal, & auoyēt ^{& Gram-}
 pour leurs forts & retraites les places d'E- ^{montois.}
 stelle, Sanguesse, Olite, & bonne part en la
 ville de Tudelle. La mere du ieune Roy y
 fit vn voyage, comme l'on void par lettres
 qu'elle octroya en la ville de Pampelone,
 cette année là, & s'esforça de pacifier les
 troubles, mais elle ne gaigna rien, & ne
 peut mettre sa volonté en effect. Plusieurs
 Prelats & grands Seigneurs de Castille &
 Arragō s'employoient aussi, mais en vain,
 de mettre la paix & d'appointer ces sedi-
 tieux obstinés & endurcis en leurs mau-
 uaises affections. La faction de Grammōt
 sur tout estoit desplaisante de voir le Cō-
 te de Lerin marié à vne Dame de sang
 Royal, sœur du Roy D. Ferdinand de Ca-
 stille, s'estant emparé de la ville de Pam-
 pelone, capitale du Royaume, & faisoit
 courir le bruit, qu'il se vouloit faire Roy
 de Nauarre. Durant ces aspres & enueni-
 mées querelles poursuiues par ces deux
 factions, aduint que Philippe de Nauarre,
 successeur en l'Estat de Marechal à son pe-

re Pierre, & és inimitiés, contre le Comte de Lerin, surprint la ville de Viane, mais ne peut estre maistre du chasteau, où commandoit vn gentilhomme de la maison de Gongora, pour le party du Comte: & se desiant de la pouuoir garder, il fut transporté de la haine, qu'ayant conuenue avec le gouuerneur de Logrogne Iean d' Riuera, le capitaine Mudarre, & autres gens de guerre Castillans, il leur mit entre les mains cette ville. Le Comte de Lerin fort irrité de ce faict, se mit en deuoir de recouurer cette place, d'importance notable tant à luy, ny à sa faction Beaumontoise qu'à tout le Royaume: & fit si bien qu'il reprist & regaigna Viane & Larraga, qui estoit de long temps possédée par le Roy de Castille: & s'il eust esté aussi puissant qu'il estoit de grand courage & sagesse à la guerre, indubitablement il eust regaigné les places de S. Vincent, la Garde & Arcos, comme il s'en mit en deuoir, mais il trouua foible: print neantmoins, en ce heur, la ville de Miranda sur Arga, & fit ietter dedás la riuere ceux qui la tenoyent. Le Royaume de Nauarre estoit ainsi troublé à l'aduenement du ieune Roy François Phebus, en danger que les Roys de Castil

le, sur telles occasions, ne s'esmeussent à son dommage, tant pour les mauuais offices des chefs de part, que superflus deuoirs des capitaines des frōtieres, lesquels pour se monstrier trop bons seruiteurs, tirent souuent leurs maistres en querelles iniques, outre leur volonté. Le Roy de Castille D. Ferdinand estant à Sarragosse, le Cardinal de Foix & son frere D. Iaques, oncles du ieune Roy François Phebus, de Nauarre, allerent le trouuer, & le supplier de secourir ce ieune Roy, pour reprimer l'audace de ses subiets qui troubloyent son Royaume, y exerceans tyrannies incroyables & mesprisans sa ieunesse. Le Roy D. Ferdinand les receut gracieusement, comme ses nepueux, enfans de sa sœur la Royne D. Leonor, & promit de faire, en ce qu'ils demandoyent office de Prince Chrestien, amy & parent proche qu'il estoit du Roy François Phebus. Cependāt que le Roy de Castille faiēt seiour à Sarragosse, le Mareschal de Nauarre qui estoit à Tudelle auoit intelligence ordinaire avec plusieurs Seigneurs de Castille, desquels aucūns sachans la promesse & volonté de leur maistre, commencerent à moyenner la paix entre les deux factions

de Beaumont & de Grammont, qui ruinoient le Royaume de Nauarre. En quoy affectueusement s'employa vn frere Prescheur du Roy D. Ferdinãd nommé Abarca, qui fit si bien que fut accordé le mariage d'entre messire Philippe de Nauarre Marechal, & vne fille du Comte Louys de Lerin, estimant que par le moyen d'un tel mariage, ces Seigneurs mettroient la haine sous le pied, s'accorderoyent & s'aymeroyent comme alliés, & que les autres partisans se conformeroyent à leur exemple, & se contiendroyent: mais ce bon Religieux y fut trompé: car ceux de la faction de Grammont reprouuans ce mariage, cōme pernicious à leur party, & par trop auantageux à la faction contraire, qui leur vouloit oster vn grand Capitaine, sceurēt tellement flatter le Marechal Philippes, qu'ores que les accords & promesses fussent passées si auant, qu'il n'estoit ny honeste ny licite des'en retirer, il se retracta neantmoins & declara qu'il n'y vouloit plus entendre. Le Comte de Lerin se sentant offensé de cela, comme il estoit d'un cœur haut & superbe, se vengea incontinent apres, & tua le Marechal Philippes, ainsi qu'il alloit de Sanguesa à Villefran-

que, parler à D. Iean de Ribera Castillan,
 l'ayant le Comte attendu expres sur les
 chemins, tant pour le chastier de sa lege-
 reté, qu'esmeu de jalousie, de ce parlemēt
 qu'il alloit faire avec ce Castillan, se dou-
 tant de quelque trahison & menée con-
 tre luy, & le Royaume semblable à celle
 de Viane, qu'il ne pouuoit oublier. Ainsi
 de mesme main, furent depeschiez le pere
 & le fils Mareschaux du Royaume de Na-
 uarre, & succeda à cette office messire
 Pierre de Navarre, frere puisné de Philip-
 pes, qui fut le quatriesme de cette maison,
 qui eut cette dignité. Le Connestable
 messire Perre de Peralta estoit lors hors
 du Royaume, lequel ayant obtenu, avec
 grandes difficultés, absolution du Pape,
 du meurtre qu'il auoit commis en la per-
 sonne de l'Euesque de Pampelone Nico-
 las d'Echauarri, alla faire publiquement
 amende & recognoissance de telle faute,
 en la grande Eglise de Valence, & mourut
 bien tost apres, laissant heritiere de sa mai-
 son vne fille seule, nommée D. Ieanne de
 Peralta, qui fut femme de D. Troilo Car-
 rillo d'Acugna, fils de l'Archeuesque de
 Toledé. Cette maison de Peralta descen-
 doit de la souche Royale de Navarre, &

Le Mares-
 chal de Na-
 uarre tué.

Pierre de
 Navarre 4.
 Mareschal.

Maison de
 Peralta des-
 cendant de
 la souche
 Royale de
 Navarre.

Marquis de
Falses.

par la mort de messire Pierre, cessa en cette famille l'office de Connestable, & ses successeurs furent intitulés Comtes de saint Estienne & grâds Chambellans des Roys de Nauarre : & entra en sa place messire Louys de Beaumôt Comte de Lerin, qui fut depossédé de cette dignité de Connestable, qui vint depuis à D. Alphonse petit fils de messire Pierre de Peralta, les heritiers de la maison duquel, par succession de temps, se sont appellés Marquis de Falses, ville de Nauarre. Le pauvre Royaume de Nauarre estât ainsi foudroyé des guerres ciuiles, les oncles du ieune Roy ayans eu du Roy D. Ferdinand promesses, que s'ils ne pouuoient renger ses subiets rebelles à l'obeissance de leur Prince, par voye amiable, laquelle il leur conseilloit d'essayer auant que venir à la force, il leur fourniroit gens de guerre, munitions & deniers, pour les domter, s'en allerent en Nauarre accompagnés de plusieurs Seigneurs & gentilshommes de la cour du Roy de Castille, avec intention de faire tout ce qu'ils pouroyent, pour reduire, par la voye de douceur, en estat paisible, & estans arriués en la ville de Tafalla, conuoquerent incontinent les Estats gene-

raux, en vertu des pouuoirs qu'ils auoyent de la Majesté : promettans le Cardinal & messire Iacques de Foix libre & assésuré accès & sauſconduit à tous. Les deputez des trois Estats du Royaume estans comparez en grande & honorable compagnie, & ayans entendu la proposition du Cardinal, & cause de leur venue en Navarre: à quoy estoient ioinctes lettres du Roy Louys xj. exhortans les Navarrois de se maintenir obeyssans à leur Roy & le recognoistre & seruir ainsi que fidelles vassaux estoient tenus de faire, pouruoyas en ce faisant, à leur bien & repos, & à la tranquillité de leur patrie: tous vnanimement respondirent que les Seigneurs & peuples de Navarre n'auoyent iamais pensé de se departir de la deuë obeissance au Roy François Phebus, qu'ils recognoissoient pour leur Prince naturel & legitime: ains au cōtraire, auoyent esté iusques à lors en continuelle ialousie & crainte, qu'à cause de son ieune aage, & absence du Royaume, & des desordres qu'à ces causes, s'y engendroyent, quelque estrangier s'en emparast ou y fist quelque notable breche. A cette cause, qu'ils ne desiroient pas moins que luy, sa venue, & l'en sup-

plioyent tres-affectueusement comme du tout necessaire. Que si elle auoit esté retardée par les excès, ambitions & tyrannies d'aucuns particuliers, il sceust que ce auoit esté, au grand regret des autres, & nullement du consentement cōmun. Par tant qu'il vint à la bonne heure: & qu'ils estoient bien prests de le receuoir & de l'honorer ainsi qu'il appartenoit. Cette si agreable & desirée responce entendue par le Cardinal & son frere, ils l'escriurent incontinent aux Roys François Phebus & à son grand oncle D. Ferdinand. Et pour ce que ce n'estoit rien faict qui ne reconcilioit ces deux grandes maisons du Comte de Lerin, & du Mareschal D. Pierre, le Cardinal s'esforça de tout son pouuoir, pour les rendre amis: mais ce fut avec tres grandes difficultés, tellemēt que plusieurs fois ils tindrent l'affaire pour desespéré: Neantmoins scachans que par la perseuerance, on surmonte tous grāds obstacles, & qu'en choses si sainctes & loüables, il se faut principalement euertuer, ils travaillerent tant, qu'en fin, ils cuiderēt les auoir accordés. Et pour vn plus grand & estroit lien de cette paix, estant en Carême l'assemblée de ces Estats, le Cardinal voulut

que le Comte & le Mareschal communias-
sent ensemble en vne hostie mi-partie
au Conuent de S. Sebastian de Tafalla.
Mais comme le cœur des hommes est biē
souuent different de l'apparence, cette re-
conciliation n'estoit que mines : car non-
obstant les promesses, sermēts & tout res-
pect de religion qui sert souuent de voile,
aux mauuaises intētions, le Comte de Le-
rin, estimant avec toutes ces ceremonies,
auoir bien assure son aduersaire, delibe-
roit de le tuer à la premiere occasion, esti-
mant que s'il se deseschoit de cetuy-cy
aussi biē qu'il auoit faict du pere & du fre-
re d'iceluy, il n'auroit plus ennemy en Na-
uarre qui luy fist teste. Le lendemain donc
de leur accord, qui estoit le iour du grand
Vendredy, ayant sceu que le Mareschal
D. Pierre partoit de Tafalla, pour aller vers
Tudelle, où bien au Monastere d'Oliue, il
alla s'embuscher en bōne trouppes, au des-
sous d'Agnorbe, pour l'assaillir au des-
pourueu, au passage. Le Mareschal qui ne
se doutoit d'aucune chose, s'en alloit en
compagnie du Comte de S. Sebastien suc-
cesseur du Connestable de Peralta, avec
leurs gens : mais estant pres du lieu de l'em-
buscade, où la mort luy estoit apprestee,

*Reconcilia-
tio sainte.*

*Trahison
du Comte
de Lerin.*

Dieu voulut qu'il en eust aduertissement, ou en quelque façon descouurit la trahison que le Comte luy brassoit. Parquoy soudain il tourna bride & se sauua à toute course, pour suiuy par son ennemy si viuement, que sans la bonne assistance de messire Arnaud gouuerneur d'Vnque, & sa prompte retraite en vne Eglise, il estoit mort. Le Comte en furie, deschargea sa colere, le mesme jour, sur autres Grammontois: car il tua de sa main, messire Leō de Garro le bastard, l'Archiprestre Mendigorria, laissa pour mort messire Iean de Velez de Medrā, sans autres, que tués que blecés: puis s'en retourna en ses maisons. Peu apres estans commis certains meurtres & assassinats par ceux de la maison d'Artieda à l'endroit d'aucuns de celle d'Ayanc, les meurtriers furent recueillis par le Comte Louys de Beaumont Connestable: A raison dequoy ceux d'Ayanc, qui auoyent tousiours suiuy le patty de Beaumont, se reuolterent du costé des Grammontois. Ces choses sont remises par aucuns plus vray semblablement, en autre temps, apres ces Estats, disans qu'il n'est croyable que le Connestable se fust tant oublié que de commettre vn tel for-

faict, le iour du grand Vendredy, apres la reconciliation si religieusement faicte, & mesmes estant le Cardinal Pierre de Foix & son frere messire Iacques de Foix au pays, & les Estats du Royaume assemblez: & croyent plustost que telle renouation de querelle aduint long temps depuis, & du regne de la Roync Catherine, pour nouvelles iniures suruenues & suscitées entre ces Seigneurs.

Le Cardinal de Foix & son frere Iacques de Foix ayās eu des Estats la responce qu'ils desiroyent, & ordonné le mieux qu'il leur fut possible, les affaires du Royaume, retournerent en Arragon, deuant que le Roy D. Ferdinand, en sortist, avec lequel ayans consulté, ils conclurent qu'il estoit expediēt que le Roy François Phebus s'acheminast en son Royaume & y entraist en armes, au plustost que faire se pourroit, auant que les volontés du peuple, par les occasions qui pouuoient naistre, se changeassent. Retournés en France, ils exposerent au ieune Roy & a madame Magdelaine sa mere, ce qu'ils auoyent faict tant en Nauarre qu'en Arragon, leur signifiant que toute l'esperance qu'ils deuoient auoir d'un bon succès des affaires

Le Roy
François
Phébus re-
çeu en son
Royaume.

1482.

de sa Majesté, consistoit en la diligence. Parquoy à l'instant furent conuqués amis & seruiteurs de toutes parts, dont ils mirent ensemble enuiron mil cinq cens cheuaux, & pareil nombre de gēs de pied, avec lesquelles forces, ce ieune Prince accompagné de sa mere & du Cardinal son oncle, entra en Nauarre, où il fut receu par la Noblesse & villes, sans difficulté ny résistance aucune. Le Comte de Lerin mesme, bien qu'il fust desplaisant de sa venue, luy liura la ville de Pampelone, considérant que s'il faisoit autrement, le ieune Roy auoit d'un costé, le Roy de Castille, & de l'autre, celuy de France, Princes tres-puissants, proches parents, qui le contraindroient de faire son deuoir. Le Roy fit son entrée en la ville, au mois de Nouembre 1482. où s'estans assemblés les trois Estats, il print la couronne Royale, presta & receut les serments de fidelité, & bonne administration, en la grande Eglise, en la maniere accoustumée, presens le Cardinal son oncle, les Seigneurs du Royaume, la Princesse sa mere, accompagnée de Dames & Damoiselles, les Ambassadeurs de France & de Castille & d'autres Potentats, estant lors aagé de quinze ans seulement.

ment: & furent faicts ce iour, & autres sui-
uans, tournoys & festes en toute magnifi-
cence. Apres, il se mit à visiter en person-
ne les villes & forteresses, tant pour voir
la forme du gouuernement du pays, que
pour receuoir particulier serment des ca-
pitaines & gouuerneurs, pouruoir à l'ad-
ministration de la iustice, & remarquer
comme chacun estoit ferme en son serui-
ce: & pour pouruoir mieux au repos, &
tranquillité publique, fit faire defenses à
son de trompe, en sa cour, & en tout le
Royaume, sur peine de la vie, de n'vser
plus de ces noms seditieux de Beaumon-
tois & Grammontois. Et pour gratifier
le Cointe de Lerin, & le rendre plus affe-
ctionné à son seruice, il luy conferma la
Connestablie qu'auoit tenu au precedent
messire Pierre de Peralta defunct, & en
outre luy donna Larraga & autres lieux
qu'il auoit gaignés sur les Castillans, ex-
cepté Viane, pour ce qu'elle estoit chef de
Principaulté, & le tiltre des aînés de Na-
uarre: neantmoins luy bailla la garnison
& capitainerie du chasteau. A la grande
Eglise où il auoit esté couronné, il fit dōs &
oütroya priuileges, mesmes d'estre exēpts
de logis, dont il y a lettres données à Ta-

falle, au moys de Ianuier de cette année :
gratiffa pareillement autres Seigneurs &
gentilshommes, Eglises, Villes & person-
nes particulieres, en telle moderation &
equité, que tous admiroyent si grãde pru-
dence, en telle ieunesse, & louoyent Dieu
d'auoir donné vn si bon Roy en Nauarre,
en toutes lesquelles choses il se preualoit
des sens & prudẽce de la Princesse sa me-
re, & du Cardinal son oncle, & autres gens
d'Estat & de grand sçauoir & experience
qu'il auoit en sa cour & autour de sa per-
sonne. Pendant que pour son bas aage,
la Princesse Magdeleine gouuernoit le
Royaume, elle vïoit ẽs lettres de tels til-
tres : Nous Magdeleine fille & sœur des
Roys de France, Princesse de Viane, tutri-
ce & gouuernante de nostre tres-cher &
tres-aymé fils François Phebus, par la gra-
ce de Dieu Roy de Nauarre, &c. Ce Prin-
ce fut furnommé Phebus, pource qu'il
estoit beau entre ses pareils, comme le So-
leil entre les Estoilles, & aussi pour auoir
eu quelques vns en sa race portans tel nõ.
On luy pourchassa diuers mariages, mais
il ne s'en accomplist aucun : car il mourut
le 15. moys apres son couronnement, se-
stant comme monstre au monde & sou-

dain defailly en sa grãde ieunesse. Le Roy D. Ferdinand de Castille son grand oncle luy voulut bailler en mariage, sa seconde fille, D. Ieanne, qui depuis fut heritiere de tous les Royaumes : mais la Princeesse sa mere, suiuant les conseils du Roy Louys xj. peu affectionné aux affaires de Castille, l'en destourna : Mesme empeschement fut par elle & le Roy Louys, donné au mariage de sa sœur D. Catherine qui fut Roynede Navarre, & du Prince D. Iean de Castille, heritier de la couronne : car le Roy Louys qui auoit de grands deffcins en la teste, vouloit marier ce ieune Roy François Phebus à D. Ieanne Religieuse à Coimbra, pretendue Roynede Castille : & esperoit moyennant les forces de son Royaume, & ce droict pretendu, reietter les Roys D. Ferdinand & D. Isabel, des Royaumes de Castille & Leon, retenir à perpetuité, la Comté de Roussillon, & autres choses. Ce qui aduint tout au rebours de sa volonté. A cet effect, il auoit enuoyé Ambassadeur en Portugal, vers le Roy D. Alphonse, la mort duquel aduenue cette année, & celle du Roy de Navarre peu apres, renuerferent tout ce conseil : auquel aussi le Roy D. Iean de Portugal qui vint

Oo ij.

1483.

Mort du
Roy Phebus
par poison.

apres, ne voulut iamais prester l'aureille. Le commencement de l'année 1483. fut fascheux & triste aux Nauarrois, à cause de la mort de leur Roy François Phebus, lequel la Princeſſe ſa mere auoit ramené en France, pour fuir les importunes ſollicitations des mariages qu'on procuroit en Eſpagne à luy & à ſa ſœur Catherine, qui n'eſtoient agreables au Roy Louys xij. ſa mort ne fut ſans ſoupçon de poison: car ſans apparence d'aucune maladie, il ſe ſentit comme frappé de mortelle pointure, apres auoir ioué d'une fleute, qu'on luy auoit présentée, duquel instrument & de tout ce qui depend de la muſique, il ſe delectoit fort. Eſtant proche de la mort, il diſt ces mots prins de l'Euangile: Mon Royaume n'eſt de ce monde, partant ie laiſſe le monde: ne vous troubleſ point, car ie vay au Pere. Il mourut en Bearn, au chasteau de Pau, l'an quatrième de ſon regne, à compter du decés de D. Leonor ſon ayeulle, n'ayāt que 16. ans accomplis. Il fut enterré à Lescar, en l'Egliſe Cathedrale de S. Maire, & fut le ſeptieſme Roy de Nauarre, qui fut enterré en France.

*De D. Iean d' Albret trente cinquiesme Roy de
Nauarre, & de la Royne D. Catherine sa
femme heritiere de Nauarre, sixiesme
Princesse qui ha herité du
Royaume.*

DOm Iean troisieme & dernier
de ce nom, surnommé d'Albret,
& la Royne D. Catherine sa fem-
me succederent au Roy D. François Phe-
bus, leur cousin & frere : la Royne en ladi-
cte année 1483. & le Roy, depuis, au temps
qui sera remarqué cy apres. La Royne D.
Catherine ayant nouuellement herité du
Royaume de Nauarre, estoit du tout à la
deuotion de France, ainsi que sa mere &
sur le poinct de se marier, avec Iean d'Al-
bret fils du Comte Amand. Surquoy ou
vn peu deuant, estoit aduenue la mort du
Roy Louys xj. qui auoit aucunemēt trou-
blé l'alliance d'entre ces deux grands
Royaumes, de Frâce & Espagne: car estās
allées Ambassades d'vne part & d'autre,
tant pour faire les accoustumées dolean-
ces & consolations ordinaires en tels ac-
cidents, que pour traiter des alliances, &
en outre de la restitution du Comté de
Roussillon, que les François tenoyent, les

Ambassadeurs d'Espagne auoyent eue-
ponce peu agreable du ieune Roy Char-
les viij. qui auoit succedé au Roy Louys,
& de ses tuteurs & conseil : de sorte qu'ils
auoyent faict les protestations & declara-
tions qu'ont accoustumé les Princes de
faire. quand ils sont sur les termes d'entrer
en debat & guerre. Parquoy la Royne D.
Isabel auoit pourueu la frontiere de Ca-
stille, ioincte à Nauarre de fortes garni-
sons, & enuoyé forces dedās Tudelle ville
de Nauarre, qui estoit de leur party, sous
la conduite de D. Ican de Ribera. Des le
temps du decez de D. François Phebus, la
Princesse sa mere, craignant & non sans
cause, les reuoltes & remuemens de ce
peuple assez ennemy de repos, y auoit en-
uoyé le Cardinal de Foix & le Seigneur
d'Abenas frere du Seigneur d'Albret, les-
quels auoyent faict assembler les trois E-
stats, pour receuoir d'iceux nouveau ser-
ment de fidelité, pour la Royne D. Ca-
therine, & voulut au surplus, qu'ils receuf-
sent pour Viceroy ledict Seigneur d'Abe-
nas, nonobstant que le Connestable D.
Louys de Beaumont, Comte de Lerins y
fust fermemēt oppose, & eust, à cette cau-
se, pratiques & intelligences avec le Roy

D. Ferdinãd son beau-frere. Ce Seigneur d'Abenas estoit homme sage & moderé, qui gouuerna assés bien le Royaume de Nauarre, & s'esforça de le tenir en repos, iusques à ce que la Royne Catherine estât mariée avec son neveu Ieã d'Albret, vint en personne le regir & gouuerner. Cependant le Connestable, qui auoit la ville de Pampelone en sa puissance & plusieurs autres places, esmouuoit troubles, & donnoit entrée aux Castillans, au Royaume, souz couleur de leurs partialités de Beaumont & de Grammont, & se continuoyēt les poursuittes de mariage, tant qu'apres la mort du Roy Louys, estant tousiours sollicitée la Princesse Magdeleine de bail-
ler la Royne Catherine sa fille au Prince D. Iean de Castille, elle fut conseillée de dire, pour finale responce, que l'inegalité des aages ne pouuoit permettre que cela se fist, attēdu que sa fille estoit en aage mariable, & le Prince encores petit enfant au maillot: & que le temps qui courroit auāt qu'il fust grand, pouuoit apporter grands troubles & desordres au Royaume de Nauarre, qui sur tout auoit besoin d'hommes pour le regir, & reprimer les querelles ordinaires que ce peuple naturellement y

1484.

entretenoit de tout temps: & que sans cest empeschement, elle & sa fille se sentiroyēt bien heureuses d'une si grande alliance: estimans n'y avoir au monde semblable party à celui du Prince D. Iean, heritier presomptif de tant de riches & puissans Royaumes. Ce nonobstant la Royne D. Isabel se persuadant de pouvoir effectuer ce mariage, quelque empeschement qu'il y eust, s'entretinst en Victoria bonne partie de l'année 1484. ayāt mis comme nous auons dict, en Nauarre D. Iean de Ribera, avec gens de guerre, lequel s'entendant avec le Comte de Lerin, print Viane, le chasteau de S. Gregoire, celui de Irrureta, & autres. A ces desordres le Viceroy es-
suyoit de remedier par sa prudence, & cō-
tenir les peuples en l'obeyssāce de la Roy-
ne leur Princeesse naturelle. En ce temps mourut le Pape Sixte iiij. succedant en sa place Iean Baptiste Cibo Cardinal du til-
tre de S. Laurens en Lucina, & Euesque
de Malfette, qui fut nommé Innocēt viij.
L'an precedēt estoit decedē le Roy Loys
xj. lequel (comme il fut bruit) par son te-
stament, auoit ordonné que la Comté de
Roussillō fust restituée au Roy D. Ferdi-
nand son legitime Prince: ce que toutes-

fois le Conseil de son fils ne trouua pas bon. Ce Roy estant fort deuotieux enuers S. Jacques, auoit donné dix mille escus, & enuoyé force métal & ouuriers, pour y faire la plus grande cloche qui fust en la Chrestienté.

Iean Vicomte de Narbonne, oncle de Catherine Royne de Navarre & de defunct Roy François Phebus son frere, querella incontinct les Seigneurs de Foix & de Bearn: disant qu'estans terres dedans les limites du Royaume de France, où les femmes ne succedent point, la Royne Catherine sa niepce estoit incapable de les tenir: & partant qu'elle se deuoit conten-
 ter d'heriter en Navarre, qui se gouuernoit par autres loix, & luy laisser ces deux Seigneuries. Sur ce different s'esmeut vne grande guerre entre les parties, estant le Vicomte de Narbonne fauorisé par Gaspar de Villemur Seneschal de Foix, & le Seigneur de Caulmont, Iean de Castilverdun & autres, lesquels l'an 1484. accompagnés de nombre de gens de cheual & de pied, prindrent par trahison d'un nommé Romengas, la ville de Maseres, & puis se saisirent de Monthaut: finalement allerent assaillir Pamiers, où les citoyens vou-

*Le Vicomte
de Narbonne
querelle les
Comtés de
Foix & Sei-
gneuries de
Bearn.*

1484.

loyent bien receuoir le Vicomte, qu'ils reco-
gnoissoient pour estre fils de la maison
de Foix, mais non pas ses gens de guerre
Dequoy indigné le Vicomte alla à S. An-
tonin, qui est l'Eglise cathedrale & residē-
ce de l'Euesque, d'où il chassa paschal Eue-
que possesseur, & y mit à sa place Mathieu
Artigalu, prétendant & plaïdant cette E-
uesché contre l'autre, faisant en outre, le
Vicomte ce qu'il peut, pour entrer dedans
Pamiers, mais persistans les habitans à luy
resister, il fallut qu'il se retirast à Maseres,
d'où il continua la guerre contre sa niepce
& la mere d'icelle la Princesse Magdelei-
ne, laquelle enuoya l'an 1485. pour garder
les terres de Foix, Jean de Lautrec, avec
grand nombre de gens de guerre leués en
Bearn, & au Comté de Bigorre, & aussi
pour recouurer ce que Jean de Foix Vi-
comte de Narbonne auoit vsurpé. Le Sei-
gneur de Lautrec marchant pour execu-
ter la charge qu'il auoit, fut preueni sur les
chemins, par le Seigneur de Rodet Rai-
mōd Lordat, qui le pria de la part de ceux
de Sauardun, qui s'estoyent donnés au Vi-
comte peu de iours auparauant, de leur
pardonner, remonstrans que ce qu'ils a-
uoyent faict, estoit pour euitier le danger

present, & appaiser la colere du Vicomte, contre lequel il n'estoyent assés forts pour se defendre: estans au demeurant, en bõne volonté & desir, de servir la Royne D. Catherine, leur Princesse naturelle, & que si son plaisir estoit de les recevoir, ils luy obeiroient & reietteroyent volontiers le ioug du Vicomte: partant le prioit ce Seigneur de Rodet, de se haster d'aller à Sauardun, l'assurant qu'il feroit tres-volontiers receu & mis dedans. Le Seigneur de Lautrec entendant à cette offre s'achemina & arriva à la porte du pont, à la mesme heure que le Vicõte de Narbonne aduertit de toutes ces menées, se trouua à Tante porte qu'on appelle d'Umet. En cette sorte s'estãs rencõtrés ces deux Seigneurs, au lieu de se battre, se firent honneur & cortoisie, & entrekrēt en propos d'appointement & de paix, lesquels eurent telle cõclusion, que Jean de Foix Vicõte de Narbonne iouyroit de Sauardū, où ils estoient, Maseres, Monthaut & S. Espartio, & de l'Eglise de saint Antoine, du chasteau d'Heremen & Montagu & autres places & forteresses: lequel accord, comme iniuste, ne fust entretenu: car quelques iours apres, Odet Cardinal de Carcassonne, recouvra Monthaut & saint Antoine,

1486.

& les restitua à la Roynne Catherine. Le Sieur de Laurec aussi d'autre part print Montagu, S. Espartio & le chasteau d'Heremen qu'il fit desmolir. En ces affaires estoit entretenue la Roynne D. Catherine, au commencement de son regne, au grand contentement des Seigneurs, chefs des factions, de Nauarre, qui cependant faisoient bien leurs besongnes, avec les intelligences qu'ils auoyent en Castille, quelque bon ordre qu'y sceust donner le Seigneur d'Abenas Viceroy audict Royaume. L'an suiuant 1486. le Vicomte Jean de Foix pour se recompenser des pertes qu'il auoit faictes, surprint, par l'intelligence d'aucuns des habitans, la ville de Pamiers, & y laissa le Seigneur de Lauellanet avec quelque nombre de soldats: mais par mesmes moyens, & avec l'ayde d'un serrurier qui contrefit les clefs de la porte de Conserans, Pierre Bufete, capitaine enuoyé par la Princesse Magdeleine & la Roynne sa fille, recouura la ville, & tua plusieurs de la garnison, & mesmes leur Capitaine Lauellanet, & pilla ce qu'il trouua de leur bagage. Ce neantmoins la guerre ne termina point, ains fut continuée au grand detrimement des pays de Foix & de

Bearn. Durant ces trauaux, la Princesse Magdeleine, laissant le grand & auantageux party qui s'offroit du Prince de Castille, maria sa fille à Iean d'Albret ou de Labrit, dont plusieurs maux auindrent au Royaume de Nauarre: car il fut fort mal aisé d'y réger les factieux à la raison. Ceux qui auoyent intelligences avec les Castillans, tant s'en faut qu'ils desirassent que ce mariage avec D. Iean se fist, qu'au contraire, ils l'empescherēt en ce qu'ils pouuoyēt, pour n'estre subiects à vn Prince qui estoit puissant pour les chastier de leurs fautes, & neantmoins se seruirent de l'occasion de ce qu'il ne s'estoit accompli, pour resister à leur Princesse, & à son mary Iean d'Albret, & se maintenoyent, par ces moyens, en leurs tyrannies. Grande faute fit à la nouuelle Royne & à ses affaires, l'absēce de son oncle, le Cardinal de Foix, qui fut appelé à Rome cet an 1486. par le Pape Innocent viij. pour l'employer à la pacification de Naples, qui estoit troublée des guerres ciuiles d'entre les Barons du Royaume, & leur Roy Ferdinand: estant encores en grande querelle le mesme Roy avec le Pape, lequel enuoya à Naples ce Cardinal, avec faculté de Legat, à latere,

où il compoſa aucunement les querelles, mais il mourut à Rome, ſans plus retourner en Nauarre: l'Eſtat duquel Royaume eſtât ainſi miſerablement diſtraiçt, Amád Seigneur d'Albret pere du nouueau Roy, ſe reſolut d'entrer en Nauarre, où ayant eu conſeréce avec ſon frere le Seigneur d'Abenas Viceroy, & puis avec D. Iean de Ribera, rauageant lors le pays, pour les Roys de Caſtille, ſouz couleur de defendre & ſouſtenir D. Louys de Beaumont Conneſtable & Comte de Lerin, & qui eſtoit ſaiſi de quelques villes, il fit en ſorte qu'il le perſuada d'aller avec luy à Valence, vers le Roy D. Ferdinand, où eſtās arriués le Seigneur d'Albret carreſſé & bien receu, ſupplia le Roy de prendre la bonne volonté qu'il auoit de le ſeruir, pour effect, d'autant qu'il eſtoit pauvre gentilhomme dechassé de ſes terres iniuſtemēt, par le Roy de France irrité contre luy, & Iean d'Albret ſon fils, la perſone duquel & ſon Royaume de Nauarre il venoit luy offrir, le priant de le receuoir en ſa proteçtiō: & auſſi qu'il auoit charge de luy faire la meſme requeſte de la part des Ducs François de Bretagne, & Louys d'Orleās, pourſuiuis & affligés par le meſme Roy Charles: leſquels tous luy

promettoient seruice & ayde à recouurer sa Côté de Roussillõ, & en toutes autres occasions. Les propos du Seigneur d'Albret furent ententiuemēt & fauorablemēt exēcutés par le Roy D.Ferdinand, lequel luy octroya tout ce qu'il luy demanda, en faueur du Roy son fils, commandant à Iean de Ribera de luy restituer ou à ses Lieutenans Viana & toutes les autres places qu'il tenoit du Royaume de Nauarre. Et dauātage donna ordre d'equipper en Guipuscoa & Biscaye vne grande armée de mer, contre le Roy de France, pour le secours des Princes susnommés, lesquels pareillement auoyēt sollicité le Roy d'Angleterre, Henry 7. d'estre de la partie : A quoy il inclina, tellement qu'il se trouua és costés de Bretagne grand nombre de vaisseaux Espagnols, dont estoit capitaine messire Gralle, avec lequel Amand d'Albret s'en retourna: & pareillemēt vne armée d'Angleterre commandée par le Comte d'Escale, au dommage des François, lesquels par vne victoire qu'obtint le Roy Charles, ou ses Lieutenans, à saint Aubin, se deliurerent de tout danger, demeurans prisonniers, le Duc d'Orleans & messire Gralle. Le Seigneur d'Albret voyant la desfaicte, se sauua: le Duc de Bretagne,

en mourut d'ennuy & tourment d'esprit, laissant deux filles, dont Anne l'aînée, ores qu'elle fust promise à Maximiliã Roy des Romains, qui estoit de la ligue du Duc d'Orleans, fut pourchassée par le Roy Charles, pour espouse, desireux, par tel mariage, d'vnir la Duché de Bretagne, à sa couronne. Et pource qu'il auoit fiancée Marguerite d'Autriche fille du Roy des Romains, laquelle, encores fort ieune, estoit nourrie en Frâce, souz esperance des futures nopces, il l'a r'enuoya & fut apres mariée au Prince D. Jean de Castille. Les Bretons ayans eu de tout temps à contre-cœur la domination Françoisse, tenās leur Princeesse au chasteau de Nantes, firēt nouuelles menées avec les Roys de Castille & l'Anglois, & obtindrent grand secours de l'vn & de l'autre, venant general de l'armée Espagnole, és riuages de Bretagne D. Diego Perez Sarmiento Comte de Salinas, avec D. Pero Carillo d'Albornos & autres renommés capitaines ayans deux mille hommes d'armes & grand nombre d'infanterie arbalestiers, piquiers & harquebusiers, qu'ils appelloyent en ce temps là espingardiers. Cependant le Roy Charles, avec vne puissante armée, alla assieger
Nantes,

Nantes, & par intelligence d'aucuns, obtint la ville, le chasteau, & la Duchesse, laquelle il espousa l'an 1489. & la fit Roynes de France, se rendant maître de son patrimoine malgré les Bretons. Cette Princesse Anne belle & gracieuse, estoit fille de la Duchesse Marguerite, & petite-fille de la Roynes Leonor de Nauarre, comme nous auons dict cy deuant, & cousine germaine de la Roynes Catherine de Nauarre, de laquelle nous traitons à present. Les affaires d'entre Castille & Nauarre, depuis le temps qu'Amand d'Albret estoit allé trouuer le Roy D. Ferdinand à Valence, cōme nous auons dict cy deuant, auoyent esté assez paisibles, mais le Royaume de Nauarre, en soy n'auoit cessé d'estre travaillé, par les factions, dont la Beaumontoise auoit tousiours pour chef, le Connestable messire Louys de Beaumôt, Comte de Lerin: ceux de Grammont se tenans ioints avec le Seigneur d'Abenas, Viceroy & gouuerneur du pays, attédans, avec grand desir, la venue des Roys D. Iean & D. Catherine, auxquels ils protestoyent vouloir donner toute obeissance. Or les grandes affaires qu'eurent ces Princes au deçà des Monts, les detindrent longue-

Pp

ment : car outre qu'ils n'estoyent aucunement en la bonne grace du Roy Charles viij. les poursuites de leur oncle Jean Vicomte de Narbonne, les auoyent perpetuellement inquiétés iusques à l'an 1493. auquel ils auoyent accordé avec luy : & pour asseurer en leur absence, les pays de Foix & de Bearn, des surprinses & vsurpations d'iceluy, luy auoyent quitté les villes de Sauerdun, Maseres, Monthaud & Gibel. Ce Vicomte estoit demeuré veuf de madame Marie d'Orleans sœur de Louys, qui fut Roy de France, avec deux enfans : à sçauoir, Gastō qui fut Duc de Nemours, & Germaine femme future du Roy Dom Ferdinand d'Arragon, apres la mort de la Royne D. Isabel, lesquels enfans, à peu qu'ils ne furent brullés dedans le chasteau de Maseres, cette année là, par le feu qui y fut mis inopinément, par la sottise d'une femme seruanté : mais Dieu les auoit ordonnés à grandes choses. Ayans donc contenté le Vicomte, & estant le Roy Charles ententif à son voyage de Naples, Jean Seigneur d'Albret & la Royne Catherine mariés, passerent en Nauarre, accompagnés de bon nombre de gens de guerre, pour la doute qu'ils auoyent de quelqu

rebellion de la part du Connestable, le-
 quel tenoit à son commandement la ville
 de Pampelone, y dispoſoit & ordonnoit
 toutes choses, comme s'il eust esté Roy. *L'entrée de
Pampelone
refusée aux
Rois Jean
d'Albret &
Catherine.*
 Et de faict arriuant les Princes aux portes
 d'icelle, l'entrée leur fut refusée, & eux cō-
 traints de loger à Egues, où ils demeure-
 rent quelques iours iusques à ce que le
 Connestable, & la faction s'estans mode-
 res, leur donnerent entrée. Là furent as-
 semblés les Estats & les Roys: couronnés
 avec les ceremonies accoustumées, pre-
 sents plusieurs Prelats, Seigneurs, Gentils-
 hommes & Ambassadeurs de quelques
 Princes. Ce fut le dernier couronnement *Dernier
couronne-
ment en Na-
uarre de
noz iours.*
 qui se soit faict en Navarre de noz iours:
 car estant ce Royaume venu tost apres en
 la possession des Roys de Castille, ils n'ont
 voulu cōtinuer telles ceremonies, se con-
 tentans de recevoir le serment des Estats,
 à la maniere d'Espagne. Les tiltres que *Tiltres des
Rois Jean
& Cathé-
rine de Na-
uarre.*
 prindrent les Roys Jean & Catherine de
 Navarre, furent Roys de Navarre, Ducs
 de Nemours, Gandie, Momblanc & Pe-
 gnasiel, Comtes de Foix & Seigneurs de
 Bearn, Comtes de Bigorre, Ribagorça,
 Pontieure & Perigort, Vicomtes de Li-
 moges, Pairs de France, & Seigneurs de

1494. la ville de Balagner. L'an 1494. D. Cesar Borgia, qui fut depuis Duc Valentin, ou de Valentinois, Cardinal, fils du Pape Alexandre vj. print par ses procureurs, possession de l'administration perpetuelle de l'Eglise de Pampelone, par le decez de l'Evesque D. Alphonse Carillo, & cōcession du Pape son pere, & l'an suiuant 1495. mourut la Princesse Magdeleine de France, mere de la Royne Catherine, à Pampelone, laquelle auoit accōpagné sa fille à son couronnement, & s'estoit tousiours vertueusement employée, à la conseruation des Estats de ses enfans, par l'espace de 25. ans qu'elle auoit vescu en sainte viduité. Son corps est enterré en l'Eglise de Pampelone, en la grande chapelle. Enuiron ce temps la Royne D. Catherine visita les Roys D. Ferdinand & D. Isabel de Castille en Alfaro, desquels elle fut fort caressée & honorée, ainsi qu'il conuenoit à vne telle Princesse, & ne lit on point autre occasion de son voyage, que pour s'entreuoir. Apres que les Roys se virēt maistres de Pampelone & de plusieurs autres places, obeys & reuerz de leurs peuples & subiets, & bien accompagnez de gentils-hommes & de gens de guerre, se resouue-

1495.

Mort de
Magdeleine
de France.

ans de plusieurs insolences & actes temeraires du Connestable messire Louys de Beaumont, tant contre le Roy D. Iean d'Arragon, & D. Leonor leur ayeulle, que contre le feu Roy François Phebus & eux mesmes, notammēt du refus que les Beaumontois leur auoyent faict des portes de Pampelone, & autres recentes occasions, se mirent à le persecuter asprement, de maniere que le Royaume de Nauarre se trouua derechef, en plus grāde confusion que jamais, n'oubliaans les deux vieilles factiōs de se seruir des occasions à s'entreuire en tout ce qu'elles pouuoient: lesquelles miseres furent aucunement assopies, par l'entremise du Roy D. Ferdinand de Castille & Arragon, qui moyenna tel accord que le Connestable messire Louys de Beaumont son beau-frere se retireroit en Castille pour certain temps limité, durant lequel cesseroyent les armes d'une part & d'autre: & que ses biens & terres seroyent mises en depost es mains du Roy D. Ferdinand. Ainsi sortit le Connestable hors de Nauarre, mais il n'y perdit rien: car le Roy D. Ferdinand luy donna deux fois autant de reuenu qu'il auoit auparauant, le faisant Marquis d'Huescar en Granade.

*Nouvelle
confusion de
Nauarre.*

*Louys de
Beaumont
chef du par
ty confiné en
Castille.*

*Louys de
Beaumont
saint Mar-
quis d'Es-
car.*

*Rois pren-
ant par-
ties que-
relles de
leurs sub-
jets.*

*Voyage du
Roy Jean
de Navar-
re, en Ca-
stille.*

Le nom de guerre ouverte cessa en Na-
uarre; mais on ne laissoit pas d'y commet-
tre meurtres & pilleries, sans aucune iusti-
ce: car ces peuples estoient de long temps
accoustumés à tels excès, & au mespris des
loix. Ce qui empira encores, par la faute
des Roys Iean & Catherine, lesquels par
mauvais aduis & affectiō tres-indigne des
Roys souverains, en fin se banderent en
ligues l'un contre l'autre: le Roy tenant le
party de Beaumont, & la Royne, celui de
Grammont, dont s'ensuiuirent maux infi-
niz. Quelque temps auparavant, le Roy al-
la trouver en Castille le Roy D. Ferdinād,
qui estoit à cette heure là de retour à Se-
uille, de la guerre Catholique des Alpu-
xarres: lequel receut le Roy de Navarre
avec grand honneur & courtoisie, l'espace
de dixsept iours qu'il y seiourna. Plusieurs
affaires mouuoient ce Prince d'aller en
Castille: mais deux estoient les plus im-
portants: car il pretendoit retirer les vil-
les de la Garde, Arcos, saint Vincent &
Bermedo, les chasteaux de Toro & Her-
rera, & autres lieux de la Sotierra, que le
Roy de Castille possedoit de l'ancien pa-
trimoine de Navarre: plus pour le droit
de la feu Royne D. Blanche de Navarre,

premiere femme du Roy D. Iean d'Arragon, bisayeule de la Royne Catherine regnante, & par donation faicte par contract de mariage d'icelle, demandoit l'Infantazgo de Castille, le Duché de Pegnafiel & Seigneurie de Lara & plusieurs autres terres: & avec ce la somme de 420112. florins vj. sols viij. deniers du coing d'Arragon: pour lesquelles pretensions, le Roy Iean d'Albret, & Catherine de Navarre estans a Pau, auoyent n'agueres depesché en Ambassade aux Roys de Castille, deux freres Cordeliers, gens d'entendement: à sçauoir frere Ieã de Vadre gardian de Corrella, & frere Iean de Ro, gardiã de Tafalla, avec amples instructiõs, pour en cheuir: mais ils n'en auoyent rapporté que gracieuses parolles & excuses dilatoires. Outre cet affaire, les pressoit fort le soupçon qu'ils auoyent du Comte de Lerin, nouvellement retiré en Castille, & là accru d'honneurs & biens, estans mesmes aduertis que le Roy Dom Ferdinand l'auoit plusieurs fois sollicité de luy faire cession & transport de tous les biens, droicts & actions qu'il pouuoit auoir dedans les terres de Navarre, luy promettant triple recompense en Castille:

fust pour l'amour naturelle qu'il portoit à sa patrie, ou bien qu'il estimait plus le rang qu'il tenoit presque comme Roy en Navarre, que d'estre en Castille, deuanté par plusieurs autres, comme il estoit necessaire. Ces deux occasions principales firent partir le Roy Jean d'Albret, & la Royne Catherine sa femme de Pau, où ils estoient allés, des qu'ils eurent nouvelles de la mort du Roy Charles viij. & retourner en Navarre, où la Royne demeurant pour gouverner assistée par frere Pedro Erasmo Abbé du monastere de l'Oliue. Le Roy Jean d'Albret estant donc passé à Seuille, pour prendre quelque resolution, avec le Roy D. Ferdinand sur ces affaires, obuier aux inconueniens qu'il craignoit, & renouveler la paix, amitié & alliance, d'entre les deux Royaumes, fut logé avec les Roys de Castille, en la forteresse & chasteau de Seuille; & pour plus le gratifier & honorer, fut defendu au Connestable & Comte de Lerin d'entrer au chasteau. On dit que le Roy D. Ferdinand fit sonder celuy de Navarre, s'il trouueroit bonne la trocque qu'il desiroit faire avec le Comte de Lerin, des terres qu'il possedoit en son Royaume, contre autre recompense en

Castille, & moyennant bonne somme de deniers qu'ils baillerent au Roy Iean d'Albret, à fin qu'il consentist que ces terres demeurassent à Castille, lequel, nonobstât la mauuaise volôté qu'il portoit au Comte, en voulut auoir son aduis, qui fut qu'on ne deuoit iamais changer terres & domaine, pour argent. Autre chose n'aduancea le Roy Iean d'Albret en ce voyage, que de receuoir bonne chere & faire riches presents: parquoy il reprint le chemin de son Royaume de Nauarre, laissant ses affaires indecis. Le Comte de Lerin Connestable de Nauarre, s'estant par cette entreueüe, reconcilié avec luy, le suiuit, & demeura quelques moys en Nauarre, en bõne concorde. Le Cardinal Borgia fils du Pape Alexandre, s'estant desfaict de l'Euesché de Pampelone, & resigné icelle au Cardinal de S. Praxede, il se desfit aussi du chapeau de Cardinal, enuiron ce temps, pour suivre les armes: à quoy il estoit plus enclin qu'aux affaires Ecclesiastiques, & fut faict par son pere, Duc de la contrée, dictée anciennement Flaminia, & capitaine general de l'Eglise: Ce fut le Duc Valentin.

Or le Roy Iean d'Albret eut de la Royne Catherine de Foix sa femme, ample ge-

*Genealogie
de Nauarre.*

1503.

neration: à sçauoir Iean & André Phebus, qui moururent ieunes: Henry le quel leur succeda és Estats de Foix & Bearn, & au tiltre de Nauarre, & nasquit trois iours apres la mort d'André Phebus son frere, en la ville de Sanguesa l'an 1503. au moys d'Auril: les parrains duquel, au baptisme, furēt deux pelerins Alemans, qui passoyēt d'auanture au temps de sa naissance, pour aller à saint Iacques dont l'vn s'appelloit Henry, & l'autre Adam: ce que le Roy son pere fit par deuotion: mais les Espagnols disent que ce fut vn aduertissemēt & presage de sa future condition de viure estranger & pelerin hors de son Royaume. Outre ceux-là, il eut Charles, nommé par aucuns, François, qui mourut au voyage du Seigneur de Lautrec à Naples: Catherine, Anne, Quiterie, Magdeleine, Isabel, & cinq autres enfans, desquels on ne met les noms, qui moururent ieunes, de maniere qu'en tout, la Royne Catherine luy enfanta quatorze enfans. Des filles Anne fut mariée au Comte de Candale: en laquelle maison ja estoit mariée la Tante de la Royne de Nauarre, nommée aussi Catherine, Mere de la Royne Anne de Hongrie, femme du Roy Vladistaus. Isabel es-

poula le Comte de Rohan en Bretagne.

Ce Roy Dom Jean d'Albret fut magnifi-
que & pompeux en sa Cour & maison, *Mœurs & qualités du Roy D. Jean d'Albret.*
laquelle estoit fréquentée de noblesse
tant d'Espagne & de France, que d'autres
nations, autant que celles des plus grands
monarques. Son estude & plaisir estoit
diuers: car il aymoît les lettres & les li-
ures, dont il fit amas & dressa vne Librai-
rie assez copieuse, recherchoit curieuse-
ment les genealogies des maisons no-
bles, vouloit entendre leurs armoiries, &
blasons, annoblissoit neantmoins quel-
quesfois aucuns de peu de merites: pre-
noit plaisir à deuiser familièrement & en
grande priuauté avec ses subiects & au-
tres, comme s'il eust esté, non pas Roy
mais vn simple Gentil-homme: dan-
çoit volontiers & si peu tenoit sa graui-
té Royale qu'il ne faisoit difficulté de se
trouuer aux festes & assemblées publi-
ques, & se resiouyr avec les Dames &
Damoiselles, à la mode du pays, al-
loit priuément dîner & soupper & fai-
re bonne chere aux maisons de ses
subiects s'inuitant soy-mesme: ce qui
le faisoit aymer par aucuns, & par

autres, mespriser, comme ne sachant tenir son rang: & auoit cette complexiõ de l'air de France, où les Princes se rendent quelquesfois trop familiers & accointables aux petites gens. Il estoit tellement adonné à ses plaisirs, que le plus souuent il se reposoit des grandes affaires sur autrui: ce qui luy amenoit mespris & malueillance de plusieurs: car par ce moyen, contre les serments & promesses faictes à son couronnement, plusieurs estrangers estoient admis aux Estats, offices & benefices du Royaume de Nauarre: dont luy furent faictes remonstrances & protestations plus d'une fois aux assemblées d'Estats, par les Seigneurs du Royaume, mais il n'en faisoit aucun compte: car il estimoit auoir vn grãd rempart, en l'amitié des Roys de Castille: nonobstant laquelle, le Roy D. Ferdinand ne laissa de capituler avec celuy de France Louys xij. qu'il ayderoit à le depousseder du Royaume de Nauarre, pour en inuestir Gaston de Foix Duc de Nemours, fils du Vicomte Iean de Narbonne, & frere de la Royne Germaine: lequel D. Ferdinand s'en empara depuis luy mesme pour autre occasion, ainsi que nous dirons. Or sur la fin de l'année 1506. le Duc

Valentin s'estant sauué de la prison de Medina del Campo, & venu en Navarre, il trouua que le Roy D. Iean d'Albret & la Royne sa femme s'estoyent rendus partiaux l'un cōtre l'autre, comme nous auōs traicté cy dessus. Parquoy le Duc montrant en cela son sens & bonne volonté, fit en sorte qu'il les reünit, rendant le Roy son beau-frere, fauteur de la faction Grāmontoise, à raison dequoy, le party contraire se trouua fort empesché : mais le Connestable messire Louys de Beaumōt, homme de grand courage, ne laissa de se maintenir haut, & superbe en son rāg, tellement que luy estant venu, vn iour notifier quelque mandement du Roy vn certain officier, il le fit charger de coups de baston, & ietter dedans vne prison au chasteau de Larraga, voulant donner à entendre qu'il ne se soucioit gueres du Roy, ny de ses aduersaires de Grammont par luy fauorisés: ce qui luy cousta sa ruine : car le Roy indigné, & à bon droict, de ce faict audacieux, l'ayant par plusieurs messages mandé de venir en Cour, sans qu'il obeist, determina de le destruire totalement. Or auoit-il pour amy, encore qu'il fust de la faction contraire D. Alphonse Carrillo

*Faiēt teire-
raire du
Comte de
Lerin, qui
le ruina.*

*Arrest cōtre
le Comte de
Lerin.*

1507.

de Peralta, Comte de S. Estienne, fils de Troile Carrillo, & petit fils de l'Archeuesque de Toledé D. Alphonse Carrillo d'A-cugna, qui l'aduertissoit de tout ce qui se machinoit contre luy, & qu'il se gardast bien de venir à la Cour, s'il ne vouloit tomber dedans les embusches. A raison de cette contumace, le Roy luy ayant faict faire son procez, le fit condamner à perdre la vie, & confisqua ses biens, comme criminel de leze Majesté. Et ayant mis gens de guerre aux champs, pour l'exécution de cet Arrest, dōna la charge au Duc Valentin son beau-frere, de le poursuiure en toute extremité de guerre, laquelle le Duc commancea par le siege du chasteau de Larraga le xj. de Feburier l'an 1507. mais vn gentilhomme nommé Oger de Betastegni, qui commandoit dedans, le defendit brauement, de sorte que le Roy qui y estoit en personne, & le Duc, leuerent le siege de là, & allerent à Viane: où la ville ne leur fit aucune resistance, mais le chasteau tint bon, nonobstant que les viures leur fussent fort courts: Dequoy le Comte de Lerin, Connestable estant aduerty, delibera de le secourir. Parquoy ayant assemblé iusques au nombre de

deux cēs bons cheuaux , & quelques gens de pied, vint à Mendaua, espier l'occasion d'executer son entreprise, laquelle luy succeda bien, en ce que la nuict mesme, s'esleua vn tresfort orage & horrible tempeste, qui fit penser au Duc Valentin que les ennemis ne se mettroyent aux champs , & qu'ils ne se hazarderoyent point de secourir les assiegez. Parquoy il retira à couuert les gardes & sentinelles, qu'il auoit accoustumé de tenir aux champs, aux aduenues du chasteau. En quoy il fut trompé, combien qu'il fust estimé sage , & aduisé guerrier: car à la faueur du bruit des vents , & de la grosse pluye, soixante cheuaux partirent de Mendauia avec chacū vn sac plein de farine , & aucuns portans de pain cuit, lesquelles prouisions ils mirent dedans le chasteau, par vne poterne, sans estre sentis ny apperceus. Le matin venu, ces gens de cheual s'en voulans retourner, apperceurent sur le chemin de Logroño, certaine cauallerie, qui leur fit croire que c'estoit vn secours de trois cens cheuaux Castillans, que le Duc de Nagera auoit promis d'enuoyer au Connestable. Partāt se prindrent à crier, Beaumont, Beaumōt,

ce qui donna l'alarme à la ville. Le Duc Valentin s'estant faict armer de riches armes par vn sien valet nommé Ianicot, lequel autresfois auoit seruy le Connestable, sortit dehors, monté sur vn braue cheual, qui auoit les naseaux fendus, accompagné de mille hommes de cheual, & grande infanterie, & tint le chemin de Mendavia, disant, où est, où est ce Comtereau? ie iure Dieu, qu'aujourd'huy ie le feray mourir, ou le prendray prisonnier: ie ne cesseray iusques à ce qu'il soit entierement destruit, & ne pardonneray ny sauueray la vie à aucuns des siens: tout passera par l'espée iusques aux chiens & aux chats. Ainsi poussé d'impetueuse affection, deuança les siens au trac de ces soixante cheuaux, qui se retiroyent deuant luy. Le Connestable auoit mis aucuns de ses gens aux champs tât pour recueillir (s'il en eust esté besoin) ceux qui estoient allés auictualer le chasteau de Viane, que pour descourir ce qui estoit en campagne du costé des ennemis, lesquels voyãs venir le Duc, qu'ils ne congnoissoyent point, seul, & d'vne si grande asseurance, se doutans bien qu'il estoit suiuy de quelque grãde troupe, se retirerēt iusques là où estoit le Connestable,

nestable, lequel s'esmerueillant qui pou-
 uoit estre ce cheualier & de sa hardiesse.
 Et quoy, dit-il, y a il personne icy, qui
 olast aller affronter ce braue, qui s'apro-
 che si pres de nous? lors se desbanderent
 trois gentilshommes de sa troupe, les-
 quels allerent le rencontrer en vn chemin
 creux en guise de fosse, où mal pouuoit
 yser le Duc de sa force & adresse, ny de
 celle de son cheual, & ayāt couché le bois
 contre luy, vn d'iceux le print souz l'aissel-
 le droiete, au defaut du harnois, ainsi qu'il
 haussioit le bras, pour donner coup de lan-
 ce, & le passa tout outre, dōt il eheut mort
 par terre: On dit que celuy qui fit ce coup
 estoit des Garceses d'Agreda: par ces trois
 compagnons le corps fut incontinct des-
 pouillé, & laissé nud sur le chemin, luy
 ayans couuert ses parties honteuses avec
 vne pierre, & les riches despouilles por-
 tées au Connestable, qui s'en alloit reti-
 rant, sans qu'il peust cognoistre autre cho-
 se du mort, sinon qu'il deuoit estre quel-
 que grand Capitaine, iusques à ce que la
 mesme matinée lanicot, le valet de cham-
 bre, qui s'estoit mis apres son maistre, &
 auoit failly son chemin, fut prins par quel-
 ques coureurs, & mené au Connestable:

*Mort du
 Duc Valen-
 tin.*

par luy fut sceu, apres luy auoir faiet mon-
 strer le harnois & habillemés, que c'estoit
 le Duc Valentin Cesar Borgia, qui auoit
 esté tué: le corps duquel fut trouué par
 l'armée qui marchoit apres luy, en l'estat
 que nous auons dict: En l'arriere garde de
 laquelle estoit le Roy D. Iean en person-
 ne, qui mena grãd dueil de la mort de son
 beau-frere: & l'ayant faiet couvrir d'un
 manteau d'ecarlatta, le fit porter à Viane,
 & enterrer en la grande chapelle de l'E-
 glise parrochiale de S. Marie; où on lit cet
 Epitaphie en langue Espagnole.

Epitaphie du
 Duc Valen-
 tin.

*Aqui yaze en poca tierra
 Et que toda le temia,
 Et que la pax y la guerra
 Per to lo el mundo hazia.
 O tu que vas à buscar
 Dignas cosas de loar,
 Si tu loas lo mas digno,
 A qui pare tu camino,
 No cures de mas andar.*

Ce qui peut signifier ce que s'ensuit, en
 aussi peu de parolles.

*Cy gist en peu de terre
 Vn qu'on ha redouté,
 Qui par tout ha porté
 Et la paix & la guerre.*

*Passant qui vas chercher
Quelque chose louable;
Pour chose plus notable,
Plus loin ne dois marcher.*

On remarque en Espagne, pour vne chose digne de memoire, que la mort du Duc Valentin aduint au Royaume de Nauarre, à semblable iour qu'il auoit au mesme Royaume, prins la possession de l'administration perpetuelle de l'Eglise de Pampehone, principale de ce Royaume, à sçauoir l'onzième de Mars, auquel on faiet la feste de S. Gregoire Pape, & qu'en cela Dieu voulut monstrier quelque tesmoignage de son ire contre celuy qui par mespris de toute religion, auoit quitté l'estat Ecclesiastique, & sa charge pastorale, pour suivre le mestier sanguinaire des armes. Le Connestable eust bien plus desiré qu'il eust esté prins vif, pour en faire vn present au Roy D. Ferdinand. Le Roy de Nauarre à cause de cette mort, entra en telle fureur contre le Connestable, & tous les siens, que mesme aucuns des parents d'iceluy, qui suiuoient l'armée Royale, furent contrains de se retirer, ne s'osans presenter deuant luy, auquel le chasteau de Viane resista pour lors, encor que son armée fust

*Aspre guerre
contre le
Comte de
Lerin &
extermina-
tion d'iceluy
des terres de
Navarre.*

creuë par les troupes, que luy auoyent enuoyé de Castille D. Bernardin de Velasco Connestable, & Duc de Frias, & le Comte de Nieua, avec lequel & le Comte d'Aguilar, le Roy auoit tousiours entretenu particuliere & estroite amitié: mais il passa aux terres du Connestable, où il fit toutes les ruines & degasts qu'un ennemy irrité peut penser, print la ville de Lerin, où il renuersa & brisa le sepulche des progeniteurs du Connestable, & de la maison de Lerin, qui estoit somptueux & de superbe structure, rasa ses maisons, coupa vignes & oliuiers, puis courant & prenant le reste de ses places, & chasteaux, partie par reddition volontaire, partie par force, où il faisoit pendre les capitaines qui luy faisoient resistance, le mit en tel poinct, qu'il fut contrainct sortir hors du pays, & se retirer en Castille vers son beau-frere le Roy Dom Ferdinand d'Arragon, suivi de plusieurs autres de la factiõ de Beaumont, laquelle demeura pour lors du tout atterrée, & les Grammontois releués: entre lesquels estoit la Mareschaucée du Royaume. Et d'abondant obtindrent, à l'occasion de la retraicte du Connestable, l'Estat d'iceluy, en la personne de D. Al-

phonse Carillo de Peralta, Comte de S. Estienne. Alors se rendirent les chasteaux de Viane & de Larraga : & en cet exil le Conneftable viel & despouillé de fes terres, mourut quelques mois apres en Arragon, en la ville d'Aranda. Sa femme Don Leonor d'Arragon deceda pareillement, & en mefme temps, en la ville de Tortofe, en Catelogne. Le corps du Conneftable ayât esté quelque temps en depoft au monaftere de Veruela, fut depuis transporté à Lerin, où il eft enterré. Son fils Dom Louys de Beaumont luy fucceda apres la conquete & vſurpation de Nauarre, faite par le Roy Dom Ferdinand d'Arragon, en la dignité de Conneftable & de grand Châcelier du Royaume, & en tous les autres Eſtats & biens, eftant par ligne maternelle, nepueu du Roy Dom Ferdinand, & petit fils du Roy D. Iean d'Arragon onzième de ce nom. Il fut bruit que le Conneftable & ſon fils auoyent déjà traité avec le Roy Louys douzième de depoffeder le Roy Iean d'Albret du Royaume de Nauarre, pour en inueſtir le Duc de Nemours Gaſton de Foix ſon nepueu, comme dé-ia a esté touché cy deſſus, & que Loys de Beaumont le fils D.

1507.

François de Beaumont, & D. Pierre Menal de Beaumont allerent en France pour solliciter le Roy à cct affaire, l'assurâs que toutes choses luy seroyent aisées & fauorables: mais le Roy Louys lors empesché en autres affaires, mesmes à renger la ville de Gennes, qui s'estoit rebellée contre luy, n'y voulut entendre. Parquoy retournerent en Arragon D. Louys de Beaumont, & D. Pierre Menal, laissant D. François au service du Roy de France, où il demeura, iusques à ce qu'estant appelé par son pere D. Iean de Beaumont, qui auoit certaine querelle & desfi avec Amador de Lascan, auquel il ne pouuoit respondre, à cause de sa vieillesse, il se vint presenter du regne de ces Roys, au combat, contre Amador: mais sur l'heure du combat s'estât esmeu certain different, sur la qualité des armes, cela les empescha de combattre, consommant toute la iournée en disputes. Estant decedé sur la fin de l'an 1507. l'Euesque de Pampelone le Cardinal D. Antoine, en son lieu fut promu, par le Pape Iules ij. le Cardinal de S. Sabine, nommé Facio, mais ayant le Chapitre de l'Eglise de Pampelone esleu des-jà le Cardinal Amand d'Albret du tiltre de saint

Nicolas *in carcere Tulliano*, frere du Roy, pour leur Euesque, fut reietté le Cardinal de S. Sabine, & empesché à prēdre la possession de cette Euesché. Parquoy le Pape Iules mit interdict en tout le Royaume de Nauarre, au commencement de l'an 1508. *Interdict du Pape Iules ij. au Royaume de Navarre.* qui dura vn an tout entier: & fallut, pour oster ces censures, que le Cardinal par luy pourueu fust Euesque de Pampelone: dōt il print possession par procureur, & fut l'election faicte par le Chapitre, declarée nulle. Ce Cardinal Facio ne vescu gueres apres. Parquoy le Cardinal Amand d'Albret, frere du Roy reuint en son droict, & fut receu en la place du defunct. L'Archidiaconat de lá table de cette Eglise, dignité principale & de grand reueñu, fut baillē à D. Iean de Beaumont, pour son fils, nommé aussi D. Iean, frere de D. François de Beaumont susmētionné, lequel estant de retour de France en Navarre, fut nonobstant les haines des partialités de Beaumont & Grammont, chery & fauorisé par le Mareschal D. Pedro, qui estoit lors le personnage de plus grande autorité, qui fust aupres les Roys D. Iean & D. Catherine, qui iouyssoient de leur Royaume tranquille & sans bruit, depuis l'expulsion

du Comte de Lerin, & de messire Louys de Beaumont son fils, & autres de la faction Beaumontoise, & auoyent lors l'esprit tēdu à le restituer en son ancien estat, & reünir les places qui en estoient distraites, & tenues par le Roy de Castille. A raison dequoy, & pour demander autres droits qu'ils pretendoyent, ils auoyent enuoyé plusieurs Ambassadeurs, au Roy D. Ferdinand, lesquels auoyent r'apporté bonne esperāce d'obtenir ce qu'ils demandoient en la plus grande partie. Parquoy ils auoyent derechef r'enuoyé le Docteur Jean de Iassu Seigneur de Pauierre. Ladró de Mōleon, & le Protenotaire Martin de laureguiçar, qui estoient du conseil, avec amplex instructions de capituler, cōposer & cheuir de toutes leurs pretētiōs en cette forme: Que le Roy d'Arragon Regent de Castille, seroit prié, que s'il faisoit quelque accord avec le Roy de France, les Roys de Nauarrey fussēt cōprins: Que les Ambassadeurs feroient grande instance au Roy D. Ferdinand, que les villes de S. Vincent, Sos, Arcos, Garde, & Bēnedo, & le surplus des places de la Sosierra, tenues par luy, & par la courōne de Castille, leur fussent restituées, suiuant l'ordonnāce de la feu Royne D. Isabel, à son decés, comme lieux ap-

partenans à la couronne de Nauarre: Que pareillement ils demandassent cōme choses hereditaires, les Duchés de Gandie & de Momblâc, & le Comté de Ribagorça, la ville de Balaguer en Arragon, le Duché de Pegnafiel, & l'Infantazgo de Castille, les villes de Cuellar, Castro Xeris, Haro, & Villalon, & autres terres: & en outre, la somme de quatre cens vingt mille, cēt & douze florins d'or, six sols, huit deniers d'Arragō, baillée en dot par le Roy Charles iij. de Nauarre, à son gendre le Roy D. Iean d'Arragon. Voila les pretensions des Roys de Nauarre enuers Castille, dont ils auoyent eu plusieurs esperāces vaines, que raison leur en feroit faicte, mais en effect, le Roy D. Ferdinād, par ses dilatiōs, monstrois assés d'en auoir peu d'enuie, & qu'il attendoit quelque autre occasion de s'acquitter, sans rien rendre de ce qu'il tenoit. En quoy la meilleure excuse qu'il eust estoit la restitutiō de ceux de Beaumōt qu'il scauoit estre tresodieuse aux Roys de Nauarre. L'Ambassade ayāt faict son deuoir, & perdu plusieurs iournées à la suite de la cour de Castille, s'ē retourna sans riē faire & se deschargea enuers les roys D. Ieā & D. Catherine, qui pour lors estoient en Frāce.

Parquoy ils repasserent les monts & retournerent en Nauarre, où se trouuās lors que plus ardoient les guerres d'Italie, le Roy D.Ferdinād qui auoit dessein de mener vne armée en Gascongne en faueur des Anglois, leur enuoya demander passage pour ses gens d'armes, viures & munitions: & pour seureté, qu'ils luy baillassent en depost les chasteaux d'Estelle & Maye en Nauarre & celuy de S. Iean de pied de Port au limite de France, leur promettant ainsi qu'il auoit faict autresfois, en reco- gnoissance de ce plaisir, de leur restituer les villes de S. Vincent, Arcos, Garde, & autres de la Principauté de Viane. Les Roys D. Iean & D. Catherine se trouue- rent fort empeschés à cette demande: car ils se voyoient fort engagés en chacū des deux Royaumes, de France & de Castille, de façon qu'en ces differents & querelles où estoient ces grands Monarques, pre- nans le party de l'vn, ils se declaroyent en- nemis de l'autre, & voulans estre neutres, ils estoient en proye à tous deux. Estans en cette incertitude, leur propre oncle Amand d'Albret, Seigneur d'Obal, qui estoit lors, en leur cour, Ambassadeur de France, les fit ployer de la part du Roy

Louys son nraistre, leur faisant promesses
 d'infinites faueurs, dequoy essaya en vain
 de les destourner Mondoguedo Ambaf-
 sadeur du Roy de Castille, leur protestant
 & annonçant les maux, qui leur aduin-
 drét. De cela estant incontinēt aduertty le
 Roy D. Ferdinand, estima auoir occasion
 propre à ses desseins, pour vnir la couron-
 ne de Navarre à celle de Castille. Parquoy
 fit grandes plainctes de cete resolution &
 adherence des Roys de Navarre au Roy
 de France, qu'il appelloit schismaticque &
 ennemy de l'Eglise Romaine, au Pape Ju-
 les, lequel ayant vsé des moyens ordina-
 res, à sçauoir d'admonitions & persuasions
 paternelles enuers ces Princes, selō la for-
 me & maniere de Rome, de quitter l'al-
 liance des peruers & se ranger avec luy, &
 ses adherents. Voyant qu'ils persistoyent à
 tenir le party de France, procedda contre
 eux, par le dernier remede, les declarant,
 par l'aduis du Consistoire, des Cardinaux
 schismaticques & heretiques, les priuant &
 leur posterité, de tous droits au Royaume
 de Navarre, & de tous leurs biens, & les
 baillant & transferant au Roy D. Ferdi-
 nand, Regēt de Castille: les forces duquel
 preparées pour passer en Guyēne se trou-

Le Roy de
 Navarre
 adhère au
 Roy de
 France.

Moyens du
 Pape & du
 Roy D. Fer-
 dinand, pour
 rauir & u-
 surper le
 Royaume de
 Navarre &
 le ioindre à
 Castille.

uerent à propos & seruirent à l'vsurpation de Nauarre. Ayant sceu le Roy Jean d'Albret toutes ces procedures, il enuoya à Burgos D. Alphonse Carrillo Connestable, & D. Pedro de Nauarre, Marechal du Royaume Ambassadeurs, à fin de remedier aucunement aux dangers qui estoient apparêts, lesquels ayans trouué en la cour de Castille messire Louys de Beaumont, & autres exilés, sollicitans avec grande faueur le Roy D. Ferdinand de faire l'entreprise de Nauarre, estimans que c'estoit la seule occasion qu'ils pouuoient esperer d'estre remis, ils furent si mal recueillis, qu'ils n'eurent plus grande haste que de s'en retourner faire rapport au Roy & aux Estats assemblés à Tudele, que toutes choses tendoyent à la guerre. Le Roy D. Ferdinand ayant pour pretexte d'assaillir ce pays, la sentence & arrest du Pape, & pour moyen, les intelligences de plusieurs fauteurs de la faction Beaumontoise es entrailles d'iceluy, estima que celuy seroit chose aisée de l'vsurper: partant differa la guerre de Guyenne: Neantmoins pour plus grande iustification, & pour couurir mieux ses iniustes desseins, de l'vsurpation de Nauarre, qu'il vouloit faire

re, ayant fait assembler son armée autour de la ville Victoria, dont le Duc d'Albe Dom Federic de Toledé estoit Capitaine general, enuoya de rechef sommer les Roys de Navarre, de mettre entre ses mains les places, & chasteaux susmentionnés, les aduertissant qu'à leur refus, il se mettroit en deuoir d'exécuter la sentence du Pape, & les despouilleroit non seulement de Navarre, mais de tout ce qu'ils posseddoient en France: Nonobstant lesquelles protestations, le Roy D. Jean, luy refusa passage & la deliurance des chasteaux, alleguant l'amitié & alliance qu'il auoit avec le Roy de France, ne se pouuant persuader que le Roy Dom Ferdinand, lequel il n'auoit iamais offensé, se mist à bon escient à le poursuivre, avec telle rigueur qu'il disoit, mais il se trouua deceu: car le Duc d'Albe eut commandement soudain, que laissant le chemin de Guipuscoa, il entra dans le Royaume de Navarre, pour l'vsurper, ce qu'il fit, se trouuans lors les Roys Jean & Don Catherine à Pampelone, l'armée Castillane estant déjà à huit lieues pres d'eux, si despourueuz de tous moyens de resister, que le Roy Jean

Demandes inciviles du Roy D. Ferdinand à celui de Navarre, pour conuerture du dessein qu'il auoit de le deposeder de son Estat.

*Le Roy Ieaⁿ
d'Albret
contrainct
se retirer en
France.*

ne sceut prendre meilleur party, que de desloger, & abandonner le Royaume, & se retirer en France. Les habitans de Pampelone, se voyans delaissés, luy demanderent, puis qu'il s'en alloit, que c'est qu'ils auoyent à faire: Defendez vous, dist-il, le mieux que vous pourrés, & si vous ne pouués vous maintenir, rendez vous au Roy D. Ferdinand à quelques bonnes conditions: car de ma part ie donneray bon ordre qu'il ne iouyra gueres de Nauarre. La Royne Catherinetrouua estrange que le Roy son mary laissast si tost son Royaume, auant que l'armée de Castille fist aucun notable effort: mais il partit; parauanture pour la desfiance qu'il auoit des Pampelonois qu'il scauoit estre affectionnés au Comte de Lerin, & à la faction Beaumontoise, nonobstât toutes remonstrances qu'elle luy sceust faire, le xxij. Iuliet l'an 1512. disant qu'il aymoît mieux viure parmy les bois & montagnes que d'estre prisonnier en ses terres. Sa retraite fut par le val de Baztan, & le chasteau de Moya, & s'en alla à la Cour de France, laissant la Royne sa femme à Pampelone, laquelle y ayant encores seiourné deux iours apres luy, le suiuit avec le Prince Henry son fils,

& trois filles, & l'ayant attainct, entre autres propos pleins d'amertume, luy dist: O Roy, vous demeurez Iean d'Albret, & ne pensez plus au Royaume de Nauarre, d'autant que pour auoir esté superfluemēt bon, vous en aués esté moins estimé des vostres, & vous estes perdu, vous & vostre Royaume. Auec ces Princes partirent du Royaume le Marechal D. Pedro & plusieurs autres gentilshommes de la part de Grammont. Le Comte de Lerin D. Loys de Beaumont auoit telle intelligence en la Cour & en tout le Royaume de Nauarre, qu'il auoit particulier aduis de tout ce qui sy faisoit & ordonnoit, dont il aduertissoit le Duc d'Albe, lequel marchant auant, se campa à deux lieües pres de la ville de Pampelone, ayant en son armée six mille hommes de pied, & mille & cinq cens cheuaux legers Castillans, sans le renfort de ceux de Beaumont, & de leurs amis, parents & partiaux. Les habitans de Pampelone enuoyerent au deuant, demandans au Duc d'estre receuz à certaines loix & conditiōs (car de se defendre ils n'en auoyent ny le pouuoir, ny possible la volonté) auxquels fut respondu par le Duc que c'estoit aux vainqueurs de donner loy aux vaincus.

Paroles piquantes de la Roynie Catherine au Roy son mary.

Faction de Beaumont en la Cour de Nauarre.

Conditions
accordées à
la reddition
de Pampelone.

Partant qu'ils aduifassent de se rendre librement en ses mains, ou s'attendissent d'endurer toutes les miseres & calamités qu'on a de coustume voir aux prinſes des villes. A raison dequoy ils retraignirent leurs demandes à l'obſervation de leurs anciens priuileges & libertés: ce qui leur fut octroyé, & outre ce aucunes prouiſiōs pour l'eſtat preſent. Entre les articles qui leur furent accordés, les principaux furent les ſuiuans: Que le Duc d'Albe ſeroit deſormais deſenſeur & moyennneur des habitans de Pampelone és demandes & requeſtes qu'ils feroient aux Roys D. Ferdinand & D. Ieanne, pour choſes ou honorables, ou profitables: Que ceux qui demureroyēt vaffaux & ſeruiteurs des Roys de Caſtille ſeroient conſerués & maintenus en leurs biens & eſtats, ſalaires, rentes & penſions qu'ils auoyent accouſtumé de receuoir des Roys precedents: qu'aux autres qui ſe retireroyent, ſeroient payées ſeulement telles choſes, iuſques au iour de la redditiō de la ville: que les receueurs Royaux recouureroyent les rentes, reuenus, gabelles, & autres emoluments de la couronne, comme ils auoyent accouſtumé, à la charge qu'ils reſideroyent en la ville

ville de Pâpelone: que les gages des Con-
seillers & Presidents de la iustice, & Audi-
teurs des Comtes Royaux, & autres offi-
ciers & magistrats des Roys Dom Iean
& D. Catherine, leur seroyent payés, à la
charge de residence à Pampelone: Que
les habitâs de la ville demeureroient bõs
seruiteurs des Roys D. Ferdinand & D.
Ieanne, & moyennant ce iouyroient de
leurs biens meubles & immeubles, droits
& priuileges anciens: & pareillement ceux
qui auoyent suiuy les Roys D. Iean & D.
Catherine, si dedans trente iours, ils reue-
noient au pays: Que les habitans de Pam-
pelone ne seroyent tenus de donner logis
à aucun, sans payemēt, non plus que ceux
de Sarragosse, Valence & Barcelone: Que
les Seigneurs & gentilshommes, qui dans
le terme de trente iours, se rangeroyent au
seruice des Roys D. Ferdinand & D. Iean-
ne, seroyent bien & honnorablemēt trai-
tés en leurs personnes & biens, sans estre
recherchés de crimes quelconques, qu'on
pourroit mettre en auant, du temps des
dissentions & partialités passées, de Beau-
mont & de Gramont: Que quand ils mar-
cheroient en guerre, leurs priuileges &
rangs, quant à leurs personnes & degrez,

R c

leur seroyent gardés ainsi que du temps des Roys precedents: Que les droits de prouisiōs de viures, draps de foye, deniers & autres choses deües par les Roys Dom Iean & D. Catherine, à leurs officiers, citoyens de Pampelone, rangés au seruice des Roys de Castille, leurs seroyent payés, moyennant bons & authentiques enseignements: Que si aucuns de ces Articles se trouuoient au preiudice d'autrui, le iugement en seroit deferé aux Roys de Castille D. Ferdinand & D. Ieanne la fille. Plusieurs autres chefs furent mis en auant, partie accordés, partie renuoyés au Roy & son Conseil, mais ceux cy sont les plus notables: lesquels articles furent promis & iurés par le Duc d'Albe, au nom & par le consentement des Roys de Castille, le vingt quatriesme Iuillet, present D. Louys de Beaumont Connestable, D. Antoine d'Acugna Euesque de Cuenca, Pero Lopes de Padilla, Ferdinand Suarez de Tolède, & autres Seigneurs. Et bien que le Duc eust accordé de n'entrer dedans la ville que le lendemain, à fin qu'il ne fust reproché aux habitans, qu'ils s'estoyent rendus presque auant que voir l'ennemy, si est-ce que le Côte de Lerin, des-jà Con-

nestable de nauarre, y entra le mesme iour
 xxiiij. & le xxv. le Duc, avec le reste de l'ar-
 mée. Ainsi, par l'vsurpation & tyrannie
 des Roys de Castille, au lieu de faire droict
 & raison aux Roys de Nauarre, de leurs
 iustes pretentions, villes, places & deniers
 que les Roys de Castille leur detenoient,
 comme ha esté dict cy deuant, demeure-
 rent despouillés les Roys D. Iean & D.
 Catherine de leur Royaume de Nauarre,
 qu'ils auoyent tenu dix-huict ans & demy
 ensemble, & la Royne seule pres de dix
 ans, apres la mort de son frere François
 Phebus: & des ce iour xxv. de Iuillet 1512.
 iour de S. Iacques. Nauarre, par cette in-
 iuste conqueste fut reünie à la couronne ^{Union de}
 de Castille 468. ans, apres que du temps ^{Castille &}
 du Roy D. Sancho le grād & par sa mort, ^{Nauarre.}
 il en auoit à iuste cause, esté separé.

Après la reddition de la principale vil-
 le, le duc d'Albe fit sommer les autres lieux
 forts du Royaume, de se rendre, leur pro-
 mettant s'ils le faisoient, qu'ils seroyent
 traitez, avec la mesme clemence que Pam-
 pelone, sinon qu'il les assailliroit & pour-
 suiuroit à feu & à sang, comme sectaires
 de Princes, déclarés schismatiques & he-
 retiques, ainsi qu'ils disoit. Au commen-

Denys de
Deça fidele
au Roy Iean
d'Albret.

Ambassa-
deur du Roy
D. Ferdi-
nand arre-
sté prison-
nier en
Bearn.

cement aucunes villes se monstrent di-
ficiles: mais ayans apres pensé à eux, les
villes de Lumbier, Sanguesse, Montreal,
Olite & Tafalla, & la ville de Tudcle, se
rendirent: le chasteau de laquelle tint bô
pour les Roys iniustement dechassés, cô-
mandant en iceluy Denys de Deça, nota-
ble Gentilhomme & bon seruiteur deses
maistres: Ceux du val de Ronçal & du
val d'Amescoa se confians en la force na-
turelle de leur pays montueux, ne firent
compte aucun de se rendre. Le Roy Dom
Ferdinand qui estoit à Burgos, entendant
le succès de son iniuste conquete, enuoy
renfort de gens au Duc d'Albe: & pour
mieux iustifier ses actions & leur donner
couleur, depescha l'Euesque de Zamor
D. Antoine d'Acugna en France, Ambas-
sadeur vers le Roy Iean, luy offrât que s'il
vouloit se departir de l'amitié & allianc
du Roy Louys, il luy rendroit son Royau-
me de nauarre: l'Euesque ne paruint poin-
iusques au Roy Iean, luy porter ceste Am-
bassade pleine de moquerie & de feintise
car nonobstant le priuilege des Ambassa-
deurs, il fut arresté prisonnier en Bearn
d'où il ne sortit que moyennant gross
rançon. Pour cette cause, le Duc d'Alb

estoit sur le point de passer en Bearn, à fin de vëger l'iniure qu'il disoit auoir esté faite au Roy son maistre & à son Ambassadeur, ne cōsiderant, sous l'arragance Espagnole, que l'iniure de son maistre enuers les Roys qu'il auoit despouillés & iniustement priuez de leur Royaume, estoit bien plus grande, & digne d'estre vangée, mais voyant les places de Tudele, Olite, Tafalla & Estelle commancer aucunement à s'esmouuoir, au bruit, qui couroit de la venue du Roy Iean, avec vne armée Françoise, il demeura en Nauarre, où ayant ordōné les choses, en maniere qu'il sembloit qu'ōs'en peust asseurer, il fit asēbler les principaux hōmes de Pāpelone, au Cōuēt S. Frāçois, & leur ayāt faiēt vn long discours pour iustifier & couurir cette inique vsurpatiō du Royaume de Nauarre, par le Roy son maistre, les requit de prester le sermēt au Roy D. Ferdinand, lesquels demanderent trois iours de terme pour y penser : lesquels expirés, ils dirent qu'ils estoient contents, de faire le serment, comme subiects, mais nō cōme vassaux: Quelle difference, demanda le Duc, faictes vous entre vassaux & subiects? En ce, dirent-ils, que vassal s'entend celuy que le Seigneur peut bien,

ou mal traiter, ainsi qu'il luy plaist, mais le subiect doit estre bien traité de luy. Alors le Duc leur ayant remonstré qu'il ne falloit qu'ils doutassent que le Roy ne les voulust bien & fauorablement traiter en toutes choses, & leur alleguant plusieurs raisons, à son aduantage, les induisit à prester le serment, & fausser la foy promise à leur Roy, s'estans monstré traistres & infideles en leur reddition trop volontaire, & fots en contrefaisans les fins, de demander temps d'aduis, apres qu'ils sont entre les mains de l'ennemy (auquel neantmoins ils auoyent tousiours esté enclins, par les pratiques des Beaumontois) ou de ceux qu'ils font semblant de leur estre aduersaires, pour excuser leur desloyauté, ou lâcheté, enuers leurs Princes legitimés & naturels dechassés de ce Royaume. Car en toutes les guerres & differents, que ce Royaume ha eu des son commencement, avec les Roys de Castille & Arragon, la ville de Pampelone ne s'estoit iamais rendue à aucun Prince de Castille ou d'Arragon, que ceste seule fois: ce qui demonstre sa perfidie, & l'intelligence de ses habitans avec l'ennemi, quelque mine qu'ils ayent fait. Tant y a qu'ils recogneurent le Roy

D. Ferdinand pour leur Roy, lequel partāt de Burgos, s'aprocha de Nauarre, iusques à Logrogno, où il demeura le reste de cete année là, pour entendre à defendre & se conseruer cette nouuelle proye de l'Estat & Royaume Nauarrois ainsi cauteleusement & facilement vsurpé, mais difficilement retenu & possédé, apres l'vsurpation. Car le Duc d'Angoulesme François de Valois, qui fut depuis Roy de France, mena vne armée Françoisise par la Guyenne, pour rebarrer les forces Espagnoles & Angloises, & en cette armée estoient le Roy Iean d'Albret, Charles de Mompensier Duc de Bourbon, Odet de Foix, Visconte de Lautrec, les Seigneurs de la Palisse & Longueuille, & autres, faisans environ 40. mille hommes & quatre mille cheuaux. Sur la fin de l'an 1512. s'aduança le Roy de Nauarre avec six mille hommes de pied, & mille cheuaux, accompagné des Seigneurs de la Palisse, & Longueuille, & entra en son pays par le val de Ronçal, où il gaigna Burgui, ayant taillé en Pièces les Espagnols qui estoient en garnison, & leur chef Valdes, capitaine de la garde de leur Roy D. Ferdinand. D'autre costé le Duc d'Angoulesme fit entrer en Guipus-

Armée Françoisise contre les Espagnols.

Le Roy Iean d'Albret en son pays de Nauarre avec armée.

Plusieurs
places re-
tournent en
l'obéissance
du Roy Ieā.

coa, avec dix mille hommes de pied, & quatre cens cheuaux, les Ducs de Bourbō, & Seigneur de Lautrec, lesquels destruisirēt Vrum Vrançu, Oïarcum, & les villes de Hornam & Renterie, & assiegerent S. Sebastian: mais tost se partirēt & se vint joindre le Vicomte de Lautrec avec les forces du Roy Iean, qui marchoit contre Pampelone. Alors estoit capitaine de Fontarabie, Diego Lopes d'Ayala, Seigneur de Ceuole, qui y fit faire la plate forme appelée de Diego Lopes du costé de France. En l'armée du Roy Iean estoit le Marechal D. Pedro, & plusieurs de la faction de Grāmōnt, les partisans desquels espars par le Royaume, firent reuolter plusieurs places au party du Roy, comme Ieā Ramires de Baquedā Seigneur de S. Martin, la ville d'Estelle, messire Ladron de Mauleon, celle de Mirāde, Martin de Goni, Tafalla, Pedro de Rada, celle de Murillo, messire Iayme Velez de Medran, Sainte Care, & autres, par autres. Le Roy estimoit que la ville de Pampelone en feroit de mesme, mais il fut deceu. Sur cela, l'Archeuesque de Sarragosse D. Alphōse d'Arragon, fils bastard du Roy D. Ferdinand, enuoya six cēs hōmes de Teruel, Darrora & Albarrazin,

pour entrer dedās Pāpelone, lesquels pas-
sans à demye lieuë pres de S. Martin, furēt
assaillis par nonante Ronçalois à pied, &
cinq de cheual qui les desfirent, & les des-
pouillerēt tous en chemise, & les rēuoye-
rent: le Colonel desquels alla à Olite de-
mander secours, mais peu s'en fallut que
l'Archeuesque ne le fist pendre. Antoine
de Fonseca s'enferma en Pāpelone, & D.
François de Beaumont cousin du Conne-
stable assaillit Estelle, & print la ville, mais
non le chasteau, & recouura celuy de Ber-
mette, & D. Pedro de Beaumont frere du
Connestable, le chasteau de Montjardin.
Le Duc d'Albe estant en ces entrefaiētes,
comme enclos entre les armées du Duc
d'Angoulesme, & celle du Roy de Navar-
re, les trōpa euadant par chemin desuoyés
& s'en alla rendre avec son armée à Pam-
pelone: & à fin que le siege du chasteau
d'Estella n'entretinst par trop, & avec des-
tourbier, les forces du Roy de Castille, fut
enuoyé de renfort à ceux qui l'assiegeoyēt
D. Diego Hermandes de Cordoue. Par-
quoy Iean Ramires de Baquedan, pressé
extremément fut contraint de le rendre, à
cōdition de sortir armes & bagues sauues,
& enseignes desployées, refusāt les grādes
offres que le Roy D. Ferdinād luy offroit,

Victoire de
90. hōmes
sur 600.
Aragénois.

*Pampelone
assiégée par
le Roy leã.*

s'il vouloit demeurer à son service : Ainsi arriua ce bon cheualier au camp du Roy de Nauarre : la ville de Larraga defendue par vn capitaine François , fut aussi réduite à paches : le Roy de Nauarre print par force le chasteau de Tiebas, où estoit la Dame de Gurendayn de la maison d'Artieda, laquelle il laissa aller libre, & ayant receu nouveau renfort de deux mille Allemans, assiegea du costé de la porte de S. Nicolas, la ville de Pampelone, où furent faictes plusieurs sorties & escarmouches, par où le Roy de Nauarre cogneut que la force des assiegés estoit grande. Le Duc d'Albe mit dehors aucuns de la partialité de Gramont qu'il eut pour suspects, & ayant visité les endroits de la ville qui pouuoient estre dāgereux, & mis bon ordre par tout, remparant les breches que les ennemis faisoient avec leur furieuse batterie, il se prepara pour soustenir l'assaut, qui fut baillé vn Sammedy xxvij. de Nouembre, où les assaillans furent repoussés, avec grande perte. Cependant le Roy D. Ferdinand residēt à Logrogno, aduertý de l'estat des affaires, auoit assemblé les forces d'Alaua, Biscaye la Rioya, partie de Guipuscoa, & nonobstant le danger des François, bon-

*Assaut sou-
tenu.*

ne partie de l'armée desquels estoit encore en ses limites, amassa iusques au nombre de 15. mille hommes combatans, assignant leur rédez vous au Pont de la Royne, où il enuoya le Duc de Nagera D. Pedro Manriques, surnommé le fort, capitaine general de cette armée, au bruit de laquelle le Roy de Nauarre hors d'esperance de pouuoir prendre Pampelone & en grande necessité de viures, ioinct l'hiver qui harassoit son armée, leua le siege, le dernier iour de Nouembre, par le conseil & persuation du Seigneur de la Palisse, & autres experimentés capitaines. Le lendemain premier de Decembre, arriua le Duc de Nagera avec son armée, dōt on n'auoit plus que faire, puis que le siege estoit leué, lequel pour cette raison, refusa la bataille, que les François luy enuoyèrent presenter, par vn Roy d'armes. Ainsi s'en retourna le Roy Iean d'Albret, plaignant son malheur au deça des Pirenées, aux destroits desquels monts, l'arrieregarde de l'armée Françoisise fut trauaillée par les Guipuscoans & autres montagnars, & cōtrainte laisser en la montagne de Velate, & de Leysondo, partie de leur artillerie qui fut trainée à Pampelone, avec grāde feste,

*Siege leué
de deuant
Pampelone.*

1513.

des Castillans. Le Duc d'Albe demeura Vice-Roy en Nauarre, qu'il mit tout en l'obeissance du Roy D. Ferdinād, excepté le chasteau de Moya, qui tint long temps pour les Roys de Nauarre dechassez iniustement cōme dict est, lesquels cependant ne cessoyent de solliciter le Roy de Frāce, pour le recouurement du Royaume. L'an 1513. au moys de Feburier, mourut à Rome le Pape Iules, qui auoit esté cause de la perte & ruine des Roys de Nauarre: & y eut trefue entre le Roy de Frāce & le Roy D. Ferdinād pour vn an. Ce qui assura au Roy Dom Ferdinand son vsurpation du Royaume de nauarre, duquel les Seigneurs & Estats, apres la retraite des François de deuant Pampelone, luy deputerent le Cōnestable D. Louys de Beaumont Cōte de Lerin, pour luy prestre le serment foy & hommage, & estant le Duc d'Albe retourné en Castille, demeura en son lieu Vice-Roy en Nauarre D. Diego Fernandes de Cordoue, qui fut Marquis de Comarès. En cette incsme année le Roy de France Loys 12. qui auoit faiēt la guerre en Italie, se reconcilia avec le Pape, & se souzmit au Concile de Latran, enuoyant pour prestre obeissance pour luy, & le Clergé de Frāce,

fix prelats de ceux qui auoyent assisté au Concile de Pise: partāt obtindrēt le Roy, & iceux planiere remission & absolution de de tout le passé, & tous les partisans: à cause dequoy, le Roy de Castille, qui souz pretexte de la sentence donnée par le Pape, contre les Roys de Nauarre, pour estre partisans du Roy de France, auoit vsurpé leur Royaume, le deuoit & deuroit rēdre & restituer, s'il n'estoit plus commandé de son ambition, que de l'obseruation de l'equite & de la raison, se sachant, bien qu'à tort, preualoir de la césure Ecclesiastique, pour occuper les Estats d'autrui, mais la sachāt aussi mespriser, voire Dieu mesme, plustost que rendre par la raison vn pouce de terre, qu'il aura iniustement, ou souz quelque specieux pretexte, & illicite moiē vsurpé sur autrui. En l'année 1515. mourut 1515. le Roy de France Louys xij. le premier de Ianuier auquel succeda François Duc d'Angoulesme premier de ce nom, Prince en aage florissant, braue & vaillant, qui bailla sa belle sœur madame Renée de France, fille deuxiesme du Roy defunct Louys douziesme en mariage au Prince Charles d'Autriche, moyennant six cens mille escuz & le Duché de Berry en dot, & en outre fut lors contracté

1516.

& accordé que le Prince Charles seroit
moyenneur enuers le Roy D. Ferdinand
son ayeul, pour le restablissement des Roys
Iean d'Albret, & D. Catherine sa femme
au Royaume de Nauarre: & pour cet offi-
ce, que le nouueau Roy François ayderoit
au Prince Charles, qui commanceoit des-
ja à gouuerner ses Estats du pays bas, de
gens & nauires, quād apres le decez, qu'on
iugeoit prochain, du Roy D. Ferdinand
hidropique, il luy conuiendroit passer en
Espagne, où il craignoit auoir quelque
contrarieté, par son frere D. Ferdinand
qui estoit nourri & fort aymé en Espagne.
Le Roy D. Ferdinand mourut l'an 1516. le
xxiiij. Ianuier, en l'age de 63. ans, ayant re-
gné 41. an vn mois, & neuf iours, en ce cō-
prins le temps que regna le Roy D. Philip-
pe d'Austriche. Apres sa mort, le gouuer-
nement de Castille n'estoit pas encore biē
asseuré & exempt de troubles, quand on
y eut nouuelles que le Roy de Nauarre
Iean d'Albret s'acheminoit avec vne grā-
de armée de François, pour le recouure-
ment de son Royaume: dequoy le Cardi-
nal Ximenes Regent, se trouua en pei-
ne, n'ayāt forces, encores suffisantes, pour
asseurer tant d'affaires, & sachant bien que

le Viceroy de Navarre D. Federic d'Acuña n'estoit pas pourueu comme il falloit.

Parquoy par l'aduis & à la requeste des ^{D. Antoine Manriques de Lara Viceroy de Navarre.} grands Seigneurs, il establit à la defence de ce Royaume D. Antoine Māriques de

Lara, fils de D. Pedro Duc de Nagera, lequel de bonne volonté offroit de prendre cette charge en temps si dangereux, & qui

auoit ses terres voisines à Navarre, d'où il pouuoit tirer prompt secours en tout eue-

nement. Et dit-on qu'il fut proposé au cō-

seil de Castille, non seulement de deman-

teler toutes les villes, & fortes places du Royaume, à cause des esmeutes qui s'es-

leuoient en ce temps là en Navarre, mais ^{Inhumain conseil pour rendre Na-} aussi de laisser toute la terre en friche, pour

seruir de pastures aux troupeaux : les de-

mantelemēs eurent depuis lieu, mais quāt ^{serte.}

à la desolation des champs, cela sembla

chose trop inhumaine. Le Connestable

de Castille D. Inigo Fernandes de Velasco ennemy inueteré du Duc de Nagera,

essaya d'empescher que son fils allast en ce

gouuernement, comme celuy qui auoit

alliances parmy la faction de Grammont,

& craignoit tousiours la ruine d'icelle.

Parquoy il fit des protestations & autres

diligences d'office à l'encontre du decret

sur ce faict au conseil : par où furent tellement dilayées les prouisions qui estoient requises à si euident peril, que si les François eussent vn peu poussé leur aduventure, ils se faisoient facilement maistres de Pampelone, & de tout le Royaume. Leur armée entrât lentemēt par les Pirenées du costé de Moya & Imana au val de Ronçal, fut arrestée & desfaicte par la diligence du Colonel Ferdinand Vilalua de Plaisance. Le Marechal D. Pedro qui en estoit conducteur & son frere Diego Velez & autres Seigneurs Nauarrois furent prins & enuoyez en Castille, en diuerses prisons, cependant que le Roy Jean d'Albret cōbattoit le chasteau de S. Jean, aux pieds des monts Pyrenées, lequel ayant entendu la desfaicte de ses gens, s'en retourna en France, hors de toute esperance de iamaïs recouurer son Royaume. On fit courir bruit, qu'il fut trouué dedans vn coffre de bagage du Marechal prins, quelques lettres du Connestable de Nauarre Dom Louys de Beaumōt, & d'autres Seigneurs Nauarrois, qui auoyent vn remors de voir cette ancienne & noble couronne abolie & reduite en Prouince. Autres disoyēt que la Comtesse sa femme D. Briande

de Manriques sœur du Duc de Nagera, esleu Vice-Roy de Navarre, ayant decouvert ces menées par certains papiers qui luy estoient venus aux mains, en aduertit le Cardinal Ximenez, lequel manda au Vice-Roy D. Federic d'Acugna de se saisir de la personne du Connestable de Navarre, mais comme le capitaine Pigatto luy voulut mettre les mains dessus, il se sauva & se tint sur ses gardes, iusques à la venue du Duc de Nagera son beau-frere, Vice-Roy & gouverneur au Royaume. A cette cause la Comtesse sa femme n'osa depuis se trouver en sa compagnie.

Estans par la desfaiete de l'armée Francoise, les affaires de Navarre en estat assez assuré pour Castille, le Cardinal fit commander les demolitions des forteresses partout le Royaume, à la sollicitation & par le conseil du Colonel Vilalua, ou bien pource que des-ja il s'estoit mis cela en teste: ce que ceux qui sont venuz apres luy ont trouué vtile & profitable: car il est certain qu'aucuns & la plus part des Navarrois ne pouvoyent oublier leurs Roys propriétaires & legitimes: & ne faut douter que si les forteresses fussent demeurées en estat, qu'ils n'eussent eu courage & cher-

ché occasion de se deliurer de cette subiection & tyrānie Espagnole, mais se voyās desnués de retraites, ils se sont contenuz. Et en ces demolitions le Cardinal voulut espargner vne grande despense qu'il luy eust cōuenue faire à entretenir tant de garnisons, comme il estoit necessaire en vn Royaume nouuellement vsurpé. Tout fut donc abbattu & dementelé, excepté la ville de Pampelone, le chasteau d'Estelle, & les villes de Lombier & du Pont de la Royne, que le Connestable D. Louys de Beaumont obtint pour quelque tēps, de son beau-frere. Le chasteau de Marzillo, lieu fort d'affiette, & d'artifice sur le fleuve Arragon, eschappa cette furie par la vertu de D. Anne de Velasco Marquise de Falses, laquelle haussa le pont leuis aux Commissaires deputez à ces demolitions, disant qu'elle garderoit bien la place, iusques à la venue du Roy Charles, & les empescha. Entre autres edifices qui tomberent par cette tyrannique calamité, on regretta fort le Conuent de saint François d'Olite, lieu ancien & reueré. La mort du Colonel Vilalua ensuiuit bien tost apres, comme par vne vengeance diuine, soupçonné neantmoins, auoir esté causée par

le Connestable D. Louys de Beaumont, lequel le rencontrant pres de sa maison de Lerin, sur le chemin d'Estelle, l'inuita à soupper avec luy, où on creut qu'il luy fit bailler du poison, dont il mourut aussi tost qu'il fut arriué à Estelle. Ce fut pour la haine qu'il auoit acquise enuers tous les Nauarrois, en ce qu'il auoit esté l'instrument des demolitions & demantelemens des fortereffes de Navarre. Le Roy Iean d'Albret, ennuyé de voir ses affaires desesperées, mourut aussi en l'an 1517. & fut mis, par forme de depost en l'Eglise Cathedrale de Lescar en Bearn : car il auoit ordonné d'estre enseuely & enterré en la grande Eglise de sainte Marie de Pampelone. Sa mort aduint cinq ans, neuf mois & vingt iours apres qu'il fut despouillé de son Royaume, par la tyrannie du Castillan, qui luy estoit redeuable. La Royne Catherine suruescut à son mary environ huit mois, & ordonna par son testament que son corps fust enseuely en l'Eglise Cathedrale de Sainte Marie de Pampelone, pour conseruer son droit au Royaume de Navarre, laissant heritier d'iceluy son fils Henry d'Albret.

*Mort du
Roy de Na-
uarre Iean
d'Albret.*

1517.

*Mort de la
Royne Ca-
therine de
Navarre.*

Elle mourut au mont de Marsan, aagée de quarante sept ans, & fut mis son corps à Lescar en Bearn, auprès de celuy de son mary.

*De Henry I I. de ce nom, surnommé d'Albret
trente-sixiesme Roy de
Nauarre.*

Henry d'Albret II. de ce nom aagé de quatorze ans, succeda à son pere Iean d'Albret, & à la Royne Catherine sa mere qui estoit heritiere propriétaire du Royaume de Nauarre, au titre & droicts dudit Royaume qui luy appartenoit, & aussi à iuste cause, il s'intitula Roy de Nauarre, encores qu'il en fut spolié, contre toute raison, par la trahison Castillane, palliée du pretexte susdict. Aussi tost que le Vice-Roy du Royaume de Nauarre, pour le Castillan, entra en son gouvernement, il fit assembler les Estats à Pampelone, & prester le serment au Roy Charles d'Autriche, & à la Royne D. Ieanne sa mere: iurant aussi iceluy de leur part, & par forme, l'observation des priuileges du pays. Et pour-ce qu'à cause des factions, esquelles ce Royaume estoit

d'ancienneté diuise, on auoit accoustumé d'eslire le conseil, ou cour de iustice de pareil nombre de chacune des parts Gramontoise & Beaumontoise, le President duquel conseil estant esleu au sort, de l'une des factions, fouloit volontiers le party contraire, le Cardinal fit en sorte que l'ordre estably premierement par le Roy Iean d'Albret, & cōtinué, par l'vsurpateur du Royaume, le Roy D. Ferdinand, fut suiuy: à sçauoir de leur bailler vn Presidēt estranger, nonobstant que les Nauarrois sollicitassent en la cour du Roy en Flandres, pour reuoquer en vsage l'ancienne coustume. Il osta pareillement le gouuernement de Pampelone à vn Arragonois nommé Ferrera, & y mit vn Castillan, ayant remonstré au Roy vsurpateur, que les Arragonois & Nauarrois, de tout tēps sestoyent mal entendus ensemble: refista aussi au Cardinal d'Albret, lequel par la faueur du Pape, vouloit iouyr de son Euesché de Pampelone, d'où il auoit esté chassé: & tout cela se faisoit, pour vne plus grande assurance de ce Royaume vsurpé, par le Castillan, & pour abolir le nom & la race d'Albret, & ruiner leurs partisans. Apres ces choses y eut de grandes diuisions

en Castille, esquelles estoit aduenu, que se trouuans les gouuerneurs foibles & mal pourueuz de plusieurs choses, ils furēt cōtraints de se seruir des gens de guerre qui estoient és garnisons de Nauarre, & tirer plusieurs pieces d'artillerie de Pampelone & d'autres places de ce Royaume. Ce qui donna occasion à aucuns, affectiōnez à la maison d'Albret & de Foix, & au vray & legitime heritier de ce Royaume, Henry 2. d'Albret d'auoir secrettes intelligences en Bearn, & en France. A la faueur desquels, le Roy François premier enuoya André de Foix Seigneur d'Asperault, frere puisné d'Odet de Foix Seigneur de Lautrec, lequel recueilly par ceux de la faction de Grammont, print le chasteau de saint Iean de pied de Port. Et pour cette cause, le Duc de Nagera Dom Antoine Manrique se trouuant surprins, ioinct que la ville de Pampelone commençoit à faire tumulte, sortit d'icelle, & se retira en Castille, abandonnant sa maison à sac au peuple. Au deslogement du Viceroy Manrique, demoura au chasteau de Pampelone, en garnison avec les autres soldats vn certain Ini-

go de Loyola , premier Auteur des Iesuites, & ennemy obstiné de la maison d'Albret : Car estant le chasteau assailly par le peuple qui se vouloit, à la venue des François, souz la conduite du Seigneur d'Alperrault, deliurer du ioug Espagnol, vn coup de canon estant tiré par les assiegeans, en certain endroit, auquel d'auanture se rencontra ce personnage, il eut les deux pieds brisés, des pierres qui furent rechassés par le boulet, tellement qu'il tomba du haut du chasteau en bas, fut retiré pensé & guaranty de mort. Mais se voyant mutilé & inutile désormais au metier des armes, il quitta le monde, & s'addonna aux choses spirituelles, & donna origine à ceux que depuis l'on a nommé & que l'on nomme encores Iesuites, lesquels depuis, comme l'on pourroit cy apres, ont herité non tant de la reigle sainte & changement de vie de ce Pere, que de l'hostile ardeur, de laquelle auant sa conuersion à la vie Religieuse & spirituelle, il s'estoit monstre enflammé, contre la maison d'Albret vraie & legitime heritiere du Royaume de Nauarre, maintenant vsurpé & possédé par le Roy de Castille.

Le Seigneur
d'Asperraut
se rend mai-
stre de Pam-
pelone pour
Henry 2.
Roy de Na-
uarre.

Aussi tost que le Duc de Nagera se fut retiré de Pampelone, les habitâs establirent pour leur capitaine, le Seigneur d'Osoyen, qui auoit esté au seruice du Roy dict Catholique. Le Seigneur d'Asperraut, poursuivant sa victoire, fut rencontré dans les monts Pyrenées par aucuns deputés du val de Ronçal; qui luy prestèrent obeissance, & luy donnerent aduertissement de l'estat du pays, avec lesquels il passa à Pampelone, & s'en rendit maistre, au nom du Roy Henry 2. au mois de May. Le Comte de Lerin D. Louys de Beaumont desiroit d'aller le trouuer, mais on luy refusa saufconduit pour le retour. Ne trouuant le Seigneur d'Asperraut aucune resistance en tout le Royaume, le reduisit & rangea en peu de iours, en l'obeissance de son Roy naturel & legitime: & se seruant de l'occasion des guerres ciuiles de Castille, & ayant bonne intelligence avec les communautés, passa la riuere d'Ebro, & alla mettre le siege deuant Logrogno, par conseil assés mal digeré & temeraire. Dedans la place s'estoit enfermé D. Pero Velez de Gucuarra, avec quelque nombre de gens de guerre, qui resisterent vertueusement à l'armée Françoise, auxquels donna grande faueur

la victoire de Villa Laria obtenue par les Vice-Roys de Castille, contre l'armée des communes, comme l'on peut voir en l'histoire de Castille. A ceste cause les victorieux s'advancerent avec le Duc de Nagera, qui avoit faict levée de gens, depuis Burgos iusques à la mer, donnant charge de Colonel, des soldats Guipuscoans à son fils D. Iean Manriques de Lara, ieune Seigneur de l'aage de 15. ans seulement : & des Biscains à Gomes Gonçales de Butron, Seigneur de Muxica & de Butron: lesquelles forces qui estoient grandes contrainrent les François de lever le siege, & repassans la rivièrre, retourner en Navarre, ayans en queue l'armée Castillane si prochaine, qu'ou les François soupoyent, les Castillans disnoient le iour apres. Les armées estans arriüées pres de Pampelonne, le Seigneur d'Asperraut accompagné de plusieurs Navarrois, fut d'advis de tourner visage & hasarder la bataille: mais fort inconsidérément: car lors il n'auoit nombre de gens de guerre, pour resister à la puissance qui luy estoit opposite, & n'eut la patience d'attendre partie de ses forces, qui estoient à Tafalla avec le Seigneur d'Ollaqui, & à Pampelone, & vne nou-

uelle levée de six mille Nauarrois, qui se pouuoit ioindre à luy le lendemain, ou l'autre suiuant. Parquoy s'estās approchez les vns des autres, apres que l'artillerie eut donné, quand on vint aux mains, la caualerie François se fit merueilleux deuoir, mais leurs gens de pied, qui estoient la plus part Gascons & en petit nombre ne peurent soustenir l'effort de leurs ennemis, & se

*Route de
l'armée François
soulz
le sieur
d'Asper-
rant.*

mirent en route: ce qui leur fit quitter le chāp & laisser la victoire aux Vice-Rois.

En cette bataille donnée pres le bourg de Noayn & port de la Riniega, moururent plusieurs Castillans, & que François que Nauarrois pres de cinq mille hommes, & entre iceux D. Charles de Mauleon & D. Iean de Saraza: le capitaine S. Martin, & Charles de Nauasques. Le general mesme de l'armée François fut blessé qui se rēdit à D. François de Beaumont: le Seigneur de Tournon y fut aussi prins, D. Pedro de Nauarre, fils du Marechal D. Pedro prisonnier à Simanca, se sauua en France, avec D. Arnaud de Grammont, D. Federic de Nauarre & autres en grand nombre.

*Pampelone
recourée
par les Ca-
stilians.*

Soulz la faueur de cette victoire, fut reprise la ville de Pampelone, sans aucune difficulté, par les Castillans; & à l'exem-

ple de leur capitale , se rendirent aussi toutes les autres places du Royaume , exceptés quelques chasteaux forts , dedans les montagnes.

Le Seigneur d'Asperraut fut blasmé d'auoir hazardé la bataille foible comme il estoit , & dans le Royaume , sans besoin : mais il s'excusoit sur-ce qu'il auoit appercéu vn grand desordre entre les ennemys , qui luy promettoit victoire assurée , dont il fut trompé : Plus aisé & plus seur luy eust esté de demeurer sur la defensiue , se contentant de garder ce qu'il auoit gaigné , sans coup ferir , en si peu de temps , sans assaillir les terres de Castille : quelque temps apres il fut lâché , moyennant rançon de dix mille escuz , par Dom François de Beaumont , contre la volonté des Vice-Roys de Castille , lesquels establirent Vice-Roy en Navarre , au lieu du Duc de Nagera , le Comte de Mirãda D. Francisco d'Estunga & d'Auillaneda. Et cette année vacqua de fait l'Euesché de Pápelone par la mort du Cardinal Amand d'Albret & fut pourueu à ce siege du Cardinal Alexãdre , Cesarin Romani. Le Roy François desplaisant du mauuais succès de l'armée du Seigneur

Admiral
Bonniuet en
Guipuscoa.

d'Asperraut, ordonna d'affaillir l'Espagne avec plus grande puissance, du costé de Guipuscoa, & y enuoya le Seigneur de Bonniuet Admiral de France, lequel print de premier abord, le chasteau de Beoyuia, où il mit le capitaine Beau-fils en garnison, puis menant l'armée contre Fontarabie, l'assiegea & dressa sa batterie en lieux commodes. Dedans estoit gouverneur Diego de Vera, lequel ou par negligence, ou par defect de moyens, l'auoit tresmal pourueuë de viures, tellement que des le troiesime iour du siege, on cōmancea à y auoir faim. Nonobstant ce, il fit quelque resistance & soustint quelque assaut, mais en fin, voyant qu'il n'y auoit raison de tenir, s'accorda aux partis qui luy estoient offerts, & rendit la place, sortant avec les armes & enseignes desployées. Cette reddition vint fort à propos pour l'armée Françoisse: car deux iours qu'elle eust esté differée, elle eust esté contrainte de desloger, à cause qu'il tomba vne si grande abondance de pluye, que les torrents enflés entre ces vallées, eussent rauagé & hommes & bagage & tout ce qui s'y fust trouué. L'Admiral Bonniuet mit dedans Fontarabie trois mille Gascons en

garnison, fouz la charge du Seigneur du Lude, apres auoir remparées ses breches & icelles munies de viures. Du costé d'Espagne fut enuoyé en celle frontiere, pour s'opposer aux François D. Bertrand de la Cucua fils du Duc d'Albuquerque, lequel pourueut à la ville de saint Sebastian, & autres forteresses de cette contrée. En cette saison l'Empereur depescha vn commandement en la ville de Bruxelles, au Comte de Mirande, Vice-Roy de Nauarre, de demolir ce qui restoit des murs & forteresses de Nauarre, à fin d'euiter nouveaux tumultes, & garder le Royaume usurpé. Ce qui fut exécuté, hors mis de la ville de Pampelone, de Lombier, & du Pont de la Roynie, & le chasteau d'Estelle. Quant à Pampelone il fut aduisé de la fortifier : & pour-ce faire furent ruinez les monasteres prochains, & les moynes tirez dedans la ville. Les Vice-Rois se trouuerent en grande peine & soucy de la perte de Fontarabie. L'an ensuiuant 1522. fut prinse la forteresse de Maya non gueres loin de Bayonne, par la diligence du Comte de Mirande Vice-Roy, & de D. Louys de Beaumont, Comte de Lerin, laquelle estoit defendue par messire Jacques Velez

Demolitiōs
nouuelles en
Nauarre.

1522.

Maya for-
teresse in-
expugnable
prinse par
les Castil-
lans.

de Medran Nauarrois, avec autres de la faction de Grammont, place, pour son affiette reputée imprenable, laquelle neantmoins pressée extraordinairement, fut rendue par le souldict de Medrā, qui fut mené prisonnier avec son fils à Pampelone, où l'un & l'autre moururent dedans quatorze iours, il est a supposer que ce fut par la violence & iniure des Castellans. Par cette prinse fut entierement despouillé le Roy Henry 2. d'Albret, de tout ce qui appartenoit à son Royaume de Nauarre du costé d'Espagne. Les François assez inconsiderement abandonnerent le chasteau de Beoyuia, qui estoit de grande consequence, pour faire la guerre en Espagne, pour estre le seul passage, par lequel on puisse mener artillerie en Guipuscoa, & pēsoyēt le ruiner : mais sur ces entrefaictes les Espagnols qui furent aduertis, empescherēt ce dessein & s'en emparerent, & le garderent bien. En cette année 1522. l'Empereur Charles retourna en Espagne, & arriua le 16. de Iuillet en la ville de S. Ander. Quelque temps apres, en la mesme année, il entra en la ville de Pampelone en Nauarre, d'où entendant à la defense de ses terres de Guipuscoa, il depescha le Connestable

D. Inigo Fernandes de Velasco, avec le Prince d'Orange, lesquels menerent vne armée d'environ 24. mille hommes hors du pays, par le pas de Bayouia, & allerent camper à Sauueterre, de Bearn, laquelle se rendit. Le Seigneur de Lautrec cependāt, qui estoit gouuerneur de Guyenne, donna bon ordre tant à Bayonne, qu'à Fontarabie, incertain quel dessein auoyent les ennemis, lesquels rentrerent en Guipuscoa, n'ayans faict chose memorable en ce voyage que la prinse du chasteau de Vidaxone, appartenant au Seigneur de Grāmōnt: grande partie de cette armée mourut de froid & de necessité, en ce voyage. Au commencement de l'an 1524. l'Empe- 1524. reur fit mettre le siege deuant Fontarabie, souz la conduite du Connestable de Castille, assisté du Prince d'Orange, & de plusieurs autres Seigneurs & gentilshommes de nom. La place estoit assés fournie pour soustenir vn long siege: neantmoins le capitaine Frauget, qui commandoit dedans, en la place du Seigneur du Lude, qui s'en estoit retiré, la rendit, armes & bagues fauues, & en sortit, enseignes desployées, ainsi qu'auoyent faict les Espagnols. Le- dict Frauget s'excusa sur les intelligences

*Fontarabie
rendue.*

que D. Pedro de Nauarre auoit avec le
ennemis: Cela n'empescha toutesfois qu'il
ne fust degradé de noblesse sur vn échaf-
faud, en la ville de Lyon. En ce temps là
ceux de la faction de Gramont qui auoyent
suiuy les Roys de la maison d'Albret, se
mirent presque tous au service de l'Empe-
reur, auquel ils presterent serment, com-
me à leur Roy, se laissant aller à la force,
notamment D. Pedro de Nauarre, qui
obtint la dignité de Marechal, qu'auoit
eu son pere, & le Marquisat de Cortes: il
estoit descendu de D. Leonel, fils du Roy
Charles II. de ce nom. Quant au Comte
de S. Estienne, lors qu'il alla au service de
l'Empereur, il eut tiltre de Marquis de Fal-
ses & l'Estat de grand Chambellan de Na-
uarre & autres biens-faits. Et de là en a-
uant ha esté retenu ce Royaume ainsi vsur-
pé, par la maison de Castille, en paix &
sans troubles.

1525.

*Le Roy
Henry d'Al-
bret prins à
la journée
de Pauie, se
sauua.*

L'an 1525. ayant esté desfaict & prins le
Roy François en la journée de Pauie, fut
aussy prins le Roy de Nauarre Henry 2.
d'Albret, mais il eschappa du chasteau de
Pauie, & se sauua en France, & le Roy
François fut mené en Espagne. Apres le
retour duquel en son Royaume, voulant
entre

entièrement accomplir entant qu'en luy estoit ce qu'il auoit promis a l'Empereur Charles cinquiesme, de tascher par tous moyens de persuader au Roy Henry de Nauarre son beau-frere, de delaisser le tiltre & nom de Roy de Nauarre, & quitter & renōcer a tous-jours, pour luy, ses hoirs & successeurs, au profit dudit Empereur & de ses successeurs Roys de Castille, au droit qu'il pretendoit audit Royaume de Nauarre, pria ledict Roy de Nauarre son frere de ce faire: lequel luy fit respōce que si c'estoit quelque terre ou Royaume par luy acquis, de cela & de plus grande chose, il voudroit cōplaire audit sieur Roy son frere, & auoit grand regret qu'il ne pouuoit satisfaire a son desir, en ce dōt il requeroit: mais le prioit bien fort de considerer, qu'il estoit question de l'ancien tiltre de sa maison du costé maternel, que son pere auoit porté & luy aussi, & de l'anciē patrimoine de ladicte maison, que honnestemēt & sans estre noté de ses successeurs & posterité, il ne pouuoit laisser, ne quitter, & trouuoit par son conseil que son hōneur y seroit blessé dont il croyoit que ledict sieur Roy son frere ne le voudroit presser, & pour-ce, le supplioit vou-

loir prendre en bonne part ladicte respon-
 ce, luy promettant neantmoins qu'il se
 garderoit d'entreprendre chose qui luy
 tournast a dommage, de laquelle respon-
 ce ledict sieur Roy fit faire acte public
 pour descharge de sa promesse, dont nous
 auons extraict ce que dessus. L'an 1526.
 s'accomplit le mariage du Roy de Nauar-
 re Henry 2. d'Albret, & de Marguerite de
 France sœur vnique du Roy François: De
 ce mariage nasquit la Roynie Ieanne leur
 seule heritiere. Cette Princesse Margueri-
 te de France estoit veufue du Côte Char-
 les d'Alençon. Et en l'an 1547. la Princesse
 Ieanne d'Albret, autant belle, sage & ac-
 cōplie qu'il en fut jamais, fut mariée, avec
 grandes pompes & solennités, au Duc de
 Vandosme Antoine de Bourbon, Prince
 du sang Royal de France, & se celebrerē
 les nopces en grande ioye & magnificen-
 ces, à Moulins: & la mesme année mouru
 le Roy François premier de ce nom à
 Rambouillet. Et en l'an 1555. le Roy de
 Nauarre Henry 2. d'Albret, mourut à Pau,
 aagé de cinquante trois ans: Il ordonn
 ainsi qu'auoyent faict ses pere & mere D.
 Iean d'Albret & D. Catherine Roys d'
 Nauarre, d'estre enseuely & enterre

*Naissance
 de la Roynie
 Ieâne Mere
 du Roy
 Henry 3. de
 Nauarre,
 & 4. de
 France au-
 iourd'huy
 regnant.*

*Antoine de
 Bourbo pere
 du Roy
 Henry 14.
 de Nauarre
 & 11ij. de
 France à
 present re-
 gnant.*

Pampelone, & fut son corps mis en deposit à Lescar en Bearn.

D. Antoine de Bourbon, Duc de Vandosme 37.

Roy de Nauarre, & D. Ieanne d'Albret sa femme, vniue heritiere du Royaume de Nauarre qui luy est usurpé: & est la septiesme Princesse heritiere de ce Royaume.

A Vx biens & Estats du deffunct Roy de Nauarre Henry 2. de ce nom, surnommé d'Albret, & au droit en la couronne de Nauarre, maintenant usurpée par le Roy de Castille, ha succédé sa fille vniue, madame Ieanne d'Albret, vne des plus sages & vertueuses Princeses de son temps mariée cōme ha esté dict au Duc de Vandosme Antoine de Bourbon du sang Royal de France. En l'année 1558. mit fin à ses penibles iours l'Empereur Charles aagé de 58. ans & six mois. En l'an 1560. estoit Vice-Roy en Nauarre D. Gabriel de la Cueva, au lieu de D. Bertrand son pere decédé.

En ce mesme temps le Roy de France, François 2. de ce nom, qui auoit quelque soupçon du Prince de Cōdé, & qui croyoit fermemēt que les troubles de Lyon, Dau-

phiné & de Prouence, qui furēt à lors, venoyent de luy, manda plusieurs fois au Roy de Nauarre, qu'il l'amenaſt, ou qu'autrement, il iroit le querir avec telle compagnie, qu'il demeureroit le plus fort. Monsieur le Cardinal de Bourbon, frere deſdicts Seigneurs Roy de Nauarre & Prince de Cōdé taſchoit de tout ſon pouoir effacer de l'eſprit du Roy toutes ces opinions, & le reconcilier au Prince de Condé ſon frere, par le moyen des Princes & de la Royne mere. Et pour contenter ſa Maieſté, s'offrit aller en Bearn, & faire tant qu'il ameneroit ſes freres, ſur la promeſſe que le Roy luy fit ſur ſa parole, qu'il ne leur ſeroit faiet tort ne deſplaiſir: mais où il y auroit quelque accusation, il y ſeroit procedé, par l'ordre de iuſtice. Le Roy de France manda ſes troupes de gendarmerie, pour l'accompagner allant de Paris à Orleans, où il vouloit aſſembler les trois Eſtats de ſon Royaume. Le Prince de Condé n'eſtoit pas ſeulement accuſé par ſes ennemis, comme Auteur de quelques eſmotions, mais y accucilloient auſſi le Roy de Nauarre, l'accuſant d'auoir ſollicité la Nobleſſe de Guyenne, & qu'à ſa ſuſcitation ceux de Dauphiné auoyent

pris les armes, & s'estoyent mis en campagne, s'efforceans de changer l'Estat des affaires de France. Le Roy de Navarre & le Prince de Condé, pour se iustifier, & faire voir à tout le mōde, que le bruit que l'on auoit faict courir d'eux estoit faux, & à ce que le Roy s'asseurast de leur integrité & innocence, s'acheminent en Cour, deuers sa Majesté, & comme ils passoyent par Vertueil, lieu situé au pays d'Angoulmois, appartenāt au Comte de la Rochefoucault, le Roy de Navarre, voyant le grand nombre de la Noblesse, qui le suiuoit, & qui luy offroit son seruice, il les remercia de la bōne volonté qu'ils luy portoyent, & des offres qu'ils luy faisoient de luy faire seruice, les priant de se retirer, se fiant en son innocence, de peur que s'il venoit en Cour, suiuy d'une telle troupe, il donnast à penser au Roy, que ce que l'on disoit de luy & du Prince de Condé, son frere, fust veritable. Incontinent luy & le Prince son frere, avec petit train, vindrent à Orleans, & y arriuerēt la vigile de Toussaints, dernier iour d'Octobre, & allerent au deuant d'eux, le Cardinal de Bourbon, le Duc de Mont-Pensier, le Prince de la Roche sur Yon, & autres grāds Seigneurs,

*Bonne conscience du
Roy de Navarre contre
ses accusateurs.*

*Rude traitemēt, sans
raison, fait
au Prince
de Condé.*

parents , alliez & amys de la maison de Bourbon. Le Roy les receut assez froide-
ment, & fit plus mauuais visage au Prince
de Cōdé, qu'au Roy de Nauarre, luy pro-
posa les depositions & accusations contre
luy : & le Prince y opposa les excuses &
deffenses , pour se iustifier : & ce nonob-
stant il fut saisi par les capitaines des gar-
des, & constitué prisonnier, en vne mai-
son voisine du logis du Roy : & cette mai-
son fut aussi tost treillissée de fer, flanquée
& percée, à ce que personne n'y entrast, &
trois pieces de cāpagne braquées en cette
maison, sur trois aduenues des ruës, pour
empescher la deliurance du Prince, si l'on
eust voulu l'attenter : & furent aussi mis
beaucoup de soldats pour sa garde, les-
quels ne permettoient qu'aucun parlast à
luy, qui n'auoit de tous ses gens, qu'un seul
valet de chābre pour son seruice, qui estoit
vn biē rude traitemēt pour vn Prince de
sa qualité, & contreuenant à la promesse
que le Roy auoit faicte au Cardinal son
frere, pour le faire venir en Cour. Le Roy
de Nauarre se veit presque delaissé de tous
ses domestiques, exceptés bien peu, pour-
ce que les mauuais seruiteurs & malaffe-
ctionnés suivent tousiours l'heureuse for-

tunc, à laquelle changeant de visage, ils
 tournent incontinent le dos. Madame de
 Roye sœur des Seigneurs de Chastillon
 & d'Andelot, belle mere du Prince de
 Condé, & niepce de monsieur le Conne-
 stable fut aussi menée prisonniere à saint
 Germain en Laye: Comme aussi fut pri-
 sonnier Amaulry Bruchard maistre des
 Requestes de l'hostel du Roy, & Chance-
 lier du Roy de Nauarre, cōduit à la Cour,
 par le Seigneur de Iarnac, avec seure gar-
 de, cōme celuy que l'on estimoit cognoi-
 stre entierement les affaires de ces Prin-
 ces: le Baillif fut prins aussi. Le Roy cepē-
 dant que l'on se preparoit à l'ouuerture
 des Estats, deliberoit aller s'esbatre à
 Chambert & Chenonceau, lieux de plai-
 sance; mais, comme il estoit vn Dimanche
 au soir, dix-huictiesme iour de Nouem-
 bre, à vespres, en l'Eglise des Iacobins, se
 sentir tout soudain saisi d'une telle deffail-
 lance de cœur, qu'il le fallut reporter en
 son logis: & là estant reuenu à soy, &
 passée cette syncope, il commancea à
 se plaindre de la teste, du costé de l'o-
 reille gauche, sur lequel il auoit vn ca-
 therre: Dessors, on demeura en attente,
 les vns de la vie, les autres de la mort:

*Emprisonne
 mēt de ma-
 dame de
 Roye.*

Mort du
Roy Fran-
çois 2.

Charles 9.
Roy de
France.

Le Roy de
Navarre
Lieutenant
general par
tout le
Royaume
de France.

par-ce que sa maladie estoit fort violente, & que pour l'apostume qui s'estoit engendré au lieu de la douleur, avec grande inflammation, le Roy se sentoit assailly d'une fièvre fort ardente, luy augmentant son mal, de sorte que quelque remede que ses Medecins y sceussent dōner & appliquer, le dix-septiesme iour qu'il se fut mis au liēt, qui fut le cinquiesme iour de Decembre, ce ieune Roy mourut, l'an dix-septiesme de son aage, & de son regne le second. Charles neufiesme, auparauant nommé Charles Maximilian Duc d'Orleans succeda à son frere, l'onzieme année de son aage & commancea à regner, le cinquiesme iour de Decembre, mil cinq cens soixante. Le Roy estat mineur, y eut quelque different & controuersie, touchant la Regence, aucuns des Estats particuliers, eslisans la Royne mere, du Roy, aucuns nommans le Roy de Navarre. En fin la Royne fut nommée gouuernante & regente en Frâce, durāt la minorité du Roy son fils, assistée du Conseil des Princes du sang, & conseillers du Conseil priué: & le Roy de Navarre, associé à la Regente, fut estably Lieutenant general de sa Majesté, par toutes les terres & pays de son obeis-

sance, sans l'aduis duquel, la Royne ne pourroit faire aucune chose, suiuant le vouloir du Roy, l'Arrest du Conseil priué, & accord faict entre le Roy de Nauarre, & la Royne Mere, apres le decez du Roy Francois second. Il est vray que toutes choses se faisoient souz le nom & autorité du Roy, sans rien expedier souz le nom de la Royne Mere Regente, ny du Roy de Nauarre. Estant ainsi mis le Royaume entre les mains du Roy de Nauarre, & de la Royne Mere, l'ouuerture des Estats se fit le douzième iour de Decembre, l'an mil cinq cens soixante. Cependant, on brouilloit les affaires en France, & se faisoit vne estrange meslée de toutes choses: & la cōtinuation des Estats fut assignée en la ville de Pontoise. Et en ce temps mesmes, aucuns voulans troubler les affaires, proposerent n'estre biē seant, qu'une femme fust preferée en la Regence & gouuernement du Royaume à vn Prince du sang, & qu'elle auoit intelligence avec ceux qui auoyēt troublé le Royaume: ce qui se faisoit en faueur du Roy de Nauarre, sans son sceu, & sans qu'il s'en donnast aucune peine, pour-ce qu'il estoit Prince sans ambition & facile à contenter. Les Seigneurs qui

*Le Roy de
Nauarre
sans ambi-
tion.*

*Le Roy de
Navarre
associé au
gouverne-
ment du
Royaume.*

*Charles 9.
sacré à
Rheims.*

*Justification
du Prince
de Condé.*

estoyent auprès du Roy, & la Royne Mere, pour obuier aux troubles qui pouuoient suruenir d'un tel different, firent en sorte que le Roy de Navarre fut associé au gouvernement du Royaume, avec la Royne Mere du Roy, sans toutesfois qu'il portast le nom & tiltre de Regent, mais seroit nommé Lieutenant general pour le Roy, par toutes ses terres & Seigneuries, & ne feroit rien sans le communiquer à la Royne, laquelle aussi ne pourroit rien resoudre & arrester des affaires sans luy communiquer, & auoir sur-ce l'aduis des Princes & Seigneurs du Conseil. Le Roy fut sacré à Rheims le dix huitiesme iour de May, mil cinq.cens soixante & vn. Quelque tēps après, l'on vacqua à la iustificatiō du Prince de Condé, & autres Seigneurs qui auoyent esté constitués prisonniers auparavant en la ville d'Orleans, par le commandement du Roy Charles 9. En fin ledict Prince, fut par arrest, déclaré innocent, à luy toutesfois reserué son recours contre qui il apartiendrait, pour la reparation de l'iniure & calomnie. Aussi furent ablouz des charges à eux imposées, la Dame de Roye, belle-mere de ce Prince, le defunct Vidame de Chartres, le Seigneur de Cany, & maistre Robert de la Haye,

Conseiller en la Cour de Parlemēt de Paris. Cest Arrest de la iustification & declaration d'innocēce du Prince de Cōdé, fut prononcé a huis ouuert & toutes les chābres de la Cour, assemblées au Palais de Paris, y seāt mesieurs de Parlemēt vestus de leurs robes rouges. A quoy assisterēt le Roy de Nauarre & le reuerēdissime Cardinal de Bourbon, freres dudict Prince de Condé, mesieurs les Ducs de Montpensier, & Prince de la Roche-sur-Yon, cousins de ce Prince, les ducs de Guise, de Nevers, & de Montmorēcy, Connestable de France, les Cardinaux de Lorraine, de Guise, & de Chastillon, & les Seigneurs de S. André & de Montmorency Mareschaux de France, & plusieurs autres Seigneurs, estans tous fort ioyeux de cecy, esperans voir par ce moyē, les troubles assopis. Mais au rebours, les Ducs de Guise, Mōtmorēcy & Mareschal de S. André & autres adhererent au Prince de Montpensier, pour la defense de la Religion Catholique, soutenus de tout le clergé & meilleure partie de la Noblesse, ioint q̄ le Roy estoit nourry en l'Eglise Catholique, & que la Royne Mere n'aymoit la doctrine des Protestās. Plusieurs pēsoyēt que le Roy de Nauarre

fust du party des Protestans: mais l'on cogneut bien tost le contraire, par la publique profession de foy qu'il fit, assistant aux ceremonies & seruice de l'Eglise Catholique, & par la submissiõ, & obeissance qu'il auoit enuoyé faire à nostre S. Pere le Pape, par l'Euesque de Comminge. Pour les Protestans se declarerēt le Prince de Condé, l'Admiral de Chastillon, Dādelot son frere, Colonel de l'Infanterie Françoise, le Comte de la Rochefoucault & autres. Au moys de Iuillet audict an 1561. fut faite vne assemblee à Paris, où se trouuerent tous les Princes Catholiques & Protestans, pour mettre en deliberation les affaires du Royaume & faiēt de la Religion: Sur quoy fut faiēt l'Edict de Ianuier audit an. Le Roy de Nauarre voyant de grands desordres pour le faiēt de la Religion, assailly de grandes difficultez, & ne sachant comme contenter l'vn & l'autre party, les voyant tous deux forts, & y ayant en chacun d'iceux quelqu'vn de ses proches parēts, s'aduisa d'vn Colloque des Docteurs Catholiques avec les Protestāts, auxquels fut donné sauf-conduict pour venir en France, au Colloque & Conference assignée en la ville de Poissy, qui fut neant-

*Colloque de
Poissy.*

moins sans aucune resolution. L'année ensuiuante 1562. fut faict l'edit de Ianuier, & publié par plusieurs reiterées iussions en la Cour de Parlemēt de Paris, le sixiesme iour de Mars ensuiuant. Cet edict fut cause que messieurs de Guise se retirerent, le Duc en sa maison, & le Cardinal de Lorraine, au Concile de Trente, tandis que quelques Princes Catholiques firent ligue ensemble, pour ne souffrir les deportemens des Protestans en France. Delà vint l'associatiō desdits Seigneurs de Guise & Connestable de France, qui estoit retiré en sa maison fort irrité contre ses nepueux de Chastillon, qui portoyent ouuertement la cause des Protestans, avec le Prince de Condé, & entrerent en cette Ligue, le Mareschal de S. André, & quelque temps apres, le Roy de Navarre. Jeanne d'Albret Royne de Navarre, voyant que le Roy de Navarre son mary, se rangeoit du party des Seigneurs Catholiques, se retira au pays de Bearn, avec sa Cour, & plusieurs de la Religion Protestante firent le semblable. Le Pape se donnoit beaucoup de peine de ces affaires, cōcernans le faict de la Religion, sollicitant le Roy de Navarre, Lieutenant general

*La Royne
de Navarre
se retire en
Bearn.*

*Assocition
du Roy de
Navarre
avec le Cō-
nestable &
Duc de
Guise.*

du Roy de France, pour la defence de la Religion Catholique, & furēt faićtes plusieurs pratiques, ouuertes & negotiations, avec le Roy Catholique, touchant la recompense qu'il deuoit faire à iceluy Roy de Navarre, pour son Royaume vsurpé, comme i'ay monstre cy deuant, par les Roys de Castille, sur la maison d'Albret, sans autre droict, que la force & tyrannie, pour leur estre ledict Royaume de Navarre fort commode & fort proche, & aussi pour l'accroissement de leur Seigneurie & domination. Tant y a que le Roy de Navarre se declara contre les Protestans, qui des-lors nommerēt, cōme par vn mepris, l'association du Roy de Navarre avec le Cōnestable & Duc de Guise, le Triumvirat, mot prins de la domination des trois hōmes à Rome, lors que la republique Romaine fut soumise à la puissance d'Auguste, Lepide & Marc Antoine: histoire amplement descrite par Appian & autres historiēs. Quelque temps apres se fit vne assemblée des Princes de l'un & de l'autre party, à Fontainebleau, suiuant le cōmandemēt du Roy, où l'on fit tant que le Prince de Condé & le Duc de Guise, parlerent ensemble, & s'accorderent du faict d'Am-

boise, & emprisonnement dudiect Prince en la ville d'Orleans: duquel se purgea le Duc de Guise, & s'embrasserent ces deux Seigneurs cōme bōs amis: mais c'estoit vn accord simulé, par-ce qui s'ensuit incontinnēt, ainsi que l'on peut voir és histoires des troubles de ce tēps là. Au moys d'Octobre audiect an, le siege fut mis deuant Rouen, & voyant que le Duc d'Aumale, auparauant auoit peu aduācé, autour du fort S. Catherine, le Roy mesme se voulut trouuer en l'armée pour donner courage aux soldats: car il craignoit fort que ceux qui tenoyēt cette ville, ne la liuraisēt aux Anglois, qui auoyēt desja le Haure de Grace. Le Côte de Montgōmery y cōmādoit: & durāt ce siege le Roy de Nauarre, Lieutenāt general, donnāt vn soudain assaut à la ville, fut atteint d'vne balle en l'espaule, & fort blessé. En la place duquel quant au faict de la guerre, fut mis François de Lorraine Duc de Guise, & le gouuernemēt demeura seul entre les mains de la Royne Mere du Roy. Le Roy de Nauarre, qui ha monstré en sa vie & gestes, qu'il n'ha point degeneré de la valeur & magnanimité de ses ancestres mourut de sa blessure, quarāte iours apres qu'il fut frappé, laissant la Royne Ieanne d'Albret sa femme, mere de deux enfans, à

sçauoir Henry, Prince qui promettoit de
 foy de grandes choses qui luy ha succedé,
 & est maintenant ce grand Henry qua-
 triefme Roy de France, duquel la fortune
 & les gestes surpassent ceux de tous les
 Cefars, & madame Catherine sa sœur, au-
 iourd'huy la plus accomplie Princeffe qui
 soit sur la terre. L'an 1563. le dixneuiefme
 iour de Mars, la paix fut conclue & arre-
 stée en l'Isle aux bœufs, à Orlcans: le Ha-
 ure de Grace fut assiegé & reprins sur les
 Anglois. Peu de tēps apres, le Pape voyāt
 que la Royne de Nauarre Jeanne d'Al-
 bret, faisoit publique profession de la Re-
 ligion Protestante, fit publier vn monitoi-
 re cōtre elle à Rome, au mois de Septem-
 bre, de cette mesme année, par lequel, elle
 estoit citée à comparoir deuant le Consi-
 stoire des Cardinaux dedans six mois, &
 à faute de ce faire, déclarée heretique, &
 ses biens confisquez & abandonnés au
 premier qui les occuperoit. Le Roy de
 France s'opposa viuement à cette censure
 & confiscation, & en escriuit a tous les
 Princes & Potentats Chrestiens, pour s'y
 opposer comme luy, ce qu'ils firent, tel-
 lement qu'on se contenta d'attacher quel-
 ques censures contre cette Dame, par les

*Monitoire
 contre la
 Royne de
 Nauarre.*

carre

carrefours de Rome, sans les porter aux
terres de son obeissance. L'an mil cinq cēs
soixante six, y eut quelques troubles, au
pays de Bearn, pour la religion, ausquels, *Sageſſe de*
la Royne de Nauarre, qui s'y estoit retirée, *la Royne de*
des que le feu Roy son mary print le party *Nauarre.*
contraire aux Protestans, obuia sagement,
& appaisa les differents d'entre les Catho-
liques & Protestans, laissant les Catholi-
ques en liberté de l'ancienne religion, &
imposant silence aux Protestans: aussi sur-
uindrent quelques troubles & diuisions
au Comté de Foix, pour quelques querel-
les particulieres, entre aucuns Seigneurs
Catholiques & Protestans, ausquels le Sei-
gneur de Mōluc, depuis Mareſchal, par sa
sageſſe pourueut promptement, chastiant
les auteurs de ce trouble, qui eust peu ré-
plir de combustion le Languedoc & la
Guyenne. L'an mil cinq cens soixāte sept,
la Royne de Nauarre, apres l'escarmou-
che assez chaude, qui fut donnée le 25. iour
d'Octobre, entre Paris & S. Denis, où fu-
rent occis plusieurs vaillans hommes, tant
du party du Roy que de ses aduersaires,
voyant bien qu'il y auoit autres occasions
que celles de la religion, qui auoyent faict
prendre les armes, aux Seigneurs de la Li-

La Royne
& le Prin-
ce de Na-
uarre vont
à la Ro-
chelle.

gue, enuoya offrir à sa Majesté tous les moyens, pour le seruir en cette guerre des secōds troubles. En l'an mil cinq cens soixante huit, apres que le Prince de Condé eut passé la riuere de Loire, pres de Sancerre, pour tirer avec ses forces, vers le Poictou, où il fut ioindre la plus part de la Noblesse du haut Poictou, souz le ieune Verac, pendant que Soubize, l'Anguilier, saint Cyre, Puiaut, Cressonniet & plusieurs autres assembloyent le reste des bas Poicteuins, la Royne de Nauarre & le Prince son fils, avec leurs troupes s'acheminèrent au rendez vous, qui estoit à Nerac, ayans dessein d'aller à la Rochelle, où le Prince de Cōdé se retira le dix-neufiesme de Septēbre, pour y laisser les Dames, où elles seiournerent tout le cours de ces guerres. La Royne de Nauarre, auant que partir, sachant la difficulté du voyage, manda le plus de gens qu'elle peut pour la venir trouuer à Nerac, d'où elle partit le sixiesme de Septembre, & Tonnemaro Fonterailles, son Seneschal en Armagna & son frere Montamar luy menerēt quelques cheuaux & gens de pied, de là à Bergerac, où elle rencontra Pilles avec ses troupes de Perigord, Quercy & Auvergne, d'où s'acheminās à Mussidan, Brique

maut luy vint au deuant pour l'asseurer.
 Aubeterre & Barbezieux laissez à Ar-
 chiac, elle sceut que le Prince de Condé
 luy venoit au deuant vn peu retardé, pour-
 ce que ceux de Congnac firent les longs à
 serendre, & luy ouvrir les portes. Delà se
 retirerēt à la Rochelle, pour mettre ordre
 à leurs affaires, par vne commune & gene-
 rale deliberation. L'an 1569. fut donnée la *Mort du*
 bataille de Bassac & Iarnac, en laquelle fut *Prince de*
 tué le Prince de Condé, au grand regret *Condé.*
 de Monsieur, frere du Roy, lors Duc d'An-
 jou, & depuis la mort du Roy Charles son
 frere, Roy de France & de Polongne, en-
 cores qu'il fut chef de l'armée contraire à
 la Protestante. Le huietieme de Iuin 1569.
 le Comte de Mōtgommercy fut depesché *Le Comte*
 par les Princes Protestans, pour aller en *de Montgo-*
 Gascongne, à fin de commander à l'armée *mery depes-*
 des Vicomtes, qui ne vouloyēt recognoi- *ché pour al-*
 stre aucun d'eux pour superieur, & avec eux *ler en*
 assemblés toutes les forces de ce pays là, *Bearn.*
 pour rōpre les desseins du sieur de Terr-
 de, qui faisoit la guerre en Bearn, à la Roy-
 ne de Navarre. Print son chemin par Sol-
 liac, où il passa la Dordone, & le Lot
 souz Cadenat, d'où il se rendit à Mon-
 tauban, sans aucun empeschement.

Le Roy de France auoit enuoyé ce Ter-
ride gouuerneur de Quercy, en Bearn,
Foix & pays de Nauarrin, pour mettre
tous le pays de la Royne de Nauarre, en
l'obeissance du Roy, à fin que l'armée Pro-
testante desmembrée & affoiblie, par les
forces qu'ils pourroyent enuoyer contre
ce gouuerneur, fust plustost ruinée parvne
bataille, qu'on pourroit lors presenter, ou
du moins faire par ce moyen, quitter le
party Protestant à la Royne de Nauarre
& au Prince son fils, qui estoit le principal
appuy de ceux de la religion: & ainsi affoi-
blir leur armée par tant d'autres, qui s'en
pourroyent retirer, à son aduçu. Le Com-
te party avec amplex lettres de Lieutenant
general des Princes, & de la Royne de Na-
uarre, en tous ses pays, ne prend seulement
les forces des Vicomtes, mais apres auoit
faict apparoir de sa charge à tous ceux des
pays circonuoisins, qui tenoyent pour la
religion des Protestās, fit tant qu'il assem-
ble forme d'armée: Descendu à Castres
ceux de Montauban, saint Antonin, Gai-
lac, Rauastein, Castelnau-dary, Foix &
plusieurs autres le vont trouuer: le Vicōte
de Caumont, des premiers. Ce chef, le
huietieme de Septembre 1568. avec qua-

tre vingts soldats, auoit prins la ville de Masieres, au Comté de Foix, & l'auoit tenuë douze mois, si bien que luy semblant la longue suite du tēps, vne asscurée prescriptiō d'obeissance, sorty pour quelques affaires, les citoyens, qui ja mal contens de son gouuernement, auoyent gaigné le capitaine Maillet, & ses gens, luy ferment la porte à son retour: ce qui le fit retirer aux montagnes, avec douze cheuaux seulement, crainte des garnisons voisines: & de la commune Catholique. Le Comte le pria d'aller le trouuer, & il se ioignit avec Montaumar, lieutenant de la Roynie de Nauarre en Bearn, suiuis de cinquante ou soixante cheuaux qu'ils assemblerent, & autant de soldats de pied. Mais en chemin rencontrerent nombre de caualiers du Marechal d'Anuille, Negrepelisse & autres, qui (apres les auoir quelque temps escarmouchez, les chargerent en fin de telle force, qu'ils les desfirēt presque tous, butinerēt le bagage, fors quelque vingtaine, lesquels se retirerēt le long d'un bois, attendant secours, que les fuyars (auoir donné l'alarme à Puylorens, pres de là) amenerēt bien tost souz le Comte, lequel découert avec trois cens cheuaux, les fit

soudain retirer. Delà à quelques iours, avec quatre mille harquebusiers, & cinq cens cheuaux, que gens d'armes, que pisto- liers du pays en bonne conche & bien montés, en Iuillet 1569. s'acheminèrent au Comté de Foix, puis passerēt les montagnes vers Mauleon, d'où prenans la route de saint Gaudens, faisans diuers chemins pour l'incommodité des lieux, tra- uerserent la riuere, que les garnisons du pays, & mesmes de S. Gaudens entrepre- noient de defendre, & les acculer là, ce- pendant que les gouuerneurs viendroyēt en queue pour les rompre. Mais ne croyās pas que le Comte, avec peu de gens, fist de si longues & soudaines traittes, ne se dili- genterent, comme ils eussent faict: occa- sion, qu'ils se virent bien tost surprins par les coureurs, comme ils s'empeschoient à rompre les ponts, & ordōner de leurs de- fenses. Tout ce qui fut rencontré fut tué, aussi n'eurent secours de leur infanterie, qui estoit au bas, dedans vn taillis, ny de quelques cheuaux qui s'estendoyent sur la plaine, ne faisans, de crainte, que regar- der l'esbat. Cela passé, prindrent la route de Tarbes, d'où quelque nombre d'arque- busiers encouragez par les lettres & pro-

messes du sieur de Monluc, entreprindrēt de leur defendre & empescher le passage du Don, riuere qui descendant des montagnes passe à Tarbes, puis se va rendre à la Garande, & de là s'engoulfe avec trois autres riuieres, au dessus de Bayonne, pour se perdre en l'Ocean. Le sieur Côte de Montgommery aduerty de ce dessein, ne sceut trouuer moyen plus expediēt que de faire passer l'eau à sa cauallerie la premiere, & nombre d'harquebusiers en ordre de bataille, & ce avec la plus grande diligence qu'il peut. Puis les harquebusiers targuez de ces cuirasses, passerent aisément, voyās l'ennemy estonné de la resolution de ces caualliers, que la pluye des harquebusades n'empeschoit de gaigner tousiours pays. Presque la seule diligence & grande soudaineté du sieur de Montgommery luy asseura son voyage, car surprenant les garnisons par vne grande promptitude, & marcher continu, trōpant les troupes des Marschal d'Anuille, Monluc, les Bellegarde, pere & fils Scipion Vimereat, Negrepelisse, Gohas, & plusieurs autres (tirans suite de neuf cens cheuaux, & pres de quatre mille harquebusiers, qui ne marchoyent qu'à iournée de camp) fit

*Siege de la
ville de Na
uarrin, levé.*

*Terride as-
siégé en
Orthez.*

en telle sorte, qu'il paruint entier, iusques à vne iournée de la ville de Nauarrin, au commencement d'Aoust, que Terride, sainte Colombe, bon nombre de chevaliers de l'ordre, & autres chefs, tenoyent assiegée y auoit plus de deux mois, avec trois canons & plusieurs moyennes, tirées de Dax & de Bayonne, & pour auoir gagné tout le pays, auoyent si serré, & tant battu le capitaine Bassillon, & ceux qui luy assistoyent à la defense de la ville, que si le Comte eust retardé quelque peu davantage, Terride eust triomphé de son entreprise, lequel neâtmoins n'eut plustost sceu les nouuelles d'une si inespérée venue, qu'il leue le siege & descampe, pour se ietter en Orthez, ne s'estimant assez fort, pour tenir la campagne, contre le Comte, au moyen que la plus-part de son armée s'estoit ja desbandée çà & là, pour trouuer ses commoditez, comme d'ordinaire, on voit en tout siege, qui prend vn plus long trait qu'on ne s'est proposé. Le Comte le suit, & pour ne luy donner loisir de respirer, ne asseurer ses gés, l'assiege, & met sa cauallerie en bataille, au veu des retirez, cependant que l'infanterie s'esforçoit de gagner les fauxbourgs : ce qu'elle fit en

fin, encores que les assiegez fussent aussi
brauement fortis, que brusquement recu-
lez ceux qui se presenterent, iusques à les
enfoncez dedans la caualerie, laquelle se
mettât de la partie, pour soustenir les har-
quebusiers, fist gagner la ville aux assiegez
lesquels neantmoins soustindrent la furie
de l'assaut general, mais en fin furent con-
traints ployer à la force du Comte, aucuns
des gens duquel, le feu gagnant des-ja par
la ville, donnerēt iusques en la basse court
du chasteau, où les plus signalez s'estoyent
sauuez, resolus d'y tenir iusques au dernier
poinct, descouurans d'un œil pitoyable,
les feuz qui ja couroyent par toute la vil-
le. Le Comte fit soudain placer & braquer
le canon qu'il trouua dans la ville, contre
cette place de refuge, & entretenāt la sco-
peterie de ses fantacins, cōtraignit le sieur
de Terride, auquel estoit allé son frere Se-
rignac, faire entendre les forces & resolu-
tion du Comte, qu'il se rendit vie sauue,
avec sa suite, en laquelle S. Colombe, &
six cheualliers de l'ordre, avec plusieurs
braues chefs furent nommés. Entre autres
poincts de la composition, Terride deuoit
estre prisonnier, iusques à ce que le frere
du sieur Comte de Montgomery, prins

à la Motte, pres de Lusignen en Poictou, & le Baron de Poilly fussent rendus, avec quelques centaines d'escuz qu'il deuoit payer, outre-ce. Caumôt fut député pour conduire le reste, le baston blanc en main. Sainte Colombe, le Barca de Pordiac, les capitaines Golias, Fauas & quelques autres, furent tuez en ce siege. Ces places prinſes, & le defastre publié par le pays, intimidâ en telle sorte le reste des villes & places fortes, que se retirans les gouuerneurs le plus couuert qu'ils peurent, tout le Royaume & autres pays, se rangerent bien tost au party du Comte, fort la ville de Pau, principale, & pour estre Parlemēt plus autorisée de tout ce qui reste de Navarre, dedans laquelle Peré auoit ja par les habitans, esté esleu gouuerneur, souz l'autorité du Roy, & s'y portoit en sorte, qu'ayant chassé les ministres, faict pendre vn President & Conseiller de la ville, & asseuroit le sieur de Monluc de la maintenir contre tous. Mais luy ayant la victoire du Comte ja frappé les oreilles, le Comte ne luy eut plustost deſesché vn trompette, pour la luy rendre, que par vne soudaine retraite, il ne la laissast à sa mercy. Peu apres le capitaine Bassillon allât trou-

*La ville de
Pau laissée à
la mercy du
Comte.*

ver le Comte de Montgōmery à Navar-
rin fut attaqué, pourſuiuy & tué par Mar-
chastel & la Motte Puiors. Cepēdant Mō-
luc avec les troupes que la Valette auoit,
affiegea & ferra de ſi pres le mont de Mar-
ſan, où pluſieurs Proteſtans s'eſtoient re-
tirés, qu'apres quelques affauts & pluſieurs
autres entreprinſes, il ſ'en fit maître, non
ſans grande effuſion de ſang, meſmement
des affiegés, à peu deſquels il pardōna. Le
Comte de Montgommery, routes choſes
ordonnées à ſon plaifir, Serignac laiſſe
gouverneur dedās Nauarrin, & autres, en
chacune place d'importance, ſe met en
campagne, ayant ſceu l'acheminemēt des
Princes en Gaſcongne, pour ſe ioindre à
eux, qu'il ſcauoit ſ'auancer vers le Port S.
Marie ſur la garōne, ſeiourna quelque tēps
à Nerac, ville des appartenāces de la Roy-
ne de Navarre, non ſans eſtre de iour à au-
tre, à la guerre, contre les garniſons voifi-
nes. Pres de là, trois ſemaines deuant qu'ar-
riuer, le capitaine Arnay forty avec cent
cinquāte ſoldats, pour ſurprēdre quelques
vns de ſes troupes, fut chargé par la cōpa-
gnie de Caumont & autres, tellemēt qu'il
fut renuerſé mort à terre, cōme il demeu-
roit le dernier, pour retirer & fauoriſer

la retraite à vn des siens, qui tombé de dessus vn pont en l'eau, ne pouuoit aisément remonter. De Nerac, le Comte se rendit au Port S. Marie, sans aucun danger, non pas ceux qu'il auoit laissez en queue, pour se faciliter le passage. Car ayāt laissé le Vicomte de Caumont & Bilque, avec ses harquebusiers à Contagnat, & le Vicomte Paulin à Plume, cestuy cy eut tāt d'algarades, & trauerfes par les Catholiques, qu'ils furent contraints se retirer à Caumont, ayans ioincts leurs troupes, ils se rendirent en fin au Port sainte Marie. En l'an 1570. apres la paix, faicte & publiée l'onzieme iour du moy d'Aoust, les Catholiques & Protestans reprindrēt le chemin de leurs maisons, esquelles plusieurs n'auoyent esté veuz depuis trois ans. Des chefs Protestans, aucū s'uiuirent les Princes, qui se retirerent à la Rochelle, avec la Roynie de Nauarre, comme l'Admiral, le Comte Ludouic de Nansau, Taligny, la Nouë & plusieurs autres, pour y attendre, en plus de seureté, disoyēt-ils, l'execution & aduancement de la paix. Cependant le Roy espousa Isabeau d'Autriche, seconde fille de l'Empereur Maximilian : dont on prenoit grand augure d'vne paix durable.

Sur la fin de cette année 1570. le Roy estât à Villiers Coterets, sur les plaintes des Catholiques se tourmentans de l'incommodité qu'ils receuoient par l'edict de paix les articles qu'ils proposerent, déclara sa volonté, en éclaircissant aucuns, qui eussent peu sembler douteux. Les Protestans au semblable se disans fort incommodez en autres choses, firent entendre leurs doléances à la Roynie de Navarre & Admiral qui se tenoyent à la Rochelle, lesquels en advertirent leurs deputés qu'ils auoyent enuoyés en Cour, pour recevoir leurs plaintes & remonstrances, à fin de les faire cognoistre au Roy qui leur promettoit y pourueoir, selon le besoin. Les deputez estoient Briquemaut le pere, Telligny, la Nouë & Cauagnes: mais Telligny alloit & venoit portant la volonté des vns aux autres. Sur ces plaintes, le Roy enuoya à la Rochelle le Mareschal de Cossé, & Proutiere maistre des Requestes avec luy, pour asseurer la Roynie de Navarre, Admiral & autres, de sa bonne volonté, à l'entretènement de son Edict, conferer avec eux, éclaircir & resoudre aucunes ambiguïtés, qui sembloient occasionner les mecontentemens reciproques des deux parties;

ſpecialement pour mettre la Royné de Nauarre, en propos de mariage de ſon fils, Prince de Bearn, avec madame Marguerite ſa ſœur, & l'Admiral en aſſurance de ſa bonne volonté enuers luy, & ſur-ce leur perſuader de venir en Cour, avec aſſurance qu'ils y ſeroient tous les biens recueillis. L'an mil cinq cens ſeptante & vn: l'hyuer paſſé, les députés des Princes, firent vn voyage à la Rochelle, pour aſſurer la Royné de Nauarre, les Princes & ceux qui leur aſſiſtoient, de la merueilleuſe volonté que le Roy ſembloit auoir à maintenir ſon Edict de paix, & nommément le bon vouloir qu'il leur portoit en particulier: qu'il ſe monſtroit fort affectionné à deux choſes deſquelles on luy auoit parlé dès le commencement du traité de paix: au mariage d'entre le Prince de Bearn, & madame ſa ſœur: puis à l'entreprinſe du pays bas. Mais pource que choſe de telle conſéquence ne ſe pouuoit pas aduācer que par l'entreueuë & conference de ceux, qui plus auoyēt de pouuoir à l'exécution d'icelles, ſa Majellé deſiroit fort qu'ils allaſſent le trouuer à Blois, où ils ſeroient les biē receuz, comme ils auoyent charge de leur dire & les en aſſurer. Cepēdant le Marſ-

chal de Biron fut enuoyé par le Roy à la Rochelle, induire & persuader tât la Royne de Nauarre, que les Princes & l'Admiral de s'acheminer en Cour, pour l'aduan-
cement de chose si grande, les assurant en telle sorte du vouloir de sa Majesté, qu'il n'y falloit rien plus. Cependant que se faisoient les entrées du Roy & de la Royne à Paris, la Royne de Nauarre demeura encores à la Rochelle, avec le prince de Bearn son fils, lequel accompagné de son cousin, le Prince de Condé, estoit retourné de la reueuë de ses pays, où il estoit allé, tant pour cognoistre & contenter ses subiects, que pour voir les places, mesmes les frontieres de son Royaume, & y ordōner selon le besoin. La Royne de Nauarre fut tant sollicitée d'aller en Cour, qu'en fin accompagnée du Cōte Ludouic, & plusieurs autres, elle fut trouuer le Roy à Blois, duquel & de la Royne mere notāmēt, elle fut amiablement receüe, cōme de tous les autres: Brief, le mariage de son fils, apres plusieurs menées & difficultés faiçtes, sur quelques points, fut en fin cōclud & arresté: & en outre, q̄ les promesses des espoux à venir, seroyēt receuës par le Cardinal de Bourbō, hors les ceremonies de l'Eglise Romaine.

Quant au lieu nuptial, la Royne de Navarre ne vouloit accorder, que ce fust à Paris, mais le Roy insista au contraire, remonstrât estre pour le mieux que les nopces se fissent à Paris : à quoy en fin la Royne de Navarre se laissa condescendre : promit qu'elle feroit venir son fils au tost qu'il auroit dressé son train : Et en telle resolution, elle partit de Blois, pour aller à Paris, lieu destiné à l'accomplissement du surplus. Peu apres l'heritier de Navarre vint trouver le Roy à Blois, suivi de plusieurs Seigneurs & Gentils-hommes de la Religion. En ce mesme temps se preparoit le mariage d'entre Henry de Bourbon, fils aîné du feu Prince de Conde, avec Marie de Cleves, la plus ieune des filles de Nevers, surnommée Marquise d'Isles, riche & de mesme religiõ queluy. Le Pape Pie, tenāt lors le siege, avoit ja enuoyé le Cardinal Salviati, vers le Roy de France, pour le détourner du mariage de sa sœur avec le Prince de Bearn, & voyant le Roy résolu au paracheuement du mariage, il mādā à son nepveu le Cardinal Alexandrin (qu'il avoit enuoyé en Espagne vers le Roy Philippe, pour les affaires de la Ligue contre le Turc) de tourner en France le plus tost

plustost qu'il pourroit : & le chargea de persuader le Roy d'entrer en la saincte ligue, contre le Turc ennemy de la Religio Chrestienne: de donner sa sœur en mariage, au Roy de Portugal, plustost qu'à celuy de Nauarre, & s'esslongner des propos, & conuersations des heretiques de son Royaume. Allant en Cour, avec cette charge, il trouua la Royne de Nauarre qui sy acheminoit aussi : dequoy aduerty, crainte qu'elle ne le deuâceast, prēd la poste, & donnant à trauers sa compagnie, sans la saluer, ny aucun de la troupe, pique pour auoir le deuant. Le Cardinal receu & traité magnifiquement, eut pour response à ces trois points, qu'il estoit prest d'entrer en ligue, avec les Princes, ne se voulant rendre indigne du nom de Roy tres-Chrestien: mais que sans rien precipiter il falloit attendre & en laisser meurir les occasions: Pour le faict du mariage, il ne pouoit, son honneur sauf, reuoquer la promesse qu'il en auoit faicte au Prince de Bearn, mais souhaitoit que le Pape s'assurast que tout cela se dresseoit à bonne fin, voire à l'honneur & aduancement de la foy Catholique : qu'il prioit bien fort le Pape Pie, de le tenir pour trescher, & pre-

*Mort de la
Royne de
Navarre.*

mier fils de l'Eglise Catholique. Ce faict il tira vn anneau de son doigt, & le presenta au Cardinal, pour marque & assurance qu'il ne departira iamais de l'obeissance du S. Siege Apostolique: & neantmoins le Cardinal refusa cet anneau, disant que la parole du Roy iurée suffit, le suppliant persister constamment en ce saint aduis. Sur la fin du moys d'Auril audiect an, le Pape Pie cinquiesme estant decedé, le Roy de France enuoya le Cardinal de Lorraine, pour assister à l'election d'un nouveau Pape, & obtenir dispense pour le mariage de sa sœur. La Royne de Navarre venue à Paris le quinziesme de May, pour y recouurer les plus beaux ioyaux, desquels elle vouloit parer la solennité nuptiale de son fils, n'y eut long temps seiourné, qu'elle se sentit surprinse d'un mal violent, qui luy fit rendre l'esprit le dixiesme iour de Iuin, au cinquiesme de sa maladie, aagée lors seulement de quarante trois à quarante quatre ans. Le Roy, la Royne Mere, son Excellence, le Duc d'Alençon & leurs maisons en chargerent le dueil par expres commandement: puis le corps embaumé & mis en cercueil, fut honnorablement conduit au lieu où Henry son pere auoit

esté inhumé. Elle institua son fils vnique, son heritier vniuersel, selon le contract de mariage d'entre son pere & d'elle : & les conuentions accordées entre le Roy & elle, sur le mariage de luy son fils & de madame Marguerite : voulant que sa sœur print sa legitime, selon le droit escrit, & les coustumes des lieux où les biens serōt assis, avec toutes ses bagues & ioyaux, tant siens qu'à elle engagez, ou l'argent qui reuiendra du des-engagement, pourueu que le grand colier, & le grand rubis balay engagés en Angleterre, demeurent hereditaires à la maison de Nauarre : luy donne aussi par preciput sa bordure d'esmerauldes, voulant que son fils paye les gages de trois années, compris cette cy, à tous ses officiers & seruiteurs : priant son cousin le Cardinal de Bourbō & le Comte de Coligny Admiral d'estre executeurs de cette siene derniere volonté. On ne laissa point de continuer le propos encommancé du mariage du Prince de Bearn, aujourd'huy Roy de Nauarre, souuerain de Bearn, Duc de Vendosme, d'Albret, de Beaumôt, &c. pour se preparer d'vne & d'autre part à l'accomplissement d'iceluy : lequel fut si diligemment sollicité, que le tout fut ar-

*Derniere
volonté de
la Royne de
Nauarre.*

resté, puis executé : les articles du mariage auoyent esté concluds & signés l'onzième Aupil, mil cinq cens soixante & douze par Charles, Catherine & Ieanne, contre-signés par Fizes, Brulard & Pinard.

De Henry de Bourbon III. de ce nom 38. Roy de Nauarre: & quatriesme de ce nom Roy de France à present regnant.

LA Royne de Nauarre decedée, son fils Henry de Bourbõ Prince de Bearn, succeda à ses Estats, & tiltre de Roy de Nauarre, duquel bien tost apres les fiançailles & espoufailles furent faictes en vn mefme iour, deuant la principale entrée de la grande Eglise de Paris, portant le nom de nostre Dame, par les mains du Cardinal de Bourbon, fur vn efchafaut haut efleué, en veuë de tous ceux qui y voulurent affifter. Le Roy de Nauarre & Madame Marguerite estans espoufez le dix-huictiesme iour d'Aouft audict an 1572, chacun se retira où la conscience luy commandoit, l'espoux en l'Euesché, & l'espouse à la Messe, qui fut dicté par le Cardinal de Bourbon. Et les deuotions paracheuées tous se trouuerent au

festin magnifique, suiuy par trois iours entiers d'infinies sortes de ieux, pompes & magnificences, telles qu'on peut penser estre ordinaires à tels Princes & Seigneurs qu'estoyent ceux, qui honoroyēt de leur presence, cette solemnité Royale. Le vendredy 22. iour dudit moys, l'Admiral fut blessé, & depuis aduindrent toutes les tragedies que l'on sçait du iour de saint Barthelemy, portées par les histoires de nostre temps. Et fut depuis defendu l'exercice de ceux de la Religion. Le Prince de Condé & le Roy de Nauarre, furent mandés par le Roy, le neufiesme de Septembre, & les somma de se reduire à la Religion Catholique, dont ayans faict quelque refus, en fin neantmoins furent persuadez en sorte, que peu à peu, ils condescendirent à la volonté du Roy, & à leur exemple plusieurs Seigneurs, gentilshommes & autres se conuertirent. La Royne Mere donna pour Chancelier au Roy de Nauarre, Henry de Mesme dict de Malafise, & le pourueut d'autres gentilshômes & officiers, comme elle fit aussi au Prince de Condé, à fin de mieux les entretenir en l'obeissance de sa Majesté. Sur-ce le Roy de Nauarre & Prince de Condé escriuirēt

humblement au Pape, qui les receut paternellement au giron de l'Eglise, & leur fit vne gracieuse responce. Le Roy de Nauarre, à l'exemple du Roy de France, dressa vne defense en forme d'Edict, à tous ses subiects de Bearn, de ne faire ny souffrir aucun exercice de la Religion Protestante, ains aller tous à la Messe, & viure en la Religion Catholique, Apostolique & Romaine. Du vivant de la Roynne sa mere, les Estats de Bearn s'estoyent assemblés tant pour le faict de la Religion, qu'autres affaires du pays, & par le commandement de la Roynne, la Religion Romaine estoit bannie de ces quartiers. Pour la remettre & porter cet Edict, avec lettres particulieres, à aucuns des principaux, Grammont y fut enuoyé: auquel neantmoins les subiects du Roy de Nauarre firent responce, que leur Prince estoit captif, & qu'ils ne se soucioient pas de cela. La pluspart de ceux de la Religion restez des nopces, se retirerent és lieux mieux asseurés que là où ils estoyent. Entre autres les deux fils aînez de l'Admiral, avec leur sœur veufue de Taligny, & le Comte de la Val aîné des enfans de Dandelot allerent à Geneue, puis à Berne & Basle seiourner entre les Suiss-

les. Enuiron ce temps, la Royne Mere enuoya en Polongne, pour y faire eslire Monsieur, Roy du pays, apres la mort de Sigismond, qui aduint le septiesme Iuillet 1572. & à cet effect y fut enuoyé Monluc Euesque de Valence, qui partit de Paris le premier Aoust 1572. entendit en chemin l'eschech des matines Parisiennes, ce qui le fit hastier pour preuenir les mauuaises nouvelles qui en pourroyent incontinct estre espandues par l'Allemagne: & le 15. d'Octobre ensuiuant il paruint à la frontiere de Polongne. Pendant cette negociation, le Roy de France, apres cette iournée de saint Barthelemy, taschoit d'auoir ses villes & notamment la Rochelle, aux habitans de laquelle il escriuit, fit escrire le sieur de Biron, qu'il en auoit faict & créé Capitaine & Gouverneur, & du pays d'Onis, qui enuoya à mesme fin, aux Rochelois, lettres du Roy de Nauarre: mais ces moyens là ne peurent ranger & vaincre les Rochelois: ce qui fit tenter au Roy autres moyens par la negociation de la Nouë; ce qui seruit aussi peu: tant que le Roy y fit acheminer ledict sieur de Biron, avec vne armée, pour assieger la ville. Quelque temps apres Monsieur

Duc d'Anjou, frere de sa Majesté, party de Paris le dixiesme de Ianuier, 1573. avec le Duc d'Alençon son frere, le Roy de Navarre, Prince de Condé, les Ducs de Montpensier & Prince Dauphin son fils, de Longueville, de Bouillon, Guise, d'Aumale, & le Comte de Rochefoucault, Chauigny, Monluc, la Valette, Mauleurier, Paumy, Puygaillard, Clermont, du Gas, Cossens & plusieurs autres, arriua en son armée le mercredy deuxiesme de Feurier, ensuiuant. Cependant que la Rochelle estoit fort pressée de tous costés, l'Euesque de Valence fit si bien sa charge, que Monsieur Duc d'Anjou, fut esleu Roy de Polongne, le neufiesme iour de May 1573. & fut bié tost apres la paix arrestée & publiée en la Rochelle, le dixiesme Iuillet audict an, & n'estoit Sancerre que l'on tenoit assiegée, en tres-grande necessité, comprinse en la paix. Quelque temps apres, Monsieur partit de France, pour s'en aller en son Royaume de Polongne, & soudain apres fourd vn bruit, de quelque entreprinse contre sa Majesté, dont l'on accusoit Monsieur Duc d'Alençon & le Roy de Navarre, lesquels s'en purgerent & iustifierent pour leurs declarations, qui en furent publiées à la

Mort du
Roy Char-
les 9.

fin de Mars, l'an 1574. En laquelle année le Roy de France, Charles 9. le vingt-quatriesme an de son aage, moins vingt huit jours, & le quatorziesme de son regne, mourut le trentiesme de May, & furent faites les obseques telles que meritoit vn si grand Roy: auquel succeda Henry troiesme Roy de Polongne, dernier Roy de la maison de Valois. Le lendemain de la mort du Roy Charles, la Royne Mere, faite Regēte du Royaume, escriuit aux gouverneurs des Prouinces, comme firēt aussi le Duc d'Alençon & le Roy de Navarre, à fin d'autoriser la Regence de la Royne Mere. Cependant le Prince de Condé qui estoit retiré de la Cour en son gouuernement de Picardie, estoit passé outre, & negotioit en Allemagne. Le Roy de Polongne retourne en Frāce, sur le vingt-vniesme de Septembre 1575. qui se fit bien tost apres, sacrer à Reims, par le Cardinal de Lorraine, & print à femme, Loyse de Lorraine, fille de Nicolas Comte de Vaudemont. Enuiron la my-Septembre 1575. Monseigneur frere du Roy s'absenta de la Cour, estant lors à Paris. Et s'estant retiré à Dreux, place de son apanage, fut incontinent suiuy d'vn bon nombre de gentils-

*Monsieur,
& le Roy
de Nauarre
se retirerent
de la Cour,*

hommes, & de personnages signalez d'y
ne & d'autre Religion. Puis le Roy de Na-
uarre en fit autant, & se retira à Saumur,
où quelques forces le furent trouuer. Ce
qui estonna la Cour, & donna dequoy
penſer à toutes ſortes de perſonnes. En ce
temps furent deliurez de priſon les Ma-
reſchaux de Montmorency & de Coſſé:
ſit tant la Royne Mere, qu'il y eut trefu
generale pour ſix mois, entre le Roy
Monsieur, pour aduiſer à vne bonne paix
qui fut quelques mois apres accordée pa-
le Roy & Monsieur, & publiée par tout le
Royaume, en l'an 1576. Dauantage le Ro-
pour gratifier ſon frere, luy accorda pa
accroiffement les Duchez d'Anjou, Tou-
raine & Berry, outre celle d'Alençon & le
Comté de Mayne, avec autres membre
du domaine de la Couronne de France. E-
fut cette paix faiſte en May audiſt an,
publié le 14. dudiſt mois, le Roy ſeant a
Parlement de Paris. Le Roy de Nauarre,
au moyen de la paix, ſe preparoit en tout
aſſeurance, de reuoir ſes Royaume, & pais:
mais le Prince de Condé ne pouuoit ren-
trer en ſon gouuernement à cauſe de la de-
ſiâce des Picards. Le Roy de Nauarre tint
vne route du tout oppoſite à celle que te-

noit Monsieur, ayant vn grand desir de tirer en ses pays. Et à cet effect, il enuoya le sieur de Feruaques en Cour pour amener madame la Princesse sa sœur, attendant la venuë, de laquelle il fit assez long seiour à Niort, & és enuirõs. Cepẽdant il alla pour visiter la Rochelle cõme ville de son gouvernement. Mais les Rochelois n'eurẽt pas peu de disputes entre eux, cõme ils se gouverneroyẽt en cet affaire, & en quelle qualitẽ, & avec quelle condition, ils luy permettroient l'entrẽe. Cependant se continuoient les allẽes & venues d'vne part & d'autre, pour raison de cette entrẽe, qui ne plaisoyent gueres au Vicomte de Rohan, pour lors seiournant à la Rochelle, lequel ne se pouuoit contenter que l'on traittast de cette facon, celuy qui de luy mesmes & de sa seule authoritẽ, y deuoit entrer à toutes heures & sans contredit. Ceux de la Rochelle, insistans sur leurs priuileges, accorderent en fin sa venuë, pourueu qu'il signat & promit garder leursdits priuileges, & reiglast son train au nombre de 50. cheuaux, aussi qu'aucũs specifiẽs n'entrafsẽt en leur ville. Ce qu'ayãt promis & accordẽ, il s'achemina de Surgeres avec la Princesse sa sœur, & entra en la Rochelle le Ieudy 28.

*Le Roy de
Navarre
veut entrer
en la Ro-
chelle.*

iour de Iuin: où il fut receu, estans allés les principaux de la ville au deuant de luy, & quelques compagnies d'harquebusiers: les Rochelois cependant tous en armes & de rang par les ruës esquelles il deuoit passer. Outre-ce il y auoit en la place du chasteau, deux compagnies en bataille, avec l'artillerie, dont il fut salué, & d'vne escopeterie d'harquebusiers assez longue. Entre tous, Feruaques trouua fort estrange que lesdits Rochelois luy eussent refusé l'entrée de la ville, le priuant de la compagnie du Prince, pour le seruice & aduantage duquel, il estoit disgracié du Roy de Frãce son souverain Seigneur. Le Roy de Nauarre ayât seiourné à la rochelle iusques au quatriesme Iuliet, il s'embarqua pour aller en Broüage où de long temps Mirambeau l'attendoit, avec deliberatiõ de le receuoir, le plus honorablemēt qu'il luy feroit possible. Deux iours apres, il print son chemin à Xainctes, & de là à Perigueux, duquel ledict fleur Roy vouloit pouruoir quelque autre. Ce que Langoirât portoit assés impatiemment, marry que quelque autre luy fust preferé, veü qu'il auoit prins ladicte ville. Cepẽdant le Prince de Cõdẽ, apres auoir choisy la Guyenne pour la re-

traite, attendant que le Roy l'eust satisfait sur les plaintes que Montagu Lieutenant de sa compagnie d'hommes d'armes, & surintendant en sa maison, luy estoit allé faire de sa part, qui estoit principalement pour le faire jouyr de son gouuernement, arriua à Perigueux, où il trouua le Roy de Nauarre. Et incontinent apres, prenant congé de luy pour quelque temps, il fut en Brouage, le premier iour d'Aoust. Et le lendemain arriué par mer à la Rochelle, fut receu, en grande ioye des habitans : la compagnie colonnelle desquels le fut recevoir à sa descente, y estant allé deuant, le Maire & principaux de la ville, en grande compagnie. Et y ayant demeuré iusques au 13. Aoust, il partit pour tirer à S. Iean d'Angely & à Cognac, où il fut conduict par ceux de la ville. De là il s'achemina à Nerac, où il trouua le Roy de Nauarre. Au commencement du mois de Septembre ensuiuant, ledict sieur Roy estant en Quercy, se dispoisoit d'aller en Foix. Cependant il auoit enuoyé Duras en Cour pour ses affaires plus particulieres, où il fut bien receu & caressé du Roy. La Nouë aussi faisoit beaucoup d'allées & venuës, tant à la Cour que vers Monsieur, & de-

puis aussi vers le Roy de Nauarre. Sur ce Feruaques qui iusques à lors auoit paisiblement gouverné ledict sieur Roy, se retira en sa maison, non sans mescontentement de voir quelque diminution de la grâde faueur qu'il s'estoit plus longuement promise du Roy. Au moys d'Octobre ensuiuant, fut mise en auant vne entreueüe, de la Roynne Mere, du Roy de Nauarre, & du Prince de Condé : & pour y paruenir, la Roynne se deuoit en brief trouuer à Cognac, avec la Roynne de Nauarre sa fille. Ledict sieur Roy pour cet effect, s'estoit approché de Bourdeaux, ville capitale de son gouuernement. Mais ceux de la ville se sentans à Candales, mirent bones gardes aux portes, qu'ils tenoyent la pluspart du tēps fermées, vne seule ouuerte: enuoyerēt toutesfoiſ par deuers luy, pour s'excuser du refus qu'ils estoient cōtraints luy faire, alleguans beaucoup de raisons longues à reciter: pour lesquelles neātmoins, il ne peu se cōtenir de proferer beaucoup de paroles aigres : & rebroussa chemin iusques à Agen, où il trouua bon de s'arrester, attendant nouuelles du Roy, vers lequel il auoit enuoyé, pour luy faire raison de ce q̄ dessus. Au moys de Nouembre ensuiuant, l.

Le Roy de
Nauarre
refusé de
l'entrée de
Bourdeaux.

Royne Mere fit tant, que Monsieur se re-
concilia au Roy son frere, & le fit venir en
Cour, contre l'aduis de Buffi & autres qui

*Reconcilia-
tion de Mon-
sieur avec le
Roy.*

luy estoient parauant les plus fauorits. En
Nouembre se firent les preparatifs aux
Estats generaux tenus à Blois: où le deux-
iesme de Decembre le Roy fit sa harāgue,
& puis apres son Chancelier, Birague. Des
le commencement de Ianuier 1577. arri-
uerent aux Estats les Deputez du Roy de
Navarre & Prince de Condé, presque à
mesmes fins, qui dresserent vne Requeste
bien ample au Roy, par laquelle ils le sup-
plioient n'adherer aux opinions & con-
clusions prinſes par le Clergé, la Noblesse
& autres deputés du tiers Estat: contre les-
quels, en adherant aux protestations, & re-
monstrances faiçtes par les Eglises Prote-
stantes, ils protestoyent de nullité de ce
qui estoit faiçt ou à faire par lesdits Estats.
Enuiron ce temps, aucuns enuoyez de la
part du Parlement & des Iurats & autres
Officiers de Bourdeaux arriuerent en
Cour, avec vn paquet s'adressant au
Roy, pour affaires d'importances: Les
lettres auoyent esté dictées escrites en
ce Parlement, presens lesdicts Iurats
& Magistrats: l'vne s'adressoit au

Roy, l'autre à la Royne Mere, & la troisième à Monsieur. Ils enuoyerēt aussi mesme moyen vne depesche, que le Roy de Nauarre leur auoit enuoyée, en date du 15. de Nouembre de l'année passée, laquelle il se mécontentoit fort de la témérité du Parlement, & des Jurats qui uoyent mis des garnisons en ladicte ville sans expres commandement du Roy, & de luy son Lieutenant general en Guyenne: que telles façons de faire estoient meschantes à tous, & mesmement à gens de leur robbe: qu'ils ne deuoyēt ignorer qu'il estoit pres de leur ville, & que s'il eust cognéu que lesdictes garnisons eussent esté nécessaires pour la garde, il y eust pourueu, selon que sa charge le porte. Et d'autant qu'il desiroit le soulagement des subiects du Roy, il les prioit luy mander le temps, auquel ils le pourroyent receuoir en la qualité que dessus, & donner tel ordre à ce qui estoit requis de sa part, que chacun fust content. Ceux du Parlement luy firent vne assez aigre responce: qu'ils ont peu & deu mettre garnisons en leur ville, sans l'aduertir: que la nécessité du temps les y auoit contraints, & qu'ils ne faisoient rien sans bon aduis & sans le
com

commandement du Marquis de Villars
Admiral de France , & gouuerneur de
Guyenne, en l'absence dudiect sieur Roy
de Nauarre. En fin ils adioustoyēt que les
Bourdellois n'estoyent encores disposez à
le receuoir comme il appartenoit: & qu'ils
feroyent toute diligence pour mettre les
affaires en bon ordre, auant son arriuée.

Sur la fin de Septembre de ladiete année *Edict de*
1577. y eut vn Edict du Roy, sur la paci- *paix 1577.*
fication des troubles de son Royaume, qui
fut publié par tout. Et apres la publication
de cette paix, le Prince de Condé se retira
en la Rochelle. Et pour faciliter l'execu-
tion de cet Edict, & esclaircir & resouldre
les difficultés qui sont interuenues, & qui
pourroyent encores retarder le bien & ef-
fect d'iceluy, furent arrestés certains arti-
cles, en la Conference de Nerac entre la
Royne mere & le Roy de Nauarre, assistés
d'autres Seigneurs & gentilshommes de-
putés, lesquels articles sont portés en l'hi-
stoire de nostre temps. Durant cette ne-
gociation, le Roy institua l'ordre des Che-
ualiers du saint Esprit, & en celebra les
ceremonies en l'Eglise des Augustins à
Paris, la veille du premier iour de l'ā 1579.
Les susdictes ceremonies sont descrites en

*La Fere
surprinse.*

l'histoire susmentionnée. En l'an 1580. le Prince de Condé suiuy de la Nouë & autres de la Religion surprint la Fere en Picardie, & y laissa forte garnison, pendant qu'il alloit querir du secours en Allemagne. Le Roy de France ne la pouuât auoir par voye de composition, fut contraint y enuoyer le Marechal de Matignon avec armée, qui l'assiegea & print, nō sans meurtre d'vne part & d'autre, pour la force de la place. Incontinent la paix fut faicte à Bergerac, & publiée en Parlement à Paris le 26. Ianuier l'an 1581. apres vne signalée victoire du Marechal de Biron contre ceux de la Religion. Les articles de cette Paix furent proposés en l'assemblée & Conference faicte au lieu de Flex, pres la ville de sainte Foy, entre Monsieur frere du Roy & le Roy de Nauarre le 26. iour de Nouëbre, 1580. Par l'Edict de l'an 1577. le Roy de France auoit accordé aux Princes Protestans, comme au precedēt, quelques villes, pour certain temps, lesquelles ils garderoient cōme en ostage de la promesse. Et en l'an 1582. le Roy les fit sommer de rendre ces places, pour-ce que le temps prefix à les tenir par eux s'en alloit expirer, Mais le Roy de Nauarre ayāt faict

entendre que la paix auoit esté tant de fois interrompue par surprinses & guerres ouvertes, & que le terme octroyé auoit esté trop court, pour l'exécution de l'Edict & amortissement des guerres, le Roy de France leur accorda prolongation, pour autres années. Ce qui donna occasion à aucuns, mais à grãd tort, de dire & publier par tout que le Roy de France fauorisoit les heretiques, & qu'il vouloit introduire l'heresie. Le Roy de Navarre voyant quelques remuemens, & que la partie se dressoit contre luy, quelque semblant qu'on fist, il comancea à penser à luy, & enuoya le sieur de Pardaillan, vers la Royné d'Angleterre, le Roy de Dannemarck les Electeurs & Princes de l'Empire, pour renouveler amitié avec eux, & les supplier le secourir au besoin. Cependant, à propos pour ceux qui voulurent remuer, & au grand malheur de la France, le Duc d'Anjou frere du Roy de France, mourut à Chasteau-thierry. Depuis cette mort, on commença à hayr le Roy de France, & fut la premiere pointe de l'amour d'iceluy, rebouchée au cœur de la pluspart de ses subiets, qui ne parloyēt de luy qu'avec toutes sortes de mespris : tous les iours se femoyent

*Mort du
Duc d'An-
jou frere du
Roy de France.*

Mespris du
Roy de France
ce & de
Pologne
iij.

des pasquils indiscrets & effrontés, des libelles sans nom, on parloit du Roy comme d'un Sardanapale, d'un faineant, d'un Prince enyvré de prodigalités & dissolutions: on le releguoit comme Chilperic en un monastere, & pour la troisieme couronne que sa devise, *Manet Ultima caelo*, luy donnoit au ciel, on luy en promettoit vne avec le rasoir en un cloistre. Ainsi & par telles menées, souz le nom de Ligue, commencerent les troubles qui ont duré & durent encores à present. Le Pape Gregoire treziesme, ne voulut approuver ces souleuemens des François, mais son successeur fit bien autrement, car il fulmina contre le Roy de Nauarre & Prince de Condé. Alors se fit vne assemblée à Montauban, où le Roy de Nauarre & les deputez de la Religion, adviserent aux expediens de se maintenir si on leur couroit sus, & le Roy de France enuoya le Duc d'Esperno, pour conferer particulierement & amplement avec le Roy de Nauarre, sur l'occurrence des affaires de l'Estat. Cela fut occasion à aucuns de s'esleuer, & d'enuoyer commissiõ par tout souz le nom du Roy, lequel les desaduoua & deffendit toute leuées de gens de guerre, sur la fin de Mars

1585. Alors le Manifeste fut publié, liurec
contenāt les motifs du Cardinal de Bour-
bon, des Princes, Seigneurs, villes & cō-
munautés Catholiques, de s'opposer aux
heretiques, alleguans plusieurs raisons
pour se iustifier: Incontinent y eut vne ar-
mée en campagne de la part de ceux qui
s'eleuerent, souz les raisons par eux mises
en auant, & pensoit on du commencement
que ce fust seulement pour abaisser ceux
de la Religion, iusques à ce que le Roy de
France, ayant eu occasion de croire autre
chose, escriuit au Roy de Navarre qu'il ne
s'esmeut point de ces souleuemens, ains
se continst en patience, à fin que le peuple
peust iuger lequel des deux partis auoit le
tort, pour luy donner le blasme: ce qu'il ha
cogneu trop tard, & à ses despens: le pria
des'asseurer tousiours de sa bōne affectiō,
promettant qu'il n'oublieroit iamais son
interest, non plus que le sien propre: qu'il
cognoissoit bien que les nouueaux esse-
ués, quelque pretexte qu'ils prinsrent, en-
treprenoyent sur sa personne & couron-
ne, & que plusieurs bons François & de
bon cœur, allechez & pipez de tels spe-
cieux pretextes, ne pensans rien moins
qu'à ce qui est depuis suruenu, suiuroyent

ce party, & qu'il falloit vser d'une grande prudence, pour leur faire voir qu'ils courroyent à leur ruine & à celle de l'Estat. Le Roy de France, au lieu de prendre les armes, fit vne declaration tost apres pour desarmer ses ennemis. Le Roy de Navarre qui pour obeyr au Roy n'estoit encores armé & laissoit passer toutes les occasions qui l'en pouuoient excuser, fit vne assez ample declaration à Bergerac le 10. iour de Iuin 1585. La Royne Mere donna à entendre au Roy son fils les grandes forces & intelligences des nouueaux esleuez, lesquels le Roy rechercha d'appoinctement, & leur donna plus que parauanture ils n'esperoyent. Tout incontinent la paix se fit au moys de Iuillet 1585. & par son Edict defendit l'exercice de la Religion surnommée nouuelle, reuoque tous autres Edicts qui le permettoient, commande aux Ministres de vider de ses terres, & à tous les subiects de faire profession de la Religion Romaine dedans six moys, ou sortir du Royaume: casse les chambres my-parties & tri-parties des Parlemēts, ordonne que les villes baillées en garde à ceux de la Religion seront rendues: loue non seulement, mais approuue la leuée d'armes des nou-

neaux esleuez, nommez Princes, & reco-
gnoist que le tout s'est faict & passé pour
son service. Cest Edict authorisoit les pre-
textes de ceux de la Ligue, mais les arti-
cles secrets arrestés à Nemours estoient
du tout à leur aduantage, & n'y auoit rien
qui ne leur pleust, excepté la condition de
se departir dès le iour mesme, de la Ligue:
qui fut le poinct de la iustification du Roy
puis apres, & le piege où les nouveaux es-
leuez furēt attrappez. Ceneantmoins biē
qu'ils ne demandassent en la Conference
de Nemours autres seuretés que celles qui
dependoyent de la bonne grace du Roy,
si voulurent ils auoir en leur puissance, les
villes de Châlons, Thoul, Verdun, Sainct
Disier, Reims, Soissons, le Chasteau de
Dijon, la Ville & Chasteau de Beaulne,
Ruë en Picardie, Dinan & Conq en Bre-
tagne: le Roy paya deux cens mille escuz
pour les gens de guerre estrangers venuz
à leur secours, les deschargea de cent six
mil trois cens quarante escuz, prins aux
receptes generales, leur fournit cent mille
escuz pour bastir vne citadelle à Verdun,
outre l'entretienement des gardes d'har-
quebusiers à cheual, qu'il octroya à tous
les Princes de la Ligue. Eux qui auoyent

tant protesté qu'ils estoient armés pour le soulagement du peuple, en trois mois que leur guerre dura, le travaillerent de plus d'extorsions qu'il n'en eust souffert en trois ans par les charges ordinaires. Il fut question de corner aux oreilles du Roy, la guerre contre les Princes de son sang, le Roy de Navarre & le Prince de Condé, qui assemblés à Cadejoux avec le Marechal d'Anville, lors Duc de Montmorency firent dresser vne declaration en date du 10. iour d'Aoust 1585. contre ceux qui leur en vouloyét. L'onzième iour dudict mois, le Roy appella au Louvre les Principaux de Paris, y assistant le Cardinal de Guise, & leur fit quelques demandes & au Clergé mesmes, pour entretenir la guerre, contre le Roy de Navarre: ce qui n'eut point d'effect: Quinze iours après, les sieurs de Lenoncourt, de Poigny & le President Brulart, arriuerét de la part du Roy de France, vers le Roy de Navarre à Nerac, pour conferer avec luy des moyens de paix, en le sollicitant de se ranger à l'Eglise Catholique, oster l'exercice de la Religion, laissé pour six mois, par l'Edict de juillet, & de rendre les villes. D'autre costé, par l'entreprinse du Roy d'Espagne, le

Pape Sixte declara le Roy de Navarre & le Prince de Condé excommuniés. On publia au nō de ces Princes plusieurs liures, où les nullités de cette bulle estoient amplement traitées. La Cour de parlement de Paris tant notable, deputa quelques uns de son corps, qui firent, à l'occasion de cette nouvelle pratique d'Espagne, vne serieuse remonstrance au Roy sur ces bulles, & autres choses concernans l'Estat. Ce neantmoins, le Roy sans auoir esgard à telles remonstrances, & à l'instance d'aucuns, fit vne declaration, le 7. iour d'Octobre 1585. sur son Edict de Iuillet precedēt, abregeant le terme de six mois donnés à ceux de la Religion, & se declarant formellement contre eux. La Cour de Parlement verifia & emologua cet Edict, huit iours apres. D'autre part les Princes de la Religion, Roy de Navarre & Prince de Condé, formerent opposition contre les bulles d'excommunication du Pape Sixte cinquiesme, appellāt d'icelles comme d'abus, & fut telle opposition affichée à Rome, le 6. iour de Nouembre. Cependant on proceddoit en France, fort & ferme contre eux & leurs adherans, & le Clergé fit vne remonstrance par l'Euesque de S.

Brieu, assisté du Cardinal de Bourbon & de plusieurs députés, tendans à faire exterminer ceux de la Religion, fauoriser les Ecclesiastiques, & faire obseruer le Cōcile de Trente. Le Roy de Nauarre au contraire, publia vne declaration, le dernier iour du mesme mois de Nouembre, contre ce qui auoit esté faict contre luy, par la receptiō des Edicts de Iuillet des six mois, & d'Octobre de l'abreuiation de quinzaine, & ce à fin de recouurer argent sur ses ennemys, pour estre employé aux frais de la guerre. Sur la fin de l'année, le Roy de France publia vn reiglement à obseruer, par les Baillifs, Seneschaux ou leurs Lieutenans, pour l'execution de l'Edict de Iuillet. Le premier iour de Ianuier 1586. le Roy de Nauarre enuoya de Montauban (où il pourueut à ses affaires) lettres au Clergé, à la Noblesse, au tiers Estat & à ceux de Paris, esquelles il se plaignoit de la rupture du dernier Edict de pacification, remonstroit les maux qui en aduiendroyent, les exhortoit d'y penser à bon escient, & de ne seruir point d'instrumens la Ligue, pour ruiner le Roy & le Royaume: adioustant qu'es'ils estoient si mal aduisez, luy & les siens s'ayderoyent de tous

moyens legitimes, pour resister à la violence des ennemys. Cependant le Duc de Mayēne estoit chef de la guerre en Guyēne, lequel fut pressé par le Roy de France d'aller attaquer le Roy de Nauarre & le Prince de Condé ce qu'il ne fit : alla vers Perigueux & Limoges, où il print Thuleville foible, & vn viel chasteau nommé Montignac : de là se transporta à Beaulieu bicoque, d'où les habitans se racheterent : l'armée ayant faict peu en Perigord, s'achemina vers la Garonne. Le Roy de Nauarre qui estoit loin de Perigord entendant que le Duc de Mayenne prenoit cette route, alla à Nerac, puis passa à Caumont en plein iour, & ne fut attaqué du Duc, lequel apres quelques autres exploits se retira dedans Bordeaux pour se rafraischir. Le Roy de Nauarre cepēdant delibera de passer en Poictou, pour s'opposer au Marechal de Biron sage & vaillant chef de guerre & qui auoit vne armée toute fraische, de laquelle il vint à bout. Enuiron le premier de Iuin mil cinq cens oētante six, le Roy de Nauarre venu de Gascongne : ayant trauersé le Perigord, l'Angoulmois & le Poictou iusques vers Loudū, s'achemina vers la Rochelle, puis à Marans, où

il donna ordre, autant qu'il luy fut possible, ayant logé sa gendarmerie es'environz. Sur la fin de Juillet, Marans fut assiegé par le Marechal de Biron, puis deliuré du siege, par accord fait entre les defendans & assiegez. Deux ans apres Lauerdin s'empara de Marans isle bourg & chasteau, y laissa des Cluseaux pour gouverneur, lequel y ayant seiourné deux moys fut assailly par le Roy de Nauarre, à la mercy duquel il se rendit, & fut enuoyé prisonnier en la Rochelle: depuis Marans demoura en paix. Le seziésme iour de Mars de l'année 1586. le Prince de Condé espousa dedans Taillebourg, la sœur du sieur de la Trimouille, de laquelle il ha eu vn fils: & ne vescu gueres en ce second mariage. Au moys de Feurier, de ladicte année, le sieur de Matignon, ayāt assiegé Castels, le Roy de Nauarre accompagné de deux à trois cens maistres, & environ dix huit cens harquebusiers en fit leuer le siege, & voulut disner dedās ce chasteau, pour tesmoignage qu'il en auoit chassé son ennemy. Puis il fit vn voyage en Bearn, pour y donner ordre aux affaires: ce qu'ayant expédié, il tira vers Nerac, & passant à Eauseville sienne, entendit que le duc de Maye-

ne s'acheminoit pour l'empescher de passer la Garōne. Ce nonobstant il fut à Nérac pour asseurer la place: au sortir, il print son chemin droit à Barbasté, & le cōtinua comme pour aller à Castel-jaloux. Estant à deux lieuës pres au milieu des bandes, il leur fit entendre son intention & avec 20. gentilshommes bien montés, & dix soldats de ses gardes, marcha vers Caumont, où il disna tout à son aise, nonobstant que le Duc de Mayēne ne fut qu'à deux lieuës de son passage, & apres disner passa la riviere sans empeschemēt ny perte d'aucun des siens. Se retrouvant le lendemain à sainte Foy avec tous ses gens, il y seiourna trois semaines entieres, allant de fois à autre, à la chasse, sans que le Duc tint conted'aller le saluer avec son armée, encorés qu'il ne fust qu'à trois lieuës loin de luy. Pourtant le Roy de Navarre tira en Poitou, où ayant faict teste au Mareschal de Biron, il s'achemina vers la Rochelle, visita l'armée de mer, fit reserrer par vne palissade ceux de Brouage. Sur la fin de l'année 1586. surseance d'armes avoit esté accordée de part & d'autre par l'entremise de la Roynne Mere & du Roy de Navarre: mais elle fut sans effect par l'artifice de ceux qui

estoyent ligués, qui ne taschoyent qu'à amuser le Roy de Nauarre, pour le surprendre. Au commencement de l'an 1587. il alla à Maràs bien accompagné, pour traiter de rechef avec la Royne, laquelle voyant son gendre venu en intention de la tancer, non pas de la croire, recula, & finalement quitta le Poictou pour reuenir en Cour, ayant entendu le vent de quelques nouveaux desseins de la Ligue. Quant au Roy de Nauarre il se mit à faire la guerre, avec quelques canons fournis par ceux de la Rochelle, & print plusieurs places. Pendant ces exploits, le Duc de Joyeuse s'auancea pour passer la riuere de Loire avec vne puissante armée. Le Roy de Nauarre ayant desfaict quelques compagnies de celles qui entroyent vn peu trop auant en pays, fit retirer parties de ses troupes vers saint Maixant, le reste en Xaintonge, pour s'en seruir selon les occasions, à la ruine de cette armée nouuelle. Mais les regiments de Charbonniere & de Bory estans demeurez dedans le Bourg de la Mothe saint Eloy, souz promesse de faueur par ceux du chasteau, furent chargez & desfaicts par l'armée de Joyeuse, à cause que ceux du chasteau les trahirent: Sou-

dain Loyeuse assiegea S. Maixant, qui se rendit par composition, comme fit Charente : assaillit la compagnie de Pueilhes en vn village, à l'improueu, & eut du deshonneur à faire tuer les soldats de sang froid, comme l'on tient aussi qu'il fit faire à ceux de Bory & Charbonniere, contre sa foy. Ce qui fut vn article qui ne seruit gueres au Duc, à Coutras. Il s'en alla au commencement d'Aoust à Paris, & laissa Lauerdin pour commâder en l'armée, sur laquelle le Roy de Nauarre fit de grands exploits de guerres. Le vingtiesme iour d'Octobre ensuiuant, le Duc estant retourné en diligence en son armée, & pensant tenir, le Roy de Nauarre à sa deuotion entre deux riuieres, luy donna la bataille, où le Duc fut vaincu & tué, & la Ligue y fit vne perte insigne. Apres ceste victoire, le Roy de Nauarre fit son voyage de Gascongne, accompagné du Comte de Soissons: le Prince de Cōdé se retira en Xaintonge, avec vne partie des compagnies: ayans conclud de se r'allier tous ensemble, pour aller au deuant de leurs Reistres, lesquels quelque temps apres, furent rompuz & dissippez sur la fin de l'an 1587. par la prudence du Roy de France,

Mort du
Prince de
Condé.

& par la vigilance du Duc de Guyse. Il en demeura beaucoup à Auneau, la pluspart moururent par les chemins: il en fut deuallisé & tué grand nombre en Sauoye, & ceux qui arriuerent en lieu de seureté & chez eux presque tous ne la firent gueres longue. Le Duc de Bouillon aagé de 25. ans mourut à Geneue, Cleruan vers Bresse & autres ailleurs: le Baron de Donau chef des Reistres eschappa: vne troupe de Reistres ayant prins le chemin de la Franche-Comté, fut poursuiuie du Duc de Guyse & Marquis de Pont, iusques en la Côte de Mōtbeliard, là où leurs troupes entrerēt, & firent plusieurs actes d'hostilité. Es années 86. 87. & 88. y eut quelques efforts de la Ligue contre le Duc de Bouillon, & en la derniere de tres-grands cōtre la maison de Bourbon & tous ceux de la Religion, & voyant que le Roy de France ne branloit assez fort à son gré, recommancea la guerre à Sedan. Et durant telles tēpestes, le cinquiesme iour de Mars de ladicte année 88. Henry de Bourbon Prince de Condé, fort amateur du bien de la France, tres-bellicueux Prince, mourut ayant esté empoisonné par quelques siens domestiques, de poison si violente, que

que dedans trente heures il fut suffoqué:
Lvn des empoisonneurs empongné fut
tiré à quatre cheuaux, en la grande place
de S. Iean d'Angely. Enuiron ce temps, le
Duc de Guyse s'achemina à Paris, laissant
le siege de Iamets, & incontinent s'ensuit
la iournée des barricades du 12. de May au-
dict an 88. & la fuitte du Roy de France de
Paris à Chartres: qui fut le cōmancement
des maux extremes que nous auons veu
en ce Royaume. Cepédant le Duc de Sa-
uoye, ayant intelligence avec le Roy d'Es-
paign son beau-pere, faisoit de grands ef-
forts contre la France, estans avec quel-
ques autres de la Ligue, leurs desseins par-
ticuliers, de ruiner le Roy de France &
desmembrer son Estat & sa force. Le Duc
de Sauoye, avec armes descouuertes fit la
premiere charge contre la couronne de
France, s'estimant d'aussi bonne maison
que les autres pour auoir sa part de la pie-
ce, pour esslargir ses limites. Et comme l'on
estoit apres l'assemblée des estats de Blois,
& que le Duc de Mayenne estoit à Lyon,
celuy de Sauoye avec son armée entra de
force au Marquisat de Salusses, où il auoit
acheté des hommes qui l'attendoient,
surprint la ville & forteresse de Carmai-

*Iournée des
Barricades.*

gnole, magasin d'armes & de munitions de guerres, pour la France delà les monts: se rendit maistre de Ravel & des autres places: ce qui esbranla aucunement ceux de Dauphiné, qui cogneurent bien que c'estoit vne guerre contre l'Estat de France, voyant le Duc de Sauoye ne passer outre, & le Duc de Mayène tousiours à Lyō. Le Duc de Sauoye pallie ses actions de belles excuses, sur tout enuers le Pape, & par le moyen des Agens d'Espagne, faict trouuer ce faict supportable pour le tēps, se souciant peu des menaces du Roy de France, lequel il estimoit autant que perdu, on tant empesché, qu'en fin encore seroit-il tout aise de venir à capitulation crainte d'auoir pis, sur tout à cause du Roy d'Espagne, par l'adueu & argent duquel faisoit vn tel remuemēt, & qui par les bra de tāt de Princes, vouloit affoiblir la France, ayant de tout temps peur qu'elle lui saute au collet, si elle estoit paisible en l'maison. Le seiziesme du mois d'Octobr audiēt an 1588. le Roy fit l'ouuerture par l'harangue, des Estats tenus & assemblez Blois, où l'ediēt d'vnion du mois de Iuliet fut confirmé. Et depuis l'on tient qu'ayant le Roy de France decouuert quel

ques menées & pratiques en ladicte assemblée des Estats, qu'il auoit pour suspectes, le Duc de Guyse, par son commandement fut tué le 23. iour de Decembre audict an : & quelques heures apres fut aussi depesché le Cardinal de Guyse, que le Roy de France ne redoutoit pas moins qu'il faisoit son frere, & qui auoit le cœur haut, l'esprit prompt & n'embrassant rien de petit, s'assurât que s'il demeueroit apres son frere, il luy remueroit bien du mesnage. Ce neantmoins le Roy en fut blasmé de plusieurs, mesmes qui n'estoyent Ligueurs, à cause du rang que le Cardinal tenoit en l'Eglise. Cependant le Roy de Navarre, entendant que l'armée de la Ligue, dont le Duc de Neuers estoit general, s'acheminoit en Poictou, s'en alla à la Rochelle pour aduiser aux affaires plus vrigens. Là il entendit au moys d'Aoust que le Duc de Mercueur l'un des chefs de la Ligue & gouuerneur de Bretagne estoit party pour assieger Montagu gardé par Colombieres, & le Duc aduertty que le Roy de Navarre estoit à la Rochelle, s'imagina que c'estoit pour faire leuer le siege: pourtant se resolut-il de faire retraite à Nantes, où il se trouua deuant que le Roy

*Mort du
Duc de
Guyse &
de son frere:*

*Exploits du
Roy de Na-
uarre; pour
sa desesue.*

de Nauarre fust approché de Montagu, laissant pour arriere-garde le regiment du sieur de Gerlay, qui demoura, biẽ que beliqueux & fort expert au faict de la guerre, engagé, & fut son regimẽt desfaict par le Roy, & fut la charge faicte à deux lieues pres de Nantes, où ledict sieur se sauua. Le lendemain comme il pretendoit assieger Clisson, ville & chasteau, il fut contraint tirer vers Angoulesme, pour desgager d'entre les mains de la Ligue, le Duc d'Espernon, auquel on tua quelques domestiques & officiers, & luy mesmes, par l'espace de deux iours & demy, fut assiegé & assailly de pres, au chasteau, en tres-grand danger de sa personne: mais ayant esté secouru à poinct, cette mutinerie s'appaisa, quelques vns des plus mauuais ayãs payé pour tout le reste. Le Roy de Nauarre retournant en Poictou, pensoit aux moyës de s'emparer de Niort, ville qui le dedaignoit & brauoit plus que nulle autre: ce neantmoins il poursuivit son entreprinse de Beauvoir sur mer. Passant pres de Nantes il vid le sieur de la Trimouille qui auoit desfaict vne compagnie de gens de pied, & prins leur chef dedans le bourg de Donay. Le quatriesme iour d'Octobre, Beauvoir fut

inuesty & malgré la difficulté des approches, & du chemin pour l'artillerie, & du temps, prins par composition trois semaines après. Le lendemain de la reddition de Beauvoir, les habitans de l'Isle de Boming, qui auoyent promis ne receuoir personne, donnerent entrée en leur ville, à deux des plus braues compagnies qui fussent au regiment de saint Pol : Mais ces soldats n'y furent si tost entrez, que le cœur leur faillit, de sorte qu'ils enuoyerent vn tambour au Roy de Navarre, le suppliant leur donner vn sauf-conduit, pour se retirer en lieu de seureté. Il les tenoit enclos, & pouuoit sans perte, à cause des passages qu'il tenoit, ou les faire tailler en pieces, ou à tout le moins deualiser. Neantmoins de son plein gré, il leur donna à tous la vie & les armes, avec vn passeport pour leur seure retraite: il pardonna aussi aux insulaires qui luy auoyent fausse la foy: douceur qui brisa tellemēt la durté de leur farouche naturel, que depuis ils sont demeurez tres-affectiōnés à son seruice. Ayāt apres, laissé le regiment de Preau, pour renfort dedans Montagu, & distribué des garnisons à Mauleon, la Ganache, Talemond, Fontenay & autres places, il s'achemina

Bonté &
clemence du
Roy de Na-
uarre.

vers la Rochelle, pour se trouuer en l'assemblée generale de ceux de la Religion, là conuoquée pour aduiser à ce qui estoit expedient, pour le temps. Cependant l'armée de la Ligue estoit au bas Poictou & pays voisins : & enuiron la fin de Decembre, de l'an 1588. la ville de Niort fut prise pour le Roy de Nauarre, & le sieur de saint Golais fut estably gouuerneur de la ville, & du pays, & Parabiere du chasteau. Au commencement de l'année suiuiante 1589. la Ganache fut rendue, à cause de la maladie du Roy de Nauarre, laquelle fut grande, & l'armée qui estoit en Poictou bien tost apres se fondit, chacū s'escartant çà & là. En ce mesme temps mourut Catherine de Medicis, Royne Mere du Roy de France, & le dix-neufiesme Ianuier fut publiée à Paris & ailleurs vne declaration des Princes Catholiques, villes & communautez vnies avec les trois Estats du Royaume, pour la conseruation de la Religion Catholique, Apostolique Romaine, & la liberté du peuple, auquel on promettoit descharge, d'un quart des tailles & cruës: il cognoist maintenant comme il a esté deschargé. De cette heure là se firent de grāds efforts de la Ligue contre le Roy

Mort de
Catherine
de Medicis
Royne Mere.

de France, qui employa la plume & l'ancre, pour ramener les desuoyés au chemin, deuant que les poursuiure par la force. Le Roy de Nauarre, cependant, reuenu en conualescence d'une fascheuse maladie, peu apres la mort de la Royne Mere, delibera pour faire preuue de sa fidelité enuers le Roy, de trauerser tât qu'il pourroit, les desseins des Ligueurs, les empeschant de rien empieter és lieux qu'il auoit moyen d'asseurer, tant pour le seruice du Roy, que pour le soulagement de ceux de son party. En ce temps la ville & chasteau d'Angers furent assurez au Roy : mais le Duc de Mercœur assubiectit presque toute la Bretagne au party de la Ligue, à laquelle Rouen, Tholouse & Lyon s'estoyēt ja rangez : & Bordeaux faillit d'en estre : mais le Marechal de Matignon fut fidelle au Roy, & les Ligueurs & Iesuites furent contraincts en desloger. En ces esmotions, l'on mit en termes vne trefue entre le Roy de France & celuy de Nauarre, à fin de pouuoir plus commodement faire teste à la Ligue, qui croissoit de iour en iour. Le Roy de France se voulant seruir des forces du Roy de Nauarre, sans lesquelles lors il ne pouuoit gueres, luy offrit & bail-

*Exploits du
Roy de Na-
uarre, qui
s'approche du
Roy de
France.*

*Entreprinse
sur la per-
sonne du
Roy de
France.*

la Saumur pour seureté de son passage sur Loire: au moyen dequoy, en attédant l'arrest de la trefue, le Roy de Nauarre fit passer toutes ses troupes delà Loire, pour ioindre les forces de Normãdie, du Mayne & d'autres lieux qui l'attendoient, en intention de s'approcher des Ligueurs. Le 18. d'Auril ensuiuant il leur denoncea la guerre, s'ils differoyent de poser les armes. Ce nonobstant il y eut vne entreprinse de la Ligue, sur la personne du Roy de France, que le Duc de Mayenne, avec son armée voulut surprédre à Tours, où il estoit assez mal accompagné & ses ennemys auoyent intelligence, en Cour & dedans la ville. Le Roy de Nauarre aduerty que cette armée estoit à Vandosme & és environs, delibera de les aller voir, & pour cet effect, partit le 28. iour d'Auril, à la pointe du iour, avec quatre cens maistres & mille harquebusiers à cheual, & fit dix grandes lieües d'vne traite. Estant en chemin pour aller plus auant, il receut nouuelles que le Roy de France l'appelloit à son secours: pourtant il tourna bride en toute diligence & vint loger à Maillé sur Loyre, deux lieües pres de Tours, apres auoir demeuré 24. heures à cheual. Le Roy de France

promptement aduertý de cette arriuée en fut tref-aíse, car on craignoit fort que le Duc de Mayenne ayât prins S. Ouyn pres Amboise, qu'il battoit de deux coulcuries, se vint loger aux faulx-bourgs de Tours: ce qu'auenāt, le Roy estoit en danger tout euident de sa personne. Le Dimanche dernier iour du moys, les deux Roys s'entreurent en l'allée du Parc du Plessis lez Tours, avec mutuelle demonstration de tout contentement. Le Roy de Nauarre monstra ce iour là vne fraîche resolution, qui luy estoit ordinaire: car le Mareschal d'Aumont l'estant allé trouuer & exhorter de la part du Roy de France de vouloir venir vers luy, tout incontínēt il delibera de s'y acheminer. Apres que les deux Roys, eurent l'espace de quelques iours, communiqué ensemble, celui de Nauarre repassa Loyre & se logea au fauxbourg de S. Saphorin, puis la trefue accordée entre eux, fut publiée par la ville de Tours apres auoir esté emologuée en la Cour de Parlement. Ceux de la Ligue estimans que le Roy de Nauarre fust fort esloigné, enuiron le huietiésme de May, donnerent iusques aux faulx-bourgs de Tours, attirés par leurs intelligences, & at-

taquerent l'escarmouche: leur arriuée soudaine donna l'alarme en la ville, où il y eut du trouble au commencement, & en diligence l'on enuoya vers le Roy de Nauarre, qui estoit vn peu eslongné, pour le hastier. En l'escarmouche firent fort bien les Regimens des sieurs de Gersay & de Rubempré, qui combattirent fort long temps, avec leurs vaillans Colonels, desquels le sieur de Gersay se retirant, par le commandement du Roy, qui plusieurs fois auoit enuoyé luy dire qu'il ne se perdît, fut tué d'un coup d'harquebusade, & fort regretté du Roy, pour sa grande valeur. Cependant dedans & autour des villes se faisoient infinies courses, pillages, captures, saccagemens: Plusieurs Royaux furent assassinez çà & là. Partout la licence estoit extreme, & la rage contre le nom du Roy, se monstroît du tout desesperée: Il n'estoit plus question d'une esmotion en quelque petite estendue de pays, mais on voyoit le feu de cette reuolte auoir enuahy les quatre coins & le milieu de la France, si furieusement que c'est horreur de s'en souuenir. Le Roy de France auoit des le commencement d'Auril, enuoyé des forces çà & là,

& quelques villes non eslongnées de Paris estoient encores à son commandement, Senlis qui estoit de la Ligue, s'estoit reduite de bonne heure, à son devoir, par l'entremise de quelques notables bourgeois : & ce fut depuis (pour estre à vne petite journée de Paris, vers la Picardie) vne espine qui poignit les Ligueurs bien rudement. Le Duc de Montpensier estant avec forces pour le Roy en Normandie, assisté des sieurs de Halot, Creuecœur, Baqueuille & Larchan desfit premierement la garnison de Falaize, print trois Capitaines, tailla en pieces la pluspart de leurs gens, & escarta le reste. Puis il assiegea Falaize, & laissa le siege pour aller au deuant du Comte de Brissac qui venoit au secours des assiegez, avec beaucoup de forces qu'il desfit, & fut contraint le Comte se retirer avec sa cauallerie. Le dix-huictiesme iour de May, le sieur de Chastillon desfit Saneuze & autres Ligueurs en la Beausse. Au mesme temps, la ville de Senlis assiegée par vne armée de Parisiens, souz la conduite du Duc d'Aumale, ayant esté furieusement batue, soustint & repoussa

*Ligueurs
desfaits en
Normandie
par le Duc
de Mont-
pensier.*

*Saneuze
desfait en
Beausse par
Chastillon.*

vn rude assaut : & comme les assiegez estoient sollicités de capituler, secours leur vint, amené par le Duc de Longueuille, suiuy des sieurs de Humieres, Boniuet, la Nouë & autres: dont s'ensuiuit bataille, en laquelle les assiegeans furent desfaicts, environ quinze cens tués sur le champ, en fuite & à la poursuite, tant par les victorieux que par les payfans : la ligue y perdit aussi l'artillerie & tout le bagage de l'armée. Depuis le Duc de Mayenne essaya d'auoir par intelligence cette place qui luy importoit beaucoup, & à la faueur de quelques vns de la ville, y fit entrer douze ou treize soldats bië résolus, pour à point nommé égorger vn corps de garde la nuit, & fauoriser en endroit propre vne escalade, les troupes approcherent fort pres, & y en eut qui vindrēt iusques au fossé : mais le corps de garde ayant lors esté renouvelé, & prenant garde de pres à soy, ceux qui estoient dedans n'oserent se mōstrer: Vn de dehors s'estāt hazardé d'approcher eut la cuisse rompue d'vne mousquetade: l'alarme donné, les assaillans se retirerent: Ce blessé prins, descouurit l'entreprinse: ceux qui entreprenoyent au dedans furēt prins & executés par iustice, & Senlis de-

puis, a tousiours perseueré en l'obeissance du Roy: lequel encouragé par tant d'heureux commancements delibera de s'auancer: tellement que depuis le commencement de Iuin iusques à my-Iuillet, la guerre commancea à s'eschauffer: & l'intention principale du Roy estoit de matter ceux de Paris, s'assurant qu'après auoir dompté la ville de Paris, toutes les autres feroient ioug incontinent, & retrouueroit ce qui estoit merueilleusement esgaré pour luy, c'est à sçauoir l'amour & l'obeissance de ses subiects, lesquels de leur part, le redoutant autant qu'ils le hayssoyent, pratiquoyent aussi de tous costez pour maintenir leur Ligue & continuer en leurs souleuemēts. Cette rancune implacable contre luy, faisoit qu'es principales villes, sur tout dedans Paris, l'on ne parloit de ce Prince que comme du plus execrable Tyrann qui eust iamais esté au mōde. Les prescheurs encourageoyent tous en general, & chacun en particulier, de luy courir sus, le tuer à quelque prix que ce fust, promettans aux tyrannicides vne place par dessus les Anges en Paradis. Outre plus l'ō poursuioit chaudement & par diuers artifices vn moyne, duquel nous parlerons tātost,

Le Roy de France s'ap-
proche de
Paris avec
vne puis-
sante ar-
mée.

Exploits du
Roy au des-
avantage
de la Ligue.

pour faire vn signalé seruice à la Ligue. Ainsi donc le Roy s'estant approché de Paris, se rendit pres de la ville, où le Duc de Mayenne estoit reuenu bien viste des enuiron de Tours, pour s'opposer au Duc de Longueuille : & ses soldats commencerent lors de viure à discretion dedans la ville: ce que les Parisiens goustoyent assez impatientement, mais les petis n'osoyent se plaindre, & les grands faisoÿēt bonne mine en mauuais ieu. Le Roy print incontinent Estampes. Cependant le Duc de Longueuille ayant ioinct les troupes de Champagne & recueilly és enuiron de Chastillon sur Seine, les Suisses & Lanquenets que conduisoit le sieur de Sancy, fit de tout vn corps d'armée d'environ vingt mille hōmes : puis alla passer à Poissy la riuere de Seine, & se rendit aupres du Roy, lequel battoit Pontoise, dont les assiegez se rendirent le lendemain vingt-cinquieme iour de Iuillet, à composition, d'vne grande somme de deniers, & deliurance des plus seditieux, pour leur faire receuoir punition exemplaire. Puis le Roy alla suiuy du Roy de Nauarre, donner la bien venue à l'armée des Suisses, rangée en bataille, & voulut passer par tous

les escadrons, avec tant de demonstration de contentement, de resjouyffance & de carresse aux chefs, que tous aussi luy firent paroistre la grande affection qu'ils auoyēt de luy faire seruire. Ayant toutes ses forces ensemble qui faisoient vn corps de quarante cinq mille hommes, il s'achemina promptement vers Paris, & à coups de canon, se rendit maistre du Pont saint Clou. Quelque temps auparauant vn ieune moyne Iacobin, nommé frere Iacques Clement, natif (à ce que l'on dit) d'un village appelé Sorbonne aupres de Sens, homme confit en debauches, ayant passé par les mains de quelques confesseurs & communiqué avec son Prieur nommé Bourgouin, religieux scelerat, (qui depuis conuaincu fut executé en la ville de Tours) & avec certains Iesuistes & autres, auoit esté, pour quelque promptitude remarquée en luy, trouué tout propre à faire vn grand coup. Ils le catechiserent à leur mode, & luy promirent qu'aussi tost qu'il seroit party pour tuer le Roy, l'on mettroit en prison tous les Politiques & tous ceux qui tenoyēt le party du Roy, qu'ils nommoient, le tyran, en la ville,

à fin qu'ayant fait le coup, la prison de tant d'hommes, l'empeschast d'estre tué ou executé, & que par ce moyen il seroit sauué & eschapperoit, souz la menace de faire mourir tous ceux qui seroyent mis prisonniers dedans la ville, si on luy faisoit aucun desplaisir : que faisant ce coup il seroit riche à iamais, & pourroit chāger son froc en vn rocquet d'Euesque, ou chapeau de Cardinal, ioinct que quād en tout euenement, il en perdrait la vie temporelle, qui n'estoit rien, & ce qui n'aduiendroit pas toutesfois, pour les raisons susdictes, il se deuroit estimer bien-heureux, & qu'il se deuoit asseurer d'vne place en Paradis par dessus tous autres. Ce moyne abreuvé de sa fureur, & de tant d'allechemens, de caresses, promesses & protestations de felicité temporelle & eternelle, se resoult & promet de tuer le Roy : le peuple qui ne pensoit point & ne scauoit rien de si cruelles menées, parloit de se rendre, & auoit beaucoup rabatu de sa cholere. Lors les plus zelez Sorbonistes & Iesuistes precherent és principales Eglises & parroisses, que l'on eust encores patience sept ou huit iours, & que l'on verroit quelque grande chose, qui mettroit l'vniō à son aise.

aise. Les prescheurs de Roüen. d'Orleans
& d'Amiens, le prescherēt en mesme tēps
& en mesmes termes. Le Moyne ayant
donné ordre à son project, sort de Paris &
s'achemine à S. Cloud: Aussi tost qu'il fut
party, l'õ fit mettre en prison plus de deux
cens des principaux citoyens & autres
gēs riches, que l'on sçauoit auoir des amis
& du credit, avec ceux du party du Roy,
pour gage, & à fin de sauuer le moyne, si
apres auoir attenté ou executé, il estoit ar-
resté. Le Moyne ainsi pratiqué de longue
main, choisit l'opportunité de se presenter
à sa Majesté, & le premier d'Aoust, s'estant
adressé à Monsieur de la Guesle Procu-
reur general de la Cour de Parlemēt, per-
sonnage fort affectionné au Roy, se des-
couurit auoir quelque faict d'importance
qui ne pouuoit ny deuoit estre communi-
qué à autre qu'à sa Majesté mesme: & que
elle sçauoit bien donner libre accez aux
Religieux & gens d'Eglise: en quoy pour
effectuer sa diabolique entreprinse, il ne se
mesprenoit: car s'il y eut iamais Prince qui
portast reuerence à gens d'Eglise, sa Ma-
jesté en estoit l'vn, & ne se peut dire que
iamais se soit veu aucun Ecclesiastique se
departir d'elle mal content. Pleust à Dieu

que ce zele eust eu quelque peu moins d'ardeur : il n'eust facilité à ses ennemis l'execution de leurs damnables desseins, & ce mal-heureux n'eust esté introduict si facilement. Le Roy donc ayant entendu qu'il auoit lettres du sieur de Harlay, son premier President en la Cour de Parlement de Paris, & creance de sa part, selon qu'il aymoît ce personnage, duquel l'intégrité & la foy, son sceellées de son long emprisonnement, en la Bastille, fit appeller ce faux Religieux en sa chambre, où il n'y auoit autre que le sieur de Bellegarde, premier gentil-homme d'icelle, & ledict sieur Procureur general, lesquels sa Majesté fit mesmes retirer, tant il auoit de fiance en cet habit, qui l'a trompé, estimant deuoir apprendre quelque chose de bien secret, attendu la demonstration qu'en faisoit ce detestable hypocrite, qui se voyant seul, l'occasion en main, asseurant sa contenance le mieux qu'il luy fut possible, en quoy il monstra vne grande impudence, veu la grande majesté du Prince qui esblouyssoit la veuë des plus asseurez, tira d'vne de ses manches vne lettre, qu'il presenta au Roy & ce-pendant qu'il estoit attentif à la lecture, le mal-heureux tira de l'autre man

che vn couteau, duquel avec violence, il donna vn coup à costé du petit ventre de sa Majesté, laquelle se sentant grièvement blessée, retira de la playe le couteau, que ce meschant y auoit laissé, & en donna vn coup au dessus de l'œil à ce maudict Apostat suscitè du diable, qui fut le premier chastiment qui luy fut donné, suiuy au mesme temps, de la mort, laquelle il receut trop honorablement de la main de plusieurs gentils-hommes qui y accoururent, esmeuz de l'indignité d'un si execrable forfait. En l'anagramme de son nom, *Frere Jacques Clement*, furent trouuez ces mots en autāt de lettres, *C'est l'enfer qui m'a creé*. Aussi sembla-il qu'apres ce coup, les furies fussent sorties d'enfer, pour renuerser dessus deffous toute la France. Le Roy porté en son liēt, les Medecins & Chirurgiens luy appliquerent le premier appareil & iugerent que la playe n'estoit mortelle, au moyen dequoy, il fit ce mesme iour escrire & donner aduis de l'attentat, & de l'espoir de sa guerison, tant aux gouuerneurs des Prouinces, qu'aux Princes estrangers ses amys & alliés. Ce neantmoins il mourut sur les trois heures du matin, du iour suiuant. Peu auant son trespas il parla

de sens fort raffis & paisible, se recogneut, nomma le Roy de Nauarre son beau-frere, legitime successeur de sa couronne, exhorta ses bons subiects de luy obeyr, de demeurer vnis, de remettre le different de la Religion à la cōuocation des Estats generaux du Royaume, qui penseroient aux remedes conuenables, de faire estat de la pieté, & de prier Dieu pour luy. Sur ces paroles il rendit l'esprit. En ce Prince defaillirent les Roys de la race de Valois, qui ont regné en France, depuis l'an 1515. iusques en l'an 1589. Ce Prince fut blasmé d'aucuns, de n'auoir que trop tard, sceu bien discerner les amys d'avec les ennemis, d'auoir esté nonchalant & par ce moyen, enhardy ses ennemys, pres & loin, dedans & dehors le Royaume, à beaucoup remuer. Quoy que soit, encores qu'aucuns ayent pensé qu'il fust tant addonné à ses plaisirs, qu'ils l'ayent aucuglé au gouuernemēt politic de son Estat, il craignoit Dieu, & n'auoit autre volonté que d'auancer la Religio Catholique, reformer les abus & maluerfations de ses officiers, en toutes les charges de son Royaume, aymoit les lettres & aduançoit les gens d'esprit. I'ay eu l'hōneur que ma plume luy ha esté agrea-

ble, sur le subiect de la pieté & deuotion, qu'il aymoît sur tout, & en eust receu du bien & du profit particulier, comme elle en ha donné au public, si souz la couleur & l'habit de la deuotion, il n'eust esté trahy, au grand malheur de son Estat qu'il ha laissé fort desolé, & qui ne pouuoit se releuer que par la iuste & legitime succession à iceluy, & l'admirable valeur & generosité du Roy de Navarre, Henry quatriesme de la race de Bourbon: lequel apres cette lamétable mort de Henry troisieme Roy de France & de Polongne, tesmoigna aux principaux de l'armée sa volonté, considerant que plusieurs de la Noblesse preten-
doient des-ja le laisser, fit assembler les
principaux, ausquels il fit entendre la vo-
lonté du feu Roy, sur le faict de la Religio,
& resolution d'icelle, par vn Concile ge-
neral ou national, moyen recogneu par
ladiete Majesté, pour bié appaiser les trou-
bles & dissentions du Royaume, qu'il de-
siroit tenir ce moyen, n'ayant rien en plus
grande recommandation que la Religion
& son serment, auquel il ne pouuoit con-
treuenir, premier que d'estre instruiet par
vn Sainct Concile, duquel il suiuroit en-
tierement l'instruction: que ceux qui le

*Le Roy de
France &
de Navarre
harague ses
subiects a-
pres la mort
du Roy son
frere.*

voudroyent laisser, le laissaient, qu'il ne s'en soucioit pas beaucoup, regretant toutesfois qu'ils n'estoyent meilleurs François, à leur profit & salut seulement & non pour autre chose: que quand tout le monde l'abandonneroit, il auoit assez d'amis à son commandement, pour à leur honte, le maintenir en son autorité, & que Dieu ne l'auoit iamais delaisié & ne le delaisseroit encore, & qu'il n'auoit commâcé vne œuvre si miraculeuse pour la laisser imparfaicte, non pour l'amour de luy seulement, mais à cause de son Sainct nom, & de tant de personnes affligées en diuerses façons en son Royaume, qui crioyent misericorde, il y auoit si long temps, auxquelles il desiroit subuenir, & le promettoit faire, en foy de Roy, au plustost que Dieu luy en auroit donné le moyen: qu'il estoit François, & d'une humeur dont on ne deuoit douter, par le tesmoignage de ses actions passées, & qu'il laissoit à penser combien il estoit à suporter à luy qui estoit leur Roy, & qui les laissoit en liberté de leur Religion, de s'esforcer à le vouloir ranger à leur opinion, deuant qu'estre enseigné, & qu'il laissoit tous les gens de bien iuges de cela. Les vns & les autres pensoient pres

& loin à la guerre : Quant au Roy ses forces amassées pres de luy ne croissoyēt pas, à cause du mescontentement de plusieurs, qui eussent voulu le voir changer de Religion, estimans que c'estoit le moyen de ruiner la Ligue : mesmes à cause des maladies, tellement qu'il resolut de tirer vers Normandie, tant pour receuoir secours d'Angleterre, que pour s'asseurer de quelques places & passages, seruās aux desseins qu'il projettoit. Cependant le Duc de Mayenne esueilloit d'une part, les parlemens, de l'autre ses associez. De ce nōbre estoit le Comte de Rendan, qui en ce tēps se saisit de la ville d'Issoyre en Auvergne, & escriuit à toutes les villes rebelles de son gouuernement, pour les asseurer au party qu'elles tenoyent. Le Duc de Mayenne assembloit cepēdant toutes ses forces, pour suivre le Roy qui auoit bien petites troupes, estimāt qu'il estoit en termes de pouoir bien tost estre vaincu. Les Parlemēts parloyent gros aussi de leur part, tesmoin l'arrest de la Cour de Parlement de Bordeaux, par lequel il estoit enioint & commandé à tous ceux du ressort d'icelle, d'observer inuiolablement les Edicts d'vnion à l'Eglise Catholique, Apostolique & Ro-

maine, & declaration faictes sur iceux, le tout sans cōtreuenir à l'Edict du 26. Avril 1589. & l'Arrest de la Cour de Parlement de Tholouse, contre Henry de Bourbon, qu'elle nommoit pretendu Roy de Nauarre & ses adherans. La Ligue fit lors de tres-grands efforts, pour se maintenir, en ruinant le Roy & ceux de son party, depuis surnommez Royaux, à la difference des autres. Le Roy separa son armée, incontinent apres le decez du feu Roy son frere, & tira en Normandie: voyage que l'on pé-
sa bien estre la ruine de ses affaires: le Duc de Mayenne le talonna tousiours avec son armée l'espace d'un mois, & logeoyent tousiours à la veuë l'un de l'autre. Le Roy fit conduire le corps du feu Roy en deposit de seureté à Compiègne, & print en passant les villes de Meulan, Gisors & Clermont, pour-ce que lors ne comparoist rien à combattre à la campagne, & que les ennemis s'estoyent tous renfermés dans les murailles. Ce qui fut cause à sa Majesté de separer son armée en trois, pour en enuoyer vne partie en Picardie, souz la charge de Monsieur le Duc de Longueuille, vne autre en Champagne, souz Monsieur le Marechal d'Aumont, & elle en retint

une autre, avec tel ordre neantmoins, que pendant que ladicte Majesté demeureroit en ces quartiers de delà, auparaavant son passage, que si l'ennemy luy venoit en gros sur les bras, que lesdictes deux parties separées, se peussent en peu de temps rejoindre. L'armée de sa Majesté pouvoit estre de plus de mille bons cheuaux, de deux Regimens de Suisses, & d'environ trois mille François. Estant venu au village du Pont S. Pierre, le capitaine Roulet, qui commandoit dedans la ville & Pont de l'Arche, affectionné à son service, alla luy porter toute assurance de la fidelité & obeyssance de tous les habitans de ladicte ville, & encores plus particulièrement de la sienne; dont sa Majesté fut fort contente, pour ce que cette place qui n'est qu'à quatre lieuës de Roüen, empeschoit le traficq qui se souloit faire des villes de Paris & Roüen. De S. Pierre, sa Majesté fit acheminer son armée à Darnetal, qui est vn fort grand bourg, à vne lieuë pres de ladicte ville de Roüen, pour la refreschir commodement. Elle en partit des le lendemain à l'improuiste, avec trois ou quatre cens cheuaux seulement, & donna iusques à Dieppe, qui est vn des meilleurs

ports de mer de toute la Normandie, & la ville bonne & riche, fort affectionnée à sa Majesté, en laquelle estoit gouverneur Monsieur le commandeur de Chastes, qui ha rendu vn tesmoignage singulier de fidelité: cōme a faict aussi le sieur de la Verune, gouverneur de la ville de Caen, tous forts recommandez pour leurs merites, d'auoir leur vertu & loyauté cōbatu toutes les tentations & charmes, qui peuvent seduire les plus resoluz, dont neantmoins avec grand honneur, la victoire leur est demeurée. Pendant ce peu de sejour qu'il fit à Dieppe, ayant sceu que la ville de Neuf-Chastel, qui en est à sept lieuës pres, incommodoit fort le passage, il l'enuoya inuestir par les sieurs de Guitri & de Halot avec partie de la cauallerie qu'il auoit menée, & quelques gens de pied de la garnison dudit Dieppe. Et s'estant assemblée grande quantité de payfans & soldats pour la venir secourir, & s'y acheminans souz la conduite de Castillon, gentil-homme dudit pays, ladicte cauallerie leur alla au deuant qui les desfit tous, & en tailla en pieces, sur le champ, plus de sept ou huit cens, & fut ladicte ville rendue. Le Roy recouura quelques

autres petites villes, qui n'incōmodoyent pas moins les chemins & les passages que les plus grandes, & y establit autant de garnisons entretenues, qui pourroyent servir à vn gros, quād il feroit besoin d'en amasser vn dedans la Prouince. Il comancea par celle d'Eu sur la riuere de Bethune, qui fut rendue par composition. Là le Roy eut nouuelles que le Duc de Mayenne ayant veu l'armée de sa Majesté tourner de ce costé, auoit aussi faict passer la riuere de Seine à la sienne, & faisoit estat d'assiéger Gournay, qui auoit peu de temps auparauant esté prins par le sieur de Longueuille. L'armée dudit sieur de Mayenne estoit grande, de plus de trois mille cheuaux & de quatorze à quinze *Grande armée du Duc de Mayene.* mille hommes de pied: ce qui fit prendre audit sieur Duc resolution de poursuiure le Roy lequel avec vne naturelle generosité, cōstāce & resolutiō, qu'il auoit coustume d'apporter aux nouueaux accidēts, ayās aparence de peril, cōme cetuy-cy, il depecha vers les sieurs de Lōgueuille & Marechal d'Aumont, pour les aduertir de l'estat de ses affaires, & qu'ils fissent route la diligēce qu'ils pourroyent de se ioindre pour le venir rēcōtrer, preuoiāt q̄ cete partie ne se

desineroit pas, sans quelque grand combat, qui seroit vne crise de la maladie d son Estat. Puis il resolut, en allant au deuant de ses ennemis & s'approchant d'eux d'aller loger à Arques, assez bon bourg nō fermé, avec vn chasteau assez fort d'assiette. Le Roy, pour estre le lieu aduantageux pour luy, y fit faire des fossés & retranchemēs, où l'industrie luy reualut l'aduantage que les ennemis pouuoient auoir sur luy en nombre d'hommes. Les ennemis reprindrent les lieux de Gournay, de Neuf-chastel & la ville d'Eu, & cheminoient avec assurance d'en faire le semblable dudit Arques, & en desloger le Roy & son armée: mais il leur aduint tout autrement qu'ils auoyent proietté, pource qu'apres plusieurs escarmouches, où les Ligueurs eurent tousiours du pire, ils furēt en fin desfaicts & mis en route, comme ils pensoiēt forcer les retrāchemens & fortifications que sa Majesté y auoit fait faire. Et pensoit bien le Roy qu'ils deussent retourner le lendemain au combat, pour reparer la perte & la honte par eux receuë, mais il fut inesperement aduerty, que le Dimanche vingt-quatriesme du mois de Septembre audict an, des la my-nuiet ils estoient

deslogés de leur quartier, & avec tel effroy & diligence qu'ils laisserent de leurs bleffez, munitions & equipage: qui eust esté assés, pour iuger que ce fust pour se retirer du tout. En ce combat susdict furent tuez de la part de la Ligue, plus de quatre cens hommes, dont il n'y en eust peu auoir cēt cinquāte de l'infanterie, tout le reste estoit Noblesse, ou pour le moins de leur cauallerie: entre lesquels on nōmoit pour principaux, le sieur Sagonne, maistre de camp de leur cauallerie legere, le Baron de saint André, frere du feu Comte de Saux: celuy qui portoit la cornette dudit Sagonne, Bourg l'un de leurs Maistres de cāp, quatre capitaines de leurs cōpagnies d'Albanois, les deux Mareschaux de cāp du sieur Marquis du Pont, & plusieurs autres gentilshommes la plus-part François. De bleffés il y eut bien plus grād nombre, de prisonniers aussi, entre lesquels furent le sieur Comte de Blain, l'un de leurs Mareschaux de camp, qui rendit vaillamment le combat, & qui ha monstre par ses derniers deportemens, en la reduction de Paris, & autres lieux, où il ha fidelemēt seruy le Roy, comme aussi plusieurs autres de son mesme party, qu'il estoit deceu de quelque

belle apparence & pretexte, qu'il tenoit pour verité, quand il ha tourné ses arme contre le Roy. Le Duc de Mayenne de logea pour aller camper entre Dieppe Arques. La Majesté lors laissa dedás le chasteau d'Arques, le fleur de la Garde l'un d ses maistres de camp, avec vne partie d son regiment, & alla loger en ladicte ville de Dieppe, & fit loger vne partie de son armée dedans les faux-bourgs, & le reste dedans les plus proches villages. Le Duc ayant fait sept grandes lieues arriva le Mardy 26. ensuiuant, quasi vis à vis d'où il estoit party, & ne fit que changer de coste, d'où apres quelques charges, au dommage de la Ligue, elle deslogea quand elle entendit la venue de Messieurs le Comte de Soissons, de Longueuille & Marschal d'Aumont, qui estoit a 20. lieues pres d'elle. Sa Majesté ne voulant s'elongner de l'armée ennemye, sentant le secours proche de Dieppe de sept ou huit lieues, se resolut d'en partir avec trois ou quatre cens cheuaux seulement, & l'aller joindre, laissant Monsieur le Marschal de Biron audict Dieppe, avec toute l'armée: print à la veüe de l'ennemy, & forcea la ville & chasteau de Gamache, & depuis

reprint la ville d'Eu : ce qui pouuoit bien semondre le Duc de Mayenne au combat, qui neantmoins passa la riuere de Somme pour aller en Picardie saisir les villes de la Prouince : Le Roy fit encore vn peu de sejour à Dieppe, tant pour pouruoir aux affaires de la Prouince de Normandie, en laquelle il laissoit Monsieur le Duc de Mompensier, avec les forces qu'il auoit amenées, qu'aussi pour recueillir les quatre mille Anglois qui luy estoient enuoyez par la Roynes d'Angleterre. Elle en partit le 21. d'Octobre, & vint à petites iournées, sans passer la riuere, estant toujours du costé de l'ennemy, iusques à Meulan, où elle passa la riuere de Seine, & s'en vint droit à Paris, avec double dessein, ou de combattre l'ennemy, ou pour le moins de le retirer de la Picardie, où il auoit surprins la ville de la Fere. Elle arriua le trante-vniesme d'Octobre au village de Bagneux, distant de Paris d'vne lieuë seulement, & fit loger là son armée, & és villages de Mont-rouge, Gentilly, Issy, Vaugirard & autres plus proches. Le lendemain sa Majesté, des la pointe du iour, fit attaquer les Faux-bourgs du costé où il estoit, par trois troupes, & en

trois diuers endroits, avec vn si bon ordre, qu'en moins d'une bonne heure i furent tous emportez, & furent tuez se à huiet cens hommes de ceux qui estoient venus à la defence, y eut perte de quatorze de leurs enseignes, & prinse de treize pieces de canon, tant grosses que petites sans qu'aucun des assaillans s'y perdist: furent les assiegés iuiuis de telle furie, qu'ils peus'en fallut que les Royaux n'entraissent avec eux pêle melle dedans la ville, & sans ce que le canon ne fut pas du tout si diligent à venir qu'il auoit esté ordonné, les portes eussent esté ouuertes & enfoncées, auparauant qu'elles eussent esté remparées. Sa Majesté entra au fauxbourg S. Jacques sur les sept à 8. heures du matin, criant le peuple par les rues, à haute voix viue le Roy, & plus avec signe d'alegresse, que d'aucun estonnement, ayant esté obserué vn ordre non encores pratiqué entre les soldats, mesmes des François que nul ne se desbanda, pour aller au pillage, ny se loger que les quartiers n'eussent esté faicts. Seulement dedans l'Abaye se renfermerent quelques cent cinquante de leurs harquebusiers, qui firent vn peu de contenance de la vouloir garder, mais sur
la my

lamy-nuiet ils se rendirent. La nuiet mesme du premier iour de Nouembre, le Duc de Mayenne avec la pluspart de son armée entra dedans la ville : Et le Ieudy deuxiesme dudiect moys sa Majesté attendit, pour voir s'ils feroient quelque sortie, mais ce fut en vain : & le Vendredy matin, elle se resolut de sortir desdicts Faux-bourgs, & se mettre en bataille à la veuë de ladicte ville, pour offrir le combat à ses ennemys, & y ayant demeuré depuis huiet heures du matin, iusques à onze, sans qu'il parust iamais personne, elle en partit, & donna à penser aux Parisiens, & à cognoistre à combien ils furent pres de leur entiere ruine, & aux moyens d'y remedier s'ils vouloyent, voyans le Roy tellement inspiré de Dieu qu'il continuoit à ne proceder pas, contre ses subiects, comme contre ses ennemys iurez, mais ainsi que contre enfans depitez & opiniastrés, les verges en vne main, & la pomme en l'autre, cōme il ha tousiours fait. Sa Majesté alla prendre la ville & chasteau d'Estampes, ayant eu aduis que le sieur de Clermōt de Lodesue avec cinquante ou soixante Gentilshommes y estoient renfermés, sur l'asseurance que le Duc de Mayenne leur auoit donnée &

confirmée, qu'il les en viendroit desgager avec toute son armée. La Roynedouairiere enuoya vn gentil-homme, à cette heure là, vers sa Majesté, pour la supplier de luy vouloir faire iustice du cruel assassinat commis en la personne du feu Roy son mary, & luy presenta vne requeste ladiète Royné, à cette fin, & le Roy r'enuoya ladiète requeste, en sa Cour de Parlement transferée à Tours, pour à la requeste de son Procureur general, & à l'assistance de ladiète Dame, faire l'instruction du procès, contre les coupables à fin d'estre apres iugé en sa presence, par les formes à ce conuenables, ioignant a la bien-seante poursuite de cette Dame l'ienne propre, & vouant derechef d'employer son soing & ses armes, iusques à ce qu'il eust faict la iuste vengeance, que Dieu luy permettoit & ordonnoit d'en faire. Alors sa Majesté voyant qu'elle ne pouoit attirer ses ennemys au combat, ny les faire sortir de Paris, elle r'enuoya Mōsieur le Duc de Lōgueuille avec les forces qu'il auoit amenées de Picardie, se rafraischir en la Prouince, & s'en alla avec luy le sieur de la Noüe, & le sieur de Giury fut r'enuoyé en la Brie. Sa Majesté partit d'Estam-

pes le Samedy dixiesme Nouembre, & arriua à Ianuille le Dimenche, & le capitaine qui estoit dedans fit vn peu de mine de la vouloir deffendre, mais ayant veu approcher le canon, il la rendit, & estant sorty avec bien deux cens harquebusiers, ladicte Majesté y entra le mesme iour, & y seiourna le lendemain, sans que ceux de la ville en receussent aucun desplaisir ou incommodité. Elle en partit y ayant laissé garnison dedans le chasteau, qui est assez bon, & s'en alla à Chasteaudun, d'où elle enuoya sommer la ville de Vendosme, de son ancien patrimoine: elle partit dudict Chasteaudun le quatorziesme Nouëbre, & le mesme iour fit inuestir la ville de Vēdosme & le chasteau, où gouuernoit le sieur Maille Benehard, lequel sentant venir le siege, y auoit appelé vn bon nōbre de gentilshommes ses amys, & y tenoit de garnison ordinaire quatre compagnies de gens de pied, qui pouuoient faire quatre cens hommes, outre ceux de la ville qui estoient de six à sept cens portans les armes. Le Roy fit battre premierement deux tours du chasteau, & bien tost apres les soldats y entrerent, & ceux de dedans prindrent l'effroy, & se sauuerent de vites-

*Benhard
& leffé
Cordelier
executés.*

se dedans la ville, où ils furent fuiuis de si pres, que les gens du Roy y entrerēt pefle melle avec eux, & se firēt, en moins de demye heure, maistres du chasteau & de la ville. Sa Majesté fit grace à tous, excepté audiēt Maillé Benhard, & à vn Cordelier, qui furent executés: la ville fut pillée, & le lendemain, le Roy fit sortir tous les gens de guerre de ladiēte ville, & permit que les habitans peussent retourner en leurs maifōs, sans pouuoir plus estre prins & rançonnez, remit tous les Ecclesiastiques en leurs charges ordinaires, & beaucoup plus paisiblement qu'ils n'estoyent du temps qu'elle estoit occupée par ceux de la Ligue. Quatre ou cinq petites villes des enuironz se rendirēt en moins de quatre ou cinq iours. Le chasteau & ville de Lauerdin commēcerent, & furent fuiues des villes de Montoire, Mōtrichar & chasteau du Loir. Sa Majesté alla à Tours, qui estoit fort attendue, & y fut receuē avec grande allegresse & resiouyffance de tous, qui furent le saluer. Ayant faict à Tours plus de seiour qu'elle ne pensoit, elle partit, pour s'en aller au Mans, qu'elle auoit enuoyé inuestir vn iour au parauant, par le sieur de Fargis, & enuoya sommer ladiēte

ville. Le sieur de Bois-Dauphin la voulut deffendre, & de fait on commença à faire brusler vne grande partie du faux-bourg de la Cousture, au moins ce qui estoit hors les retranchemens dudit faux-bourg, mais ledict sieur du Fargis y survint avec sa troupe, qui en sauua vne grande partie. Tous les faux-bourgs gangnez, sa Majesté, le deuxiesme du mois de Decembre, sur les sept heures fit commander à battre quelques defenses de la muraille de ladicte ville: dedans trois heures les assiegés estoient prêts d'auoir l'assaut, à quoy n'estans pas bien resolus, ils demanderent à parlementer, & en fin auant qu'il fust deux heures apres midy, ladicte ville fut rendue à sa Majesté, qui l'exempta d'estre pillée: il auoit cousté plus de cinquante mille escuz au peuple pour la fortifier, auoit esté bruslé pour plus de cent mil escuz de maisons dedans les faux-bourgs, & le pays estoit ruiné de six fois dauantage. A cette prinse, deux foldats furent trouuez saisis d'un calice qu'ils auoyent desrobé, dont sur l'heure, ils furent pendus. Sa Majesté remit premierement l'Euesque du Mans, & le sieur du Fargis son frere qui en estoit gouuerneur. Pendant le seiour

*Prinse du
Mans.*

qu'elle y fit depuis la prinse, se rendirent le chasteau de Beaumont, de Toutedoyes, & le sieur de Lanillac lors se mit au service du Roy. En mesme temps furent reduites les villes de Sablé, Laual, Chasteaugontier & autres. Le Roy resolut d'aller à Laual, où il seiourna huit ou dix iours, pendant que son armée, souz la conduite du Marechal de Biron, & du sieur Baron son fils, Marechal de camp de l'armée, s'acheminait à Alençon, pour la prendre. Le Prince de Dombes le vint là trouver avec la Noblesse de Bretagne, qui eut à grand honneur d'estre recogneue de sa Majesté, comme elle fut aussi fort humainement receüe. Sa Majesté l'enuoya bien tost apres ledict Prince de Dombes, en sa charge: & fit partir aussi Monsieur le Marechal d'Aumôt, pour aller recueillir ses forces estrangeres: partit de Laual, passa en la ville de Mayenne, où elle fut aussi fort bien receüe, & s'asseurer du chasteau, sans vouloir laisser autre garnison dedans ladicte ville. Elle arriva audict Alençon le vingt-troiesime dudict mois, ayant eschappé de tres-mauuais chemins: print d'abordée les faux-bourgs. Le capitaine la Gau commandoit dedans la ville, qui se retira dedans le chasteau avec

quatre cens cinquãte soldats, faisant contenance de se vouloir defendre, estant la-dicte place tres-bonne, environnée d'eau, de bonnes murailles, flanquées de bonnes & grosses tours. Ledit sieur Marechal estant entré en la ville y donna tel ordre qu'il n'y eut aucune apparence qu'elle eust esté assiegée, ayãs esté le mesme iour qu'il y entra, les boutiques ouuertes, comme si elles eussēt esté en pleine paix: le chasteau n'arresta beaucoup à composer & à se rendre à sa Majesté, laquelle en moins de deux moys fit faire à vne armée pesante comme la sienne, chargée d'un lourd attirail d'artillerie, & d'un grand nombre de Suisses & autres estrangers, plus de huit vingts lieues, & ce faisant prins les faux-bourgs de Paris, faict quatre, cinq, ou six sieges notables, prins quatorze ou quinze bonnes villes, auoir nettoyé le Vendomois, Tourayne, Anjou & le Mayne, de tout ce que tenoyent les ennemys, & recouré les cœurs & affections des vaincus. Je serois bien long à vous discourir les diuers exploits & deportemens des Ligueurs, iusques à la fin de l'an 1589. Ils bastirent vne certaine lettre apostée, qu'ils attribuoyent au Roy, & l'adressoyent aux

Seigneurs de Berne , pour entretenir le peuple en la volonté de faire la guerre au Biarnois, appellās ainsi leur legitime Prince. De mesme forge fut vne autre lettre dressée par les Iesuites de Troye, & semée par la France aux fins que dessus , & estoit adressée à la Dame de Tinteuille à Langres. Avec ces lettres on fit courir vn autre libelle de la desfaiete du sieur de Boniuet & de ses troupes aupres de Beauuais: publiant que le Marquis de Pienne, suiuy de trois cens cinquante hommes tant de pied que de cheual , auoit coupé la gorge audict sieur de Boniuet , à trois ou quatre cens harquebusiers & à six vingts caualiers, sans qu'vn seul eschapast, iusques aux cheuaux, & que la teste fut coupée à Boniuet , puis portée par les villages pour resiouyr les payfans. Ceux de Paris imprimerēt en vn discours à part, la prinse de Gournay ville & chasteau , & que le Duc de Mayenne (qui parauenture estoit bien marry que l'on semast ces faux bruits) pres d'Arques & Dieppe, où le Roy de Nauarre estoit assiegé, auoit gagné quatorze enseignes d'infanterie , & huit cornettes de cauallerie par luy defaictes. Les drapeaux furent apportez à Paris, mais ils auoyēt esté

taillés & cousus en la mesme ville: & ainsi ce pauvre peuple se mutinoit d'heure à autre pour la Ligue: & ceux qui voyoyent le iour à trauers ce tafetas de la Ligue, n'osoient dire mot, de peur d'estre poignardez. En ce temps le Parlement de Roüen publia contre le Roy & ses subiects qui luy assistoyent, vn Arrest du 23. iour de Septembre 1589. A ces mesmes fins d'entretenir le peuple és grandes esperances qu'on leur donnoit, on publia à Paris, Roüen, Orleãs, Lyon, & par tout ailleurs que le Duc de Nemours auoit mis en route, les troupes du Comte de Soissons, du Duc de Lōgueuille, & du sieur de la Nouë, qui alloient à Dieppe pour secourir le Roy de Nauarre. Que le 23. & 24. de Septembre, le mesme Duc de Nemours auoit taillé en pieces cinq ou six cens hommes des troupes de ce Roy, que le Cheualier d'Aumale, avec les Espagnols & Normãds auoit au mesme temps enuahy deux grans nauires chargés de munitions, cheuaux, armes, & finances que la Royned'Angleterre enuoyoit. Qu'vn nommé sainct Pol capitaine, qui depuis ha voulu s'autoriser, mais à ses despens, dedans Mezieres & autres places, auoit faiet merueilles pour

la Ligue, en Champagne, contre le Comte de Grandpré & autres: qu'en Prouence le sieur d'Ampius & autres auoyent desfaict 25. compagnies enuoyées par Monsieur le Marechal de Montmorency au secours du sieur de la Valette, l'onzième iour de Nouembre: Que sur les frontieres de Lorraine auoit esté desfaicte vne armée de Reistres & Lâsquenets, par le Duc de Lorraine, au commencement du mois de Decembre: Que le Comte de Brissac auoit tué à Tonnerre tous les Reistres du Roy, & autres nouvelles de tels exploits, qui parauanture desplaisoyent à ceux auxquels on les attribuoit, quand il y auoit de la fausseté, ayant encore de cette heure là le cœur si genereux, pipez d'une opinion qu'on leur auoit imprimée, qu'ils n'eussent voulu auoir la loüange de ce qu'ils n'eussent faict, sçachant qu'incōtinent elle leur fust tournée à mespris & deshōneur: mais cet artifice venoit d'autres qui ne regardoyent pas de si pres à l'honneur & à la gloire pretendue de la Noblesse Françoise, encore que de cette heure là elle fust diuisée, & vne partie alterée de son propre naturel. Il y auoit parmy tant de mensonges quelques grains de verité, mais cōme

en l'Arithmetique, adioustant vn zero, de dix, on faisoit cent, & de cent, mil. On ne cessoit de crier que le Biarnois estoit perdu, & fut semé en mesme tēps, par la France, vn libelle contre le Roy & ses seruiteurs, qui s'intituloit ainsi : *L'Arpocratie ou Rabais du caquet des Politiques & Iebusiens de nostre aage, dedie aux Agens & Catholiques associez de Navarre.* A ce libelle respond (encores que ce soit beaucoup deuant) vn Docteur en Theologie nommé F. Th. Beauxamis Carme, par vne sienne remonstrance au peuple François: Qu'il n'est permis à aucun subiect, souz quelque pretexte que ce soit, se rebeller, ne prendre les armes contre son Prince Roy, ny attenter cōtre son Estat, le tout prouué par l'Escripture sainte: comme plusieurs autres de ce temps, par semblables traités & discours y ont suffisamment respondu. Sur la fin de cette année vn Ligueur publia certain aduis, auquel il conseilloit aux François de se rendre & mettre souz la protection du Roy d'Espagne: auquel fut faict responce par vn Catholique Romain. Ce qui aduint en l'an mil cinq cens nonāte en l'Estat des affaires de France n'est pas moins remarquable. La Ligue appuyée sur ses intelligences dedans & dehors le Royaume,

mesprisoit le Roy nonobstant ses heureux succès, & se roidissoit contre tous euene-
mens, tant par-ce que disoyent les Pres-
cheurs que par infinis libelles, où par plu-
sieurs deguiseemens, elle s'entretenoit en
l'esperance de pouuoir longuement subsi-
ster dedans cet abyssine de confusion. En-
tre autres, les Ligueurs publierent vne co-
pie de lettre d'un Politique (cest à dire par-
tisan du Roy, demeurant à Tours, en-
uoyées à vn autre à Roüen, où ils forgent
ce qu'il leur plaist, touchant les desseins &
pretensions qu'ils attribuent au Roy, & y
discourent de l'estat de ses affaires à leur
plaisir. Ils firent croire que ces lettres a-
uoyent esté surprinses à Vernon par vn
capitaine du regimēt du Marquis de Pien-
ne. Le peuple de Paris & des autres villes
estoit ainsi mené de tels artifices, à fin de
ne se lasser du faix des impôts, rauage de
soldats, & calamitez qui le pressoyent de
tous costés. Cependant le Roy menoit les
mains en diuers endroits, sur tout en Bas-
signy, Normandie & Prouence, & la Li-
gue se fondoit aussi sur le secours attendu
des Espagnols. Le Roy d'Espagne estoit
biē empesché au pays bas, où le Côte mau-
rice fils du feu Prince d'Aurange, tailloit

de la besongne au Duc de Parme: Neantmoins preferant ses pretensions sur la France à toutes autres considerations, & ne voulāt perdre les sommes de deniers fournies aux chefs & membres de la Ligue, commanda au Duc de Parme de s'y ache-miner, sur les instances qui luy en esto-yēt faictes. Suiuant quoy d'un costé, le Duc enuoya des troupes en bon nombre, souz la conduite du Comte d'Egmont, lesquelles bien tost apres furent desfaictes. Et quant au Roy d'Espagne il publia vne declaration qu'il fit sur les troubles, miseres & calamitez qui affligeoyēt la Chrestienté & notamment le Royaume de France, avec ses lettres au Clergé, pour fournir moyens aux frais de la guerre. En quoy la verité est, que ce Roy se mesloit des affaires de la France, à cause de l'Estat, & non pas pour la Religion, qui ne sert que de couuerture à ses desseins: comme se void apertement par vn brief discours d'un Parisien Catholique Romain, escriuant contre ses entreprin-ses sur la France, & intitulé son discours l'Antiespagnol, monstrant le but où tend Philippe Roy d'Espagne. Le Duc de Parme, suiuant plusieurs reitez mandemens du Roy d'Espagne, auoit

enuoyé long temps auant la declaration sus decrite, le commandeur Morré à Paris, avec argēt & quelques soldats : ensemble lettres de creance, pour asseurer que bien tost l'on auroit vn puissant secours pour la Ligue. Le Duc ayant prestes plusieurs compagnies, depescha promptemēt le Comte d'Egmont, suiuy de bon nōbre de Seigneurs & capitaines Espagnols, Flamans & Alemās, avec quinze cens lances, quatre ou cinq cēs harquebusiers & quelques regimens d'infanterie pour aller au secours de la Ligue, laquelle auoit desja plus de deux mille cheüaux, & plus de huit mille hommes de pied en campagne. Incontinent ce Comte se mit en chemin. Et le Roy de France & de Nauarre cependant recouura en moins d'vn moys par sieges & assauts, huiēt ou dix meilleures places de la basse Normandie. Sa Majesté ayant recouuré la ville de Honfleur qui ha vn port de mer, alla faire leuer le siege, que le Duc de Mayenne tenoit depuis plus de quinze jours deuāt la ville & fort de Meulan, distant dudit Honfleur de plus de 30. lieuës, & lors plus foible de beaucoup luy presenta la bataille, que le Duc ne voulut accepter, ains alla recueillir son secours

qui luy venoit de Flandres. Le Roy mit le siege deuant la ville de Dreux, & bien tost apres, pressant fort les assiegez, il fut aduertty que le Duc de Mayenne ayant ioinct lesdictes forces estrangeres, conduites par le Comte d'Egmont qui en estoit general, venoit droit affrõter l'armée de sa Majesté, & à cet effect passoit son armée sur le pont de la ville de Mâte, qui tenoit lors pour la Ligue, & n'est distante de celle de Dreux q̃ de huit ou neuf lieues. Sa Majesté scachât que le Duc avec son armée, estoit aduancé iusques au village de Dâpmartin 2. lieues en auant vers elle, partit deuant Dreux le Ludy 12. & cõmācea deffors de faire marcher son armée en bataille, de sorte q̃ ceux de la ville se cõtēterēt d'en voir l'ordre de dessus leurs murailles, sans en aprocher de plus pres. Sa Majesté alla ledict iour loger en la ville de Nonancourt, qui s'estoit peu de tēps auparauāt faiēt prendre par assaut: ce fut pour prēdre le gué d'une petite riuie re qui y passe. Si tost qu'elle y fut arriuée, elle fit aduertir q̃ le lendemain vn chacū se tint prest. Le soir & la nuict, s'estāt sadiete Majesté retirée, dressa & trassa elle mesme le plan & l'ordre de sa bataille, lequel des le grand matin, elle monstra à Monsieur de

Montpēfier & à Messieurs les Marefchaux de Biron & d'Aumont, & Baron de Biron Marefchal de camp, & autres principaux capitaines de ladicte armée, qui tous d'une voix le trouuerent si bien & avec tant de iugement & prudence militaire, qu'ils n'y changerent rien. Elle le mit au mesme temps, entre les mains du Baron de Birō, pour aduertir chacun de son rang & place: & choisit ce mesme matin, le Seigneur de Vicq qui est l'un des anciens Maistres de camp de l'infanterie Françoisse, pour fergēt de bataille. Cela faiēt, sa Majesté fit sa priere à Dieu, qui raut tant tous les assistans que chacun à son exemple, en fit de mesme: Et l'on vid aussi tost les Eglises dudiēt Nonancourt pleines de Princes & Seigneurs, Noblesse & soldats de toutes nations, ouyr Messes, se cōmunier, & faire tous offices de vrays & bons Catholiques: ceux de la Religion firent aussi de leur part leurs prieres & deuotions. Sa Majesté fit assigner le rendez vous au village de saint André, distāt dudiēt Nonancourt de quatre lieuës, sur le chemin pour aller à Iury, où elle estimoit que l'ennemy & son armée fust logée. Au delà dudiēt village ya vne fort grande plaine bordée à veüe de quelques

quelques autres villages, & d'un petit bois
appellé la Haye des Prez: Toutes lesdictes
troupes y arriuées, ladicte Majesté avec
les Mareschaux de Biron & d'Aumont, le
Baron de Biron Mareschal de camp, com-
mancerent à les dresser en bataille, suiuant
le plan qui en auoit esté resolu. Si tost que
l'on eut nouuelles que le Duc de Mayen-
ne paroissoit, l'on entendit vne allegresse
vniuerselle en toute l'armée, à laquelle sa
Majesté fit au mesme temps tourner la te-
ste, du costé où il estoit, & n'eut gueres
cheminé que l'on commença à le des-
couvrir à veüe, toutesfois fort esloigné,
& entre les vns & les autres y auoit vn vil-
lage, duquel les Ligueurs s'estoyent saisis,
que ladicte Majesté fit incontinent atta-
quer, & leur fit quitter. Les deux armées
demeurerent ainsi tout ce iour à la veüe
l'une de l'autre, sans qu'il s'y entreprint riē
d'auantage, que quelques legeres escar-
mouches, & la prinse de ce village qu'on
leur fit quitter: La nuit estoit quasi toute
fermée qu'elles estoyent encores en ba-
taille: en fin elles furent contraintes de se
loger: le logis de la personne de ladicte
Majesté fut à Fourcanuille, qui est vn petit
village vn peu à la gauche de ladicte plai-

ne, où l'armée auoit esté premierement mise en bataille. Le reste de l'armée fut logé aux autres villages, que ceux de la Ligue pensoyent auoir ce iour là pour eux. Le Roy ayant donné ordre à toutes les gardes de son armée, enuoya aduertir que vn chacun se tint prest à la pointe du iour: Il le fut bien pluſtoſt: car s'estant ietté sur vne paillasse, & ayant reposé deux heures, soudain il commença à enuoyer querir des nouuelles de ses ennemys. Elle recōmencea cette iournée, comme elle auoit faict la precedente, par vne priere tref-deuote, qu'elle fit à Dieu publiquement & tout haut: Pendant que sa Majesté voulut des-jeuner, lesdicts Princes, Mareschaux & autres Seigneurs furent ouyr la Messe, & de là chacun alla repaistre. Sa Majesté se rendit au champ de bataille sur les neuf heures, & peu apres s'y rendirent toutes les troupes, & sur les dix heures, toute l'armée estoit en l'ordre qu'elle deuoit estre. Celle des ennemys parut aussi en mesme temps, en lieu vn peu plus releué, & aussi vn peu plus reculé qu'elle n'estoit le iour precedent: l'ordre & disposition de leur armée pour la bataille estoit quasi pareille à celle de sadiete Majesté, excepté que les

pointes auançoient dauantage, & auoyēt vn peu plus de la forme de croissant. Ainsi que la Cornette de sadiete Majesté estoit au milieu de ses escadrons, aussi estoit celle du Duc de Mayenne, mais c'estoit au milieu de deux escadrons de lances, de celles qui estoient venues de Flandres, qui pouoyent estre de douze ou treize cens lances. Cette Cornette du Duc de Mayenne pouuoit aussi estre de deux cens cinquante cheuaux, & bien autant qui estoient de la troupe du Duc de Nemours, qui s'y vint ioindre, faisoient vn troisieme escadron au milieu de deux autres, faisans pres de dix-huiet cens cheuaux qui marchoyent tous ensemble. Au costé dudiēt escadron estoient leurs deux regimens de Suisses, couuers aussi d'infanterie Françoise. Il y auoit apres deux autres escadrons moyēs de lances, celui de leur main droite, de sept cens cheuaux, & celui de la gauche de cinq cens. Ils n'auoyent que deux couleurs & deux bastardes, qui estoient à leur main gauche. Sadiete Majesté ayant recogneu qu'ils ne vouloyent aucunemēt s'auancer, elle s'aduança de plus de cent cinquante pās, gagnāt aussi par ce moyen le dessus du Soleil & du vent, qui eust peit

reietter toute la fumée des harquebufades dans son armée : aduantage qui n'est pas petit vn iour de bataille. Comme elle fut rapprochée, sadiète Majesté & tous ses capitaines, recogneurent à veüe, que leurs ennemys estoient bien plus grand nombre que l'on n'auoit estimé : car il fut iugé qu'ils estoient plus de quatre mille chevaux, & de dix à douze mille hommes de pied, mais il sembla que ce fut vn surcroist de courage qui leur fut donné. L'armée de la Ligue estoit chargée de clinquât d'or & d'argent sur leurs casques : mais celle du Roy l'estoit de fer, & ne se pouuoit rien voir de plus formidable, que deux mille Gentilshommes armez à cru, depuis la teste iusques aux pieds, bruslans d'affection de vaincre. Sadiète Majesté estant à la teste de son escadron, dont les premiers rāgs n'estoyent que Princes, Comtes & Barōs, Cheualiers du saint Esprit, & des principaux Seigneurs & gentilshōmes des principales familles de France, elle recōmencea à prier Dieu, & fit exhorter vn chacun à faire le semblable. Elle partit aussi tost dudit escadron, & commēcea à faire vne passade à la teste de son armée, animāt vn chacun avec vne grāde modestie, & neā

moins pleine d'asseurance & resolution. Retournée qu'elle fut en sa place, arriua le sieur de Mariuaut, qui la vint aduertir que les troupes de Picardie, qu'amenoyent les sieurs de Humieres, de Moüy & autres Seigneurs & gentilshommes du pays, qui pouuoient estre plus de deux cens cheuaux, estoient à deux mille pas du champ de bataille: ce neantmoins la Majesté ne voulant diferer d'un poinct, enuoya commandement au sieur de la Guiche grand Maistre de l'artillerie de faire tirer: ce qu'il fit incontinent & avec grande promptitude & fort à propos: dont les ennemys receurent grand dommage: il auoit faict tirer neuf canonades, auant que les autres eussent commencé: Apres trois ou quatre volées de part & d'autre, l'escadrõ de leurs anciens cheuaux legers, tant François, Italiens, qu'Albanois, qui pouuoient estre de cinq à six cens cheuaux, voulut auancer, pour venir à la charge cõtre celuy du Marechal d'Aumont, menant avec eux les Lansquenets, qui estoient à leurs costez: mais le Marechal voulut entamer le combat, & le leur fit à eux mesmes si rude & furieux, qu'il les perça de part en part, & aussi tost l'on ne vid plus que le dos & les

croupes de leurs cheuaux, les menant battant iusques à vn petit bois qui estoit derriere, où il fit ferme pour venir retrouver le Roy, comme il en auoit eu commandement. Au mesme tēps que ceux là fuyoyēt l'host des Reistres de leur main droicte, qui vouloit venir vers l'artillerie, y trouuāt les cheuaux legers qui s'y estoient aduancés, il leur fit vne charge, qui fut si bien receuë, que sans les enfoncer, ils tournerent tout court se rallier derriere. Cependant vn autre escadron de lances de Vallons & Flamens, voyāt lesdicts cheuaux legers de ladicte Majesté vn peu separez de ce grand effort qu'auoit fait parmy eux cette troupe de Reistres, leur voulut venir faire vne autre charge: mais le Baron de Biron s'auancea, & ne l'ayant peu prendre par la teste, en prit vne partie de la queue qu'il perça, & y fut blessé au bras & au visage. Au deuant du reste Monseigneur de Montpensier s'achemina, & leur fit vne tres-belle charge, en laquelle ayant luy mesmes esté porté par terre, & incontinēt remonté, s'y comporta avec telle valeur, qu'il demeura maistre de la place. En ce mesme temps ce gros escadron du Duc de Mayenne, s'auancea pour venir à la char-

ge, faisant marcher à son aïlle gauche quatre cens harquebusiers à cheual, qu'ils appellent Carabins, qui sont armés de plastrons & morions, lesquels firent vne salue de vingt cinq pas pres de celuy de sadiete Majesté. Ladiete salue acheuée, la teste desdicts gros escadrons affronta celle de celuy de sadiete Majesté, du front duquel on la vid partir la longueur deux fois de son cheual auant aucun autre, & se mesler si furieusement parmy les ennemys, qu'il fit bien recognoistre, que si auparauant, il auoit, en commadant & ordonnant, bien faict l'office d'un grand Roy & d'un grand Capitaine, au combat il sceut bien faire celuy d'un braue & magnanime gendarme. Cette rencontre fut tres-furieuse, n'ayant neantmoins iamais esté au pouoir de ceste espouuantable forest de lances, de faucher l'escadron de sa Majesté: laquelle au contraire fut si bien suiuite, qu'elle percea celuy de ses ennemys, & fut vn grand quart d'heure parmy eux tousiours combatant. Cependant ce gros corps duquel on auoit ainsi affoibly le fondement commença à chanceler, & en moins de rien on vid en fuite ceux qui venoyent si furieusement presenter le visage & leurs

testes & bras armez. Ce commencement de victoire ne pouuoit encore res-jouyr l'armée, ne voyant point le Roy: mais aussi tost on le vid aparoiſtre couuert du ſang de ſes ennemys, ſans que Dieu mercy, ils euſſent veu vne goutte du ſiē, encores qu'il fuſt aſſez remarquable par vn grand panache blanc, qu'il auoit à ſon acouſtremēt de teſte, & vn autre que portoit ſon cheual, qui auoit autant donné de terreur à ſes ennemys, qu'il donna de conſolation à tous les ſiens, quand ils le virent de retour de cette mellée: auāt que ſortir de laquelle, en s'en reuenant, n'eſtant pas accompagné de plus de douze ou quinze de ſa troupe, elle rencontra entre les deux bataillons des Suiffes ennemis, trois eſtendarts de Vualons & quelques autres qui les accompagnoient portās tous les croix rouges, qu'elle chargea ſi valeureuſement que leſdictes cornettes luy demeurèrent, & ceux qui les portoyent & accompagnoient furent tuez ſur la place. Arriuée qu'elle fut quaſi d'où elle eſtoit partie, il ſe fit de toute l'armée, en ſigne d'action de graces à Dieu, de ce qu'il eſtoit ſain & ſauue, vn cry vniuerſel de viue le Roy. Arriuant ſe ioignit à elle ledict ſieur Mareſchal

d'Aumont, avec vne bonne troupe qu'il auoit ralliée, entre autres du sieur grand Prieur & de quelques vns des siens. En mesme temps, arriua aussi le Baron de Biron: Et ainsi sadiète Majesté avec cette troupe ralliée, & qui grossit en vn instāt, alla trouuer le Marechal de Biron, qui estoit demeuré ferme avec la troupe de cōserue, laquelle sans fraper, auoit autāt ou plus fait de mal aux ennemys que nulle autre: parce qu'ayans veu cela sain & entier, & à la teste ce vieil gendarme, ils iugerent bien qu'ayāt tant entamé de batailles en sa vie, il scauroit bien acheuer d'en rompre vne des-ja demy esbranlée. Sadiète Majesté eut ce plaisir de voir ses ennemys luy laisser la place toute couuerte de leurs morts: & ne restoyent plus que leurs Suisses, lesquels bien qu'abandonnés de toute leur cauallerie, qui à gauche & à droiète auoit prins party, neantmoins ne laisserēt de faire tref-bonne contenāce. Il auoit vne fois esté proposé de les enuoyer rōpre par l'infanterie Frāçoise de main droiète, qui n'auoit point cōbatu. Toutesfois sadiète Majesté se resouuenant de l'ancienne amitié & alliance que cette nation a de tout tēps eu avec cette courōne, elle se cōtenta

(les ayāt r'enuoyés audiēt fleur Mareſchal de Biron) de leur faire grace, & au lieu de leur enuoyer la mort, comme elle pouuoit faire, elle leur enuoya la vie, & les receut à miſericorde : & ayans mis les armes bas, paſſerēt du coſté de ſadiēt Majesté: ce qui eſtoit avec eux de François, iouyrent de cette meſme clemence. Au meſme inſtant que le Roy ſe ioignit avec le Mareſchal de Biron, il y fut rencontré deſdictes troupes de Picardie. Le Roy pourſuiuit la victoire avec ſon gros, & ayant ietté deuant elle le grand Prieur, avec vne troupe à ſa gauche, & le Baron de Biron à la droite, ayāt avec elle le reſte de ſa cauallerie, qui ſ'eſtoit r'alliée, & leſdictes troupes de Picardie, elle ſe mit à ſuiure la victoire, eſtant accompagnée des Princes de Conty, de Montpenſier, & Comte de ſainct Paul, des Mareſchal d'Aumont, de la Trimaille & infinis autres Seigneurs, capitaines & gentilshommes de ladiēt armée, laiſſant le Mareſchal de Biron avec le corps d'icelle qui ſuiuoit & alloit apres. La retraite des ennemys fut ſans ordre, & ſans aucune choſe de remarquable, de deux coſtez: le Duc de Nemours, Baſſompierre, le Vicōte de Tauannes, Roſne & quelques autres

prindrent la route de Chartres, & le Duc de Mayenne & le gros de ceux qui se retiroient prindrent le chemin d'Yury, pour y passer la riuere : l'artillerie & tout leur bagage demeura en chemin. Le temps que ladicte Majesté arresta à pardonner aux Suisses, donna grand aduantage à ceux qui se retiroient, de sorte que quand elle fut arriuée à Yury, elle trouua que le Duc de Mayenne estoit pieça passé, & auoit apres luy rompu le pôt, qui fut cause de la mort & perte d'une infinité des siens, spécialement des Reistres, dont vne grande partie se noya, estans contraints, pour empescher les rues, à fin qu'on ne les peust suiure, de couper les jarrets de leurs cheuaux, & en faire des ramparts dedans lesdictes rues, estant le pont dudit Yury rompu, & le gay tres-dangereux. Sa Majesté alla passer la riuere au guay d'Anet, qui luy fut vne grande lieue & demye de detour, & ne laissa de trouuer les chemins bordezz de fuyars, qui n'auoyent peu estre si diligens que les autres, lesquels demeuroyēt à discretion. Ceux qui voulurent eschapper dedans les bois, tomberent à la mercy des payfans, qui leur furent plus cruels, que n'eussent esté les gēs de guerre. Sa Majesté

les pourſuiuit iufques quaſi aux portes de la ville de Mante, qui leur fut ouuerte, & ainſi le Duc & ſa troupe ſe ſauua. Dequoy ſa Maieſté bien aduertie, alla loger au village de Roſny à vne lieüe pres de Mante, auſſi mal garnie de bagage pour ceſte nuit, qu'eſtoient ſes ennemys. Toute l'infanterie de la Ligue fut taillée en pieces, ſans ceux qui ſe rendirent, & ne leur en reſta point: de leur cauallerie, il en fut tué ou noyé plus de quinze cens, & y en eut plus de quatre cēs priſonniers. Entre les morts furēt cogneus pour principaux, le Comte d'Egmont cheualier de l'ordre de la Toiſon, Colōnel des troupes enuoyées par le Prince de Parme: le ieune Côte de Brunſuik, le Seigneur de la Chaſtaigneraye & pluſieurs autres, dōt on ne ſçauoit les nōs. Des priſonniers ſe trouuerent le Comte d'Anſtfrift, qui eſtoit avec les Reſtres, & pluſieurs Seigneurs eſtrangers, tant Eſpagnols, Flamans, qu'Italiens: & des Frāçois, les Seigneurs de Boisdauphin, Cigongne qui portoit la cornette blanche dudiēt Duc de Mayenne, Meſdaut, Fontaine Martel, Loncham, Lodonan, Falendre, Hengueſſan, les maîtres de cāp, Treuzay, la Caſteliere, Diſemieux & infinis autres.

Plus de vingt cornettes de cavallerie demurerent, entre lesquelles estoit la cornette blanche, le grand estendart du general des Espagnols & Flamens, & les cornettes du colonel des Reistres, plus de 60. enseignes de gens de pied, tant de François, Flamens, que Lansquenets, sans y comprendre les 24. enseignes des Suisses, qui se rendirent. De ceux de l'armée de sadiete Majesté y furent tuez, le sieur de Clermôt d'Entragues, Capitaine de ses gardes, qui mourut bien pres de la personne de son Maistre: le heur de Tich Schomberg, lequel ayant commandé & mené de grosses troupes de sa nation, se contêta pour cette iournée d'estre simple gendarme, à la cornette de sa Majesté. Les sieurs de Bongaulnai de Normandie, âgé soixante & douze ans, de Crenay cornette de Monseigneur de Montpensier, Fesquieres, & iusques à vne vingtaine d'autres gentilshommes pour le plus: Des blesez le sieur Marquis de Nesle, lequel bien qu'il fust capitaine des gens-d'armes, voulut combattre au premier rang des chevaux legers: le sieur Côte de Choisy, qui avoit amené vne bone troupe, & les sieurs Do, Comte de Lude, Monlouet, Lauerngne, Rosni & peut estre vne vingtaine d'autres

gentilshommes, dont la plus part ne furent que legerement bleffez, & les autres pour le moins sans peril de mort. Il s'est peu cognoistre en ce combat deux ou trois choses si extraordinaires & miraculeuses, que elles ont deu faire iuger, que Dieu y a voulu besongner. La premiere ha esté ceste ferme resolution, qui a tousiours esté au cœur de ce Prince, de chercher de donner vne bataille à ses ennemys, avec ferme constance que la victoire luy en demeure-roit: l'autre qu'en vne mesme place du combat, au mesme temps qu'il a voulu cōman- cer, il a semblé que la terre ait faict naistre des hommes armés pour son seruice, cō- me il s'est veu que la vueille & le iour du combat, il luy arriua plus de six cens che- uaux, sans lesquels neantmoins il estoit tout resolu de combattre: Et la troisieme que de deux mil Gentilshommes Fran- çois, dont il n'y en a pas eu plus de douze cens, qui auoyent combatu, ayent desfaict & mis en telle route vne armée de quatre mil cheuaux, & de douze mille hommes de pied, leur cauallerie estant fresche, bien montée & bien armée. Depuis cette vi- ctoire se rendirent à sa Majesté les villes de Vernon & de Māte, qui ont deux prin-

deux ponts de la rivière de Seine. Touchant cette même victoire du 14. Mars, l'audict an 1590. Sa Majesté escriuit au Duc de Longueville, & à plusieurs autres, pour s'en res-iouyr & en faire rendre graces à Dieu. Le Roy seiourna quinze iours dedans Mante, pour refreschir son armée: cependant les Parisiens & ceux de saint Denys pensoyent à se mutiner: & le Duc de Mayene ayant seiourné quelques iours à saint Denys, print le chemin de Flandres pour aller querir du secours: le Commandeur Morré courut en poste vers le Duc de Parme, pour luy dire des nouvelles de France. Quant au Roy, il s'aprocha de Paris, au mois d'Auril, se rendit maître de Corbeil sur Seine, de Lagny sur Marne & de Melun, puis tenta Sens en Bourgogne, où il ne fit rien par la faute de quelques vns, desquels il pensoit devoir estre mieux seruy. Retourné en diligence vers Paris, il se saisit du Pont Charenton, & de quelques autres places es environs, pour la commodité de son armée, où il y auoit environ douze mille hommes de pied & trois mille cheuaux. Les Parisiens estoient six fois autāt, & le Duc de Nemours y commandoit, lequel fai-

soit faire quelques forties. Cependant pour monstrier l'animosité de grands & petits, contre leur Seigneur souverain, la Cour de Parlement de Roüen donna vn Arrest contre les Gentilshommes & autres qui persistoyent à la suite de Henry de Bourbon, Roy de Nauarre: du Mardy dixiesme Aupil 1590. & fut publié le Mercredy ensuiuant. En cette mesme année apres cette tant signalée bataille d'Yury cy deuant mentionnée, le Roy bloqua Paris & saint Denys, dont les habitans furent reduits à telle extremité de famine, qu'au moys de Iuillet, la ville de S. Denys se remit en son obeyssance: & Paris fut lors sur le poinct de se rendre. En consideration du siege de Paris furent faicts diuers traitez, qui ont esté publiés de part & d'autre, pour le contentement des deux partis, & pour instruction à la posterité: comme la resolution de Messieurs de la faculté de Theologie de Paris, sur les Articles à eux proposez par les Catholiques habitans de ladiète ville, touchant la paix ou capitulation avec l'heretique, & admissiõ de Henry de Bourbon à la couronne de France: avec vne lettre aux habitans Catholiques des villes de la France, qui ont iuré la sainte

été vnion. La conclusion & resolution fut
prinse sans aucune contradiction le sep-
tième iour de May l'an 1590. en la troisiè-
me congregation generale sur ce faicte en
la grande sale du college de Sorbonne,
tous les Docteurs de ladicte faculté en ge-
neral & chacun en particulier, ayans esté
appelés par serment à ladicte congrega-
tion : Plus ont esté imprimés à Paris deux
discours, qui monstrent ce que l'on pou-
uoit penser de l'estat de cette pauvre ville.
Le premier est suiuant le tiltre d'iceluy, de
tout ce qui s'est passé en la ville de Paris, es
enuirons, tant de la part du Roy de Na-
uarre & de son armée, que de la part de
Monseigneur le Duc de Nemours, & les
habitans de Paris, depuis la retraite dudict
Roy de Nauarre de deuant Sens, iusques
au douzième Iuin 1590. avec vn Arrest de
la Cour de Parlement, par lequel il estoit
defendu, à peine de la vie, de ne faire au-
cun traité, ny composition avec ledict
Roy de Nauarre. Au moyen dequoy ap-
pert, comme les Parisiens se roidissoient
contre la tempeste; incités à ce faire par
leurs chefs, qui semoyent des bruits de
leurs valeureux exploits, pour enuenimer
& endurcir le menu peuple, qui eut à cō-

batre contre la famine, tãdis qu'on le paissoit de l'esperoir d'une prochaine deliurance: L'autre discours est, suiuant le tiltre qui luy est donn  , des choses plus notables, arri    es au siege memorable de la renomm  e ville de Paris, & defense d'icelle, par Monseigneur le Duc de Nemours, contre le Roy de Nauarre. Par lequel discours fai  t par vn nomm   Pierre Cornejo, l'on peut voir le miserable estat de ladi  te ville, encores qu'il n'en ait dict que le moins qu'il a peu. Il amoindroit des choses en quelques endroits & les grossit en autres, fait le censeur & discoureur tres-impertinemment en la plus-part de son discours: & neantmoins a recogneu beaucoup de choses qui descouurent les malheurs de la Ligue, nomm  ment de la ville de Paris, lors reduite souz le pouuoir des chefs Ligueurs, lesquels pendant que le peuple mourroit de faim de tous costez, faisoient b  ne chere tir  s viures de diuers endroits, par la faueur qu'ils auoyent en l'arm  e du Roy. Autres discours ont est   imprimez, qui donnent encore vne plus ample cognoissance des miseres de Paris. Durant le siege y eut vne conference de l'Euesque de Paris & de l'Archeuesque de Ly   avec

le Roy: à la fin de laquelle, le Roy monstra ausdicts sieurs de Gondy & de Lyon, les lettres qui venoyent d'estre surprinses, enuoyées par Mendozze au Roy d'Espagne, par lesquelles il se plaignoit que trop tost, les Theologiens auoyent resolu qu'il estoit licite à ceux de Paris, d'enuoyer vers le Roy qu'ils apelloyēt le Prince de Bearn, pour traicter de pacification, & finit sa lettre par ce mot, Dieu sauue vostre Catholique Majesté, & me vueille consoler: & estoit ladiète lettre escrite du cinquiesme de ce moys. Et sur cette occasion, sa Majesté conta ausdicts sieurs de Gondy & de Lyon, qu'il auoit nouuelles certaines de Bearn, de la Rochelle & d'Angleterre que l'armée naualle d'Espagne qu'il enuoyoit en Bretagne, cōposée de deux mille cinq cens hommes (& que toutesfois ils s'estoyent vantez par tout estre de quinze mille hommes) auoit esté desfaiète sur la coste de Biscaye par les Anglois, & quinze nauires retournées à Coraga, & les gēs de pied mis en garnison sur la coste de Navarre: auoit aussi nouuelles qu'un des principaux Secretaires du Roy d'Espagne nommé Antoine Perez, ayant esté prins prisonnier & mis à la question, & cōdam-

né à mort, estoit euadé en Arragon, & que ceux de la Iustice l'ayans receu, auoyent mādé au Roy d'Espagne, que s'il luy vouloit demander quelque chose, ils luy feroient iustice, & cependant ont esslary ledict Perez. Il s'est faiēt & imprimé vn sommaire discours, de ce qui aduint en l'armée du Roy, depuis que le Duc de Parme se ioignit à celle de la Ligue, iusques au 15. du moys de Septembre, qui seruoit d'instruction aux gouuerneurs, lieutenans generaux des Prouinces, à fin d'en informer les affectionnez seruiteurs & subiects de sa Majesté. Tandis que les Parisiens lutoient avec la famine & la mort, le Pape Sixte cinquiesme mourut le 27. d'Aoust & eut pour successeur vn geneuois, surnommé Urbain 7. qui ne tint le sainēt Siege que 13. iours, pour faire place à Sfondrate Cardinal de Cremonne, qui fut surnommé Gregoire 14. du tout Espagnol. Le Duc de Parme avec sa puissance ayant debouclé Paris, assiegea Corbeil, laquelle il print avec tres-grande perte de ses gens, & encores plus de sa reputation: car ce fut l'que sa forte armée s'affoiblit, & que durā qu'elle s'y amusoit, le Roy se remit sus, dressa des nouueaux desseins qui reduirē

la Ligue en plus grandes difficultés que paravant. Les Agêts du Roy d'Espagne estimoient bien remplir deslors sa bõne ville de Paris (ainsi l'Espagnol l'appelloit il en ses lettres) de compagnies Espagnolles & Vuallonnes : mais d'un costé il n'y auoit gueres à manger : De l'autre, si tost que les chefs de la Ligue & les Seize & quarante de Paris se virent vn peu au large, ils commencerent à remercier le Duc de Parme, & le prier de s'en retourner prendre repos à Bruxelles. Cette priere estoit vn secret commandement : car d'une part son armée diminuoit à veuë d'œil, de l'autre, il se voyoit au milieu d'une populace inconstante, & leur laisser les forces pour les maîtriser, c'estoit les perdre, & se hazarder luy mesmes à estre desfaict, par-ce que le Roy luy seroit incontinent sur les bras. Pourtant delibera de s'en retourner le mieux accompagné qu'il peut, de peur d'estre battu, & partit sur la fin de Novembre. Toutes ses forces luy firent bien besoin : encore le Roy ne laissa il de le conuoyer, harcelant & harassant iusques aux frontieres d'Artois, & dismant de iour en autre son armée, pour aprendre aux Espagnols que France est vn fardeau trop pesant pour

leurs espaulles. Si tost qu'ils fuirent, Corbeil & les autres places qu'ils auoyēt prises se virent regaignées sur eux. Sur cette retraite du Duc de Parme, le Roy se trouua en personne, & toute la Noblesse là y vint trouver de toutes les Prouinces voisines : ce qui fit marcher l'armée dudit Duc fort serrée, dont luy aduint qu'elle fut fort incommodée, & qu'il en demeura neantmoins tousiours quelque proye. Et par ce moyen le Roy contraignit le Duc de Mayenne d'aller avec ses meilleures forces, accompagner ledit Duc de Parme, & ce faisant laissa quelques places desgarnies, sur lesquelles l'armée de sa Majesté, ce-pendant, plus facilement peut entreprendre & proffiter quelque chose. Sa Majesté aduertie de la volōté que le Duc de Parme auoit de se retirer, se resolut de partir d'Escouy en Normādie, le quatriesme du mois de Nouembre, avec ce quelle auoit de caualerie Françoise, qui n'estoit pas en grād nombre, & quelques harquebusiers à cheual, laissant son armée souz la charge de Monsieur le Marechal de Birō, pour l'employer en ce qu'il cognoistroit le plus propre, & y laissa, Monsieur le Chancelier, & trois de ses Secretaires d'Estat,

pour vacquer aux affaires qui se pour-
royent presenter, pendant son voyage.
Elle se rendit bien tost apres à Compie-
gne, où elle ne seiourna gueres que toute
la Noblesse de Picardie ne se vinst rendre
à luy, & fist incontinent vn corps de huit
cens bons cheuaux. Elle eut peu de iours
apres la nouuelle, comme la ville de Cor-
beil, la nuit de la veille de saint Martin,
auoit esté reprinse. Le Duc de Parme ne
retourna pour la reprendre, ains seiourna
quelque temps aux enuiron de chasteau
Thierry, qui fut cause que sa Majesté y
fut, & y laissa Monsieur de la Nouë, avec
bonne troupe de Noblesse pour l'y atten-
dre, s'il le fust venu assieger. Ledit Duc
faisoit ce seiour pour attendre les forces
du Duc de Mayenne, à fin qu'il peust che-
miner plus seurement. Lesquelles arriuées
ledit Duc commença à cheminer, & sa-
dicte Majesté à aller aussi droict à luy, &
commença à le ioindre de pres, le 23. du-
dict mois de Nouembre, & l'ayant à l'in-
stant enuoyé recognoistre, elle en eut ce
mesme iour, pour sa bien venue, vne com-
pagnie de gens de pied, Espagnols, qui fu-
rent tous taillés en pieces. Le vingt-trois-
me, le Duc deslogea de Feismes, pour aller

loger à Pontauers, où passe la riuere d'Esne, la Majesté le fut aussi rencontrer, partāt de Fere en Tartenois, accompagnée de huiēt cens bons cheuaux & autant d'harquebusiers à cheual, & fatigua tellement cette armée, qu'il leur rompit le dessein de leur logis. Ce qu'ayant faict, la Majesté se retira au village de Longueual, où les ennemis vindrent donner des coups de lance iusques dedans les portes : mais les harquebusiers qui estoient sur les murailles, leur firent vne salue, quasi à mire, de sorte qu'ils en tuerent grād nombre, & les contrainrent de s'en tenir plus loin. Ainsi la Majesté se retira & fut son logis à Pontarfy, & l'ennemy fut contrainct de camper toute la nuit, se doutant du deuant & du derriere : par-ce que ce mesme iour Monsieur de Neuers, deuoit ioindre le Roy, avec cinq cens cheuaux qu'il amenoit de Champagne, & les sieurs de Giury & Parabelle qui venoyent de Melun, & amenoient encore vne bonne troupe, qui se rendirent tous ce mesme iour, pres de la Majesté. Le vingt-neufiesme la Majesté estoit partie avec mille bons cheuaux, en intention de faire vne bonne charge, & emporter toute leur arrierégarde : mais

deux canons estans demeurez embourbés, comme ils cheminoyent, leur auantgarde qui estoit desja aduancée, rebroussa, & demeura toute leur armée cedit iour en bataille, au lieu où estoient lesdicts canons, & y campa toute la nuict, de sorte que pour ce iour, il ne se peut rien entreprendre sur eux. Le lendemain qui fut le dernier dudit mois, sa Majesté leur dist à Dieu par vn combat de cauallerie, qui ne fut pas moins honorable qu'auoit esté sa retraite du precedent. Sadiete Majesté aduertie que l'ennemy partoist, prenant le chemin de Marle, pour gagner l'arbre de Guyse, & sortir hors du Royaume, elle ordonna à toute sa cauallerie, de se rendre à Crecy, avec les armes & sans bagage. Et estant le premier arriué au rendez vous (les autres ayans esté vn peu paresseux) ne voulant perdre l'occasion de voir l'ennemy, ledict iour, qui deuoit estre celuy de leur departement, elle fit partir ledict sieur Baron de Biron, & le suiuit de cent pas, avec quarante gentilshommes seulement. Depuis y suruint Monsieur de Longueville, avec cinquante cheuaux & le reste de la Cornette. Sadiete Majesté ioignit le premier ledict sieur Baron de Biron, ayant

laissé sa troupe vn peu derriere. Il parut au mesme temps, au coing d'un bois, en deux troupes, environ cent lances, y ayant en chacune troupe, vne cornette de Caradins : soudain ils partent pour charger les coureurs dudit sieur Baron. Sa Majesté fit aduancer sa troupe, & y estant le sieur de Charmont, qui menoit environ vingt cheuaux arriué le premier, ledit sieur Baron leur fit vne si rude charge, qu'il leur fit tourner teste, iusques à leur gros qui estoit de six vingts lances que menoit Georges Bate, qui faisoit la retraicte, lesquels tous ensemble reuindrent à la charge. Et par-ce que le cheual dudit sieur Baron de Biron auoit esté blessé d'un coup de lance, & d'un coup d'espée, il eust esté en danger de se perdre, sans que sa Majesté r'allia ceux qui s'estoyent separez, & fist auancer le reste de sadicte troupe, laquelle rassemblée fit vne charge si furieuse, à toute cette arrieregarde, des ennemys, qu'elle plia & se sauua à toute bride, laissant leurs morts tous armez sur la place, & plusieurs chariots : mais si le reste de l'armée eust esté si diligent, que sadicte Majesté, il en fust bien demeuré dauantage, & toute l'arrieregarde y eust esté desfaicte.

Par ce moyen le Roy empescha le Duc de Parme de rien entreprendre en son passage, & en cette retraicte, fit sur luy plusieurs desfaictes: l'ayant contrainct de loger si serré, & faire de si grandes iournées, qu'il a fallu qu'il ait laissé vne grande file de ceux qui n'ont pas peu marcher si legerement, & de leurs bagages, qui est tout demeuré à la mercy des payfans, qui leur ont faict mauuaise guerre. En outre le Roy occupa en ce passage les meilleures forces dudict sieur de Mayenne, de sorte que le Marechal de Biron, durant iceluy, print cinq ou six villes, & vne vingtaine de forts & châteaux, où les ennemys tenoyent garnison. Depuis la sortie du Duc de Parme & de ses forces hors du Royaume, sa Majesté alla faire son entrée en la ville de saint Quentin, où elle fut receuë avec vne allegresse extreme des habitans d'icelle, qui mesmes à cette occasion, firent vne fort honorable despenſe. Sa Majesté y eut nouvelle le dixiesme de Decembre, comme le ^{Surprinſe} _{de Corbie} mesme iour, la ville de Corbie auoit esté remise en son obeyſſance, par vne entreprinſe que les sieurs de Humieres, de la Boiffiere son beau-frere, & de Parabelle y executerent fort heureusement, à la poin-

te du iour, avec vn petart & vne escalade, ayant eu grand combat par ceux de la garnison, qui y estoient en grand nombre, lesquels y furēt tous tuez, mesmes le sieur de Belle fourier qui en estoit gouuerneur, pour la Ligue, sans que lesdicts sieurs y ayent perdu que deux de leurs troupes. Ils trouuerent dedans ladicte ville deux gros canons, deux couleurines, & plusieurs autres pieces mōtées sur rouës, & vne grande quantité de munitions de guerre & de viures, comme estant vne des plus fortes places de Picardie, & laquelle seruira beaucoup à recouurer ou à faire reduire les autres qui sont detenuës par ceux de la Ligue, & maintenant par les Espagnols. En diuers endroits du Royaume, comme en Bretagne, Prouence & Languedoc, la Ligue se remuoit & faisoit quelques exploits, au preiudice des affaires du Roy. Au commencement de l'an mil cinq cens nonante vn, le Roy continua de reserrer ceux de Paris, lesquels ayans esté quelque peu soulagés, se retrouuerēt en mesmes difficultez que deuāt. La Royne d'Angleterre, sa Noblesse & quelques marchands enuoyerent bonne somme d'argent au Roy pour le soulagemēt de ses forces. Le sieur

des Diguieres chassa la Ligue hors de Greble, parlement de Dauphiné, contraignāt vn nommé d'Arbigny qui y commandoit d'en sortir, sans que le Duc de Sauoye ny aucun autre Ligueur peust venir à temps au secours. Ce fut vn exploit de tref-grande importance, & vn coup que la Ligue n'ayant sceu parer, depuis ses affaires allerent en decadence, sur tout en Dauphiné & ailleurs. En Normādie le Duc de Montpensier s'empara de Honfleur, & contraignit les Ligueurs de se reserrer. Le Vicōte de Turenne venu en Alemande, pour la leuée des Reistres, commença à dresser l'armée de laquelle le Prince d'Anhalt fut déclaré chef. D'autre costé, le nouveau Pape promit à la Ligue, huit mille hommes de pied, & quatre mille cheuaux, souz la cōduite de Sfondrate son nepueu. Pendant ces entreprinſes le Cheualier d'Aumale en fit vne sur sainct Denys, le iour sainte Geneuiefue, estimant s'en rendre maistre. Il y alla avec beaucoup de forces, mais il n'en retourna pas, d'autāt que Monsieur de Vic gouuerneur de la ville, ayant ouy l'alarme le vint récontrer pres de l'espée Royale, où ledict Cheualier estoit desja, & le chargea là si rudement qu'il

Mort du
Cheualier
d'Aumale.

luy fit perdre la vie, & par ce moyen garantir la ville pour le Roy. Les Parisien furent fort estonnés de cette perte notable de ce chef & de plusieurs autres, de plus affeurez en leurs troupes, & neant moins ils s'entretenoyent en leurs miseres, en grande esperance du secours d'Italie & d'Espagne. Quant au nouveau Pape ayant assemblé le Consistoire, il excommunia derechef le Roy & ses adherans, faisant dresser vn monitoire, enuoyant à cette fin Landrian Nonce dudit Pape en France, où estoit le Cardinal de Plaisance son Legat, & n'en bougea de long temps apres. Pareillemēt il octroya aux Ligueurs vn secours de six mille Suisses, deux mille pictons & quinze cens cheuaux, souz la conduite de Francisque Sfondrale son nepueu, accompagné du Marquis de la Corne, de Vergile Vrsin & autres chefs. Le Roy d'Espagne enuoya vne armée Navale en Bretagne, qui se faist du port de Blauet, que les Espagnols ont depuis rendu plus fort qu'il n'estoit. La Nouë y fut enuoyé pour faire teste aux Espagnols, lesquels pretendent droict sur cette Province, alleguans que n'estant demeuré aucun successeur de la race de Valois, Eliza-

beth Royne d'Espagne fille de France, ayant deux filles, à l'aînée d'icelles appartient la Duché de Bretagne: Mais cette Duché estât annexée à la couronne, pour n'en pouuoir estre desmembrée, comme les histoires en font foy, l'Infante d'Espagne peut autant selon le droict estre Duchesse de Bretagne que Royne de France. Le Comte de Brissac deliuré de prison où il auoit esté detenu sept moys, fut enuoyé demander secours pour la Ligue au Duc de Parme, lequel fit du froid, au regard des gens, mais pour tenir la Ligue en haleine, la secourut de quelque somme de doubblons, pour subuenir à ce qui estoit vrgēt. Tandis le Roy ne dormoit pas, ains fit l'entreprise sur Chartres, ville de tres-grande importance, de laquelle finalement il se rendit Maistre, à l'ayde entre autres du sieur de Chastillon, qui par son industrie, fit dresser vn pont (comme il estoit l'vn des plus rigoureux & valeureux gentils-hommes de France) & contraignit les assiegez de venir à composition. Au moys d'Auril de ladicte année, fut faicte en Provence, la desfaiete d'une armée Ligueuse, par les sieurs des Diguieres & la Vallette, & estoit cette armée cōposée de mille mai-

*Chartres se
rend au Roy.*

stres, & de seize ou dix-huict cens harque-
busiers, tant Prouençaulx, Espagnols que
Sauoyards : & fut cette desfaicte à Espar-
rō de Pallieres le 15. dudiēt mois. Le Duc
de Mayenne n'ayant peu secourir Char-
tres, pourfuiuit en ce temps l'entreprinse
sur chasteau Thierry qu'il assiegea & print
estant abandonné, & peu apres eut aise-
ment le chasteau, par capitulation. Le sieur
d'Essomme frere du Cardinal de Lenon-
court, apres auoir quitté & remis les seaux
de la Ligue, és mains du Presidēt de Nul-
ly, se retira dedans chasteau Thierry, dont
il eut le gouuernement, à cause de son Ab-
baye d'Essomme, qui est aux faux-bourgs,
& son lieutenant fut le capitaine Pescher.
Après cet exploit, le Duc de Mayenne &
autres de sa maison, firent vn voyage à
Reims, où ils establirent vn nouveau Ar-
cheuesque: D'autre part le Duc de Sauoye,
l'Agent du Duc de Lorraine, & le Presi-
dent Ianin, l'vn des principaux conseillers
du Duc de Mayenne s'embarquerent à
Marseille sur la fin d'Auril, pour aller en
Espagne, à fin d'en r'apporter argent & in-
structions bien particulieres de ce que la
Ligue auroit à faire à l'aduenir, tant delà
que deçà les monts : tandis que la famine
con

continuoit à presser les Parisiens, que les garnisons du Roy à saint Denys, & sur les ruières espuisoyent de deniers.

En ce mesme moys, le sieur de Brion fut surprins par Guyonuelle Ligueur dedans Mirebeau en Bourgongne, & arresté prisonnier. On luy tua huit soldats, & fut trouuée bonne somme de deniers, force bleds, nombre de cheuaux & beaucoup d'armes en ce chasteau. Au mesme moys le Vicomte de Turenne arriua à Francfort, pour haister l'armée des Reistres qui saprestoit pour le secours du Roy, lequel estoit apres à s'asseürer toute la Normandie, auant que penser à la Picardie, tandis que le Côte Maurice & les Estats de Hollande tailloyent de la besongne au Duc de Parme, lequel és moys de May, Iuin & Iuillet, perdit plusieurs places & beaucoup de gens en rencontres & escarmouches. Le Roy estant à Mante, fit au commencement de Iuillet son Edict, contenant re-stablissement des Edicts de Pacification, faicts par le deffunct Henry troisieme sur les troubles de ce Royaume. Il fit aussi vne declaration qu'il auoit des ce temps là, de maintenir l'Eglise & Religiõ Catholique, Apostolique & Romaine en ce Royau-

me : ensemble les droicts & anciennes libertés de l'Eglise Gallicane. Aussi y eut vn Arrest de la Cour de Parlement seante à Tours , sur les Bulles monitoriales de Gregoire, se disant Pape &c. comme aussi y en eut vn autre de la Cour de Parlemēt de Chaalons au moys de Iuin de ladicte année 1591. Le parlement de la Ligue à Paris indigné de ce qui auoit esté faict à Chaalons fit vn Arrest contraire, i'estime qu'il n'en fit pas moins contre celuy de Tours. Le ieune Duc de Guyse qui estoit prisonnier à Tours se sauua de la prison le 15. iour d'Aoust, s'estāt glissé avec vne corde du plus haut du Chasteau où il estoit prisonnier: trouua ce qu'il luy falloit aposté de longue main , puis se retira vers le sieur de la Chastre , qui auoit disposé en chemin vne bonne troupe, pour le conduire à sauueté : la Ligue fit des feux de ioye de cette deliurance. Cependant le Roy ne dormoit pas , qui mit le siege deuant Noyon , & la print par composition à la veuë du Duc de Mayenne & de toute son armée, le 19. iour d'Aoust audict an. Le 18. du moys de Septembre ensuiuant, fut desfaicte l'armée du Duc de Sauoye, par le sieur des Diguieres , en la plaine de

*Monsieur
de Guyse se
sauue.*

Pontcharra, pres le chasteau de Bayard, vallée de Graisiuodan. Apres ces exploits de guerre, plusieurs qui auoyent adheré à la Ligue, voyans que les affaires ne succedoyent pas selon qu'ils l'auoyent estimé, commâcerent à se refroidir, & à chercher les moyens de se repatrier. De ce nombre estoient quelques officiers de Iustice, cōtre lesquels (pour-ce qu'ils vouloyent de plein fault, r'entrer és charges publiques) fut faicte au grand Conseil du Roy, vne belle remonstrance, par M. François de Claris, Conseiller & Aduocat general de la Majesté audiet Conseil. Le quinziésme de Nouëbre audiet an, Messieurs le President Brisson, Larcher Conseiller en la Cour, & Tardif Conseiller au Chastelet de Paris, furent estranglez au petit Chastelet par les seize, puis leurs corps mis en Greue & exposez à la veuë du peuple, où ils furent deux iours. Le Duc de Mayenne aduertiy de ce faict, alla à Paris, fit sortir Bussy le Clerc de la Bastille, & le quatriésme de Decembre ensuiuant fit emprisonner plusieurs desdicts seize, & en fit pēdre quatre au Louure; & des cette heure là, les seize perdirent leur autorité, qui leur fut ostée. Il s'est faict vn discours sur la mort

Mort de
President
Brisson.

dudiſt ſieur Preſident, contenant les Arreſts donnez à l'encôtre des aſſaſſinateurs. Le Duc de Sauoye en ce temps, faiſoit la guerre contre Geneue, laquelle il comencea en Aouſt 1589. & acheua à la fin de cette année 1591. ſes gens y commirent vne infinité de maux, ſur les ſubieſts de la dicte ville de Geneue, avec toute ſorte d'hoſtilité. L'année enſuiuant commenceante, le Roy aſſiegea la ville de Roüen, en laquelle commandoit le ſieur de Villars, & fut long temps deuant: mais en fin en leua le ſiege, pour aller au deuant d'une puiffante armée d'Eſpagnols, conduits par le Prince de Parme, qu'il ſerra de telle façon entour la riuere de Seine, que ſans l'intelligence qu'il peut auoir à cette heure là, pour ſe ſauuer en paſſant la riuere, il euſt faiſt, avec toute ſon armée, ſon cimetiere en Normandie: mais luy qui eſtoit vn grand Capitaine voyant le danger auquel il eſtoit, vſa de ſa dexterité au faiſt de la guerre, pour eſchaper ce danger, le Roy apres la retraicte de l'armée ennemye, qui fut par luy ſuiuie iuſques aux limites du pays d'Artois, à ſon retour fit pluſieurs exploits de guerre, aſſiegea & print la ville d'Eſpernay, & comme ſa Maieſté voulut

investir la ville, tailla en pieces trois cens tant Vvalons qu'Espagnols qui vouloyēt se ietter dedans. Et estāt comme tousiours elle ha esté la plus forte, Dieu l'inspira en l'an 1593. de desirer à estre instruite, en la Religion Catholique, & sans aucune contrainte, mais considerant en elle mesme que la Religion qu'on luy auoit enseignée de ses ieunes ans n'estoit que depuis peu d'années auparauant, & que celle des Catholiques estoit bien plus ancienne, surquoy il desiroit auoir quelque resolution, pour sçauoir laquelle estoit la vraye: & de faict il eut satisfaction de son desir, par le moyen de Monseigneur l'Archeuesque de Bourges, de Maistre René Benoist Docteur en Theologie, & de quelques autres Docteurs, par lesquels (cooperant la grace de Dieu) il fut si bien instruit de tous les points de la Religion, & de toutes les vrayes marques de l'Eglise de Dieu, qu'il cogneut manifestement son erreur, en remercia Dieu, & requit qu'il fut admis au giron de l'Eglise, de laquelle des sa naissance il auoit esté eslongné. Au commencement de cette mesme année 1593. commencerent les Estats de la Ligue à Paris, & suivit la trefue & conference qui fut ac-

cordée de part & d'autre, & faicte à Sure-
ne & autres lieux, où fut proposée la vo-
lonté du Roy, ne tendant qu'au repos de
son Royaume, à laquelle les deputez de la
part de sa Majesté ne pouuans auoir res-
ponce, furent contraints en escrire aux
deputez establis de la part du Duc de
Mayenne qui estoient retournez à Paris,
ce qui fut le 23. Iuin 1593. & estoient les
deputés de la part du Roy les sieurs Ar-
cheuesque de Bourges, Chauigny de Be-
lieure, Gaspar de Scomberg, Camus A. de
Thou, & Reuol, lesquels en escriuirēt aussi
à Monsieur de Belin, le 27. dudiect moys,
faschés d'une telle longueur & temporise-
ment, tant ils desiroyēt le repos de l'Estat,
cōblé lors de toute misere. Et neantmoins
ne sceurent si bien faire que pour lors, ils
tirassent de cette Conferēce le fruit qu'ils
en auoyent esperé. Durant icelle le Roy
print la ville de Dreux, & quelque temps
apres estant bien & deuēment instruiēt de
la foy Catholique, delibera de se conuer-
tir, & abiurer l'erreur qu'il auoit creu par le
passé, & bien tost apres donna, deuāt tous
suffisant tesmoignage de sa sainte cōuer-
sion, le 25. Iuillet iour de saint Iacques &
saint Christophe, en la grande Eglise de

sainct Denis, de laquelle le chœur estoit tendu de tapissierie releuée de soye & d'or: & l'Autel paré d'ornemens Royaux, de velour cramoisy brun, couuerts de fleurs de lys, où les armes de France & de Nauarre estoient attachées, avec la chapelle de mesme parure. Vis à vis y auoit vn Dais de mesme veloux & de toile d'or: & au dessous, vn oratoire couuert de mesme veloux, avec deux oreillés, l'vn en bas, & l'autre dessus pour s'agenouiller & appuyer. Dedās les chaires du chœur, du costé droict, estoient toutes les Dames & Damoiselles, qui y peurent prendre place: & le costé gauche estoit vuide. Monseigneur le Cardinal de Bourbon, accompagné de neuf Euesques, de Monsieur l'Archeuesque de Bourges, & de tous les Religieux de saint Denys, qui portoyent la croix & le liure de l'Euangile, s'acheminèrent iusques à l'entrée de l'Eglise, vis à vis du Benestier: où y auoit vne chaire couuerte de damas blac, & sur les deux bouts du dossier, estoient les armes de France: dedans laquelle Monsieur de Bourges qui faisoit l'office, s'assist: & là attendirent le Roy vne bonne heure & demye: Pendant lequel temps, l'autre porte qui est au com-

manquement de la place, vis à vis l'Eglise, demeura fermée; iusques à ce qu'oyant le tambour des Suisses, qui accompagnoyent le Roy, elle fut ouverte. Sa Majesté sortit du logis Abbatial, accompagné de quarante Archers de ses gardes, portans le hocqueton escaillé d'argent, & vestus de ses liurées. Et apres douze trompettes, suivies de toute la Noblesse: Au milieu de laquelle, sa Majesté estoit environnée des Archers de sa garde Escossoise, & marcha de cette façon à pied, les rues tendues, & couvertes de jonchées, iusques à l'Eglise, avec vne grande alegresse de tout le peuple, criant, Viue le Roy. A l'entrée de la porte, il trouua Monsieur l'Archeuesque de Bourges, accompagné de tous les Euesques & Religieux de l'Abbaye: Aux pieds duquel il se ietta, où estant, protesta de viure & mourir en la Religion, Catholique, Apostolique & Romaine; & iura de la maintenir enuers tous & contre tous: Et apres bailla vn papier audit sieur Archeuesque, dedans lequel estoit sa profession de Foy. Puis ayant receu l'absolution & benediction, il fut relevé par les Euesques, & s'achemina droit au chœur de l'Eglise, ayant tous les Ec-

clesiastiques devant luy, & au milieu de tous les Suisses qui faisoient deux rangs dedans la Nef, battant le tambour. Il arriva iusques à l'Autel où l'attendoit ledict sieur Archevesque, devant lequel il s'agenouilla, puis se relevant alla faire le signe de la croix sur l'autel, & le baïsa, puis se retira avec ledict sieur Archevesque derriere l'autel, lequel l'ouyt en confession, & le ramena s'agenouiller & accouder sur l'oratoire qui estoit préparé souz le Poisle, ayant à sa main droite ledict sieur Archevesque, faisant sa charge de grand Ausmonier, & à la gauche feu Monseigneur le Cardinal de Bourbon: Et là ouyt en grande deuotion la Messe, qui fut célébrée par Monsieur l'Evesque de Nantes. A l'entour de sa Majesté estoient tous les Euesques & Abbés, les Curés de saint Eustache de saint Sulpice & saint Merry, & derriere eux, les Seigneurs & Gentilshommes de la Cour. Dedans les chaires du chœur, à la main gauche estoient Monseigneur le Chancelier, Messieurs de la Cour de Parlement, & aucuns de la Chambre des Comptes. Durant la Messe sa Majesté

alla à l'offrande, conduite par feu mondict Seigneur le Cardinal à main gauche : ledict sieur de Bourges à la droicte, & Monseigneur le Comte de saint Pol derriere luy : où après auoir baisé la platine, il ietta dedans le bassin vn escu, que luy bailla ledict sieur Comte. Apres l'Euangile dict, Monseigneur le Cardinal luy apporta le liure à baiser : puis apres, *l'Agnus Dei*, la paix luy fut présentée par ledict feu sieur Cardinal. La Messe dicte, on chanta *Vive le Roy*, en musique, & largesse fut faicte par toute l'Eglise, d'une grande quantité d'argent : Puis tambour battant, sa Majesté fut conduite en mesme ceremonie iusques en son logis, avec vne grande esiouyffance & clameur du peuple, criant, *Vive le Roy*, & grand bruit de l'artillerie, qui tiroit de dessus les murailles de la ville. A son disner ledict sieur Archeuesque consacra la table, & feit chanter les graces en Musique, puis alla faire son sermon, auquel sa Majesté assista, & aux vespres aussi. Le lendemain fut receu encores en l'Eglise, en ceremonie, par tous les Religieux, qui vestus d'habits sacerdotaux, allerent au deuant de luy, à l'entrée de l'Eglise, supplier sa Majesté les auoir en sa protectiō : ce qu'il leur pro-

mit faire. Au moys d'Aoust ensuiuant la trefue generale commencea, & dura trois moys, & fut cōtinuée iuſques au premier iour de l'an 1594. Et icelle finie le Roy ſe fit ſacrer & courōner en ſa ville de Chartres, par l'Eueſque dudit lieu, le 27. de Feurier, avec grandes pompes & magnificences, comme il appartenoit à vn ſi grād Prince. De là ſuiuit la reductiō de Meaux, par le moyen du gouuerneur Monsieur de Vitry, qui ſe ietta de ſon bon gré entre les bras du Roy, auſſi toſt qu'il le ſceut eſtre conuertſy & ſacré: Surquoy il ha faiçt vne belle remonſtrance, qui teſmoigne ſa fidelité, apres qu'il ha decouuert les ruſes & piperies des Eſpagnols. Monsieur de la Chastre, Seigneur non moins iudicieux & genereux François en a faiçt de meſmes, remettant en l'obeiſſance du Roy ſes villes d'Orleans & de Bourges: & pour ce faire, ledict ſieur de la Chastre Mareſchal de France, fit vne belle declaration aux habitants de la ville d'Orleans, en l'aſſemblée tenue en ſon logis, le Ieudy 17. Feurier 1594. pour les induire à recognoiſtre le Roy, representant par icelle les cauſes & raiſons, pour les y eſmouuoir. Le Roy fit vn Edict ſur la reduction de ladicte ville

d'Orleans, donné à Mante au moys de Feurier audict an & publié le dernier iour dudit moys. En ce mesme temps les habitans de Lyon, s'opposerent aux desseins & entreprinſes que pouuoit auoir deſſus le Roy d'Eſpagne, & ſe rangerent de leur bon gré au party du Roy, auquel ils ſont tres-affectionnés, comme depuis ils luy ont bien faiſt paroistre, par tous les honneurs qu'ils ont peu faire à ſa Maieſté. Le Roy enuoya lettres à ſa Cour de Parlemēt ſur cette reduction de ſa ville de Lyon, pour eſtre de tref-grande importance à l'aduancement de ſes affaires, & eſcriuit de Melun le treizieme iour de Feurier audict an. Je declareray en brief ce qui ſe paſſa en la reduction de ladicte ville en l'obeiſſance de ſadicte Maieſté, le ſeptieme, huitieme & neuſieme de Feurier. Le Roy d'Eſpagne, lors auoit confirmé plus que iamais ſes pratiques & intelligences avec la Ligue, comme l'on deſcouurit par ſes lettres eſcrites à Madric l'onzieme de Ianuier, à ceux de ſa faction en la ville de Lyon, par leſquelles il les aſſeuroit de ſecours d'hommes & d'argent: En execution dequoy, le Duc de *Terra Noua*, Gouverneur de Milan, en meſme temps leur

escriuit, donnant assurance d'une levée de gens, & mesmes de douze cens Suisses par le commandement de son Maistre, qu'il devoit avec autres forces, souz pre-
texte de secours, contre le Marquis de S. Sorlin, faire approcher de ladicte ville, pour apres les avoir introduits & faict glis-
ser parmy les habitans, avec la faueur de ceux du party d'Espagne, se rendre mai-
stre de la ville. Sur ces termes quelques bons seruiteurs du Roy, proposant le dan-
ger de leurs personnes, à la conseruatiō de leur liberté, & au tesmoignage qu'ils desi-
royent rendre de leur affection au service du Roy, en vne si grande necessité & peril si euidēt, de voir leur ville tomber en la domination & tyrannie de l'Estranger, du consentement de quatre Escheuins serui-
teurs du Roy, le Sammedy cinquiesme à huit heures du soir, se resolurēt qu'ils pré-
droyēt les armes, pour remettre la ville en l'obeissance de sa Majesté: & pour favori-
ser l'execution d'une si belle & perilleuse entreprinse, en aduertirent le sieur Alphonse Corse de l'amitié & secours du-
quel, en vne si bonne occasion, ils auoyent assurance. A quoy il ne faillit pas, ains en toute diligence, se rendit au faux-bourg de la Guillotiere, le Lundy

ensuiuant septiesme dudiect moys, avec de belles troupes de gens de guerre. Le mesme iour entre les trois & quatre heures du matin, le sieur Iaquet Escheuin, & l'un des quatre assisté des sieurs de Liergues & de Scue, suiuis de bõ nombre de gens armez, du quartier du Plastre, donnerēt au corps de garde de l'Herberie, au pied du põt, où commandoit en personne Thierry Escheuin, l'un des plus perdus & factieux, lequel apres beaucoup de resistance, fut en fin forcé de quitter la place. Au bruit des harquebusades l'alarme fut donnée par toute la ville, & les barricades aussi tost faictes, en la pluspart des quartiers par ceux qui estoient aduertis de ce qui se deuoit faire. Sur cette premiere esmotion chacun en son quartier cria, viue la liberté Françoisë, & qu'il se falloir deliurer de toute tyrannie & seruitude estrangere. L'Archeuesque voyant vne si prompte & inopinée prise des armes, accompagné des sieurs Baron de Luz & de Chascul ses nepueux, apres auoir demeuré deux heures, auant que de pouuoir passer le pont de la Saune, se rendit en fin en l'hostel de ville, & remonstra en l'assemblée qu'il falloir estre neutre, attendant la resolution du Pape, & le retour

de Monseigneur de Nevers. Cette opiniõ fut si mal receuë par ceux qui estoient en ladicte assemblée, que sur leur murmure & mescontentement, ledict Archeuesque se retira assés tost en son logis, & neātmoins, pour ce iour là, ne fut parlé que sourdemēt du seruice du Roy, ny faiēt autre executiõ, *Lyon se rēd a l'obeissan- ce du Roy.* sinon que les Imprimeurs se saisirent de l'Arsenac & qu'on s'asseura des personnes des sept Escheuins, de quelques Penons & autres factieux. Mais la nuit du Lundy au Mardy, la vigilance & sollicitation de ceux qui auoyent hardiment acheminé cette affaire, eut tel pouuoir sur le peuple, que le Mardy mesme au matin, on commancea à prendre les vns des autres, des pennaches blancs, & peu de temps apres, des escharpes blanches: & à dix heures de matin, ne se trouuoit plus de tafetas ny de crespes blancs dedans la ville, tant fut grande l'affluence de ceux, & iusques aux enfans qui voulurēt porter les marques & enseignes des bons François. Quelques seruiteurs du Roy en firent largesse, & se perdit le son des cloches, par la force de la voix du peuple qui crioit, viue le Roy. Il n'y eut ruë ny carrefour, où l'on ne fist feu de ioye, & où l'on ne bruslast les armes & liurées d'Es-

pagne, de Sauoye & de Nemours, & l'effigie de la Ligue, faicte & peincte en forme de Sorciere. Et au meisme instant furent les armes du Roy, mises & esleuées en triomphe par tout. Aux places & barricades les seruiteurs du Roy firent liberalité au peuple, tenans table ouuerte, & beuuās à la santé du Roy. Sur les deux heures apres midy le sieur Colonel Alphōse entra dedās la ville à pied, botté & esperonné, accompagné des sieurs d'Andelot, de Cheurieres, de S. Forjeul, de Bouteon, la Liegue, la Baume, de Mures & plusieurs autres Seigneurs & Gentils-hommes du pays, tous auct l'escharpe blanche. Ledit sieur Colonel estant entré, l'on aduisa à ce qui restoit pour la seureté de la ville, & à la requeste & cry du peuple, furent desmis de leur charge sept Escheuins: sçauoir Amable, Thierry, Iean Baptiste Renaud, Ponsson Bernard, Guillaume Gella, Charles Noirat, Debernny & Claude du Rubis, par deuant Conseiller au siege Presidial, & Procureur de la maison de ville, qu'on peut appeller le flambeau de Lyon, & qui par son liure imprimé en quatre vingts & neuf & par toutes ses parolles a tellement blasphemé, ainsi que plusieurs autres, de
mesme

mesme farine, contre la memoire du feu Roy (que Dieu absolue) & contre la Majesté du Roy regnant, qu'il ne peut plus viure au monde qu'à la honte de tous les François. Ce dernier auoit esté suspendu depuis l'emprisonnement du Duc de Nemours. Au lieu des sept Escheuins desmis, furent creés les sieurs de Combelandes, de Montmartin, le Tresorier Henry, Pelletier, Laurens Conseruateur, Pollalion & Mornieu. Les Capitaines Penons suspects ont esté ostez, & le sermēt de fidelité fait solennellement au Roy, avec plus de ioye, d'allegresse & de contentement qu'on ne scauroit exprimer. Les factieux & adherās à l'Espagnol furent depuis mis dehors, scauoir les sept Escheuins, & avec eux Tourueon, Lieutenāt Criminel Austrain Lieutenant particulier, du Pré & de Bourg, Conseillers au Presidial, le Barō de Vaux, Platel, Piguieres, Prost, Maleual, Antoine Teste, Mathieu Balbany & tous les siens, & les deux de Poggio, ledict Balbany & Poggio Lucquois. Quant au Thresorier Barraillō, Ianetto, d'Allequi & Resinand, ils se sauuerēt en habits desguizez des l'emprisonnement du Duc de Nemours. Mais ce qui est le plus remarquable en cette

execution est, qu'encores que la vie & les biens de tous les partisans d'Espagne fut en la main des fideles habitans, & que par le droict de la guerre, ils peussent venger la mort de plusieurs gens de bien qu'ils auoyent iniustement faict executer par des bourreaux, & la perte des biens par eux pillez, neantmoins ils ont vsé de toute douceur, tant en leurs personnes qu'en leurs commodités, mesmes leur fut donnée seureté & retraite en leurs maisons aux champs, attendans de les remettre & r'appeller, quād la ville auroit obtenu pardon & grace de sa Majesté pour eux. L'Archeuesque eut quelque mécontentement de ce qui estoit ainsi changé, & ayant demandé à sortir, fut prié de demeurer. Il fut resolu en la maison de ville & iuré de n'admettre iamais aux charges publiques, aucuns Italiens. Il faut recognoistre en cette conduite & execution vne grace speciale de Dieu, qui miraculeusement deliura les Lyonnois de la seruitude, iusques à la porte de laquelle ils auoyent donné. L'exemple de cette ville, comme des autres reduictes, seruit comme d'un clair phanal, pour ramener au port de la clemence du Roy, toutes les autres villes, qui s'y sont

rendues: comme Mascō, pres dudiēt Lyō,
 les villes de Roüen, le Haure, Harfleur,
 Montiuillier, Pontcaudemer & Verneuil,
 sur la reduction desquelles villes, y eut let-
 tres patentes en forme d'Ediēt du Roy,
 qui furent publiées à Roüen, en Parlemēt
 le 26.iour d'Auril, audiēt an: car de parler
 de la ville de Paris, remise miraculeusemēt
 en l'obeissance du Roy, c'est plustost la re-
 ductiō de tout l'Estat que d'une ville, puis
 que la rebellion auoit esté la cause de tous
 ces troubles & souflemens. Cette redu-
 ction est telle, qu'elle semble vn songe,
 pour la nouueauté & grādeur du faict, qui
 se passa comme ie diray maintenant. La
 porte sainēt Denys & la porte neufue fu-
 rent ouuertes, par Messieurs de Brissac,
 Gouverneur de la ville, Jean Luillier, Pre-
 uost des Marchands, Langlois & Neret
 Escheuins, hommes renōmés, & qui ont
 par ce moyen beaucoup meritē du public.
 Le Roy sans peur aucune entra dedans a-
 uec sa gendarmerie, iustement au poinēt
 du temps, qui estoit tres-propre, pour fai-
 re vne tres-bonne prise & tres-salutaire
 changement en l'Estat, à sçauoir, lors que
 le Soleil accōpagné de la Lune voltigeoit
 par les premiers degres du Belier, signē du

*Reduction
 de Paris
 miraculeu-
 se.*

ciel qui domine à la teste, & par ce moyen au conseil qui reside en icelle. Et comme il estoit bien seant, qu'il aduint à vn Roy Martial, ce fut au vingt-deuxiesme iour du mois de Mars, & de ce iour à la fine premiere heure de Mars: ô iour remarquable! iour heureux! auquel tout fut paisible dedans la ville: tous les gens de bien qui estoient encores en plus grand nombre que les peruers, prindrent l'escharpe blanche, prièrent pour la santé & prosperité du Roy. Les Espagnols avec leur grand Duc Feria, leur D. Diego & Taxio, inuenteurs & fabricateurs de tous les aguets dressez contre les François, n'allerent point à l'encontre, ne se mirerent point en defense, mais se desarmerent & mirent bas leurs armes. Sega Cardinal de Plaisance, ny la faction des seize voleurs, par la tyrannie desquels iusques à lors, la ville auoit esté grandement affligée, n'oserent dire vn mot ny paroistre en vne place. Toute la ville quitta le party, & toutesfois comme toute estonnée, attendoit quelle seroit l'issue de ce grand changemēt. Auant que le Roy entraist dedans la ville, il auoit prins le serment de tous les Capitaines de ses bandes, à ce qu'il ne fust faict tort ne dommage à aucun ci-

toyẽ, si ce n'estoit quelqu'un qui s'opinia-
strast à faire resistance, à faute dequoy il
leur auoit protesté, qu'il se prendroit aux
chefs & capitaines desquels les soldats fe-
royẽt autrement. En ce mesme iour, le Roy
cõmanda à toutes les garnisons estrange-
res de vuidier la ville, ce qu'elles firẽt incõ-
tinent. Le iour d'apres se faisant fort de son
innocẽce & integrité (qui est le plus fidele
gardien de tous, & le rempart d'un Roy
inexpugnable, & qui n'ha besoin d'autre
fossé ny casemate) il enuoya autre part sa
gendarmerie, à fin que plus long temps,
elle ne fust espouuantable à ses citoyens,
freschement recouurez : à la sauuegarde
desquels il se mit, & eux voyans vn si glo-
rieux acte, ils ne cessoyent d'exalter la
grande clemẽce & generosité du Roy, qui
d'esclaves, les rẽdoit par sa victoire citoyens
ayãs recouuré leurs cheres espouses, leurs
bien aymés enfans, leur tant desirée cité,
leurs biens necessaires, leurs souhaités hõ-
neurs, leurs Magistrats, voire eux mesmes.
De cette grãde obeissance des soldats qui
furent retenus du cõmandement du Roy,
nous pouuõs estimer cõbiẽ grãde est l'au-
thorité de luy qui leur commada. Sa Ma-
jesté enuiron les 5. heures du matin entra

dedans la ville, & peu apres, à huit heures, elle s'achemina droict en la grande Eglise de nostre Dame, où avec grãde ioye il fut receu des Chanoynes ; il baïsa la croix de nostre Sauueur que l'on luy presenta, puis ietté à deux genoux en terre deuãt le grãd autel, & leuant les mains au ciel, rēdit graces à Dieu tout-puissant, pour le merueilleux benefice qu'il recognoissoit auoir receu, ce iour là de luy, en recouurant sa ville deliurée de l'horrible seruitude & tyrannie des Espagnols, & de la factiō des seize. Le chœur des Ecclesiastiques chantoit cependant les loüanges de Dieu, avec vn grãd bruit, & avec vne telle affluence de peuple (qui du premier fault, auoit esté aucunement estonné, mais qui aussi tost s'estoit ref-jouy) frappant des mains & des pieds en signe d'alegresse, & criant tout ensemble viue le Roy, que le lieu n'estoit grand assez pour les contenir tous, ny la voix des Chantres n'en pouuoit estre entendue: on n'oyoit pour tout que par plusieurs fois rechanter, viue le Roy, viue le Roy. Finalement, comme s'il fust venu dedans cette Eglise, durant vne assurée paix, & qu'il en fust fortý, s'estant departý pour aller en son chasteau du Louure, les mesmes

cris mille fois estans faicts par toutes les rues qu'il passoit, icelles rues & toutes les boutiques & fenestres estās remplies d'hōmes de tout sexe & de tout aage. Chacun des le mesme iour retourna à sa besongne, toutes choses demeurantes appaisées & tranquilles par toute la ville, non autrement qu'elles y auoyent esté le iour precedent, ie dy par toute la ville en laquelle ny pere ny mary quelconque n'auoit eu occasion aucune d'auoir peur. La clemence du Roy fut tres-grande enuers ce peuple, qui durant le temps de cette malheureuse rebellion, s'estoit monstre à luy plus contraire, & plus plein de cruauté, & lequel, quand quelques vns des autres citadins se plaignoyent de leur misere, tenoit pour vn crime de demander seulement du pain, ou la paix, & demander du pain & la paix ensemble, le tenoit pour vn cas pendable. Cette clemence est si grande qu'elle ne se peut dechiffrer comme elle merite: & ne peut estre imaginée ny entendue de personne, que de celuy qui aura bien sceu combien grande est la tache du crime, d'ot cette Cité est souillée. Tous ses habitans (encores qu'ils fussent tres riches & fort à leur aise, souz le regne de Henry troies-

me) de leur propre mouuement sans contrainte, s'armerent contre leur Roy, remplirent contre luy, toutes les ruës de barricades: car quant aux garnisons & sentinelles que le Roy auoit posées és places publiques & aduenues de la ville, encore que elles n'offensassent personne, & tel en auoyent le cōmandement, ils les assaillirent les premiers, en tuerēt, & chasserēt le reste. Et ce qui est biē pis, avec les barricades, on ferra de telle sorte le Roy, qu'il fut cōtraint se retirer soudainement, & s'il ne fust fort par vne fausse porte de derriere avec bien petite compagnie, & ne les eust trōpez de cette façon, ie pense tant la rage leur auoit occupé la ceruelle, ou qu'ils l'eussent massacré, ou luy ayāt rasé la teste, comme à vn moyne, l'eussent enfermē dedans vn monastere, pour transporter la couronne de France sur la teste d'un autre, ou viure en vne confusion la plus estrange qui fut iamais, sans Roy, sans Prince, sans Magistrat: qui estoit bien ce que plusieurs desiroyēt. Et apres cette frenesie tellement quellement adoucie, & qu'il y eut quelque intervalle à sa remise, cōme l'on eut proclamé & publié l'assemblée des Estats, pour estre tenue en la ville de Blois (qui sembloit

estre le moyen de remedier à la grande maladie de cet Estat) ils y enuoyerēt ceux qui sçauoyent bien estre à lors les plus mal affectionnés au feu Roy, & au mesme iour qu'ils eurent nouvelle de la mort de feu Messieurs de Guyse, sans faire aucune perquisition du faict, ils entreprindrent tout soudain d'en prendre la vengeance, qui se deuoit reseruer à Dieu seul, veu que c'est aux subiects d'obeyr & non pas de faire la Loy, & que les Roys seuls dependent de Dieu. Ils coururent en grande haste pour en prendre la vengeance: ils firent vne leuée de deniers pour fournir aux frais de la guerre: ils s'armerent non pour se tenir sur la deffensive, mais pour aller assaillir, ils firent reuolter toutes les autres bonnes villes de France, avec libelles diffamatoires, pleins de toute sorte de calomnies: ils foulerent aux pieds le renom du Roy, pillerent ses thresors, rauirent tous ses precieux meubles, allerent arracher & faire sortir du liēt de Iustice, tout le Senat en corps, & en plein iour, deux à deux, les chasserent en la Bastille: Quelques vns ne firent riē de cela, mais aussi n'ēpescherent ils pas ceux qui le faisoient à leur barbe. Ils allumerent toute cette guerre quelque

grande qu'elle ayt esté, en chacune Province de France, villes & villages: & a esté la plus pernicieuse qui fut iamais, durant laquelle tant de milliers de François y ont laissé la vie, tant de femmes y sont demeurées veufues, tât d'ẽfans y ont perdu leurs peres. Nous en voyõs beaucoup de villes abbatues, plusieurs murs des villes iettez par terre, leurs beaux faux-bourgs rasez: & bien plus encore les champs desolez & gastez. Tout cela sont crimes horribles, mais encores en a esté cõmis vn plus grãd, qui n'auoit iamais esté ouy, vn crime execrable, crime qui ne scauroit trouuer de supplice assez grãd, pour la chastier, il sortit de leurs Conuents & lieux saincts vn monstre en habit de Religieux de l'ordre des Iacobins qui tua le Roy: Et à la nouvelle de sa mort, ils en firent vn iour de feste solemnelle. Et lors qu'ils deuoyent au moins par vne mort si detestable leur arrester, & aller se ietter comme dedans vn port de salut, entre les bras de son successeur Henry quatriesme, plus farouches, perfides & mutins que deuant, ils l'empescherent d'aller s'asseoir dessus le tribunal du Royaume, qui luy estoit donné par la grace de Dieu. Il n'y a iniure, pour insolent-

te qu'elle soit, superbe, vilaine, qu'ils ne luy
ayent craché au visage : il n'y a fraude ny
embusche qu'ils n'ayent dressée pour le
surprendre : il n'y a cousteau ny alumelle
qu'ils n'ayent forgée, emoulue & esguisée,
pour l'offenser, & ce qui est le plus admi-
rable de tout, est que la faction des seize, a
esté si temeraire. que descrire diuerses let-
tres souffignées par les principaux de leur
faction, par lesquelles ils deferoyent au
Roy d'Espagne, le Royaume de France,
comme s'il eust esté à eux. En fin ils des-
puerent la ville de ses habitans, pour la ré-
plir d'estrangers, pour l'espuiser de ses pro-
pres deniers, pour abbatre & renuerser les
maisons de la ville & des faux-bourgs, cō-
me nous les voyons renuersées : Et ce qui
est le plus horrible, ils ont fait sauter quel-
ques vns de leurs concitoyens, de dessus le
pont aux meuniers au beau milieu de la
Seine : aux autres ils ont coupé la gorge
dedans leurs lits, & (pour la plus gracieu-
se cruauté par eux cōmise) ils en ont chas-
sé aucuns de la ville & de leurs maisons, &
contrainct abandonner leurs femmes,
leurs petis enfans, leurs parents & amys, la
plus-part desquels ont souffert vne extre-
me necessité & misere, & les autres sont

morts de faim. Par l'immense & incroyable grandeur, & par vn si grand nombre de leurs crimes & offences, l'on void clairement combien est grande la clemence du Roy Henry quatriesme enuers eux, qui leur ha plustost pardonné, & à plustost embrassé tous ses citoyës qu'il n'en a esté prié & requis. Il ha r'enuoyé sans perte & sans danger les Espagnols, les Italiens, Vualons & Laniquenets qui s'y trouuerent à l'heure de son entrée: de sorte qu'il leur seroit maintenant bien malaisé à dire, s'ils ont plus redouté sa vertu en bataille rangée, ou estans ainsi vaincus, s'ils doyuent plus aymer & louer sa douceur. Et ayans esté quelques vns chassez de la ville, mais fort peu, encores hommes tres-seditieux, hommes nais souz vn mal-heureux astre, à la ruine de la ville & de toute la France, il a rendu la tranquillité à tous les autres, a ramené la gayeté ja de long temps bannie, a estably la seureté d'vn chacun, & a restitué à la Cité qui estoit sans Roy, sans Magistrat, sans Euesque, sans ses ordres, son Roy, son Magistrat, son Euesque & tous ses ordres. Et bié que la gloire de cete clemence soit si grande, elle n'est toutesfois semblable à ses autres Royalles, & belli-

queuses loüanges , qui se peuuent amoindrir de paroles , & aucunement départir avec plusieurs, de sorte qu'elles ne sont totalement siennes. Et à dire vray pour mener cette guerre & recouurer son Royau-me, il a eu vn grand support d'une bonne multitude, de Cardinaux , Euesques , Abbés, Magistrats, hommes de robbe lōgue, en tous estats , qui ont suiuy apertement, ou en cachette son party , & en toutes les occasions qu'ils ont peu , se sont trouués prests & appareillés à son seruice. Et puis la Noblesse Françoisse (qu'on ne pourra iamais assez exalter de loüanges , pour n'auoir iamais abandonné son Roy, apres auoir souffert tant de trauaux, trauerfé tant de mauuais passages, se rencontrant en tāt de dangers & tant de pertes de la vie & de tous biens) s'en doit attribuer vne bonne part, & presque estimer sienne la prosperité de tout le succez : les secours aussi des confederez de sa Majesté , les Suisses , les Alemans , les Anglois y ont aussi bien aydé : mais quant à la gloire qui luy reuient de cette clemence, il n'y a compagnon aucun : le tout luy appartient : ny les courageux secours de ses Princes, de sa Noblesse, de ses confederez , ny les conseils des

robes longues, pas vn de ses Colonnelz, pas vn de ses Capitaines, pas vne de ses bādes & troupes ne luy en ostent rien. Et qui est bien plus la fortune, qui est (ainsi que veulent les Poëtes) la maistresse des affaires des hommes, n'oseroit prendre avec luy aucune parcelle de cet honneur: elle le luy quitte, elle confesse qu'elle est à sa Majesté seule.

Incontinēt apres & en ce mesme moys, le Roy fit vn Edict & Declaration ample, sur la reduction de ladicte ville de Paris, en son obeyssance, qui fut leu, publié & enregistré, ouy, & ce requerant son Procureur general, en la grande chambre du Parlemēt, Monsieur le Chancelier y seant, avec les officiers de la couronne, Ducs & Pairs de Frāce, Conseillers de son Conseil d'Etat, & aucuns des Maistres des Requestes ordinaires de son hostel, le 28. de Mars audict an. Et le trentiesme ensuiuant y eut Arrest de la Cour de Parlement, sur ce qui s'est passé durant les presens troubles: contenant la reuocation de ce qui a esté fait au preiudice de l'autorité du Roy & des loix du Royaume. Quelque peu de temps apres se rendit au Roy la ville de Sens, sur la reduction de laquelle, & sur ce qu'il a

pleu à sa Majesté leur accorder, elle fit vne Declaration en forme d'Edict, donné à Paris au moys d'Auril 1594. A l'exemple de Paris, sembloit y auoir contention, par toutes les Prouinces, qu'elles des bonnes villes auroient l'honneur de se remettre les premieres en la voye de l'obeyssance deuë à leur Prince, de laquelle elles s'estoyent par vn si long temps detraquées: ie ferois trop long à vous les deduire toutes par le menu. Enuiron ce temps la ville de Laon fut assiegée & rendue, à l'imitation de laquelle la Champagne & la Picardie, se remirent en l'obeyssance de sa Majesté. A laquelle mesme Monsieur le Duc de Guyse se reünit, luy fit le serment de fidelité, enuiron le moys de Nouembre, avec vœu de sincere affectiō & obeissance: & à son exemple, se reünirent bon nombre de Noblesse, de villes & de peuples, qui tenoyent son party: sur laquelle reünio dudiect sieur de Guyse, de Messieurs ses freres, de la ville de Rheims, & autres villes & chasteaux, en l'obeissance de sa Majesté, elle fit & octroya vn Edict à S. Germain en Laye au moys de Nouëbre, audict an. Le Roy estant retourné à Paris, fut blessé en la face, d'vn cousteau, par vn

*Reduction
de Monsieur
de Guyse.*

ieune escolier deſeſperé, nommé Ieã Chastel, eſtudiant au college des Ieſuiſtes, & par Arrest de la Cour, fut tiré à quatre cheuaux, en la place de Greue, le Ieudy 29. de Decembre audiẽt an. Plusieurs gentils eſprits diſcoururent pertinẽment ſur cette bleſſeure, & ſur l'abominable parricide attenté par ce petit bout d'homme façonné à l'eſcole des Ieſuiſtes, ſur la perſonne du Roy. Par le meſme Arrest, tous les Ieſuiſtes furent condamnés à vuidẽr du Royaume, comme corrupteurs de la ieuneſſe, perturbateurs du repos public, ennemys du Roy & de l'Eſtat. Voicy la teneur de l'Arreſt, que j'ay inferé pour eſtre fort remarquable.

*Arreſt de la
Cour cõtre
Iean Cha-
ſtel.*

Veu par la Cour, les grand' Chambre & Tournelle aſſemblées, le procès criminel commencé à faire par le Preuoſt de l'Hoſtel du Roy, & depuis paracheué d'inſtruire en icelle, à la requeſte du Procureur general du Roy, demandeur & accuſateur à l'encontre de Iean Chastel natif de Paris, eſcholier ayant faiẽt le cours de ſes eſtudes au College de Clermont, priſonnier eſ prisons de la Conciergerie du Palais: Pour raiſon du tres-execrable & tres-abominable parricide attenté ſur la perſonne du
Roy:

Roy: Interrogatoires & confessions dudit Jean Chastel, ouy & interrogé en ladicte Cour ledit Chastel sur le faict dudit parricide. Ouys aussi en icelle Jean Gueret Prestre, soy disant de la congregation & société du nom de I E S V S, demeurant audit College, & cy deuant Precepteur dudit Jean Chastel: Pierre Chastel, & Denise Hazard, pere & mere dudit Jean. Conclusions du Procureur general du Roy, & tout considéré.

Il sera dit, que ladicte Cour a déclaré & declare ledit Jean Chastel, atteint & convaincu du crime de leze Majesté, diuine & humaine au premier chef, par le tres-mechant, & tres-detestable parricide attenté sur la personne du Roy: pour reparation duquel crime a condamné & condamne ledit Jean Chastel à faire amende honorable deuant la principale porte de l'Eglise de Paris, nud en chemise, tenāt vne torche de cire ardāte du poix de deux liures, & illec à genoux dire & declarer, que malheureusement & proditoirement il a attenté ledit tres-inhumain & tres-abominable parricide: & blessé le Roy d'vn couteau en la face: & par faulces & damnables instructions il a dit audit procès estre per-

mis de tuer les Roys, & que le Roy Henry quatriesme à present regnant n'est en l'Eglise, iusques à ce qu'il ait l'approbation du Pape: dont il se repent, & demande pardon à Dieu, au Roy & à Iustice. Ce fait, estre mené & conduit en vn tumbereau en la place de Gréue. Illec tenaillé aux bras & cuisses, & sa main dextre, tenant en icelle le cousteau duquel il s'est efforcé commettre ledict parricide, couppée. Et apres, son corps tiré & demembré avec quatre cheuaux, & ses membres & corps iettez au feu & consumez en cendres, & les cendres iettées au vent. A déclaré & declare tous & chacuns ses biens acquis & confisque au Roy. Auant laquelle execution, sera ledit Iean Chastel appliqué à la question ordinaire & extraordinaire, pour scauoir la verité de ses complices, & d'aucuns cas resultans dudit procès. A fait & fait inhibitions & defenses à toutes personnes de quelque qualité & condition qu'elles soient, sur peine de crime de leze Majesté, de dire ne proferer en aucun lieu public, ne autre, lesdicts propos: lesquels ladicte Cour a déclaré & declare scandaleux, seditieux, contraires à la parole de Dieu, & condainnez comme heretiques par les

saincts Decrets. Ordonne que les Prestres & Escholiers du College de Clermont, & tous autres, soy disans de ladicte societé, comme corrupteurs de la jeunesse, perturbateurs du repos public, ennemis du Roy & de l'Estat, vuideront dedans trois iours, apres la significatiõ du present Arrest, hors de Paris, & autres villes & lieux où sont leurs Colleges: & quinzaine apres, hors du Royaume, sur peine où ils y seront trouuez ledict temps passé, d'estre punis cõme criminels & coupables dudit crime de leze Majesté. Seront les biens, tant meubles qu'immeubles à eux appartenãts employés en œuvres pitoyables, & distribution d'iceux faite ainsi que par la Cour sera ordonné. Outre, faict defenses à tous sujets du Roy d'enuoyer des escholiers aux Colleges de ladicte societé, qui sont hors du Royaume, pour y estre instruits, sur la mesme peine de crime de leze Majesté. Ordonne la Cour que les extraits du present Arrest seront enuoyés aux Bailliages & Seneschauffées de ce ressort, pour estre executé selon la forme & teneur. Enioint aux Baillifs & Seneschaux, leurs Lieutenans generaux & particuliers, proceder à l'execution dedans le delay contenu en

iceluy : Et aux Substituts du Procureur general, tenir la main à ladicte execution, faire informer des contrauentions, & certifier ladicte Cour de leurs diligences, au moys, sur peine de priuatiõ de leurs estats.

Or est il que se faisant la recherche en la maison desdicts Iesuistes, sçauoir le College de Clermont, l'on trouua entre les liures de l'un d'eux quelques escrits contre sa Majesté : L'auteur d'iceux atteint & cõuaincu se voulut ayder de la grace & pardon du Roy, faict & octroyé à la reductiõ de sa ville de Paris: ce neantmoins voyans que ces manieres de gens ne laissoient de troubler l'estat, donnoient mauuaise instruction à la ieunesse, & que ce Iesuiste, depuis la grace par le Roy octroyée à ses subiects rebelles fut trouué saisi de ces libelles diffamatoires contre ladicte Majesté, il fut condamné à la mort, & executé par iustice. J'ay touché cy deuant de leur fondateur Loyola, qui fut premierement guerrier & ennemy de la maison d'Albret: lequel depuis quittant le monde s'adonna aux choses spirituelles, alla visiter le lieu de Monserrat, où il fit vne neuuaine: puis donna aux pauvres tout son bien, & se retira aux montagnes de Mauresa, où il me

*Loyola au-
teur des
Iesuistes.*

na vne vie solitaire par l'espace de 7. moys
Après il descendit à Barcelone, d'où par
mer il passa à Venise, & trouuant le nauire
des Pelerins qui partoit, se mit dedans &
alla en Palestine, rechercher les lieux des-
quels est faicte mention aux saintes escri-
tures: mais le pere Gardiẽ des Cordeliers
du mont de Sion, le contraignit de s'en
retourner. Estant ignorant, se mit à estu-
dier la Grammaire en Barcelone, & fre-
quenta l'vniuersité d'Alcala de Henares,
allant tousiours deschauffé, dont aucuns
le reprindrẽt & s'en scandaliserent: Ce que
voyant, il s'en alla en Salamanque, où pa-
reillement on trouua mauuaise cette ma-
niere d'aller pieds nuds. Ainsi se voyant
empesché en ses estudes, par telles perse-
cutions, pour-ce que l'on se moquoit de
luy, il laissa l'Espagne & vint à Paris, où il
ouyt maistre Pierre Fabri, & ne demeura
gueres, qu'estant harassé par les vns & sou-
stenu par les autres, en fin approuué par
nostre maistre Ory, l'on eut opinion que
c'estoit vn saint homme, & d'escolier de-
uint maistre, & eut plusieurs sectateurs, qui
se rangerent tous à sa reigle, & firent vœu
de perpetuelle pauvreté & chasteté. Tous
ses successeurs iusques auiourd'huy n'ont

pas gardé ce vœu: Tant y a qu'il s'en retourna en Espagne, & se retira au lieu de sa naissance, en l'Hospital d'Azpeytia, sans qu'il se donnast à cognoistre, & se mit à prescher, avec grande reputation: & reconnu par vn Nauarrois qui l'auoit veu à Paris, les parents essayerēt par tous moyens de le retirer de cette mendicité, mais ce fut en vain. Il auoit arresté avec ses compagnōs de faire le voyage de la Terre sainte, & à cet effect les alla trouuer à Venise, d'où ils passerent à Rome, & obtindrent du Pape Paul 3. congé. Ils retournerent à Venise, où ils s'arrestèrent long temps à cause de la guerre, qui lors estoit entre cette Republique & le Turc. Ce qui les fit cognoistre en Italie, non sans grandes traueses. Desireux d'auoir plus de renom obtindrent permission d'ouyr en confession, & aucuns d'entr'eux receurent les ordres, pour dire & celebrer la sainte Messe, & ils preschoyent & faisoient œuures de leur profession, & acqueroient bruit: tant que l'an 1538. ils se retrouuerent tous à Rome, où ils obtindrent du Pape Paul confirmation & approbation de leur maniere de viure, status & reigles de leur secte, avec l'ayde & faueur du Cardinal Cō-

tareno , & furent receuz en la protection du sainct Siege, seulement *vine vocis oraculo*, les remettant pour l'expedition de la perpetuation de leur secte , au Cardinal Guidiccion Lucquois, qui les embrassa & approuua (nonobstant que peu parauant il eust mis vn liure en lumiere, *De non multiplicandis religionibus*,) se rendit leur solliciteur. Ainsi furent confirmés par lettres & bulles du premier d'Octobre 1540. données à Tiuali, souz le nom & tiltre de la compagnie de I E S V S, avec faculté de recevoir en leur compagnie, qui estoit lors de dix seulement, iusques à soixante personnes par prouision. Le Roy de Portugal D. Iean 3. ayant eu par son Ambassadeur, nouuelle de ces nouveaux religieux, en voulut auoir en son pays. L'an 1543. ils eurent congé du Pape Paul d'augmenter tant qu'ils pourroyent leur compagnie, & l'an 1545. il leur cōceda tous les priuileges, facultés & graces dont ils iouyffent à present. Le Pape Iules de Monté qui vint apres, confirma cet ordre, l'an 1550. Le Duc de Gandie & Marquis de Lombay aymât cette secte se fit Iesuiste, receu par Inigo de Loyola, auteur de l'ordre. Le Duc fit la renonciation de la Duché de Gandie , &

de ses autres biens à son fils D. Charles de Borgia & d'Arragon, au College des Iesuites, d'Ognate, où il print l'habit & receut tous les ordres, & peu apres voulut que son second fils D. Iean Borgia & d'Arragõ espousat D. Laurence de Loyola, & Ognos la fille de D. Bertrand de Loyola, neveu du pere Inigo, lequel avec l'aide & faueur du Cardinal Iean Mourõ edifia a Rome le College Germanique, pour instruire la ieunesse de cette nation, contre la doctrine de Luther. Il veid auant que mourir seize Prouinciaux de son institution & ordre, & plus de cent septante Colleges, lesquels ont depuis beaucoup multiplié, il mourut à Rome l'an 1556. aagé de soixāte & vn an, & fut enterré en la maison principale & chef de cet ordre, dicte S. Marie de la Strada. En cette Religion, sont trois manieres de Religieux: vne de profex, qui ne peuent tenir aucuns biens: l'autre d'aprouués, & la troisieme de Collegiés. A ces deux il est licite de posseder tāt de biens qu'ils pourront. Les Iesuites ne sont pas Theatins: car ceux qu'on appelle Theatins eurent autre origine, & autre maniere de viure: c'estoyent certains gentilshōmes & autres gens, meuz de deuotion, lesquels

s'adōnoyent à prieres, chants & autres telles œuures, & se nōmerent premierement de la cōpagnie de l'amour diuin, ausquels s'estant ioinct Ieā Pierre Carrafe Napolitain Euesque de Chieti, on commancea à les apeller Chietins, & puis corrompant le mot, Theatins, & furent en renō du temps du Pape Clement 7. & se retirerēt à cause du sac de Rome, à Ostia, & de là à Venise, où ils se logerent 11. ans, deuāt que Loyola & ses compagnōs y arriuaissent. Les Iesuites sont nōmés en Arragon Iniguistes, du nō de leur auteur, & en Portugal Apostres, mais par tout ailleurs Iesuites, selon les bulles & brefs des Papes : Voila ce qui se trouue en l'histoire Espagnole de l'institution des Iesuites : s'ils se mesloyēt simplement de leur profession, ils ne troubleroyēt pas les Estats Chrestiens, & n'instruiroyēt pas la ieunesse, à attēter sur les Roys oingts de Dieu, ausquels l'ō doit obeissance quels qu'ils puissent estre : à plus forte raison à nostre legitime Roy, maintenant par la grace de Dieu, Tres-chrestien & Tres-catholique. Le Roy estant guery de sa blefseure fit ses cheualiers du S. Esprit, en Ianuier 1595. Le dixseptiesme dudiēt moys, le Roy declara sa volonté sur l'ouuerture de la guerre contre le Roy d'Espagne.

Au mois de Iuin de la mesme année, le Roy estant party de Paris pour s'en aller en son armée, & s'opposer aux progres que celle du Connestable de Castille faisoit sur ses seruiteurs qui estoient au Comté de Bourgogne, & entreprendre sur le pays de ses ennemis estant arriué à Monglas, maison de son premier maistre d'hôtel, receut nouuelles de Monsieur le Marechal de Biron, de la prise qu'il auoit faicte de la ville de Nuys en Bourgogne & qu'il s'en alloit pour secourir le chasteau de Vezou audict Comté, defendu par le sieur de Tremblecourt, & en passant pres la ville de Dijon fomentier la volonté du peuple, qui commanceoit à s'eschauffer & prendre les erres de celles de Beaulne, Authun & Nuys, de n'agueres rangez à l'obeissance du Roy, pour se remettre entre les bras de sa Majesté. Cette nouuelle la fit hastier d'aller à Troyes, où estoient ja arriuéés vne partie des forces qui la deuoient accompagner en son armée, auxquelles elle commanda s'aduancer vne iournée par delà ladicte ville, en laquelle ladicte Majesté arriua & fit son entrée le Mardy trentiesme iour du mois de May : où elle receut lettres dudict sieur Marechal, par les-

quelles il luy mandoit, que les habitans de ladicte ville de Dijon estoient bandez cōtre ceux du chasteau, qui auoit esté cause, que ledict sieur Marechal auoit faict approcher ladicte armée de ladicte ville, & que luy mesmes estoit venu sur le bord du fossé parler ausdicts habitans, pour les fortifier en leur bōne volonté, en leur remonstrās ce qui estoit de leur deuoir. Ces parolles ne furent de peu d'effect. Dequoy s'aperceuant le Vicomte de Tauannes qui commandoit au pays, pour le Duc de Mayenne, & Francesque au chasteau, ayās mandé les garnisons voisines, tenderent de reduire lesdicts habitans à leur volonté, par la voye de la force. Ce qu'ils eussent faict aisément, sans le secours dudit sieur Marechal, lequel ils precipiterēt tant par plusieurs messagers, qu'il entra en ladicte ville, le Dimenche 28. dudit mois, accompagné seulement de 25. ou 30. hōmes: avec lesquels par la grace de Dieu & sa vertu, il rechassa lesdicts ennemys, qui auoyent reduict les habitans en vn coin de la ville, & les alloient forcer sans sa venue, qui fut suiue de pres de ladicte armée, preparée à cet effect: où il fut tenu vn tel ordre, que lesdicts habitans n'y perdirēt aucune cho-

*Trouble à
la reduction
de Dijon.*

se:& ne fut riē prins, mesmes pour le viure des soldats, sans payer, au grand honneur dudit sieur Marechal, & contentement des habitans, soudain ledict sieur Marechal depescha vn courier vers sa Majesté, qui arriua à Troyes le Mercredy à cinq heures du matin, où cette nouuelle fut receuë avec grande resiouissance pour l'importance d'icelle. Au mesme temps sa Majesté enuoya querir Messieurs de Neuers, le Chancelier & autres de son Conseil, & pourueut aux affaires necessaires auāt son partement, & commanda aux Marechaux de camp, le chemin qu'elle vouloit que ses troupes tinssent, & tailla ses iournées les plus grandes que les gens de guerre pouuoient faire selon la saison, iugeant bien que l'armée dudit Connestable estant libre, apres la prise dudit chasteau de Vezou, rendu par composition, dont il auoit eu aduis, seroit employée par ledict Duc de Mayēne, à secourir celuy de ladicte ville de Dijon, auquel cōsistoit sa principale ressource, & où ses partisans s'estoyent retirez: surquoy sa Majesté bastit à l'heure mesmes le dessein qu'elle ha depuis executé. Et ayant auāt que partir faict remercier Dieu, de la reduction de ladicte ville, mōta

à cheual à midy, & arriua le Dimēche ensuiuant en celle de Dijon. Estant à S. Seyne distant de cinq lieuës d'icelle, ladiēte Majesté eut aduis dudiēt sieur Mareschal, que le Connestable de Castille faisoit faire vn pont de bateaux, pres de Grey sur la riuere de la Saosne, & accōmoder celuy de ladiēte ville, pour passer son armée sur l'vn, & son artillerie sur l'autre: & à son arriuée à Dijō, sceut qu'vne partie de ladiēte armée estoit ja passée, & que le reste deuoit suiure le lendemain, pour venir des le Lūdy en diligēce, secourir lediēt chasteau, lediēt Duc de Mayenne ayant celé audiēt Cōnestable de Castille l'arriuée de sa Majesté, & celle des Suisses qui estoient venus des le Samedy. Si tost que sa Majesté fut arriuée, elle remonta à cheual, accompagnée dudiēt sieur Mareschal, pour recognoistre le chasteau, & le fort de Talen, assis à vne canonnade de ladiēte ville (dedans lequel s'estoit retiré lediēt Vicomte de Tauanes) & toutes les aduenues, par lesquelles l'ennemy pouuoit entreprendre de secourir la place, choisissant les places de bataille propres, pour l'ē empêcher, & les lieux pour dresser des forts, à fin de boucler du tout lediēt chasteau.

Cela ne se peut executer que iusques à la nuit. Cependant sa Majesté proposa audit sieur Marechal, le dessein qu'elle auoit projeté, qui estoit de prendre mille cheuaux, & cinq cens harquebusiers à cheual, & aller prester vne estrette aux ennemis, deuant qu'ils fussent bien assurez de son arriuée: & par ce moyen retarder leur venue d'un iour ou deux, pour auoir plus de loisir de faire vn retranchement par dedās la ville, pour en separer le chasteau, y laisser mille hommes avec les Bourgeois, & prendre le reste de son armée, pour aller combattre ledict Connestable, à trois ou quatre lieües de ladicte ville. Ledit sieur Marechal n'approuua pas seulement cet aduis, mais le fortifia encores de plusieurs raisons. Sa Majesté ayant pourueu à ce qui estoit necessaire, tant pour les viures, qu'à enuoyer querir de l'artillerie, pour batter ledict chasteau, & à cet effect, ordonné toutes les escortes necessaires, depescha aux troupes, & leur donna le rendez vous, le lendemain à Lux, à huit heures du matin, maison du Baron dudit Lux, assise sur la riuere de la Tille, estāt au milieu des villes de Dijon & de Grey, & distant de l'une & de l'autre de quatre lieües, & manda

à tous ses seruiteurs qui sont sur les frontieres dudict Côté, de luy donner au mesme temps, audict lieu, les plus certaines nouuelles des ennemis qu'ils pourroyent. Sadicte Majesté partit de Dijon à quatre heures du matin, y laissant Monsieur le Comte de Thorigny, l'un des Mareschaux de camp de l'armée, pour continuer le siege dudict chasteau, & se rendit audict Lux, à l'heure dicte, où ayant de la contradictiõ entre les aduis qu'elle y trouua, se resolut d'y repaistre deux heures, & le reste de ses troupes en trois villages circonuoisins, pour donner loisir au sieur Daussionville, que sa Majesté enuoya avec cent cheuaux, donner iusques où il trouueroit les ennemis, pour luy dõner aduis s'ils marchoyēt ou s'ils seiurnoyent, luy commandant d'estre de retour à trois heures apres midy à Fontaine Françoise, lieu appartenant au sieur de Brion, où à la mesme heure, sa Majesté auoit donné son secõd rendez vous, & qu'il print garde s'ils ne deslogeoyent point: le moyen qu'il y auroit de donner à couuert, audict village où ils estoient. Sadicte Majesté partit à vne heure apres midy dudict Lux avec ledict sieur Mareschal, à fin qu'arriuant le premier, il mit les trou-

pes en l'ordre de marcher, qui auoit esté resolu, menant vne compagnie de gens de pied, pour ietter dedās deux chasteaux qui sont au village de saint Seyne, sur la riuere de Vigenne, pour leur empescher ce passage, d'autāt que c'estoit le plus beau & le plus droict chemin, que les ennemis pouuoient tenir pour venir a Dijon, avec leur armée. Sa Majesté estant à vne lieuë dudit Fontaine Françoise, receut aduis par trois soldats, enuoyés par le Marquis de Mirebeau, qu'il auoit rencontré trois cens cheuaux, qui l'auoyent ramené plus vite que le pas audict lieu, qu'il luy sembloit auoir veu des files d'armes derriere: mais qu'ils ne luy auoyent pas donné loisir, de les bien recognoistre. Soudain sa Majesté depescha ledict sieur Mareschal, avec la compagnie dudit Baron de Lux, qui estoit la seule qu'elle auoit pour lors avec elle, pour recognoistre si c'estoit veritablemēt l'armée, où vne troupe qui fust venue à la guerre. Au mesme temps sa Majesté fit prendre les armes à sa troupe, & s'achemina au grand trot apres ledict sieur Mareschal, lequel ayant passé ledict village de Fontaine, veit soixante cheuaux qui estoient sur vne coline, à moitié chemin dudit

dudict lieu à S. Seine, qui est situé au pied d'une coste, laquelle empesche que les villages ne se puissent veoir. Ledit sieur Marechal iugea qu'il deuoit chasser lesdicts soixante cheuaux, pour voir ce que l'ennemy faisoit derriere. Ce qu'il fit fort facilement, & recogneut l'armée des ennemis descendre dedans ledict S. Seyne, & apres d'un bois proche dudict lieu, deux ou trois cens cheuaux qui auoyent chassé ledict sieur Daussionville que sa Majesté auoit auparauāt enuoyé recognoistre l'ennemy, lesquels debanderent vne troupe à main droicte, & l'autre à main gauche, pour recognoistre ce qui estoit derriere ledict sieur Marechal. A quoy il pourcut, enuoyant pour les empescher le Marquis de Mirebeau à vne main, & à l'autre ledict Baron de Lux. Cette troupe de caualerie ennemye, sentant aprocher toute leur armée, derriere laquelle ce bois empeschoit que l'on ne veist, commancea à s'aduançer vers ledict Marechal, qui ayant recogneu ce pourquoy il s'estoit aduancé (qui estoit pour sçauoir si c'estoit leur armée ou non) se retira. Ce que les ennemys voyans monstrerēt le vouloir presser, mais il en fit peu de compte; n'estans pas gens pour le des-

H h h

faire, bien qu'ils fussent deux fois autant que luy. Ledit Baron de Lux estoit avec dix cheuaux derriere, à qui il sembla devoir faire vne charge à quelques vns qui s'auançoient deuant le gros: ce qu'il fit tres-bien: mais son cheual y fut tué, de façon qu'il fallut que ledit sieur Marechal tournast avec sa troupe pour le desengager, & fit vne charge, où il mit en fuite ce gros qui estoit deuant luy. En mesme instant sortirent du coing du bois sept ou huit gros de cauallerie, qui pouuoient faire avec ce qui estoit deuant, douze cens cheuaux. Ce que voyant ledit sieur Marechal, commença à faire sa retraite, au petit trot deuers la Majesté, tant pour l'aduerter que toute l'armée marchoit, qu'aussi pour luy dire qu'il y auoit moyen, avec toute sa cauallerie, de combattre la leur, auant que leur infanterie fust iointe: mais il ne peut arriuer iusques à ladicte Majesté, que les troupes du Baron de Thiangen, Thenissé, Villers Houdan, & vne compagnie de Carabins estant iointe avec eux, qu'il auoit desja chassé, ne le cōtraignissent de tourner. Ce qu'il fit, vray est que ce ne fut qu'avec vingt cheuaux: car le grand nombre des ennemys estonna la plus grā-

de partie de ceux qui estoient avec luy. Il y fut blessé : quoy voyant sa Majesté, enuoya vne troupe de cauallerie qui luy estoit arriuée pour le soustenir, laquelle aperceuant venir cette grande nuée d'ennemys, se renuer sa sur sadiete Majesté, qui s'aduancea vers eux, & en fit tourner quelques vns qui se ioignirent à sa troupe. Sur ces entrefaictes, la compagnie du sieur de Tauannes arriua, laquelle sa Majesté fit mettre à sa main gauche, & lesdicts cinq cens cheuaux qui auoyent chargé ledict sieur Mareschal, feirent ferme à my coste, attendans que tout le reste de leur caualerie qui les suiuoit fust arriuée, qui parut aussi tost sur le hault, & à la presence de sa Majesté les mirent tous en cinq escadrōs, & ietterent leurs Carabins deuant eux. Des que les ennemis firent ferme, ledict sieur Mareschal vint trouuer sa Majesté, pour la supplier de departir sa troupe en deux, & luy en bailler vne partie, ne luy estant resté des siens que huiet ou dix : Ce que sa Majesté voulant faire, vne partie de la compagnie dudit sieur Mareschal arriua : Partant il print seulement douze ou quinze hommes de la troupe de sa Majesté, l'heure du rendez vous n'estant point

encore escheüe, nulle des autres compagnies n'estoit encore arriüée, que les sus-nommés, qui pouuoient faire enuiron deux cens cheuaux. Cela ne fut pas si tost executé, que ledit Duc de Mayenne, estât encores suruenü avec vn gros de trois cēs cheuaux, commanda aux autres marcher droict vers sa Majesté, contre laquelle il enuoya trois gros qui estoient à sa main droicte, & deux contre ledict sieur Marechal. Mais Dieu qui est protecteur des iustes causes, se monstra tellement fauorable à sa Majesté & aux siens, qu'avec ce qu'elle auoit, qui n'estoit que soixante cheuaux, elle desfit le premier escadron composé de trois cens cheuaux: puis avec ce qu'elle peut r'allier, le second, qui estoit pres de deux cens, & apres avec vingt ou vingt-cinq cheuaux qui luy restoyēt (car le reste suiuoit la victoire) le troisiēme, qui estoit de cent cinquante. Ledit sieur Marechal, de son costé, tout blessé qu'il estoit d'vn coup d'espée sur la teste, & d'vn coup de l'anceau petit vêtre, qui toutesfois ne faisoit que luy couper la peau, avec enuiron cinquante cheuaux, desfit l'vn apres l'autre, ces deux escadrons qui venoyent à luy à soixante pas du Duc de Mayenne, qui

faisoit ferme sur le hault, avec son gros, où les fuyards se ioignirent, pēsans y trouver du salut, furent mis à vau de route avec luy mesme, & furent menez tousiours batans à coups d'espée pesse mesle iusques au coin du bois, où ladiēte Majesté trouua leurs bataillons de gens de pied & force mousquetaires & harquebusiers, departis en files, le long d'iceluy, avec quatre cens chevaux frais, qui vindrent recevoir le Duc de Mayenne & ses troupes, environ à cent pas des bataillons. Sa Majesté ayant fait ferme: & les ennemis estās separez d'avec les siens, trouua avoir fait cet effect avec quatre vingts chevaux, & lors commācea à se retirer sans toutesfois estre pressée: bien fut elle suiue par toute la cavallerie iusques sur le haut, où elle se remit en bataille: Et estant en la place d'où elle estoit partie pour faire la charge, retourna derechef, & se remit en deux troupes avec ledict sieur Mareschal, demeurant par ce moyen maistre des corps des ennemys, & du champ du combat, accompagné seulement de cent chevaux, en la presence de plus de quinze cens. Là elle commancea à rallier ceux qui s'estoyent escartez, à fin de s'en servir pour le moins de monstre, si

mieux elle n'en pouuoit faire. Sur ce point arriuerēt Monsieur le Côte de Clermont, le sieur de Vitry, la cōpagnie des cheuaux legers du Roy, celle de Cesar Mōsieur, de Monsieur, le Duc d'Elbeuf, du sieur Comte de Chiuerny, du Cheualier d'Oyse, & des sieurs de Rissé & d'Aix, fort faschez de n'auoir esté au combat : mais par-ce qu'il falloit qu'ils passassent à la file, au trauers dudit village de Fontaines, si tost que celle dudit sieur de Vitry & ses Carabins, & celle dudit Cheualier d'Oyse, furent arriuez, sa Majesté, sans attendre lesdictes cōpagnies, fait aduancer lesdicts Carabins, deuant ledict sieur Mareschal, lequel marchant apres, vers les ennemis, comme sa Majesté fit de son costé, ils tournerent & gangnerent leur infanterie, auant qu'on les peust ioindre, encores que sa Majesté, quand tout y fut arriué, n'eust peu auoir que six cens cheuaux; & eux, au raport des trompettes du Connestable de Castille, & dudit Duc de Mayenne & des prisonniers, plus de deux mille. Ils retournerent loger à saint Seyne, & sa Majesté demoura maistre d'un costé & d'autre de la coline, depuis le village de Fontaines iusques au bois dudit saint Seyne, logeant sa ca-

uallerie legere audict Fontaines, & luy à Lux, qui est à vne lieüe & demye de là. Les ennemys deslogerēt des le lendemain dudict S. Seine, pour aller repasser l'eau sur les ponts qu'ils auoyent dressez, avec vn grand effroy : & si les cheuaux de ceux de la Majesté eussent esté frais, & qu'elle eust eu quelque infanterie, sans doute l'on pouuoit faire vn bon effect sur leur retraicte. Sa Maiesté les suiuit avec cent cheuaux iusques à deux lieües dudict Grey. La perte de son costé n ha esté que de quatre & vn prins : & celle des ennemis de six vingts morts sur la place, soixâte de prins, & deux cens de blesez : il y est mort cent cheuaux d'une part & d'autre. Entre les ennemys se trouuerent morts le capitaine Sanson, le lieutenant de Dom Rodericq de Binelle, lieutenant de la cauallerie legere du Roy d'Espagne, & le lieutenant & la cornette de Mongane, duquel le drapeau fut prins à la derniere charge que feit ladicte Majesté, qui feit tous ces combats, sans autres armes que sa simple cuirasse, au grand regret de ses seruiteurs, desquels elle se louë d'auoir esté si bien assistée. Entre iceux estoient Messieurs d'Elbeuf, de la Trimouille, de Pizauy d'Inteuille, Roquelaure, Cha-

steau-vieux, Liencourt, Montigny, Myre-
poix, le Marquis de Treynel & autres, &
quelque chose que peurent faire les Li-
guez, peu de temps apres le chasteau de
Dijon & presque toute la Bourgongne
fut reduite en l'obeissance du Roy: car l'on
sçait bien comme auparauant, & des le
mois de Feurier, de ladicte année, la ville
& chasteau de Beaune, furent remis en l'o-
beyssance du Roy, par la fidelité des habi-
rans, qui y firent entrer le sieur Marechal
de Biron, & se deliurerent du ioug insup-
portable de la Ligue. Aussi tost que cette
place fut reduite, ledit sieur Marechal de-
pescha vers le Roy vn courrier, pour l'ad-
uertir de ce bon succès, qui arriua vers sa
Majesté à Vincennes, la veille de Pasques,
dont sa Majesté receut vne telle ioye, que
tout aussi tost, elle fit sçauoir cette prise
par tout dedans la ville de Paris. Et le len-
demain en l'Eglise & chapelle de Vincen-
nes, fit chanter le *Te Deum*, comme il fut
aussi chanté solennellement à Paris, à no-
stre Dame, le Mardy ensuiuant, où tous
Messieurs de la Cour de Parlement de Pa-
ris se trouuerent en corps. Est à noter en
cest endroiect vne vieille prophetie de S.
Brigide, maintenant accomplie, portant

Que les guerres de France pour la rebellion des faux François, finiront par vn choc ou bataille, qui se donnera à la Fontaine Charles, à l'issue de laquelle le victorieux entrera dedans Dijon. Cette fontaine retenant ce nom est vne lieuë de Dijon sur le chemin de Beaune. Cependant de ces grands & heureux succez, il faut estre aveugle pour ne voir que Dieu conduict la main du Roy, est avec luy, & soustient sa cause: qui doit faire pēser à ceux, qui luy voudroyent encores dresser des parties à leur conscience. Le liure de la Toison d'or raporte que le Roy S. Loys eut de mesmes attaintes & entorces à son aduenement à cette couronne, à sçauoir que les descendus de Robert Cōte de Dreux, s'esleuerent à l'encontre de luy: entre autres Pierre Mauclerc Comte de Bretagne, le Comte de la Marche; & les Seigneurs de Coussi, de ce Robert, appelez Robertois qui esleuerēt & attirerēt à eux Philippe Cōte de Bolongne oncle du Roy, luy promettant le faire Roy: à quoy dit l'histoire, il se laissa imprudēment & legeremēt aller: mais que cognoissās la magnanimité du courage de S. Loys, iugeans par ses heureux succès que Dieu luy aidoit & estoit avec luy, ils se deporterent tous

de leur entreprinse, & se vindrēt rendre à sa mercy. En ce sacre surgeon de ce sacré tige, telles entreprinſes renouvellees ſont repouſſees & confondues par vne meſme aſſiſtance de Dieu, euidente & aparente, par tant de dangers qu'il ha euité, quelque mal que l'on machine contre luy. Il eſt remarqué en Cyrus, Romulus, David & au Roy Charles 7. que les Roys qui reçoynent des trauerſes & empeschemens en leurs Royaumes, & cōtre ieuxels la puissance humaine ſe bande pour les garder d'y paruenir, ſont ordinairement les plus grands Monarques & reſtaurateurs des Eſtats, preſque perdus: Comme il ſe voit en noſtre Roy, qui eſt ja tellement aduancé, qu'il ha conqueſté preſque tout ſon Royaume, & en eſt venu là que les rebelles ſont combatus & deſfaits aux lieux meſmes de leur retraite, c'eſt à dire aux liſieres, & extremitez, qui eſt la fin de la guerre ciuile, comme elle fut ſouz l'Empire d'Auguſte, quand les fils de Pompée & Marc Antoine furent deſfaits en Eſpagne & en Egypte. Et ce que l'on a dict du réps de Charles 7. d'un Poton de Saintrailles, d'un Comte de Dunois d'un la Hire, ſe dira des valeureux Seigneurs & capitaines,

qui ont assisté le Roy en cette guerre : & parmi ces loüanges , particulièrement de feu Monsieur le Marechal de Biron, qu'il ha reconquesté au Roy la Bourgongne : honneur qui sembloit luy estre deu & le regarder, d'autant que du costé maternel, il estoit Bourguignon, à sçauoir de la maison d'Authun tres-noble & tres-ancienne. Monsieur le Marechal de Biron son fils ha bonne part en ces loüanges , pour auoir en tant d'endroits si valeureusement exploité , à l'aduancement des affaires de sa Majesté , si ie voulois nommer tous les autres, la liste en seroit infinie.

En cette mesme année, au moys de Iuin, fut prinse la ville de Han en Picardie, les Espagnols desfaicts, & fut le chasteau reduict en l'obeissance du Roy. Au combat qui fut donné , à cette prinse & reduction ne se sauuerent pas vingt hommes des ennemys qui n'ayent esté tuez ou prins : & se trouuerent entre les morts six vingts Espagnols & plusieurs capitaines & soldats, iusques au nombre de six à sept cens : de prisonniers, le sieur Chicque Napolitain, qui commandoit à toutes les troupes , fut blessé de deux coups de picques : les sieurs Marcel Carraccio, le sieur Alexandre & le

*Prise de la
ville de Hã.*

Mort de
M^{rs}ieur de
Humieres.

capitaine des Lansquenets & autres capitaines en chef, qui furent baillez au sieur d'Oruillier pour retirer le sieur de Gomeron son frere qui estoit detenu prisonnier à Bruxelles. Il y eut trois ou quatre cens prisonniers, tant officiers des compagnies que soldats. Du costé Royal, Monsieur de Humieres y fut tué, qui laissa vn extreme regret & desplaisir à toute l'armée: aussi regretable à toute la France, apres sa mort, que ses vertus & merites l'auoyent rendu recommandable & necessaire au seruice du Roy durant sa vie. Le sieur de la Croix maistre de camp, Desmaziere Lieutenant du sieur de Suruille le Bayencourt, Capitaine des gardes dudit feu sieur de Humieres y moururent, apres auoir rendu tel tesmoignage de leur valeur, qu'ils en serōt à iamais reputez, y ont pareillement esté tuez, iusques au nombre de quinze ou vingt, tant Gentilshommes que Capitaines & enuiron cent soldats, avec quelque nombre des blesez, entre lesquels furent les sieurs d'Ampierre Capitaine des gardes de Monseigneur le Cōte de S. Pol, qui estoit à cette entreprinse & combat, Lieruille maistre de camp, d'Apagcon, & Chaumont Chalandre. La

huiſt enſuiuāt cette execution, en laquelle eſtoit auſſi Monſeigneur le Duc de Bouillon, le ſecours que les eſtrangers auoyent enuoyé demander à leur armée qu'on auoit ledict iour eu aduis certain, auoir aſſié le Caſtellet, arriua à deux lieües dudict Han, compoſé de quatre mille hommes de pied, & huiſt cens cheuaux avec quatre pieces de canon: mais auſſi toſt qu'ils eurent nouuelles de ce qui eſtoit aduenü à Han, ils ſ'en retournerent en leurdict armée. L'entreprinſe fut hazardeuſe, & heureuſement executée, comme ſe peut voir par le particulier & veritable diſcours qui fut imprimé à Paris incontinent apres. Les ennemys incontinent apres prirent le Caſtellet, la Capelle, & la ville de Dourlans par aſſaut, non par faute d'hommes ny munitions, mais par le peu d'ordre, & par l'intelligence qu'auoyent parmy eux les chefs qui eſtoient dedans la dictée ville, laquelle on croit ne fuſt perdue ſi la propoſition de Monſeigneur de Neuers euſt eſté approuuée, de mettre dedans toute l'infanterie & cauallerie, comme il ſe pouuoit ſans difficulté au hazard de quelque coup de canon. Ayant eſté prins reſolution au Conſeil tenu

le premier iour d'Aoust de ladicte année, à Pequigny que Messieurs les Comte de S. Paul & Duc de Bouillon iroyent donner ordre aux places du costé du Boullonois, & que Monsieur de Neuers viendroit du costé de decà, contremont la riuere de Somme, pour en faire de mesme. Il partit le lendemain & alla coucher à Amiens où il trouua vn esfroy & estonnemēt si grād, non seulement au peuple, mais aux plus grands, à cause de ce qui s'estoit passé à Dourlans, par la cruauté des Espagnols, qu'il fut cōtraint pour les assseurer de mettre à part la qualité de sa personne, & de leur promettre d'aller le lendemain cōme il fit, à Corbie, distāt de quatre lieues d'Amiens, pour s'y enfermer & la garder contre l'armée Espagnole. Ils furent fort reſiouys & esmerueillez de cette offre, & l'en remercierent infinimēt avec grāde loūange. Ainsi pour effectuer la promesse de laquelle il estoit engagé, mondict sieur de Neuers partit d'Amiens le leudy troisieme dudit mois, & alla coucher a Corbie, laquelle sans descendre de cheual, il visita par dehors, & le matin ensuiuant par dedans, & soudain se fit donner par estat les munitions de guerres & de viures qui s'y

trouuoient, pour recognoistre le default qui estoit en icelle, qu'il trouua grand à fin d'y remedier au plustost, par-ce que les ennemys qui estoient encore aux enuiron de Dourlans, pouuoient venir en deux iours l'assiéger, pour n'en estre eslongnez que de sept lieues. Ledit sieur pourueut le mieux qu'il luy fut possible, à tout ce qui estoit necessaire pour defendre & conseruer la place. Le Vendredy les ennemys partirent d'aupres de Dourlãs, & s'aduançerent d'un logis. Et le Samedy ensuiuant ayans prins le chemin tirant entre Peronne & Corbie, mondict sieur de Neuers se partit aussi tost de Corbie, puis qu'il n'y auoit plus que faire, & alla coucher à Arbœnier, & le matin ensuiuant passa à Peronne : & ayant entendu que les ennemys estoient allez loger entre saint Quentin & Cambray, il se resolut de passer outre, pour s'aprocher ce soir là le plus pres qu'il pourroit de S. Quentin, à fin de se ietter de nuict dedans la ville, mesmes que Monsieur le Vicomte d'Auchy gouuerneur d'icelle, l'auoit aduertty que les ennemys s'estoyent aprochez de luy. Estant arriué à S. Quentin, il eut aduis certain, que les ennemys estoient logez aux enuiron de

Cambray pour l'assiéger, lequel aduis fut confirmé par quatre lettres qu'il receut l'une apres l'autre du sieur de Balagny des 11. 12. 13. & 14. dudiect moys, par lesquelles il demãdoit secours prompt, pource que le peuple estoit estonné de ce qui estoit advenu à Dourlans, & que la ville estoit mal garnie d'hommes. A cette cause, le Duc de Neuers y enuoya son fils vnique le Duc de Rethellois, assisté des sieurs de Buhy & de Trumelct, avec environ trois cens cinquante cheuaux, meit à la teste le sieur de Vaubecourt, avec quatre compagnies de cheuaux legers. Pres dudiect Duc de Rethellois estoient aussi les sieurs de Sugny, de Fleury, de Chaltray, de Burosfelin, avec quelques capitaines, qui s'acheminèrent en bon ordre, armez de toutes pieces, par vn grand vent & pluye qui dura toute la nuit. La guide qui les conduisoit, les feit passer sur vn meschant petit pont de bois, proche d'un village qui s'appelle Anne, distant deux lieuës de Cambray, au lieu qu'il les deuoit faire passer hors du village, à main droicte où il n'y auoit ruisseau ny pont. Aduint qu'en passant s'osta vne planche du pont, qui fit trebuscher vn cheual, qui retarda le passage
de

de toute la troupe : & fait faire alte ledict
 fleur duc de Rethelois l'espace d'une heu-
 re & demye, pour attédre que tous fussent
 passez : Ce qui donna loisir aux ennemys
 de se mettre en bataille, sur l'alarme que
 les payfans donnerent par le son de leurs
 cloches, de village en village: estant ledict
 fleur Duc arriué à la plaine proche de Câ-
 bray, à vne heure de iour, il veit en batail-
 le la cauallerie des ennemys, presque sur
 le droict chemin qu'il deuoit prendre : ce
 qui fut cause qu'il chemina à quartier, ti-
 rant droict à vn petit corps de garde de
 25. lanciers, qui estoient au deça d'un che-
 min creux, lesquels furent taillez en pie-
 ces, à la veuë de la cauallerie, qui ne les
 pouuoit secourir à cause dudit chemin.
 Ledit fleur Duc de Rethelois, passant ou-
 tre, pour entrer dedans la ville, rencontra
 vn gros de deux cens cinquante cheuaux,
 auquel il alla droict & les escarta en vn in-
 stant, & passant outre arriua sur le fossé, &
 bien tost estant recogneu, entra dedans la
 ville, avec vn grand honneur, & ioye des
 habitans, voyās venir vn si braue secours.
 Ces choses se passerent durant le voyage
 que sa Majesté feit en sa ville de Lyon, en
 laquelle il fit son entrée le quatriesme iour

Entrée du
 Roy à Lyo.

*Absolution
du Roy.*

de Septembre, avec grande magnificence & somptueux preparatifs, cōme l'on voit par le Discours qui en ha esté faict & imprimé en ladicte ville de Lyon. Au commencement dudit mois, vindrent nouvelles de Rome, de l'absolution du Roy par le Pape Clement huictiesme : & au mesme temps fut publiée la seconde trefue generale, pour trois mois, qui ha amené la reconciliation du Duc de Mayenne, & de tous ceux qui l'ont suiuy, avec sa Majesté, au grand bien & repos de l'Estat, pour ce qu'estās tous les François réunis, il sera aisé de chasser les estrangers Espagnols qui nous veulent asservir & empieter sur cette couronne. Ils l'ont bien montré des le commencement des troubles là où ils ont peu se rēdre les plus forts cōme à Blauet en Bretagne, à la Fere en Picardie, places qu'ils ont merueilleusement fortifiées & autres qu'ils ont surprises, avec entiere resolution de mourir plustost que d'en desloger : & de n'agueres par la prinse de la ville de Dourlans, en laquelle ils ont commis les plus grandes cruautez du monde, celle de la Capelle & du Catellet, pratiquans tousiours comme

ils ont fait par le passé des intelligences de ceux qui sont encores secrettement en- forcez du poison de la Ligue, pour surprendre les meilleures places qu'ils pour- ront, comme freschement ils ont fait de la ville de Cambray, place des plus fortes & de tres-grande importance, lors desgar- nie d'hommes & de munitions, qui ha esté par eux aisément emportée par la perfidie de quelques habitans, nonobstant la dili- gence que le sieur de Ballagny fit, d'auoir le secours susdict de Monseigneur le Duc de Rethellois, qui eust sauué la ville indu- bitablement, si bien tost il eust esté secon- dé de plus grandes forces. Peu de temps apres mourut Monseigneur le Duc de Ne- uers, qui ha fait de grands seruices à cette courōne, fasché d'un costé, de la perte d'une place de si grande importance, de l'autre, content de ce que Monseigneur le Duc son fils se monstra si vaillant, en la conduite du secours qu'il ietta avec sa per- sonne mesme dedans ladicte ville. Enui- ron ce mesme temps mourut un grād chef de la ligue, le sieur Duc de Nemours. Sa Majesté ha donné à Monsieur de Guyse le gouuernement de Prouence, & tient-on que le sieur Duc d'Espernon, qui en estoit

Mort de
Monsieur
de Nevers.

pourueu, le debat fort & ferme contre le-
dict fleur de Guyse. Est venue nouvelle ces
iours passez que ledict fleur d'Espernon
estoit fort blessé, par vne trainée de pou-
dre à canon que l'on auoit faicte en son
logis, on ne sçait par qui. Le Roy, à son re-
tour de sa bonne ville de Lyon, alla met-
tre le siege deuant la Fere, où il est encores
à present, ayant faict faire des blocuz tout
à l'entour, pour empescher les forties des
assiegez, & les secours qui leur pourroyēt
venir, ladicte Majesté est resolue ne partir
de là, & ne leuer le siege qu'il ne l'ait prinse,
encores qu'il coure vn bruit sourd, que les
Espagnols assiegez là dedans ne sont prêts
de se rendre, qu'ils ont encore vne liure
de pain à manger tous les iours, & qu'ils
attendent sur le renouueau vne forte &
puissante armée, pour les venir desgager
& deliurer du siege. Le dixiesme de No-
uembre de cette mesme année, Monsei-
gneur le Duc de Montmorency, Pair de
France arriua à Paris : Monseigneur le
Prince de Conty assisté de toute la No-
blesse estant lors pres de luy, alla au deuāt
hors les portes, avec les archers de la ville
& autres des plus apparens bourgeois, &
luy fut faict fort grand honneur & recep-

*Arrivée de
Monsieur le
Conestable
à Paris.*

tion, comme il meritoit, eſtât aujourdhuy l'un des plus ſages & experimenté chefs qui ſoyent en France: & pour eſtre le premier, à iuſte cauſe le Roy luy a octroyé lettres de l'office de Conneſtable de France, qui eſtoit auparauant en ſa maiſon: & eſpere-on de luy, qu'eſtant arriué à la catastrophe de cette tragedie François, il donnera ſi bon ordre aux affaires de la guerre & de la republique, que ce pauvre Royaume reflorira, guaranty de la tyrannie Eſpagnolle, trouuera moyen que la gendarmerie ſera bien payée, & que les pauvres officiers de ſa Maieſté, & bons ſeruiteurs d'icelle, apres tant de pertes par eux ſouffertes, pour auoir, comme ils deuoyent, ſuiuy leur maistre & Prince legitime, feront aucunement releuez de l'extremité en laquelle ils ſe voyent tous les iours, pour neſtre ie ne diray, recompenſez des pertes qu'ils ont faiçtes en ſeruât, mais ſeulement payez de leurs gages. Ledit ſieur de Montmorency preſenta ſes lettres dudit office de Conneſtable, en Parlement le 21. iour de Nouembre audit an: apres la lecture deſquelles, M. Ant. Arnauld tres-fameux Aduocat en la Cour, commença à parler & diſcourir ſur les loüanges, hōneurs & me-

rites de ce grand Capitaine, & de ses predecesseurs. La harangue se void imprimée a Paris, par Mamert Patisson, chez Robert Estienne. A la fin de laquelle, il conclud que mondict sieur le Connestable voulant participer à l'esperance de son bon maistre, remettoit de cette heure là tous ses triomphes & tous ses lauriers, entre les mains de la bonne fortune de la France, promettant au lieu le plus celebre, & en la lumiere la plus esclatante de l'Europe, d'employer toute l'autorité & toute la puissance de ce premier office de la couronne, pour faire, que la iustice soit obeye en tous les endroits du Royaume, comme elle est audict lieu du Parlement, que les armes soyent effroyables aux ennemys, douces & gracieuses aux subiects, & que les deniers publics soyent bien & sainctement maniez: à fin que (si c'est chose qui se puisse) il se rende digne Connestable d'un si grand Roy, que Dieu, sans doute, a reserué à ces derniers temps, pour reestabliir l'ancienne gloire de cette courone, voire l'accroistre & rehausser par dessus le comble, auquel elle ha esté autresfois esleuée. Autant que cette charge est grãde (pour vser des mesmes termes de monsieur Arnaud) autant

se trouue elle tousiours à la fin necessaire: car la personne des Roys estant saincte & sacrée, & la moindre goutte de leur sang si chere à tout leur Estat, qui ne respire que de leurs poulmōs, ne bat que de leur cœur & ne vit que de leur estre, & d'ailleurs estās souuent appelez en diuers endroits fort eslongnez, il est du tout necessaire qu'ils soyent soulagez par ce grand officier, tout reluisant de la gloire de son maistre, portant en sa main l'espée de la France, deuāt laquelle marche la terreur & l'effroy accompagnée d'honneur & reuerence. Ce qui ha esté pratiqué en tous les grands Estats souz diuers noms, & quelquesfois puissances dissemblables, mais en fin l'experience ha tousiours faict cognoistre, que pourueu qu'enuers le Maistre & le Souuerain, il soit humilié comme le moindre vassal, que pour le regard des subiects il ne peut estre trop esleué, pour le bien des affaires publics, qui ne sont aduancez que par vne grāde puissance & autorité, mettant promptement à fin, les belles & hautes entreprinſes de la guerre, que la longueur ruine ordinairement. Le Connestable de France ne faict pas seulement le serment, mais aussi l'hommage lige de son

office: il est par dessus tous autres qui sont dedans l'ost, exceptée la personne du Roy: il ordonne toutes les batailles, & toutes les fois que l'ost se remue, il liure les places & logis au Roy & à tous autres, il a le soin de toutes les espies, de toutes les sentinelles, de camper & generalement de tout ce qui est necessaire en l'armée. Il est chef de tous les Conseils du Royaume en l'absence du Roy, & a ce priuilege qu'encor qu'il ne fust Pair, neantmoins il assiste au iugement des Pairs. Les François ont estably vn Empire qui ne respire que la guerre, tout bouillant & tout fremissant d'armes & de cheuaux, ayans affecté tous les grāds fiefs & arrierefiefs aux Gentils-hommes François, naturels enfans & nourriçons de Mars, & la plus guerriere race qui soit sur la terre: qui est aussi la colonne de la Monarchie, l'appuy du sceptre, la force & l'honneur du Royaume, qui ne sçauroit estre assubiectie par les estrangers. Les villes peuuent estre domptées par garnisons & citadelles: mais ce grand corps de noblesse respandu par tous les champs diffus & epars en tous lieux, ne peut estre reduit souz autre domination que celle de son Roy legitime, qu'elle recognoist des sa

naissance, selon l'ordre de la successiõ certain, estably de Dieu, & qui ne peut estre esbranlé qu'en coupant la gorge à tout ce qu'il y a de vrays François. Cette noblesse assemblée en vn corps d'armée avec l'infanterie Françoisë reiglée & disciplinée, faiet le plus vif & le plus rude effort qu'autre quelconque qui se puisse presenter, pourueu qu'elle soit conduite par vn chef digne de sa valeur, & qui ait autant d'experience & de generosité, que ce qu'il conduit a de force & de vigueur. On sçait assés en quel hault degré de gloire & de splendeur, doit estre tenue la Majesté des Roys, oingts de Dieu, & qui doiuent estre reservez aux coups d'Estat, qu'eux seuls peuvēt executer: *Temetipsum ad ea serva pericula, quæ magnitudinem tuam capiant.* Du surplus ils doiuent estre soulagez par celuy duquel ils choisissēt la suffisance & la fidelité propre pour vne telle & si pesante charge. Monsieur le Connestable outre la generosité de son sang ha esté esleué dans les armées, il est creu parmy les alarmes: & son esprit n'ha eu autres obiects que ceux qui le formoyent à ce qui est de plus excellent en l'art militaire. Sa ieunesse s'est passée au milieu des batailles, des batteries

furieuses & des assaults : tout son aage s'est passé en continuelles guerres, tāt s'en fault que son esprit esleué & adonné à toutes choses grandes puisse maintenant penser au repos, qu'au contraire les prosperitez de ses proüesses passées luy engendrent vne imaginatiō de plus belles & plus hautes entreprinſes : combatant continuellement en luy l'esperance de l'aduenir avec la gloire du passé. A ceux qui sont esleuez en ces grandes & supereminentes dignitez, ou plustost en ce solstice de tous honneurs, rien de iusten'est impossible: principalement y estans aydez par la puissante main du Roy, qui veut le bien, si iamais Prince l'a desiré: mais il a receu tant & tant de traueses, & son esprit est occupé en tāt de grandes & importantes cogitations, qu'il fault necessairement qu'il soit soulagé par ce premier officier de la couronne. Iceluy apres auoir protesté à la Cour par ledict sieur Arnauld qu'entre tous les subiects du Roy il ne s'en trouueroit iamais vn plus humble, & plus obeissant que luy, qui plus volōtiers s'employast de tout son pouuoir à restablir l'ancienne gloire de cette courōne, voire mesmes l'accroistre, supplia humblement la Cour d'ordonner

que sur le reply des lettres de prouision de l'office de Connestable de France, & Lieutenant general du Roy par tout son Royaume, duquel il ha pleu au Roy de l'honnorer, & d'en receuoir le serment & l'hōmage, fust mis, Qu'elles ont esté leües, publiées & enregistrées. Ce que la Cour accorda & fait sur le champ tresvolōtiers. Dieu luy fasse la grace de venir à bout de ses beaux & glorieux desseins, souz le plus grand & le plus heureux Monarque de la Chrestienté, qui ha souz la main de Dieu aduancé ses affaires iusques où elles se voyent miraculeusemēt contre toutes les plus grandes forces humaines, tant de ses subiects rebelles, que des estrangers, qui conspiroyent sa ruine. Dieu le nous vueille bien preseruer, à fin de deraciner prōprement, avec l'aide d'un si grand Connestable, & d'une si braue Noblesse Françoisse, cette nation d'Afrique, ces Espagnols de la Picardie & de la Bretaigne, où ils ont pris pied y a six ans, rompans ouuertemēt la paix, iusques là, que d'auoir planté leurs garnisons dans la capitale de l'Estat, dans cette grāde ville de Paris, qu'ils mettoient entre leurs villes de conqueste, & benir son entreprinse tres-iuste sur la ville de la

Entrevue
du Roy &
Monsieur le
Duc de
Mayenne.

Fere en Picardie, occupée par ces Barbares, qu'il tient encores à present bloquée & assiegée: sur la fin du moys de Ianuier 1596. le Roy s'estant venu esbatre a Monceaux, Monsieur le Duc de Mayenne luy est venu trouuer, auquel lieu il a faict la reuerence a sa Majesté, & apres auoir seiourné quelques iours audict lieu, est allé conduire sadiete Majesté audict siege de la Fere: à ce qu'ayant par force reconquis le sien en France, & la France mesme, il employe dehors ses armes tant glorieuses & triomphantes à la reconqueste & recouurement de son Royaume de Nauarre, vsurpé par les Roys d'Espagne, qui de droict luy appartient, & duquel est icy representée sommairement la vraye & notable histoire.

F I N.

